

राजस्थाली

लोक चेतना री राजस्थानी तिमाही अंक : जुलाई-सितम्बर, 2021



राजस्थली रै 45 बरस री अणथक यात्रा रै मंगळ टांगै तेवडीज्यै
महिला लेखन अंक सारु मोकळी बधाई



शोभाचण्ड आसोपा

एडवोकेट

श्रीडुंगरगढ (बीकानेर)

मो. : 94130 74385



हरीश कुमार कुलदीप आसोपा

आसोपा डेकोर प्रा. लि.

कोलकाता

मो. : 9831097616, 9836616666



कमल कुमार मोहित आसोपा

जगन्नाथ लेभिनेट्स

भुवनेश्वर (उडीसा)

मो. : 9937034969, 9861134969

लोकचेतना री राजस्थानी तिमाही
राजस्थली


जुलाई-सितंबर, 2021

बरस : 44

अंक : 4

पूर्णांक : 152

संपादक
श्याम महर्षि



अतिथि संपादक
किरण राजपुरोहित
'नितिला'

प्रबंध संपादक
रवि पुरोहित

प्रकाशक

मरुभूमि शोध संस्थान

(राष्ट्रभाषा हिन्दी प्रचार समिति, श्रीडूंगरगढ़ 331803)

www.rbhpsdungargarh.com

e-mail : rajasthalee@gmail.com

आवरण
राजोल राजपुरोहित 'मुक्ता'

रेखाचित्राम
धनलक्ष्मी भट्ट, 'मुक्ता'

ग्राहक शुल्क

पांच साल : 500 रिपिया, आजीवन : 1500 रिपिया, संरक्षक सदस्य : 5100 रिपिया

Google Pay / Paytm : 9414416252

इण अंक में

संपादकीय

महिला लेखन रो विड़दजोग विशेषांक

किरण राजपुरोहित 'नितिला' 7

कहाणी

बेनाम रिस्तो

डॉ. अनुश्री राठौड़ 13

सलाम, भोळा सैयद !

तसनीम खान 20

डकार

प्रेम शर्मा 24

साच होवतो सुपनो

मंजू सारस्वत 27

अंतस रा आखर मोती

मनीषा आर्य सोनी 31

मोतिया आब

संतोष चौधरी 38

सुगनां

हेमलता दाधीच 50

लघुकथा

गरम कचोर्यां / म्हूं काई करूं

डॉ. अनिता वर्मा 53

इमरत धारा

अनुपमा पाण्डे 55

गणित / सवासेर

इंजी. आशा शर्मा 57

साच रो बोध / मौकै री तलास / दिल रो दौरो

उर्मिला माणक गौड़ 58

दाय मां

डॉ. कृष्णा आचार्य 60

चिड़ी उड़

डॉ. नीना छिब्बर 62

निहिरा

पुष्पा पालीवाल 63

तिस्स

मंजू शर्मा जांगिड़ 'मनी' 64

बायरो / डोकरी / पेट री आग

शकुंतला अग्रवाल 'शकुन' 65

प्रीत री भासा

डॉ. संतोष बिश्नोई 67

आजकाल / मिनकी

सावित्री चौधरी 68

किन्नी

सुषमा राजपुरोहित 69

बालकथा

अणव्हैती

करुणा दशोरा 71

वीजा

दमयंती जाडावत 73

पान सडै घोड़ो अडै, विद्या बिसर जाय

डॉ. मीनाक्षी लक्ष्मीकांत व्यास 75

लोककथा

ठणठण पाल ई ठीक

शकुंतला सोनी

76

संस्मरण

अपणायत रो गैरो मीठो रंग

डॉ. अंजु

77

आखातीज

कंचन आशिया

81

जात-पांत

किरण बादल

84

भूआ कैवती

सुनीता बिश्नोलिया 'सुनीति'

85

सबदचित्राम

चांद

डॉ. रेणुका व्यास 'नीलम'

87

रेखाचित्राम

मज्जन

शकुंतला पालीवाल

90

पन्नो बाबो

सिया चौधरी

94

जात्रा-वृत्तांत

किस्सो बडी बहू रो

विमला भंडारी

96

जगन्नाथपुरी री जात्रा

सुशीला शर्मा 'कंचन'

99

व्यंग्य

दंतकथा

बसंती पंवार

102

कागद

मां रो कागद बेटी रै नांव

विमला नागला

105

अेकांकी

टेम चोखो कोनी

अरुणा अभय शर्मा

109

लूठो जलमदिन

पूर्णिमा मित्रा

112

आलेख

मध्यकालीन नारी रै अंतस री पीड़ रो गान

डॉ. गीता सामौर

116

संत नागरीदास अर विष्णुप्रिया (बणीठणी)

दमयंती कछवाहा

120

राजस्थानी कहाणी अर महिला रचनाकार

डॉ. प्रकाश अमरावत

126

राजस्थानी उपन्यासां मांय नारी-विमर्श	मोनिका गौड़	135
परंपरा अर संस्कृति रै विकास में महिला लेखन री भूमिका	रेखा लोढ़ा 'स्मित'	141
आधुनिक राजस्थानी महिला काव्य में प्रगतिवादी सुर	डॉ. शारदा कृष्ण	146

कविता

रूख भायलो / वीर दुर्गादास	अर्चना राठौड़	153
थारी कविता	अनिला राखेचा	154
पांखडल्यां / मिजमानी	अभिलाषा पारीक 'अभि'	155
मन रै आंगणै / आंधल घोटो	अरुणा जी. मेहरू	156
म्हारी प्रीत	इन्द्रासिंह	157
जठै हर नारी दुर्गा / जद तूं खुद है ज्वाला	इन्दु तोदी	158
के लिखूं म्हैं... ?	इला पारीक	159
जगतो सवाल	डॉ. उषा श्रीवास्तव	160
आयो आसाढ / प्रकृति में रमणी चावूं	ऐश्वर्या राजपुरोहित	161
घर / साच / दुनिया	ऋतु प्रिया	162
पणिहारी / आंधी	कविता शर्मा	163
थे ई जाणो	डॉ. कृष्णा कुमारी	164
कियां लिखूं कविता / थे अरथा दीजो	कृष्णा सिन्हा	165
मजलां चालणियो ई पासि	कमला मारवाड़ी (जैन)	166
हथाई आळी चूंथरी	कामना राजावत	167
अंगरख्यो	डॉ. चेतना उपाध्याय	168
बा बतळासी बगत अर आभै नैं	ज्योत्स्ना राजपुरोहित	169
मन / देवो थे किणनैं दोस	ज्योति राजपुरोहित	170
महेन्द्र-मूमल / जीवण री बातां	जयश्री कंवर	171
गैली राधा	तरनिजा मोहन राठौड़ 'तंवरणी'	172
सोना नो सूरज क्यारे उगेगा ?	दीपिका दीक्षित	173
म्हारो बेरो	डॉ. धनञ्जया अमरावत	174
माधवी	नलिनी पुरोहित	175
मायडु कैवै बेटी नैं	निर्मला राठौड़	176
कोविड पर आपबीती	नीलिमा राठौड़	177
कुबदी कोरोना / अबखाई अर औसर	पवन राजपुरोहित	178
आंगण अब जोवैला बाट	प्रमिला चारण	179
अनुभवां री लाठी / उठायो दोनूं हाथ	डॉ. प्रियंका भट्ट	180
मुळक / मजूर / सरणार्थी कैप / किसान अर मजूर	प्रियंका भारद्वाज	181
प्रीत रै आंगणै / दोजक	बंशी यथार्थ	182

पूत भलाई लख कमाया होसी	भावना शर्मा	183
छाला / हरियल पान	मधु वैष्णव 'मान्या'	184
आंगणियै री चिड़कलियां	मधुर परिहार	185
वीरां रो वीर	मयूरा मेहता	186
सोच	मानसी शर्मा	187
महामारी रै दौर मांय / अब थे ईज	मीनाक्षी आहुजा	188
बस! इत्तो ईज चावै नारी	मीनाक्षी पारीक	189
आथण / बंधण / मानवी	डॉ. मीनाक्षी बोराणा	190
मरुनार	मोनिका राज 'गोपा'	191
लापसी / भतूळियो अर मिनख	राजोल राजपुरोहित 'मुक्ता'	192
म्हें पाणी में ऊभी	डॉ. लीला दीवान	193
ठाडी चिंत्या / नैणां	विमला महरिया 'मौज'	194
हर आवै छै / भरम / जिंदगाणी	श्यामा शर्मा	195
पिछाण / करतूत	डॉ. संजू श्रीमाली	196
खसेरणी / त्यौंहारी अर भीख	सपना वर्मा	197
मां / कथावां	सरोज देवल बीटू	198
पीड़ / सूखती जड़ां / राजस्थान रो धीणो	सुंदर पारख	199
रिवाज री बुगची	सुमन पड़िहार	200
सवां बीच राजी हूं म्हें	डॉ. सुषमा सिंघवी	201

गीत		
औ जीवन जीणो पड़सी	अवन्तिका तूनवाल	202
सीख रो गीत	आशा रानी जैन 'आशु'	203
क्यूं गुणगुणायो रे भंवर / पाणी में चांद दिखावै	चंदा पाराशर	204
मन में ले लूं सार / बिरछां रो प्रेम	नगेंद्र बाला बारेठ	205
ओळ्यूं	प्रमिला शर्मा सनाढ्य	206
अखबारां में	प्रीतिमा 'पुलक'	207
भ्रूणहत्या	पुष्पा शर्मा	208
घणो निराळो राजस्थान	मंजु महिमा	209
चिड़कली उडबो चावै	डॉ. रानी तंवर	210
मारवाड़ी ओळमो	रानी सोनी 'परी'	211
आयो बुढापो	डॉ. रेनु सिरियोया 'कुमुदिनी'	212
परिवार नियोजन / बचपन री यादां	लता पुरोहित	213
गीत कस्यां गाऊंला	विजयलक्ष्मी देथा	214
तूं क्यांनै तरसावै रे!	डॉ. विजयलक्ष्मी शर्मा	215

मायङ्गरी पाती	डॉ. विद्या रजनीकांत पालीवाल	216
पीङ्ग अेक विरहण री	शकुंतला शर्मा	217
क्यूं भेजी परदेस / सुणल्यो म्हारी बात	शोभा चंदर	218
अलबेलो मेवाङ्ग	स्नेहलता कचोरिया	219
म्हारो जैसाणो	सपना यशोवर्धन व्यास	220
मारवाङ्ग री मीठी बोली	सरोज कंवर	221
राग बसंती	डॉ. सुमन बिस्सा	222
रंगीलो राजस्थान	सुमन राठौङ्ग झाङ्गङ्ग	223
गजल		
दो गजलां	आशा पांडेय ओझा	224
हर घड़ी हतास क्यूं	उर्मिला देवी 'उर्मि'	225
व्है मन घणो उचाट	डॉ. तारा दीक्षित	226
दो गजलां	दीपा परिहार 'दीप्ति'	227
दूहा		
निज रा करम सुधार	डॉ. उषाकिरण सोनी	228
कळप	छैल कंवर चारण 'हरिप्रिया'	229
करलां मन री बात	तारा प्रजापत 'प्रीत'	230
शृंगार रस रा दूहा	मान कंवर 'मैना'	231
शृंगार रा दूहा / कहावतां रा दूहा	डॉ. सुशीला शील	232
कुंडळिया		
चरुंठिया	डॉ. साधना जोशी 'प्रधान'	233
हाङ्गकु		
चवदा हाङ्गकु	डॉ. अनिता जैन 'विपुला'	234
दस हाङ्गकु	चित्रा शर्मा 'काप्रेनी'	235
बंतळ		
राजस्थानी री सांवठी छियां में पढूं जीवन-पोथी रा पाना	आनंद कौर व्यास—जेबा रशीद	236



महिला लेखन रो विड़दजोग विशेषांक

सौ सालां रै राजस्थानी महिला लेखन पर निजर न्हाखां तो मायूसी तो नीं होवै क्यूं कै जकी हालत राजस्थान राज्य अर भासा री रैयी उणसूं धुंआधार लेखन री आस दोरी ही। रियासत काल में ई मायड़ भासा री पोसाळां या गुरांसा नीं हा जका शिक्षित करनै लेखन री दिसा दिखावता। जको कीं हो केवल परंपरा में अर मौखिक ईज हो। फगत औ ईज आमजन री पूग में हो। राजस्थानी री दरजेवार शिक्षा बिना आम संवेदनसील मिनख साव गूंगो हो। आजादी सूं पैला ई हीणता रो जाडो परदो न्हाख दियो गयो हो। पोसाळां में शिक्षा जद सरू व्ही तो हिंदी सूं सरू व्ही तो लेखन हिंदी में ईज हो सकतो हो अर हुयो भी हिंदी में ईज। स्वचेतना परवाणै ईज कीं राजस्थानी वापरी अर पछै मायड़ भासा रो मान भी चेतै आवण लागो। इणी कारण राजस्थानी में लेखन मोड़ो सरू हो सक्यो।

आजादी सूं पैला राजस्थानी लेखिकावां रो साम्हीं नीं आवण मांय अशिक्षा खास कारण हो। उणरै मूळ में आ बात है कै जद आठवीं अनुसूची रो झुणझुणो नीं हो तद भी राजस्थान रै रियासती काल री स्कूल-कॉलेज में राजस्थानी विसय अर आखर ग्यान री भणार्ई नीं ही।

सागळो ठीकरो भासा मान्यता पर ढोळणो तो ठीक नीं। आजादी पैलां रा आपणा आगीवाण इण पेटै ठाह नीं क्यूं ध्यान नीं दियो। दिनाजपुर सम्मेलन रै समै सूं केवल भासा मानता री मांग ईज पकड़नै राखीजी। 20 वीं सदी रै पैला सूं स्कूली शिक्षा री जरूरत मैसूस होवण लागगी ही अर राजा-दरबार हिंदी-अंग्रेजी स्कूलां री जरूरत समझ थापित भी करली ही। उणी सागै मायड़ भासा राजस्थानी विसय या उप भासावां री पोसाळ क्यूं अनिवार्य नीं करी जदकै वै इण सारू आज रै उलट उण समै खुद सरवेसरवा हा। रेल-हवाई जहाज रै पेटै तो विकास कर्यो पण वारै मायड़ भासा नै दरकिनार करणै रो अजै खामियाजो भुगतां हां। रियासत काल में राजस्थानी नै तवज्जो नीं देवण रा कारण विचारणीय है।

उण समै पोसाळां मांय राजस्थानी या उपभासा रूप मांय मायड़ भासा लागू कर दी होवती तो राजस्थानीभासी में आतमगौरव होवतो अर मायड़ भासा सारू हेज रैवतो तो हिंदी नै पग पसारण री जगै नीं मिलती। पण भासा सारू चेतना ही कोनी अर खेत खाली हो तो पारकी भासा फसल नै पांगरता जेज नीं लागी। राजस्थान सूं उलट राजस्थानी री मां जायी बैन गुजराती, गुजरात राज्य री पोसाळा में लागू ही अर मायड़ भासा री चेतना रै परवाणै पारकी भासा उटै बड़ ई नीं सकी। औ ईज कारण है कै गुजराती अर दूजै राज्य आळा आज गरब सूं माथो ताण्यां घूमै अर आपां जवान होवतै 21वें सईकै में अजै ई मायड़ भासा में पैली शिक्षा रै अधिकार-हक री भीख ईज मांगां हां।

इण बीच समय री पारखी लेखिकावां आस थामी राखी अर लक्ष्मीकुमारीजी रै 'मांझळ रात' अर 'मूमल' पछै 1972 में आशा शर्मा रो कविता-संग्रै 'चंदाबरणी बातां' आयो। पण जद ताई तो सरकारां राजस्थानी भासा नै लारै करनै हिंदी पर वरदहस्त रख दियो हो तो पछै रोजगार रै लारै धावती पीढी नै राजस्थानी छोड'र हिंदी री सरण में जावणो घणो लाभकारी लागो। भूखा रै रोटी अर रोजगार जरूरी व्हे जको कै राजस्थानी रै नीं होवण सूं हिंदी रै कारण ईज मिल सकतो हो। पोसाळां बगर अेकदम सूं भासा री चेतना आवणी दोरी ही क्यूकै प्राथमिक शिक्षा मांय तो कदैई राजस्थानी रैयी नीं ही, तो मायड भासा रै पेटे प्रेम री अलख नवी पीढी में क्रियां जागती। उण समै में कोई नै राजस्थानी भासा अर नारी शिक्षा री अणूती पीड़ ही भी कोनी।

आजादी सूं पैलां ई तो आपणा नेतावां रो ध्यान फगत कुरसी खोसण पर लागग्यो हो, क्यूकै बै लोकतंत्र री आहट देखली ही अर आज ताई बा ईज बात है। लिजलिजा नेता आज भी फगत कुरसी बचावण लाग रैया है। भासा री ऊंडी पीड़ तो अजैई कोई नेता रै मन में कोनी।

इण बिचाळै स्वप्रेरणा अर विवेक सूं जको सिरजण होयो बो बिना खाद-पाणी रो हो। इणी कारण विसय अर विचार री ऊंचली उडाण नीची ई रैयी। पछै भी दूजी भासावां री लेखिकावां दांई वानै हाथोहाथ नीं लेयनै दरकिनार भी कस्यो गयो। फेर भी आपणी लेखिकावां री दीठ नै जस कै बै टुक-टुक सिरजण करती रैयी अर मायड भासा में कमती ई सही, पण पगल्या मांडती रैयी। हिंदी री फसल रै बीचै जद राजस्थानी नै खरतपवार घोसित कर दी गई तो सींच मिलणो तो अळगो रैयो बल्कि राजस्थानी री निदाण भी करीजी अर हेय दीठ सूं भी देख्यो गियो।

औ ईज कारण हो कै राजस्थानी में किणी महिला लेखिका रो पैलो आधुनिक कहाणी संग्रै डॉ. सावित्री चौधरी रो 'मनचाही आजादी' मोडो आयो। राजस्थानी में लेखिका रो पैलो आधुनिक उपन्यास 'सौगन' बसंती पंवार रो 1997 में आयो जको राजस्थानी भासा री जूनी समरिधता देखतां थकां घणो मोडो हो। राजस्थान में राजस्थानी री माड़ी हालत देखतां जियां-जियां मायड भासा रो मान हिलोळा लेवण लागो, सिरजण बधतो गियो। हवळी गति सूं ई सही पण अमुक विधावां में छुट्टो सिरजण अर पोथियां साम्हीं आवती रैयी।

आज ताई राजस्थानी पत्रिकावां में लेखिका अंक निकाळणै रो कीं काम होयो, पण बो ई आंगळी गिणाव। महिला लेखन अंक अर लेखिका सम्मेलन 2013 में 'जागती जोत' अर 'राजस्थली' ईज साम्हीं लायी अर संजोग सूं जिण रा संपादक अर संयोजक रवि पुरोहित ईज रैया।

डॉ. शारदा कृष्ण री आलोचना री 'आंगणै सूं आभो' अेकली पोथी है जिणमें राजस्थानी महिला लेखन पर लेखिका री अेक सांवठी दीठ ही।

विसयगत बात करां तो बीसवीं सदी रै अंत अर इक्कीसवीं सदी में संचार साधन अर मीडिया सूं भासा रै खातर चेत वापरी अर विसयां में नवोपण आवण लागो। पारंपरिक्ता रै सागै नवी अबखायां पर बात साम्हीं आवण लागी।

राजस्थानी साहित्य रै इतिहास में लेखिकावां पर सदा सूं कम ईज ध्यान दिरीज्यो है। आलोचनात्मक या कृत दोनू ई दीठ सूं बांरो आकलन टाळ्यो गयो। जे कोई संकलन में दिखत रूप में भेळी ली तो भी भूमिका में कोई जगै नीं दी। पछै आ बात भी साच है कै घर रा सरावै जद ई दूजा कीं गिनार करै। जद घर रा ई कदर नीं करी तो दूजां रो ध्यान क्रियां जावतो अर कदर ई कांई करता!

समै खाताई सूं बदळ्यो अर लारला दस सालां मांय समाज में नैना-मोटा अणूता ई बदळव आया। समाज री मानसिकता पर असर पड़्यो। कीं समै पैलां जकी सामाजिक घटनावां अजोगती लागती बै ईज दुर्दांत घटनावां अब आपणै आसै-पासै आराम सूं घटित हो जावै अर आपां मुचकां ई कोनी। आपोआप में सिमटियो मिनख संवेदनहीण हो रैयो है या भय सूं संग्यासून है। आ हालत चिंत सूं भरै। समाज रो पड़बिंब अर भविस साहित्य है अर साहित्य रो सामान समाज है। दोनूं अेक-दूजै नैं प्रभावित करै अर दोनूं अेक-दूजै रा पथ-प्रदरसक रै सागै पथ-भटकाऊ भी होवै। समाज में घट्योडै नैं अर भावी नैं साहित्य देखै अर साहित्य जकी कल्पना करै उणनैं समाज पूरो कर देखावै। औ चिंतण रो विसय है कै साहित्य अजोगती बातां समाज सूं सीखै या अजोगतै साहित्य सूं समाज सीखै अर रंग बदळै।

राजस्थान ई दुनिया री आधुनिक आबहवा सूं अछूतो नीं है अर ना ई लेखिकावां, क्यूकै समाज री हर घटना अेक स्त्री नैं केई भांत सूं झकझोरै। औ असर लेखन पर आवणो लाजमी है। इणी असर नैं देखतां थकां खासै समै सूं आ दरकार ही कै बडेरी अर नवी पीढी री राजस्थानी लेखिकावां में लेखकीय दीठ सूं कांई असर आयो है? सोशल मीडिया अर अत्याधुनिक जीवन शैली जीवण आळी अर दुनिया भर रो साहित्य पढण आळी राजस्थानी लेखिकावां री कलम आजकालै कांई रच रैयी है? इण पर विचार अब होवणो जरूरी हो। अबार तांई अेक गलतफैमी आ भी ही कै राजस्थानी में लेखिकावां री संख्या सीमित है।

श्याम महर्षिजी अर रवि सर इण री जरूरत मैसूस कर रैया हा। जिक्र अर विचार चालतो रैयो अर अेक दिन कैयो कै लेखिकावां पर अेक अंक आवणो बोत जरूरी है। आप 'राजस्थली' रै इण अंक रो अतिथि संपादन कर सको।

मां वीणापाणि रै आसीस अर आपरै मारगदरसन सूं कीं कर सकूं तो आ म्हारै सारू बोत बडी बात होवैला। म्हनैं भी युवा लेखिकावां री केई विधावां पढण नै मिलसी। औ सुख कांई कम है। म्हारो जवाब इण सूं दूजो कीं हो ईज नीं सकै हो।

बेगो ई मीडिया, सोशल मीडिया रै जरियै 'राजस्थली महिला लेखन अंक' रो काम चालू होयो। मौलिक रचनावां री अरज करतां थकां औ सनेसो राजस्थान ई नीं बारै तांई पूगायो गयो। आज रै समय री रीत मुजब 'राजस्थली लेखिका अंक वॉट्सऐप ग्रुप' बणायो अर लिंक सूं लेखिकावां नै जुड़णै री अरज करीजी। हरेक लेखिका आपरी इच्छा अर हूस सूं इणसूं जुड़ी अर सूचना रो विगसाव खाताई सूं हुयो। तुरंत ई रचनावां आवण लागी। जकी धारणा ही कै युवा पीढी राजस्थानी में सिरजण कम कर रैयी है, खासकर महिला लेखन पर, आ धारणा तुरंत ई धूड़ चाटती निगै आई। रचनावां आवण लागी तो बेगो ई आंकड़ो अस्सी पार पूग्यो अर पछै सौ पार करनै अेक सौ बीस नैं पार करतो लखायो।

राजस्थानी रै इतिहास में औ रिकॉर्ड पैली बार हो कै सौ सूं बेसी लेखिकावां री सिरजण री हूस देखण नै मिली।

कविता, कहाणी, लेख, साक्षात्कार, दोहा, गजल, हाइकू, लघुकथा, संस्मरण, रेखाचित्र अर कथेतर विधा री रचनावां पूगती मिली। बडेरी अर समकालीन सिरजण रै सागै नवी लेखिकावां खाथाई सूं जुड़ी। अेकांकी, रेखाचित्र अर जात्रा-वृत्तांत ई आया। पछै अंक आपरी अैतिहासिक

जात्रा सुरू करी। रचनावां पढती वेळा केई दिन भांत-भांत री लहरां मांय उबचूब रैयी। लेखिकावां नें राजस्थली रै अंक सारू जोडण में सगळां रै सागै विजयलक्ष्मी देथाजी अर नलिनी पुरोहित जी रो जोगदान महताऊ रैयो। रचनावां री पूग जिण खाथाई सू व्ही बा देखण जोग ही।

हरख री बात आ कै वरिष्ठ लेखिकावां में समाज नें देखण री पारंपरिकता रै सागै नवी दीठ ही अर नवी लेखिकावां अळूता विसयां सागै पारंपरिकता रो भी पोखण करुयो अर साची रूप में औ संतुलन होवणो घणो जरूरी है। परंपरा अर लोक सूं उखड़यो समाज नस्ट व्ही जावै। अतिआधुनिकता रो चक्कर लगायां पछै कटु अनुभवां लियां जियां कै भूलै नै पारंपरिकता खरी लखावै बियां ई आज लेखन में आंचलिकता रैवणो सुखद संकेत है। इण समै राजस्थानी लेखन सारू हरख री बात है कै बो आपरी जर्मी नीं छोडी है। सोच आकास ताई है, पण पग जर्मी में है।

अंजस इण बात रो है कै कूपळ री कवितावां घणी ऊरमा सूं साम्हीं आयी। कूपळ बगर रूख कठै सूं आसी। इणी सोच सागै आं पैला पगल्यां री अंवेर अर दिसा-दरसन जरूरी हो।

इण अंक रै सार रूप में औ कैय सकां कै राजस्थानी रो महिला लेखन भासा, साँदर्य अर शिल्प री दीठ सूं नवो रंग धारण करतां समै रै पसवाडै रा दोनूं रुख भलीभांत जाहिर कर रैयो है। इण दीठ में समै री ऊंडी पडताल है। अत्याधुनिक जीवन सैली में ढळी रचनाकारां रो जीव मायड भासा में है, आ बात हरख री है। राजस्थानी भासा रै गुलदस्तै रो हर पुसप आपरी सौरम सागै इण अंक मांय विराज्यो है।

रचनावां आवण री तय तिथि रै पैला ताई वॉट्सऐप रै भेळप मांय अेक सौ बीस लेखिकावां में लगोलग रचनावां खातर संवाद चालतो रैयो। छेकड तिथि नैडी आई तद रवि सर रो सुझाव आयो कै इत्ती लेखिकावां अेक मंच पर भेळी करणी दोरी है। राजस्थली रै कारण औ भेळप बण्यो है तो इणरो पूरा उपयोग होवै तो कीं बात है। नींतर सगळा बिखर जासी अर अंक रै अलावा और कीं फायदो नीं होवै।

चिंतन सूं औ सार निकळ्यो कै जकी मायड भासा में पैल परथम पग मांड्या है, जकी अेक-दो विधा रै अलावा दूजी विधा में हाथ नीं राखै या जकी हाथ राखै बांनै और पारंगत करण सारू क्यूं नी वॉट्सऐप ग्रुप में वर्कशॉप चलायो जावै, जिणसूं आं री ऊरमा रो उपयोग होवै, कीं नवो सीखै अर सीखोडै मांय सुधार कर सकै। औ पांवडो राजस्थानी सारू साचो योगदान होसी अर नवी लेखिकावां ठायी रूप सूं राजस्थानी सूं जुड जासी। इणी पेटै कीं सिखावण री लैण में सगळां सूं पैला 'दूहा' रो नाम आयो। आ विधा मैनत अर गुरु री सरण बगर नीं सीखिजै, सो इणी विधा रा गुरु सूं अरज करी कै भेळप नें दिसा देवै।

तद इण कार्यशाला रो नाम 'राजस्थली गुरुकुल' राख्यो अर दूहां सारू आचार्य री पदवी पर श्री भंवरलालजी सुथार विराज्या। दूहा पर साला चालू व्ही। विधान बतायां पछै गृहकार्य दियो जातो। उणनै जांचनै सुधार अर दिसा दी जाती। हरख री बात 'क इण विधा मांय कवयित्रियां जोर-शोर सूं भाग लियो। दूहा लिखणा सीखणै री ललक बां मांय देखणजोग ही। भेळप में आचार्य अर ऊरमावान पढेसख्यां रो उल्लास दिन-दिन रंग ला रैयो हो। भंवरलालजी पूरै धीजै सूं टाबरां री कॉपी जांचता। इण तरै कीं समै मांय ई तीस नैडी लेखिकावां दूहा री पथ पर पूरै लगन सूं चाली। इण में खासी जण्यां पैली बार दूहा रचण री हीमत दिखाई। उण मांय सूं अेक म्हें ई हूं।

गुरुकुल रो उल्लास इतो हो कै औ विचार आयो कै आं री इत्ती मैणत नैं काई नांव दियो जा सकै। हर उमर री लेखिका आपरै घर-गिरस्ती में उळझी-पजी है, पण फेर भी टाबर बणनै उरमा सू गुरुकुल में सीख रैयी ही। आ नारी रै सीखणै री ललक ही। युवा रै सागै सैकिंड इनिंग्स री लेखिकावां भी बालक बणनै पढाई करती। हूस नैं नांव देवण सारू पोथी री कल्पना करीजी। जे दूहा सांवठा रचीज जावै तो 'राजस्थली वॉट्सऐप ग्रुप' सू दूहा-पोथी अेक लाभ रै रूप में साम्हीं भी आ जासी। गुरुकुल में रचीज्या दूहा संग्रै सारू सात जुलाई छेकड़ तिथि राखीजी अर विविध रंगी दूहा आया भी। पण पोथी तो आसी जद री बात है। तुरंत ई इण जोश नैं जग क्रियां सराय सकै। तद प्रमाण-पत्र री सोची। जकी सिरजणकार कीं सांतरा दूहा रच दिया बांनै औ सम्मान मिलै। औ भी हुयो अर आचार्य रै हाथां सू पंदरा सिरजणकारां नैं प्रमाण-पत्र दिरीज्या।

'दूहा कार्यशाला' पछै आशा पांडे ओझाजी रै आचार्य पद सू हाइकु री कार्यशाला चालू व्ही। इणमें भी कुण चूकतो! दूहा सू भी बतै जोश सू हाइकु में सिरजण साम्हीं आयो। कीं जकी दूहां में सक्रिय नीं ही, बै भी साम्हीं आई अर गुरुकुल चाल पड़्यो। अणूती व्यस्तता रै बावजूद आशा जी हिलमिल र सहजता सू हाइकु नैं सधायो। लेखिकावां गद्गद होयगी। कोई जकी दूहा-हाइकु रो कदैई सोच्यो ई नीं हो, बै इण पर सुथरायी सू चाल पड़ी।

हाइकु री दस दिन री कार्यशाला पछै आशाजी री आगीवाणी में चौपाई अर रेखा लोढ़ा 'स्मित' री आगीवाणी में 'सोरठा' लेखन रो गुरुकुल सरू हुयो अर इणी भांत दूजी विधावां चौपाई आद पर गुरुकुल चालतो रैयो अर सिरजण बधतो रैयो। सिखारां अर लिखारां री हूस देखतां दूजी केई विधावां रोला, कुंडळिया, घनाक्षरी, गजल अर दूजी कथेतर विधावां में भी पोसाळ राखण री मंसा पाळी।

इणी बिचाळै संस्था औ विचार कर्यो कै भगवान री मेहर होवै अर कोरोना सू मुगती मिलै तो 'राजस्थली महिला लेखन अंक' रै अेक और उपयोग रूपी लेखिका सम्मेलन भी तेवड़ियो जा सकै अर उण में ईज इण महताऊ अंक रो लोकार्पण होवै तो भलो।

इणी सोच रै सागै 29 अगस्त रो लेखिका सम्मेलन तेवड़ीज्यो है। कोरोना री अमूझ सू निकळणै रो औ चोखो मौको हो। हरख सू सहमतियां आवण लागी।

केई अबखायां सू जूझतै इण समै में लेखिकावां रौ औ खास रिकॉर्ड अंक कीं थ्यावस देवै अर थ्यावस देवै लेखिकावां रो ऊरमा भर्यो सिरजण। मोकळी नवी लेखिकावां रो राजस्थानी सू जुड़णो सुखद संकेत है। बांरी अंवेर जरूरी है। होय सकै, कीं रचनावां ई अंक में सामल नीं करी जा सकी व्हे, उणनैं पानां री सींव मानी जाय सकै।

राजस्थानी महिला लेखन नैं अजै घणा पड़व पार करणा है। मायड़ भासा री आज री हालत देखतां थकां बां पर फगत लेखन ई नीं, भासा रै प्रसार सारू भी खेचळ करणी है। आप ई नीं, नवी पीढी नैं भी राजस्थानी पढण अर लिखण सारू खाथाई सू त्यार करणा है। विसयगत विविधता पर पूरो ध्यान देवणो है, सागै ई अकादमियां ई अेक लेखिका नैं समिति में लेयनै औपचारिकता नीं करै बल्कै घणी संख्या में बांनै जोड़नै बांरी दीठ अर अनुभव रो लाभ लेवै तो हूस बधै।

कवयित्री-चित्रकार राजोल राजपुरोहित री कूची सूं निकळ्यो चित्राम नारी री अर नारी खातर अेक असींव दीठ नैं दरसावै। स्मिस्टी सिरजक अर स्मिस्टी पाळणहार री साख भरतो कवर पेज अर रेखाचित्रामकार नलिनी भट्ट री कला सूं औ अंक सज-धज लियां आपरै साम्हीं है।

राजस्थली अर श्याम महर्षिजी सागै हर लेखिका नैं घणा रंग कै सागै चालनै इण अंक नैं सरावणजोग बणायो। बाकी तो आप जकी कूंत करसो, बा सिर माथै रैसी। मोकळो आभार।

-किरण राजपुरोहित 'नितिला'

आसाढी गुरु पूनम, वि. सं. 2078

24 जुलाई, 2021



आवरण चित्रामकार

राजोल राजपुरोहित 'मुक्ता'

कविता, लघुकथा आद विधा रै सागै आप केई भांत री चित्रामकला में ई दखल राखै। तैल चित्राम ई नीं, वॉल पेंटिंग, रेखाचित्राम में ई निपुण। 'मारवाड़ री जायी थळी परणायी' राजोल आपणी संस्कृति रा गुमेजजोग निरत, कला अर कविता रै ओळ्वावै इंस्टाग्राम रै सागै यूट्यूब चैनल पर ई छायोड़ा रैवै। राजस्थली रै आवरण सारू आपरो औ पैलो पळको। आवरण रै साथै इण अंक में आपरा केई रेखाचित्राम ई है।

मो. 9414470611

ठिकाणो :

नोखा रोड

पुराणी चूंगी चौकी रै साम्हीं, भीनासर
(बीकानेर) राज.



रेखा चित्रामकार

धनलक्ष्मी भट्ट

हाल अहमदाबाद रैवण वाळा धनलक्ष्मी भट्ट नैं श्रीनाथ जी री नगरी अर उदयपुर रै सागै कला रो त्रिवेणी संगम मिल्यो। आज आप स्वतंत्र चित्रामकार है। इण लारै चावा-ठावा चित्रामकार सुसरोजी श्री योगेन्द्र भट्ट रो आसीस है। सागै ई नानी सुसरोजी पं. विश्वेश्वर शर्मा नामी गीतकार अर मंच रा कुशल हास्य कवि अर चित्रामकार श्री अनेन्द्र भट्ट आपरा सायबजी सूं कला-साहित्य रै पथ नूवी दीठ मिली।

मो. 7285006926

ठिकाणो :

एल-12, श्रीकृष्ण नगरी
वेजलपुर (अहमदाबाद)

गुजरात



डॉ. अनुश्री राठौड़

बेनाम रिस्तो

रेल टेसण छोड 'र रफतार पकड़ चुकी ही। सुरजी खिड़की सू बारणै देखण लागी। चवदस री काळी रात में घणघोप अंधारै नैं छोड काई भी निजर नीं आय रैयो हो। आभै मांय टिमटिमावता तारां नैं देखतां-देखतां उणरी आंख्यां साम्हीं डाक्टर विनोद री सूरत घूमगी अर विचारां में बीत्यां बगत री अेक धुंधळकी तस्वीर उभर आई। उण माथो झटक 'री बठीनै सू ध्यान हटावणो चायो, पण नीं चावता थकां भी अतीत चलचित्राम री भांत दिमाग रै पट माथै चालण लाग्यो अर बा आंख्यां मूंद 'र उणमें डूबगी।

टमाटर जिस्या राता गाल, हिरणी जिस्यी चंचळ चाल, गुलाब री पांखड़्यां-सा होठ, कमर ताई लैरावता केश, लांबी काठी अर कस्योडै डील री धणियाणी सुरजी नैं ठाह नीं हो कै उणरो ब्यांव कद व्हियो ? हां, जिया (मां) रै मूढै सू सुण्यो हो कै उणनैं थाळी में बैठा 'र फेरा कराया हा। जाहिर हो कै ब्यांव री टेम बा फगत बैठणो सीखी ही, पणै नीं चालती ही।

बापू री भी फोरी-फोरी-सी चितार ही कै वै गांव प्रधान रमाकांत सेठजी री गाडी चलावता हा। सुरजी पांच-छह बरस री ही जद सेठाणी कमला देवी नैं स्हैर ले जावता थकां गाडी दुरघटनाग्रस्त व्हैगी। उण दुरघटना में कमला देवी दोनूं पगां सू अपाहिज व्हैगी अर बापू हरिसरण।

बापू री मौत पछै पुश्तैनी जमीन काकै जूनी मांग-तांग पेठै हड़प ली तो आपरै अर बेटी रै पेट री लाय बुझावण खातर जिया जानकी प्रधानजी री हेली मांय अपाहिज सेठाणी री सेवा वास्तै नौकरी माथै लागगी। जानकी नैं बठै काम री अेवज में पईसा तो घणा नीं मिलता हा, पण दोनूं मां-बेटी नैं साल दो-तीन जोड़ी नूवा-जूना गाभा अर दो बगत री रोटी बठै सू मिल जावती ही, जिणसूं उणां रो गुजारो आराम सू व्है जावतो। हेली में नौकरी करता-करता कद जानकी रो गोळ-मटोळ गोरो मूंडो पिचक 'र सांवळो अर झुरीदार व्हैग्यो, कद उणरा काळ केशां में धोळी धास्यां निकळ आयी अर कद सुरजी बाळपणै री उमर पार कर किशोरवय में पूगगी, ठाह ई नींपड़ी।

बाळपणै सू ई खुदोखुद में मस्त रैवण वाळी भोळी सुरजी कदैई किणी सू घुळ-मिल नीं सकी। उणरो बिना मतलब हर किणी सू उळझ जावणो, बगीचै में फुदिया (तितलियां) रै पाळै

दौड़तो रैवणो कै पछै बकरी रा बच्चियां रै साथै मैं-मैं करतां उछळ-कूद करणो, जानकी नैं हमेस डरपावतो रैवतो ।

डाक्टर विनोद कमला देवी रो भतीजो हो अर बिशनपुर गांव रै कनै वाळा स्टैर मांयहालही में उणरी नौकरी लागी ही । बिशनपुर में बो पैली बार प्रधानजी रै बेटै रविकांत रै ब्यांव में आयो हो । विदेस सूं डाक्टर कर रै आयोडै विनोद नैं गांव री बा भोळी किशोरी घणी आछी लागती ही अरसुरजी भी घणी प्रभावित ही उण मोट्यार डाक्टर सूं । ब्यांव में रोज-रोज री मुलाकात सूं उणां दोनूं बिचाळै पक्को बेलीचारो हुयग्यो हो । सुरजी सूं बात करण रो कोई मौको नीं चूकतो विनोद । आपरी आदत सूं मजबूर सुरजी केई ताळ उणसूं भी बिना बात उळझ जावती, पण वाक्पटु विनोद सहज ही बात संभाळ लेंवतो अर दोनूं हंस पड़ता ।

ब्यांव निपट्यां पछै जद विनोद स्टैर बावड़ग्यो तो सुरजी अकलापो मैसूस करण लागी । पैली बार बा किणी सूं इत्ती घुळी-मिली ही । उणनैं लागण लाग्यो कै अबार तक बा कित्तो अकलो जीवण जीवै ही । काकै रै परिवार सूं उणनैं कदैई अपणायत नीं मिली ही अर जिया आखो दिन सेठाणी री ड्यूटी बजा रै रात रा मोड़ी थाकी-हारी फगत सूवण नैं ईज घरां आवती ही । ओ ईज कारण हो कै बा सरू सूं ई खुद में रमी मस्त री ही । पण अबै विनोद थोड़ो-सो प्रेम अर अपणायत देय रै उणरी सांत जीयाजून में उथळ-पुथळ मचायग्यो हो । अबै उणनैं विनोद जिस्यै अक साथी री जरूरत मैसूस होवण लागी, जिणसूं बा खुल रै मन री हरेक बात कर सकै ।

उणनैं चितार आयो, बींद बण्या रविकांत नैं देख रै उण विनोद नैं पूछ्यो हो, “डाक्टर साब, आपरो ब्यांव व्हैग्यो ?”

“ऊंऽऽहूं ।” विनोद ना में माथो हिलावतो बोल्यो, “कोई मिली ई कोनी ।”

“भला मिनखां ! आधो जगत घूम आया अर कोई छोरी ई नीं मिली ब्यांव जोगी ?”

सुरजी अचंभै सूं बोली तो विनोद उणनैं छेड़तां थकां बोल्यो, “मिली तो केई, पण थारै जिसी नीं मिली, ब्यांव तो थारै जिसी सूं ई करणो है अर बिसी तो थनैं ईज हेरणी पड़ैला ।”

सुरजी रै मन में आयो कै पूछै—“क्यूं, अस्यो कांई है म्हारै मांय” पण पूछती, इणसूं पैलां ई विनोद पूछ लियो, “अच्छा, आ तो बता, थारो बींद किस्योक है ?”

“टाह नीं, म्हैं देख्या ई कोनी अबार ताई उणां नैं ।”

“ओऽऽहो ।” विनोद अफसोस रै अंदाज में मूंड़ो बणावतो कैयो, फेर चिड़ावण वाळै अंदाज में बोल्यो, “जरूर, बो रविकांत जिस्यो हुवैला ।”

जबाब में बा मूंड़ो बिगाड़ती बोली, “छी: काळो पाडो ।”

विनोद नैं हंसी आयगी अर उण पूछ्यो, “अच्छा चाल, थूं बता किस्योक व्हैला ?”

“ऊंऽऽऽऽ ।” सुरजी थोड़ीक ताळ सोचण वाळै अंदाज में चुप रैयी अर पछै विनोद रै कानी देखती टिठोळी करती बोली, “कुछ-कुछ आपरै जिस्यो ।” कैवण रै साथै ई बा सरमा रै बटै सूं भाजगीअर विनोद ठठा रै हंस पड़्यो ।

इण तरै बारै बिचाळै अँड़ी केई बातां व्हैती ही जो पैलां सुरजी किणी रै भी साम्हनीं नीं करी ही । नीं चावता थकां भी उणनैं बै सगळी बातां चेतै आवै ही । विनोद नैं गयां नैं दस दिन व्हैग्या हा,

सुरजी रै मूंडे माथै हमेस टिमटिमावतो रैवण वाळो नूर अबै फीको पड़वा लाग्यो हो। बा समझ नीं सकै ही कै उणनैं डाक्टर साब री इत्ती ओळूं क्यूं आय रैयी है, जदकै उणां रै बिचाळै तो कोई रिस्तो भी नीं है।

पंदरै दिन बीतग्या। सेटाणी री तबीयत वत्ती खराब होवण सूं दो दिन व्हैग्या, जानकी बिल्कुल भी घरै नीं आयी ही। समझ आयां पछै सुरजी हेली कम ई जावती ही। वजै ही रविकांत री घूरती निजरां। पण उण परभात घर में आटो खूटग्यो, इण वास्तै उणनैं हेली जावणो पड़्यो। बटै पूगतां ई उणरी आंख्यां फाटी री फाटी रैयगी। विनोद सब रै साथै बैठो नास्तो कर रैयो हो। जद सुरजी नैं ठाह पड़ी कै बो रात रो ई आयोड़ो है तो मौको मिलतां ई बा उण माथै बरस पड़ी :

“काल रा आयोड़ो हो, अेक बार ई जीव नीं कर्यो कै जाय र सुरजी सूं मिल आवूं। लोग साची ई कैवै कै स्रैर रा मिनख निरमोहिला व्है अर म्हैं मूरख, जो पाछला पंदरा दिनां सूं आपनैं चितार-चितार र दूबळी व्है रैयी हूं।” कैवतां-कैवतां उणनैं रोवणो आयग्यो अर बां बटै सूं न्हाटगी। आ बात दूजी ही कै घड़ी भर पछै ई विनोद जाय र उणनैं पाछी राजी कर ली। उण रा लायोड़ो उपहार देख र सुरजी नैं ई औ विस्वास हुयग्यो कै बो उणनैं अजै भूल्यो तो कोनी।

स्रैर सूं विनोद रो आपरो गांव पांचसौ किलोमीटर छेटी हो, जदकै बिशनपुर पेंताळीस-पचास रै लगैटगै, इण वास्तै बो पंदरै दिन में अेक बार सप्ताहांत री छुट्टी मनावण सारू अटै ईज आय जावतो हो अर जद ई आवतो, पैलां सुरजी कनै आवतो, उणसूं मिलतो, पछै हेली जावतो। बै दोनूं केई-केई घंटा अेक-दूजै रै साथै रैवता, बातां करता, हंसी-ठिठोळी करता। कदैई सेठजी रै खेतां में जाय र लीलवा अर गंऊ री ऊंबियां सेक र खावता तो कदैई मक्किया। गांव भर में उणां रै हेज-हेत री चरचा व्हैती रैवती ही अर दबी-दबी कानाफुस्यां जानकी ताई भी पूगवा लागी ही।

हालांकै उणां दोनूं रै बिचाळै अैड़ो कीं भी नीं हो जिणनैं समाजू रूप सूं गलत कैयो जा सकै। विनोद रै मन में काई चाल रैयो हो, औ सुरजी नैं नीं ठाह, पण बा आछी तरै जाणती ही कै बां अेक परणेतार है, उणरो अेक धणी है, सासरो है अर अेक दिन उणनैं बटै ईज जावणो है। आ बात अलग ही कै बा जद भी आपरै अणदेख्यै धणी री कल्पना करती, उणरी आंख्यां साम्हिं विनोद री धुंधळी-सी छिब उभर आवती ही। बा तो कदैई नीं समझ सकी कै उणरै मन मांय विनोद नैं लेय र काई चाल रैयो है, पण जानकी री अनुभवी आंख्यां सगळो भांप लीधो हो।

आगली बार जद विनोद आयो तो सुरजी घरै नीं ही। उणरो सामेळो से सूं पैली जानकी सूं व्हियो। विनोद जाणतो हो कै जानकी नैं उणरी अर सुरजी री मेळ-मुलाकात घणी दाय नीं आवती ही, पण मालिक रो रिस्तेदार होवण रै कारण बा खुल र कदैई कीं कैय नीं सकी। उण दिन विनोद जानकी नैं नमस्ते कर र ज्यूं ई सुरजी बाबत पूछ्यो, बा हिचकिचातवी थकी बोली, “डाक्टर साब, आप बुरो नीं मानो तो अेक बात कैवणी चावूं।”

“हां-हां, कैवो नीं काकी।” विनोद कैयो।

“साब, म्हनैं नीं ठाह कै आपरै मन मांय काई है, पण मोट्यारपणै रा पगोथिया चढती सुरजी आप मांय उण मरद नैं देख रैयी है, जको इण उमर री छोर्यां रै सुपनां रो राजकंवर व्है। आ बात उणरै सुखी ससुराली जीवण रै वास्तै आछी नीं है, क्यूंकै उणरो धणी आपरै दाई स्रैरी बाबू

नीं, गांव रो करसाण है।” जानकी हाथ जोड़'र बोली, “साब, आगलै महीनै सुरजी रो मुकलावो है। म्हारी आपसूं अरज है कै आप म्हारी छोरी नैं आपरै मोहजाळ सूं मुगत करदो।”

जानकी री बात सुण'र विनोद छिण-भर रै वास्तै तो हकबक रैयग्यो। फेर बात री गंभीरता नैं भांप'र संभळतो थको बोल्यो, “काकी, सुरजी म्हारी दोस्त है। म्हैं तो हमेस औ ईज चायो है कै बा हरदम खुस रैवै। जे महारी वजै सूं उणरो भविस्य काळो व्है सकै तो आज रै पछै म्हैं उणसूं कदैई नीं मिलूंला।” कैय'र विनोद उणीज बगत सहैर बावड़ग्यो।

इण बात सूं अणजाण सुरजी रोज उणरी बाट जोवती। अेक महीनो बीतग्यो। ज्यू-ज्यू मुकलावा रा दिन नैडै आय रैया हा, उणरी व्याकुलता बधती जाय रैया ही। बा मान'र चालै ही कै मुकलावा रै पछै स्यात बा विनोद सूं कदैई नीं मिल सकैला। कांई ठाह उण रा सासरावाळा अर उणरो धणी उणां दोनूं रा रिस्ता नैं किण निजरूं सूं देखै! फेर बिशनपुर तो विनोद इण वास्तै आवै है कै औ उणरी भूवा रो गांव है, सुरजी रै सासरै बो क्यूं आवैला। बठीनै सहैर में विनोद रो मन भी अकुळा रैयो हो, रैय-रैय'र सुरजी रो भोळो मूंडो आंख्यां साम्हीं घूम जावतो, उणरी टाबरां जिसी चंचळता, भोळी मुळकाण घड़ी-घड़ी याद आवती ही उणनैं। बो भी मुकलावै सूं पैलां अेकर उणसूं मिलणो चावतो हो। जाणतो हो कै अेकर जे बा सासरै परी गई तो पछै जाणै कद मिलणो होवैला, पण जानकी नैं दीधा वचन रै कारण बो मजबूर हो।

अेक दिन अचाणचक उणनैं आपरै पर्स मांय सिणगार रै सामान री बा परची मिली, जो भोत पैली सुरजी आपरै मुकलावै सारू बणवायी ही। साज-सिणगार री सौकीन सुरजी काकियां-भाभियां अर सहेल्यां नैं पूछ-पूछ'र अेक हप्तै तक लिस्ट अपडेट करावती रैया ही।

उण दिन आखातीज ही। सुरजी रै मुकलावै री तय तिथि। विनोद सोच्यो कै औ सगळो सामान गांव में तो मिलै नीं अर सहैर सूं उणनैं कुण जाय'र देवैला! बो तुरंत मणियारी दुकान माथै गयो अर सगळो सामान खरीद'र गांव रै वास्तै रवाना व्हैग्यो। उण सोच्यो कै जे जानकी काकी इजाजत देवेला तो सुरजी सूं मिल लेसूं, नींतर औ सगळो सामान काकी नैं सूप'र पाछो आय जासूं। पण उणनैं आगै जको दरदनाक दरसाव देखण नै मिल्यो, उणरी तो उण सुपनै मांय ई कल्पना नीं करी ही।

बगत सूं पैलां बूढो व्है चुक्यो जानकी रो डील निरजीव खाटली माथै पड़्यो हो अर सुरजी भाटै री मूरत बण्योड़ी पथराई आंख्यां सूं उणनैं देखै ही। लोगां सूं ठाह पड़ी, मुकलावा वास्तै आवती गाड़ी दुरघटनाग्रस्त व्हैगी अर उणमें सवार सुरजी रै धणी री मौकै माथै ई मौत व्हैगी। खबर मिलतां ई सदमा सूं जानकी भी संसार छोडगी अर सुरजी उण बगत सूं ई मूरत बणी बैठी ही।

इण घटना रै पछै स्यात सुरजी वैंडी व्है जावती, जे विनोद नीं व्हैतो। बो सगळो काम छोड'र उण बगत उणरै साथै रैयो, जद ताई कै बा सदमै सूं नीं उबरगी। बा नीं खावती तो आपरै हाथां सूं खिलावतो। नींद नीं आवती तो थपक्या देय'र सुवाणतो। रोवती तो टाबरां री भांत हंसी-ठिठोळी कर'र हंसावतो।

समै रै साथै सुरजी संभळ तो गई पण उणरी हंसी, चंचळता अर मस्तमौलापणो साव बिलायग्यो। विनोद डाक्टर हो। बो जाणतो हो कै अबार सुरजी नैं फगत प्रेम अर अपणायत री

जरूरत ही। पण पैलां सू ई उणां दोनुवां रै मेळजोळ नैं गलत निजरां सू देखण वाळा अबै कानाफूसी री ठौड़ खुल र आडा-डोढा बोल बोलण लागग्या हा। विनोद तो स्रैरी छोरो हो। अेक कान सू सुण दूजै कान निकाळ देंवतो, पण सुरजी रै स्त्रीमन नैं उण टीका-टिपण्यां सू पीड़ व्हेती ही अर अेक दिन मन रो दरद आंसुवां रै लारै फूट पड़्यो :

“सुरजी, जरूरी नीं है कै हरेक रिस्ता रो कोई नांव व्हे, कीं रिस्तो अैड़ा भी व्हे जो उमर भर बेनाम ईज रैवै अर निभता जावै।”

“अैड़ा बेनांव रिस्ता थारै स्रैर में व्हेता व्हेला डाक्टर, म्हारै गांवां में तो छोरा-छोरी रै बिचाळै फगत नांव रा रिस्ता व्हे है।”

अचाणचक दो-चार गांववाळा साथै सुरजी रो काको बठै आ पूग्यो अर आवतां ई बोल्यो, “बाप-बेटी, काका-भतीजी, मामा-भाणजी, भाई-बैन, धणी-लुगाई या पछै रसियो-छिना...।”

“बस करो काका, जरा तो लाज राखो, बेटी रै बरोबर हूं थारी।” सुरजी तड़प र बात काट दी, उणरो काळजो किरच-किरच व्हेग्यो हो। उणसूं पैलां कै कोई दूजो कीं और कैवतो, बा विनोद सू मुखातिब व्हे र भर्या कंठां सू बोली, “डाक्टर साब, साची तो कैय रैयो है काको, हरेक रिस्ता रो अेक नांव हुवै है बै अेक-दूजै रा सुख-दुख रा साथी व्हे है। जद आपां रै बिचाळै नांव देवणजोग कोई रिस्तो ई नीं है तो क्यूं आप आपरो कामधंधो अर टेम खोटी कर र म्हारै दुख रा बेली बण र बैठ्या हो?”

“नांव रो रिस्तो तो श्रीकृष्ण अर पांचाली रो भी नीं हो, फेर भी कृष्ण उमर भर पांचाली रै दुख रा बेली बण्या रैया हा।” विनोद कैयो तो सुरजी रै काकै रो छोरो बोल्यो, “न तो थूं कृष्ण है डाक्टर, न आ पांचाली अर ना ई औ महाभारत वाळो जुग है। थां दोनुवां री भलाई इणमें ईज है कै अबै थूं अठै सूं चालतो बण! म्हे सगळा अबार तक फगत प्रधानजी रो लिहाज राख र चुप बैठ्या हा। पण अबै पाणी माथै सूं ऊंचो आवण लाग्यो है। नाक रै हेठै औ पापाचार अबै और सैण नीं करांला।”

“म्हें...।” विनोद कीं कैवण लाग्यो, पण सुरजी उणरी बात काट र बीच में ई बोल पड़ी, “...म्हें विणती करूं हूं डाक्टर साब, भगवान रै वास्तै म्हनैं म्हारा हाल माथै छोड द्यो अर जावो अठै सूं, अबै ओजूं फजीतो मत करवावो।” उणरो रोज फूटग्यो।

विनोद नैं लाग्यो, अबार समझदारी इणमें ईज है कै चल्यो जावणो चाईजै। तो बो सुरजी रै कनै जाय र बोल्यो, “ठीक है सुरजी, म्हें अबार जाय रैयो हूं तो सिरफ इण वास्तै कै अबै थूं आपरी देखभाळ खुद कर सकै है। म्हें बेगो ई पाछो आवूंला, पण जे इण बिचाळै कदैई भी थनैं म्हारी जरूरत मैसूस व्हे तो भूवा रै साथै म्हारै तांई संदेसो पूगा दीजै या पछै आपणै रिस्तै नैं जो भी नांव देय र जद चावै बिना हिचक म्हारै बठै आय जाईजै, म्हारै घर रो दरवाजो सातूं दिन अर चौबीसूं घड़ी थारै वास्तै खुलो मिलैला।” कैवा रै साथै ई बो आपरो बैग उठा र रवाना व्हेग्यो, पण स्रैर जावण सूं पैली आपरी भूवा रै कनै जानकी री जग्यां सुरजी री नौकरी पक्की करवायग्यो ताकै उणरो गुजारो व्हे सकै।

विनोद रै गयां रै दो-तीन दिन पछै ई सुरजी हेली में काम करवा लागगी। हालांके बा जाणती ही कै रविकांत री नियत में उणनै लेय 'र खोट है। जानकी जीवती ही उणां दिनां में भी केई बार बो सुरजी नै बहकावा-फुसळावा री आफळ करी ही, पण पापी पेट वास्तै काम करणो भी जरूरी हो। दूजी कानी उणरै सारू अेक सुखद अचंभो औ हो कै काका रो परिवार जको पैलां उणनै कोड्यां रै भाव भी नीं गिणतो हो, आजकाल उण माथै खूब लाड उंडेल रैयो हो। उणनै लाग्यो, स्यात बिना मायतां री अनाथ छोरी वास्तै उणां रै मन में दया पैदा व्हैगी ही।

बा काळी चवदस री रात ही। आज काम खतम व्हैतां-व्हैतां थोड़ो मोड़ो व्हैग्यो हो। रसोड़ादार भूरी काकी अर बरतण-बासण करण वाळो रामू दादो, दोनू घंटा भर पैली निकळग्या हा। बै दोनू रोज हेली सूं घर ताई उणरै लारै रैवता हा, पण आज बा अेकली ई घरै बावडै ही कै गेलै में रविकांत मिलग्यो। बो थोड़ी देर तो उणनै बरगळावा रौ जतन करतो रैयो, फेर दाळ गळती नीं दिखी तो जोर-जबराई माथै उतर आयो। बडी मुस्कल सूं बा बच 'र भाग तो निकळी, पण आपरै घरै जावतां डरपणी लाग रैयी ही, इण वास्तै काकै रै घरै जाय पूगी। दरवाजो खडकावा लागी ई ही कै अचाणचक हाथ ठाम रा व्हैग्या। मांयनै सूं जो बात कानै पड़ी, उणरै पगां नीचली जमीं सिरकगी। काको-काकी अेक दलाल सूं उणरो सौदो कर रैया हा। आज रात रा ईज उणनै घर सूं उठावण री योजना बणाय राखी ही उणां।

“सुबै गांववाळा हेरैला तो ?” बेटे पूछ्यो तो काकी बोली, “औ थे म्हारै माथै छोड दो। डाक्टर सूं उणरी मासूकी आखो गांव जाणै है। कैय देवू कै रातै आयो हो डाक्टर, न्हाठगी व्हैला उणरै सागै।”

छिण भर रै वास्तै हकबक-सी हालत आयगी। समझ नीं आयो कै कांई करै ? आगै कूवो अर लारै खाडो वाळी हालत ही। अेक कानी रविकांत उणरी आबरू रै लारै पड्योड़ो हो अर दूजी कानी काको-काकी। आज समझ में आयो कै अेकाअेक काको-काकी क्यूं उण माथै हेत उंडेलवा लाग्या हा, बस उणरो भरोसो ई जीतणो हो उणां नैं।

अेकर तो उणरो जीव कीधो कै बाको फाड़ 'र रोवा दूकै, पण दूजै ई छिण उण आपरी सगळी हिम्मत बटोरी अर सैकंड रा सौवां भाग में अेक द्रिढ निरणै लेंवती झटपट घरै गई। कीं जरूरी सामान थैलै मांय न्हाख्यो अर आगतै-आगतै पगां टेसण कानी बधगी। रेल आवण वाळी ही। इंजन री सीटी सूं उणरो ध्यान टूट्यो। रेल स्रैर रै टेसण पूगगी ही। टेसण सूं बारणै आय 'र रिक्सो पकड़्यो अर रिक्सावाळां नैं विनोद रै घर रै पतै री परची पकड़ाय दी।

रिक्सै में बैठी-बैठी बा सोचती रैयी कै जावतां ई कैय देवूला, “आप कैयो हो नीं डाक्टर साब, कै कोई मिली नीं है अबार ताई म्हारै जिसी अर म्हनै ई हेरणी है। अबै म्हारै जिसी म्है दूजी कठै सूं हेरती, इण वास्तै म्है ईज आयगी हूं, सगळो छोड-छाड 'र हमेस रै वास्तै। आप कैयो हो कै आपणै रिस्तै नैं जो चावै नांव देय 'र जद चावै बिना हिचक आय जाईजै। पण रिस्तै नैं नांव देवणो म्है अणपढ गंवार कांई जाणूं! बस, आयगी हूं आपरै भरोसै, अबै आप चावो जो नांव देय दो इण रिस्तै नैं।”

लगाबगा रात री इग्यारै बज्यां सुरजी विनोद रै घर रो दरवाजो खड़कायो। दरवाजो विनोद ईज खोल्यो अर उणनै देखतां ई अचुंभै सूं बोल्यो, “थूं अटै, अबार, इण बगत?”

सुरजी कोई जबाब दियां बिना ई उणरी छाती सूं लाग'र फूट-फूट'र रोवा लागगी। रोवतां-रोवतां ईज उण रविकांत री करतूत अर काका-काकी री नीयत रै बारै में सो-कीं बताय दियो। पण बा और कांई कैवती, इण सूं पैलां ई मायलै कमरै सूं कोई स्त्री-सुर सुणीज्यो :

“कौन है वीनू?”

“सुरजी है निक्कू।” विनोद बोल्यो तो मांयनै अचुंभै अर हरख रो मिल्यो-जुल्यो सुर फूट्यो, “सुरजी! ओह माय गोड! तुम्हारी बिशनपुर वाली फ्रेंड! बहुत सुना है तुम्हारे मुंह से इसके बारे में। आज देखती हूं, क्या है इसमें ऐसा कि दिन में एक बार नाम न लो तो खाना नहीं पचता तुम्हारा।” कैवण रै सागै ई अेक रूपाळो जनानो डील कमरै रा दरवाजा माथै प्रगट व्हियो।

सुरजी अबार तांई विनोद सूं अळगी व्है चुकी ही। विनोद उणरै कांधां माथै हाथ राख'र बोल्यो, “देख लो निक्कू, ये है माय डियरेस्ट फ्रेंड सुरजी।”

फेर सुरजी सूं मुखातिब व्हैतो बोल्यो, “अर सुरजी, इणसूं मिलो, आ है डाक्टर निकिता, माय लवली फिऑन्से, म्हारो मतलब है म्हारी मंगेतर।”

सुरजी री आंख्यां फाटी री फाटी रैयगी। कानां में विनोद रा पैली कैया सबद गूंजण लाग्या, “सुरजी, कीं रिस्ता अैड़ा भी व्है जका उमर भर बेनांव ई रैवै...”





तसनीम खान

सलाम, भोळा सैयद!

जद मारवाड़ रा सगळ्या ठिकाणां ई रियासत जियां ईज चालता हा। रजवाड़ां सूं बत्ती हाजरी तो अट्टे ठाकरां नें ईज मिल जावती। ठाकर रो आपरो दरबार होवतो। हवेली ई महल सूं बत्ती होवती। हवेली माथें चाकरी करता लोग भी घणा सोरा-सुखी दीखता। मारवाड़ रा ई ठिकाणां रो दरबार माथें ई कित्ता ई गांवां री बस्तियां चालै ही। इण दरबार माथें घणा ई सेवक हुया करता। सेवकां में भी बडा ओहदां पर सैयदां रो घणो रुतबो रैया करतो। चपरासी सैयद, दरबान सैयत, खानसामा रें सागै मदद करबा आळो सैयद। ठाकर रें ओळै-दोळै चालबा आळो सैयद। ठाकर रें इसारें पर काम करता सैयद। ठाकर रें दरबार री चौकसी करता सैयद। घणा ई सैयत हा अट्टे। ठाकर हाकमां री भी सैयदां सूं कीं घणी ई पटरी बैठबो करती। इयां मानल्यो कै नरम दिल ठाकर हुकम री किरपा आं पर घणी बरसबो करती। कुणसी भी परेसानी आ जावै, मोकळी मुसीबत आ पडै, ठाकर हुकम तुरत-फुरत सूं आपणै दरबार रा मुलाजिमां री मदद कर देवै। इयां कोनी कै सैयदां पर ई सगळी किरपा बरसबो करती। सगळ्या दरबार ई ठाकर हुकम रें हाथ रो छाळो जियां हो, पण सैयदां रा भोळपण पर बै खास मैरबान हा।

तो हुयो इयां कै ठाकर हुकम अेक दिन सूरज ऊगतां-ऊगतां ई दरबार लगा लियो। अट्टे सगळ्या दरबारां रें सागै दीवान भी बैठयो हो। ठाकर हुकम दरबारियां रें साम्हीं आपरें लांबै-चौडै पसरयोडै ठिकाणै मांय दो-चारेक गांव बख्सीस में देबा पर विचार करबा रो प्रस्ताव राख दियो। दरबार में बैठ्या सगळ्या जणा हैरत में पडग्या, कै ठाकर हुकम रें आ कांई जची? पण सगळ्या औ भी जाणता हा कै ठाकर हुकम पैली भी इसी बख्सीस प्रजा नें देय मेली ही। चिंता या ही कै इयां तो ठाकर हुकम सगळ्या ठिकाणा ई लुटा दैसी। पण कोई कांई कर सकै हो, ठाकर हुकम रें साम्हीं। धणी रो धणी कुण?

दीवान मुळकता-मुळकता ठाकर हुकम रें साम्हीं आपरी मुंडकी हिलाय दी। पण काळजै मांय घणी बळत लागी, जाणै सगळो ठिकाणो उणां री ई जागीर हुवै। आ बात और ही कै काळजै माथें मण भर भाटो मेल रें बांरो मुळकणो जारी रैयो। जाणै जलमतां ई बै हंसता-मुळकता ई आया हा।

डी-156, ड्राईडन पब्लिक स्कूल रें कनै, हसनपुरा-ए, जयपुर 302006 मो. 9928036141

खैर मरबा द्यो, आपणो काई ! कहाणी रै बिचाळै म्हें आ बात निगळगी ही, तो बता द्यूं कै बो तकियो कलाम है, जिको बरसां सूं नीं, सदियां सूं ई मारवाड़ री हर जुबान पर है। सगळी बसती, गांव, स्रैर री बातां, पंचायती कर, लोगबाग हथायां पर सूं उठती टैम, यो ईज कैवता उठ्या करै है कै 'मरबा द्यो आपणो काई है।'

तो दीवान भी आपरो काळजो यो ईज सोच'र टंडो कर्यो।

मुळकता दीवान नें ठाकर हुकम, हुकम कर्यो कै बेगी-सी दो-चार गांव बख्सीस करण रो मसौदो त्यार कर न्हाखो। आपरै इण हुकम रै बाद ठाकर री पीठ और सीधी हो मेली। आपरी चांदी रै पागां री कुरसी भी सिंघासण सूं कम नीं लागी। बां पर बै तण'र बैठ्या। दरबारियां री वाहवाही गूजबो करी। तणियोड़ी पीठ अर गरदन सूं वाह-वाही लेंवता ठाकर हुकम री दीठ सिंघासण जियां लागरी कुरसी हाथ जोड़्यां ऊभै लांबै-डीगै सै सैयद पर पड़गी।

सैयत आपरी हाथ पर लांबी पीठ नें झुकावतो दोलड़ो होय'र खड़ो हो। बितो ई हाथ पर लंबो मुळकतो चौखटो देख'र ठाकर हुकम रो काळजो जाणै टंडो पड़यो। साफो बांध्योड़ो सैयद दोनूं हाथां नें जोड़'र इयां ऊभो हो कै ठाकर हुकम नें आपरी शान और ऊंची होवती लागी। आपरी इत्ती इज्जत देख'र ठाकर हुकम रो मन झूम उठ्यो।

इयां भी ठाकणै में ठाकर हुकम री किरपा दीठ पड़ै जटै ई 'जेठ सूं सावण होय जाया करै', 'धोरां में भी पाणी रा सोता उमड़ पड़ै है।' तो अठै भी ठाकर हुकम सैयद पर आपरी किरपा-दीठ डाल चुक्या हा। अब सैयद री तकदीरी बदळतां नें कोई नीं रोक सकै।

ठाकर हुकम दीवान नें कनै बुलाय'र कैयो, "इण सैयद सूं पूछलो कै कुणसो गांव कै स्रैर चावै है। इणरै पूरै कुनबै अर बस्ती नें म्हें अेक स्रैर बख्सणो चावूं हूं।"

यो सुणतां ई दीवान रो बळ्योड़ो काळजो औरूं राख हुयग्यो। पण मुळकता सो आपरी घांटकी हिलावतो बगल में बहीखातो दाब्यां हुकम री तामीर ताई दरबार सूं हाजरी देय'र निकळ्यो। ठाकर हुकम रा इशारा पर सैयद आपरी दोलड़ी देह लियां दीवान रै लाँरै चलयो गयो। सगळा दरबारी जयकारो करबा लाग्या। जित्ता भी सैयत उठै ऊभा हा, सगळां री आवाज सबसूं ऊंची आवती रैयी। अब इण ठिकाणा मांय सैयदां रो आपरो स्रैर होसी, या सोच-सोच'र ई दरबार में ऊभा सैयद घणी देर जयकारा करता रैया। बाकी रो काळजियो बळतो रैयो।

अठै देखो जणां दीवान सैयद रै सागै फंसग्यो। जटै जावै, बटै ई सैयद सागै हाजर। बो हवेली री दीवान कोठरी रा सगळा कागज उठावै, बिठावै अर सैयद नें देख'र आपरो काळजो टंडो करण री आफळ ई करै, पण काई करै? मुळकतो सैयद लारो नीं छोड रैयो हो।

"आं सैयदां रो स्रैर तो म्हें कदैई नीं बणण द्यूं।" दीवान मन ई मन विचार कर्यो।

घणा दिनां ताई इयां ई चालतो रैयो। सूरज ऊगतां ई सैयद दीवान रै कनै आय'र बैठ जावतो अर दीवान झूठी ई कागजां में सिर खपातो रैवतो। सैयद हाथ जोड़्यां आपरै स्रैर रो नक्सो अर पट्टो मिलबा नै उडीकतो रैवतो।

घणा दिनां ताई जद दीवान बांनै घुमावतो ई रैयो हो थक-हार'र सैयद हाथ जोड़्यां फेरूं ठाकर हुकम री हाजरी में जा खड़्यो हुयो। सैयद रो मूंडो लटक्योड़ो देख'र ठाकर हुकम पूछ लियो, "काई हुयो सैयद, हाल ताई तूं आपरो स्रैर कोनी बसायो?"

लटकतै मूंडे सैयद कैयो, “रैबा द्यो हुकम, दीवानजी परेसान हो रैया है, म्हैं तो आपरी हाजरी माथै ई ऊभो ठीक हूं अर म्हारो बो कुनबो सैयदां री बस्ती में ईज ठीक है।”

ठाकर हुकम समझग्या। बै अेक दरबारी नैं भेज 'र दीवानजी नैं बुलवाया।

बगल में बही दबायां दोलड़ा होवता दीवान ठाकुर हुकम रै साम्हीं हाजरी दी।

“काई दीवानजी, सैयद रै स्हैर रो काई हुयो। हाल ताई थे कागज कोनी दिया?”

“बस हुकम, कागज त्यार होयग्या। म्हैं सोचै हो कै सैयद री पसंद रो स्हैर ई बखसणो चाईजै। इण खातर टेम लागग्यो।”

दीवान री बात सुण 'र ठाकुर हुकम भी राजी अर सैयद भी राजी। पण दीवान रै मन री बात कोई जाण नीं पा रैयो हो। बठै तो और ई कीं चालै हो। जो भी हुवो, सैयद फेर दीवान रै लारै फिरतो रैयो। अब तो दीवान पक्को कागज लेय 'र बैठग्यो। सैयद फेर मुळकणो चालू होयग्यो। सैयद री मुळक दीवान माथै बीजळी री गाज सूं कम नीं ही। दीवान आपरै साम्हीं सैयद नैं बिठाय 'र पूछ्यो, “बता, तनैं डीडवाणो गांव चाईजै कै शिमला स्हैर?”

स्हैर रो नांव सुणतां ई सैयद री आंख्यां मांय चमक बापरगी। पण बो दीवान साम्हीं दिखावो करतो केई ताळ सोचतो रैयो। बिचाळै दीवान फेरूं पूछ्यो, “डीडवाणो गांव कै शिमला स्हैर?”

अब सैयद रो मगज चालबा लाग्यो। बो अंग्रेजां रै बसायोडै स्हैर शिमला रै बारै में सुण राख्यो हो। ठाकर हुकम घणी बार कैयो भी है गरम्यां तो शिमला री ई चोखी। बो सोच्यो, डीडवाणो तो घणी पीढ्यां सूं रैय लिया। ठाकर रो हुकम बजा लियो, बडो स्हैर हासल करण रो मौको चूकणो नीं चाईजै। फेर कुनबा में नांव ई होसी कै ठाकर री बखसीस म्हारै खातर मिल सकी अर स्हैर रो नांव भी फेर सैयदां रै नांव सूं चमकसी। सैयद स्हैर रा खयालां में इतो खोयो कै दीवान नैं झिंझोड़णो पड़्यो।

बस, पछै काई, सैयद घणो सोच-विचार कर 'र शिमला स्हैर सैयदां रै नांव करबा रो कैय दियो। दीवान रै साम्हीं हाथ जोड़ 'र बो बैठो रैयो। सगळा कागज-पत्र त्यार कर 'र दीवान सैयद सूं दस्तखत करवा लिया अर शिमला रो नक्सो अर ठाकर साब कानी सूं पूरी सैयदां री कौम नैं बखसीस रो कागद सैयद रै हाथां संभळा दियो।

अबै इण ठिकाणै रै डीडवाणा गांव में सैयदां री बस्ती में घणो ई जसन मनाईज्यो। कड़ाव चढ्या, घणा बकरा हलाल हुया। पूरी बस्ती सागै बैठ खायो अर आपरो अलग स्हैर होवण पर छाती घणी चौड़ी करी। सगळी बस्ती में शुकराना रा नफील पढीज्या।

दूजै दिन सूरज ऊगतां ई दीवान सा बस्ती माथै पूगग्या। बस्ती में अैलान कर्यो कै सैयदां नैं ठाकर हुकम शिमला बखसीस में दियो है। बस्ती में अेकर फेरूं खुसी री लैर दौड़गी। बस्ती वाळा आपरो सामान बांधबा लागग्या।

सैयद साब शिमला रो नक्सो लेय 'र घणै गुमेज सूं आपरै बेटा साम्हीं कर दियो। जयपुर री कॉलेज में पढ आयो बारो बेटो नक्सै नैं घुमा-घुमा 'र देख्यो। घणो सोच्यो, बिचार्यो। घर में पड़्या सगळा कागज-पत्र खंगाळ लिया। आखतो होय 'र बाप नैं कैयो, “अब्बाजी, थे तो गलत स्हैर बखसवा लियो।”

सैयद साब रो मूंडो उतरग्यो ।

“यो क्रियां हो सकै, दीवान कैयो कै शिमला सहैर है, जणां ई तो म्हें हांमी भरी ही।”

“पण यो शिमला सहैर कोनी, आपणै डीडवाणै सूं 50 कोस दूर रो ठेठ ढाणी रो गांव हे यो तो । शिमला ढाणी।”

“यो कांई कैवै है तूं । बावळो होयग्यो के ?”

“अब्बाजी, बावळो म्हें कोनी, बो दीवान थानै बावळा बणा दिया । यो देखो नक्सो, डीडवाणै सूं यो रास्तो जाय रैयो लाडणूं अर फेर यो देखो अठै शिमला । जो म्हांकी बस्ती नैं बख्सीस कराय लाया आप ।”

सैयद साब माथो पकड़'र बैठग्या ।

“यो दीवान मूरख बणा दियो । म्हनैं तो कैयो कै शिमला सहैर लेसी कै डीडवाणो गांव । म्हें बापड़ो कांई जाणूं कै शिमला गांव री बात होयरी है ।”

“अरे गांव होवतो तो ई कीं कोनी, बा तो खोड़ री ढाणी है । आपणी बस्ती में कच्चा-पक्का मकान तो है, अक स्कूल भी है, पण बठै तो धूड़ उडण रै सिवाय कीं नीं है । गरमी इत्ती पड़ी कै रेत ई नीं, लोगां रा कंठ ई सूखा पड़्या रैवै । पाणी तो कोस-कोस तक कोनी ।”

सैयद आपो खो दियो ।

“देयदै अै कागज पाछा म्हनैं, दीवान रै मूंडै पर फेंक'र आवूं । म्हारै सागै इत्तो बडो धोखो ?” सिर पकड़्यां-पकड़्यां सैयद चौंतरी पर ई बैठग्या ।

“म्हें तो समझ्यो कै पीढ्यां सूं ठाकर हुकम री हाजरी बजा रैया हां, तो कोई इनाम तो मिल्यो म्हारी सगळी कौम नैं । आ तो शर्मिंदगी री बात होयगी । मूंडो दिखाबा लायक भी नीं छोड्यो इण दीवान तो ।”

“अब्बाजी, अब कीं नीं हो सकै । थांका दस्तखत है कागजां पर । ठाकर साब नैं कैस्यो तो बै तो यो ही कैसी नीं के थे ईज मांग्यो हो, सो दीवान आपनै देय दियो । थे कुणसै मुंह सूं ठाकर हुकम आगै सिकायत करस्यो ?”

पूरी बस्ती में बात फैलवा लागी तो लोगबागां रो सारो भरम उतरग्यो । आपरो सामान बांध बैठ्या लोग पाछा राखबा में लागग्या । शिमला जाण कै सट्टै लोग आपरा ढोर-डांगर भी छोड दिया, तो अब घर रा टाबर बानै ढूंढबा नैं चरगाह री ओर चाल दिया ।

सैयदां री बस्ती खाली होवण री बजाय फेर आपरै काम में लागगी । पण सैयद साब दिन-रात दीवान नैं गाळ्यां काढ्यां बिना पाणी नीं पीवता ।

सैयद साब आपरै चौंतरी पर बैठा होवता तो लोग बानै ‘सलाम, भोळा सैयद!’ कैय'र निकळ जावता । अब लोगां नैं यो कुण कैवै कै ‘भोळो’ सबद सैयद साब रो काळजो बाळै है । यो सुण'र भोळा सैयद री देह दोलड़ी हुयां जावै ही, जियां कै ठाकुर हुकम रै कनै खड़्यां-खड़्यां हुया करती ही ।





प्रेम शर्मा

डकार

सुखदेव अके सरकारी स्कूल रो मास्टर है। औस्था में नीं मोट्यार गिणीजै अर नीं बडेरो ई। कोई पैताळीस बरस री उमर पार करतां थकां काया नैं आछी तरै सांभ जरूर राखी है। स्कूल मास्टर रै रूप में बो आसै-पासै रा गांवां अर हलकै री मिनख-बिरादरी बिचाळै आपरी आछी इज्जत कमा राखी है। पण सगळां री निजरां में आपरै सुभाव लेखै इत्तो सूधो, जाणै रामजी री गाय। अकेरसी तो गाय ई लात या सींग मार दै तो ई सुखदेव चूं ई कोनी करै। सनेव रो सागर। औ इत्तो सीधो जीव है, इण रो अके ही कारण है अर बा है सुखदेव री मां। उण बापड़ी आपरी जीयाजूण में घणा ई दुख झेल्या, धणी री मार खाय-खाय र इण पूत नैं पाळ-पोस इत्तो बडो अवस कर लियो कै उणनैं देख बाप नैं ई कीं संको पड़ग्यो। मां री आछी सीख उणरै काळजै कीं इण भांत धंसी रैयी कै उण खुद आपरी घरवाळी सूं आज दिन ताई कदैई ऊंची आवाज में बात नीं करी। तीन टाबर-टींगर होयग्या। बहू अर सासू मांय घणी घुट्टै। सुखदेव री मां खुद रै पूत नैं फटकार देसी, पण बहू नैं काळजै सूं लगाय र राखै।

आ साची बात है कै जिण घर मांय लुगायां बिचाळै अके होवै, मिनख मतैई रामजी री गाय बण जावै। पण इण सीधै-सादै सुखदेव री पण अके ई दूखती रग है—लुगायां। आंख्यां रै साम्हीं हरेक लुगाई नैं बैनजी, बाईसा बोलण री मजबूरी ताई बंध्योड़ो है, सेवट तो रामजी री गाय गिणीजै बडभागी।

यूं ऊपरवाळो सगळां रो कोई न कोई सतूनो अवस कर ई देवै। सुखदेव रो मोबाइल, जिकै उणरै सपनां खातर पांख्यां रो काम कर राख्यो हौ, उण मोबाइल रै बूतै उण केई सारी लुगायां सूं आछी सांठागांठ कर राखी ही। दिनूगै-दिनूगै भोळै भंडारी नैं पूजण सारू जावै जद ई मिंदर रै बारणै चबूतरा माथै पूठ टिकाय र बैठ जावै अर लाग जावै हिवडै नैं उछाळण में—ब्यूटीफुल, पटाखा, पप्पियां री इमोजी, डियर फ्रेंड, सगळी लुगायां नैं, कोई बैनजी अर कोई भाभीजी!

सगळा कांड नीका चाल रैया हा। हिवडै मांय दब्योड़ा सगळा कीड़ा ई मोबाइल मांय डंक मारता। आछी भली गाड़ी गुड़कती जावै ही कै अके दिन भूचाळ आयग्यो जीवण मांय। प्रवेश होयग्यो अके औरूं टूनटुनै रो। अबकाळै राखी माथै सुखदेव रो साळो आपरी बैन सारू श्रीजी मोबाइल ले आयौ। साळां रै हाथां नैं तो औ जस मिल्योड़ो ई है काम बिगाड़ण रो।

टाबर-टींगर पण उंतावळा घणा हुवै इसै सुखी जीव रा। बडो बेटो हनी नांव रो ई शहद है, बापखणी रो इत्तो तेज कै जाणै ततैयो मिरची। अपटूडेट कर दियो पूरो मोबाइल। मां रो खोल दियो अफबी मांय अकाउंट अर सरू होयग्यो बापडै सुखदेव रो उल्टो बगत।

घरवाळी सारू फोन इण भांत रो होयग्यो जाणै पांचसौ रा नोटां री गड्डी। चोळी मांय हर बगत खास हिफाजत सूं सांभ'र राखै फोन नैं।

बापडो सुखदेव घर सूं बारै जद भी होवै, अफबी खोल-खोल'र देखतो रैवै। उणरी धिराणी कोई बगत ई देखौ, ऑनलाइन ई दीखै। रीना, मीना, संगीता किणी माथै दीदा कोनी लागै। इमोजी रो मामलो ई ठप्प पड़ग्यो। घर सूं नीसरतां अर घुसतां पूरी निजर घरवाळी अर उणरै मोबाइल माथै। घरवाळी खाणो बणावती, बुहारी काढती, सिंझ्या पड़ी या दिनूगै, उणरो मोबाइल बाजतो ई रैवै। सनेसां री आवाजां इण भांत लगा राखी है कै जाणै पाणी री बूदां टपकै—टप टप अर सुखदेव रै काळजै मांय खाटो पाणी बणतो रैवै। उणरी हालत तो इण भांत री हुयगी, जाणै आगै नाथ अर पाछै जेवड़ो। अेक ई तो लुगाई ही अर वा ई अफबी मांय घुसगी, अबै किणनैं कैवै आपरै हिवडै रो हाल।

मां भी तो सासू कोनी बणी ढंग सूं, उणनैं तो सगळा मिनख रावण सरीखा दीखै अर सगळी लुगायां मांय सीता।

सुखदेव घरवाळी रो फोन उठाय'र छणबीण भी कोनी कर सकै। थोड़ा दिनां पैली री बातां ध्यान में आ जावै, किण भांत बा पाडोस्यां रा लड़ाई-झगडां में उचक उचक'र छलांग लगाया करती ही। मोबाइल री बात माथै ई धणी-लुगाई में राड़ छिड़ी ही। खूब डींग हांकी जद तो, “म्हें तो म्हारी लुगाई माथै दर ई बैम नीं करूं, आज दिन ताई घरवाळी रै फोन रै हाथ तकात कोनी लगायो।”

पाडोसी कुणसो कमती हो, “हां भाईजी, थारी घरवाळी संस्कारी है, नोकियो फोन राखै, काई करसौ बीं नैं खंगाळ'र?”

अब अेक ई उपाय बचग्यो हो उणरै कनै—ग्यान बांटण रो। सिंझ्या पड़्यां आज जद घरवाळी रो फोन बाज्यो, चोळी मांय सूं फोन निकाळ'र देखतां ई हंसी नाचगी बीं रै मूंडै पर। सुखदेव री तो हालत पस्त, कुणसै सुखदेव रो सनेसो आयो हुसी अर सुर फूट ई गयो मूंडै सूं :

“अरे सुणै है नीं, हनी री मां, इण मोबाइल नैं छती सूं इत्तो चिपकाय'र मत राख्या कर, हानिकारक किरणां री खाण है औ टंडीरो, कैंसर हो जावै।”

“थानैं तो हार्ट-अटैक कोनी आयो इत्ता साल होयग्या राखतां, बुशर्ट री जेब छती ऊपर ही बण्योड़ी है, यूट्यूब चैनल बणावण वाळी हूं म्हैं, म्हारी रेसिपी रा, देखता जाया थे, कियां नांव रोसन करस्यूं।”

“अरे इत्तो आसान काम कोनी औ, घणा पापड़ बेलणा पडै।”

“थे नीका रैवो, थानैं तो लोई बणावणी ई कोनी आवै, थे तो सरकारी स्कूल में जाय'र कुरसी तोड़ो, म्हारै सूं माथा-पच्ची मत करो।”

बस इत्ती-सी फटकार घणी हुवै, सुखदेव रै मूंडै ताळो लागण सारू।

“परोस दूं थाली!”

“अरे ना रे भागवान, गैस बण रही है छाती मांय, पैली ई झाळ लाग रही है।”

“तो ईनो पी लेवो या मीठो सोडो फांक लेवो।”

“अरे ना, तूं तो थारो मोबाइल दे दे बस”, मन मांय ई बोल रै रैयग्यो सुखदेव।

हाल ताई तो पखवाडो ई पूरो कोनी हुयो अर सुखदेव रै सुख नै ग्रहण लागग्यो। भूख-प्यास सगळी मरगी बीं री तो।

आज तो मां ई लताड पाय दी, “कियां फतैया री मां सो थोबडो बणाय र घूमै, बेदजी नै दिखाय र चूरण-चटणी क्यूं खावै नीं? डकार आवणी बौत जरूरी है रे भाया, जद ई भूख लागसी थनै।”

“अरे मां, अेक दफै औ मोबाइल हाथ लाग जावै, पण आ म्हारी धिराणी गुसळखानै में ई साथै लेय र जावै फोन नै...।” मनो-मन में ई बोल रै रैयग्यो बापडो सुखदेव।


आज तो सांप ई लोटग्या सीनै पर, खाटो पाणी कमती हो काई, न्हावतां-न्हावतां गुसळखानै मांय सूं गाणै री आवाज बारै आवै ही :

“अब करूंगा तेरे साथ गंदी बात...” पेट मांय घुड़घुड़ सरू हुयगी सुखदेव रे... “अरे काई गंदी बातं करणी बाकी रैयगी हालताई, तीन टाबरां री मां!” सुखदेव मन मसोस नै रैयग्यो।

औ मिनख रो निजरियो कुण समझ सकै, त्रिया चरित्र री बातं करणवाळां सारू पूरै जगत में अेक बस खुद री लुगाई टाबरां री मां हुवै, बाकी तो पटाखा अर खुद शाहरुख खान। पण आज सूधी दसा आय ई गयी सुखदेव री। स्कूल सूं आधी छुट्टी लेय र बो घरां आयग्यो अर इत्तो छानै-मानै मांयनै घुस्यो, जाणै मिनकी घुसी हुवै। मिनख रो चोर उणरै वैवार मांय ई दीखण लाग जावै। घरवाळी डागळै पर कपड़ा सुखावण ताई गयोड़ी ही अर औ टुणटुणो पलंग माथै ई धर्योडो हो। सुखदेव झट फोन हाथ में लियो अर उणरी छण-बीण सरू करी।

“अरे, कीं भी तो कोनी मिल रैयो”, खंगाळ खंगाळ र फोन नै आछी तरै देख लियो।

अठीनै तो लुगाई रो कमरै में घुसणो हुयो अर सुखदेव रै गळै सूं जोरदार डकार निकळी। बो पेट पर हाथ फेरतो बोल्यो, “आज जाय र कीं जी-सोरो हुयो है, आज तो दाळ-बाटी चूरमो खावण जोगी भूख जाग्रत हुई है!”





मंजू सारस्वत

साच होवतो सुपनो

छोटो सो 'क अके कमरियो, जिकै में घरेलू समान री अड़ा-भीड़। नैन्ही-सीक रसोवड़ी अर टूट्यो-फूट्यो आंगणो। औ ई रैवास रेंवती अर उणरै घर धणी मदन रो।

चार टाबरिया, जिणां में तीन टाबरां नैं ब्याव कर'र अेटै लगा दिया। अके छोरो अजै कंवारो है, जिकै नैं बै चावै कै थोड़ो मोटो मकान बण जावै तो परणावै-पतावै।

बडोड़ो छोरो अर छोटोड़ी छोरी दादी-दादै कनै ई रैया। बांनै दादै-दादी ईज परणाया। पोतै री बीनणी अर दायजै पर बां ईज कब्जो कस्यो।

मदन रै पांच भाई अर दो बैनां। भाईड़ा आपरै मां-बापू नैं बातां में लेय'र सगळो हिस्सो-पांती हड़प लिया। उणरो बडोड़ो बेटो जिको दादै-दादी कनै रैवतो हो, उणनैं अके रैवण लायक छोटोक मकानडो बणाय'र देयनै राजी कस्यो। बो बेटो भी अैड़ो निकम्मो निकळ्यो कै नौकरी लाग्यां पछै मां-बाप नैं कदैई भूल'र ई नी संभाळै।

मदन सुभाव रो तो दयालु, पण रीस आवै जणै इत्ती खारी कै रेंवती पर कळछ'र पड़ै। मूंडै में आवै ज्यूं बोल'र रोळा करै, पण रेंवती कांई ठाह किसी माटी री बण्योड़ी है। पाछी चेहरै पर दरद भरी मुळक लावती रैवै। कदैई भूल-चूक सूं ई सुर तीखा नीं हुवै। घर में कित्ती ई तंग-ताई चालो, बा तो जियां-तियां धाको धिका लेवै, पण किणी नैं लखाव नीं पड़ण देवै। रेंवती रै संतोष अर धीजै रो कांई कैवणो, आपरै मोट्यार या किणरै ई साम्हिं आपरै जीवन रो रोवणो नीं रोवै।

मदन दिनूगै री टेम चाय पीवतो-पीवतो अखबार में आयोड़ी खबरां बांचै हो। अके खबर अैड़ी बांची कै मदन रा रूं खड़ा हुयग्या। अके मिनख नैं उणरी लुगाई चाय में ज्हैर देय'र यमलोक पूगाय दियो, कारण कै उणरै आमद घणी नीं ही।

उणरी निजरां अखबार सूं हट'र विगत अर चाल रैया दिनां रै चीलां माथै रेलगाडी ज्यूं सिरकण लागी।

रेंवती मन रै आसै-पासै डोलण लागी। रेंवती, जिकरी आछै घर सूं पाळीज-पोसीज'र आई ही, उण सागै फेरा लेंवती बगत सात वचन दिया हा कै म्हैं तनैं सोरी-सुखी राखूलां, पण मन मुताबिक सोरी राख नीं सक्यो, कारण कै उणरा तकदीर सागै नीं हा। उणरै जाग्यां-जर्मां बेचण रो काम, पण जद भी कोई आछी डील आवै उणसूं कूड़ो हेत राखणिया भायला बा पैली हथिया लेवै।

ट्रेक-ऑन कुरियर, वेद मार्केट, रानी बाजार, बीकानेर 334001 मो. 8619662544

उणरै हाथ पल्लै खुरचण ई नीं आवै। आखै टेम तोसो-मोसो कर 'र घर चालै हो। आ तो रेंवती ई है जद टेमसर घर में खाणै-पीणै रो तोड़ो नीं पड़ण देवै। बा सिलाई रो काम करै। अड़ी-सड़ी, ब्यांव-सावा में कच्ची रसोई बणावण रो काम, जियां कै चावळ-दाळ, लापसी, रोटी साग आद-आद। ब्यांव सलट्यां पछै चोखा पईसा, नूवा गाभा अर धपाऊ रो मीठो-चूठो भी आवै। उणरै आछै-मधरै सुभाव रै कारण आगै सूं आगै रसोई री बुकिंग आवती रैवै। इत्ती मैणत कस्यां पछै भी उणरै चेहरै पर कदैई रीस रो नांव-निसाण ई नीं रैवै। हरमेस मुळक रो गैणो पैरुओ राखै।

मदन नैं याद आवै—अेकर जमीं री कोई आछी डील उणरै हाथ में आवण आळी ही, पण भाग अैडो धोखौ दियो कै बीं दिन उणरो भयंकर एक्सीडेंट हुयग्यो। भगवान री किरपा सूं बच तो गयो, पण पग फेक्वर हुयग्यो। तीन-चार महीनां ताई ऊभो तकात नीं हुय सक्यो। कित्ता-कित्ता अपरेसन हुया। उण बगत रेंवती दिन-रात घणी सेवा करी। इन्नै-बिन्नै सूं उधारो-पारो कर 'र डाक्टरां री फीसां भरी अर दवाई-पाणी रो जुगाड़ बैठायो। उणरी मन सूं कस्योड़ी सेवा रै पाण बो आज री घड़ी चोखी तरै चालै-फिरै अर अबै पाछो मोटरसाइकल चलावण रै लायक हुयग्यो। बा उणरै शरीर री तो सेवा करी ई ही, मनोबल बधायो जिको न्यारो। उण बीखै री टेम उण रा भाईड़ा तो काई जलम देवाळ मां-बाप भी पूछण तकात नीं आया।

दूजी बार ई सागी बात हुई। भळै कोई जमीं री आछी डील आई। बो ई सागी रासो। पैलां आळै जियां भळै अेक्सीडेंट हुयग्यो। रेंवती री सेवा में पैलां सूं ई दूणी निष्ठा अर समर्पण भाव।

उणनैं याद आवण दूकै—आखातीज रै मौकै रेंवती बीसूं लोगां नैं मोल-भाव सूं खीचड़ो छड़ 'र देवै। खीचड़ो इत्तो सांतरो कूटै कै अळी-गळी, आडौस-पाडौस रा लोगां री लैण लाग जावै। आजकाल घणकरी लुगायां नैं खीचड़ो कूटणो दोरो लागै, कोई रेंवती जिस्यो मिल जावै तो मौज हुय जावै। पैलां रै जमानै में दुपारै री टेम तीन-च्यार बजतां ई खीचड़ो कूटीजण रा धमीड़ सुणीजण लाग जावता। पांच बजी हांडी बेळा हुवतां ई घर-घर में चूल्है माथै हांडी में खीचड़ो खदबद करतो सीजण लाग जावतो। अबै केई जणां नैं भावै तो घणो ई पण कूटै कूण? बा कैबा है नीं कै 'तूं ई राणी, म्हैं ई राणी, कुण घालै चुल्है में पाणी!'

कोई मिक्सी में पीसै तो बो सुवाद नीं आवै जिको खीचड़ो हाथां रै जोर सूं कुटीज 'र हांडी में सीजतो मधरी-मधरी आंच माथै। जीम्यां पछै जिको सुवाद आवतो बो आज कठै? बो खुद सूं ई बड़बड़ावण लाग्यो।

“काई कठै? काई कठै? काई बड़बड़ावो हो थै?”

“हम्म, हां हां...” कैवतो मदन अखबार सूं निजर ऊंची करी?

“ओऽऽ हां, ममता री मां, पैलां रै जमानै में जिको हांडी में खीचड़ो बणतो बो सुवाद याद आयग्यो।”

“बस इत्ती-सी बात? म्हैं आज ई चूल्है माथै हांडी में खीचड़ो बणाय 'र जीमावूला।” कैवती थकी रेंवती मुळकण लागी।

बगत निकळतो रैयो। रेंवती रै जाण-पिछाण आळां रै अठै ब्यांव रै मौकै दस-पंदरै दिनां

री दिनुगै-सिझ्यां री रसोई बणावण रो काम आयो। उणरै हाथां में साख्यात अन्नपूरणा ई बिराजता हा। जीमण आळा आंगळ्यां चाट जावता।

ब्यांव आळै घर में कोई पईसै आळी पाल्टी रा बटाऊ आयोडा हा। बै जीमता जणै कैवता-थारै अटै खाणो घणो सुवाद बणै है, कुण बणावै है ?

बटाऊ री जोड़ायत राधा भी रेंवती सू घणी प्रभावित हुई। बा उण सू सुख-दुख री हथाई करती रेंवती। राधा नैं ठाह पडै कै रेंवती रै घरधणी सागै धोखा-धड़ी हुवण सू बै पनप नैं सकै, इण कारण उणनैं मजबूरी में लोगां रै घरै रसोई बणावण रो काम करणो पडै।

अक दिन राधा आपरै घरधणी श्यामसुंदर सू बात-बात में कैयो, “थानै आपणै ड्रीम प्रोजेक्ट ताई जर्मी री जरूत है नीं ? रेंवती रो घरधणी प्रोपर्टी डीलर है। थे बां सूं बात कर र बांरो कीं फायदो करावो, जीव री आसीस मिलैला। और भी कोई जग्यां-जर्मी रो लेवाळ हुवै तो बांरो कनै सूं ई डील करावो। कदास रेंवती रा ई कीं दिनमान सुधरै।”

“ठीक कैवै राधा, काल ई म्हैं जर्मी बाबत बात करूला। जर्मी तो म्हनैं बीसवाबीस लेवणी है। इणमें कोई दो राय नीं है।”

आगलै दिन श्यामसुंदर अर मदन रो मेळ-मिलाप हुयो। जर्मी बाबत बात हुई।

बो मदन नैं धीमै सुर में कैयो, “भाई! म्हनैं पचास बीघा जर्मी चाईजै, जिकै में अक बीघा जर्मी माथै देसी रिसोर्ट खोलणो है। उणमें राजस्थानी स्टार्डल रा झूपड़ा, गारै रा कच्चा आंगणा, जिकै माथै धोळी माटी रा मांडणा अर चूल्है रा पकवान आद हुवैला। बाकी चाळीस बीघा बिकाऊ फारम हाऊस सारू। अबै समझ आई म्हारी बात ?”

सुणतां ई मदन रै कानां नैं अचूंभो हुयो। बो पाछो चेतो कर र बोल्यो, “हां भाईजी, थारी जरूत मुताबिक जाग्यां म्हारी जाण में है।”

“देख भाई मदन, तनैं लोगां घणो धोखो दियो है, म्हनैं जाणकारी मिली है। अबकाळै म्हैं थारै सागै हूं। बस चोखी ठौड़ जाग्यां दिराय दे। थारो लूठो नफो होय सकै।”

छेकड़ केई जमीनां देख्यां पछै स्हैर सू थोड़ी अळगी अक जग्यां देखतां ई श्यामसुंदर नैं भायगी। सौंदो तै हुयो। मदन रै आछो-खासो फायदो हुयो। इणरै पछै आपरै संपर्क आळां आगै प्रचार करवा र मदन रै काम नैं खासो विगसाव दिरायो।

मदन-रेंवती रा ई दिनमान फुरण लाग्या अर अक कमरियै सू तीन तल्लां आळो फूटरो, आलीसान मकान चिणाईजग्यो। घर रो मौरत लॉकडाउन रै कारणै गिणती रा लोगां में, होमायत सागै संपन्न हुयग्यो।

श्यामसुंदर अर राधा मौरत रै कैयी दिनां पछै नूवो घर देखण सारू जोडै सूं आया।

रेंवती अर मदन बांरो घणो कोड अर आवभगत करी। सागै ई मौरत माथै नीं आवणै रो ओळमो दियो।

“म्हे माफी चावां, पण उण टेम सरकार री गाइडलाइन नैं ध्यान राखता थकां निरवाळा ई आवणै रो मत्तो कर्यो।” श्यामसुंदर मदन साम्हीं उथळ्यो देंवतो थको बोल्यो, “बाकी मौरत रो मोटो उपहार तो नीं लाय सक्या पण राधा आपरी बैन खातर अक भेंट सोची है, जे थे स्वीकार करो

तो म्हां दोनू नैं भोत हरख हुवैलो।” कैवतां श्यामसुंदर राधा नैं लिफाफो काढण रो इसारो कर्यो।

राधा बैग सूं लिफाफो निकाळ'र रेंवती रें आगै बधायो।

“इण मांय काई है जीजी?” रेंवती अचूंभो करती पूछ्यो।

“बाई! थे कागद खोलो तो सरी, पछै म्हे बतावां।”

रेंवती लिफाफो खोल'र कागद बारै काढ्यो। ऊपर मोटा आखरां मांय लिख्योड़ो हो—
“रेंवती रसोई”। उणनैं विस्वास नीं हुयो तो बा पानो दुबारा पढण लागी। बीं नैं कीं समझ में नीं आयो, जणै बा कागद मदन कानी कर दियो।

“बधाई हो रेंवती! अरे साँरी मैडम जी, नूवै काम खातर। अँड़ो अनूठो उपहार म्हेँ आज ताई नीं देख्यो है।”


“रेंवती, इणमें छप्योड़ो है कै “रेंवती रसोई” नांव रो प्रतिष्ठान जिण मांय पंदरै साथी कारीगर अर उणां री निर्देशक अर प्रबंधक है—रेंवती शर्मा। जिण मांय बणण आळा व्यंजन भाईजी रें रिसोर्ट रें सागै आखै स्हैर मांय पूग सकैला। बधाई हो मैनेजर साब!” मदन कागद पढतो थको कैयो।

रेंवती नैं विस्वास नीं आय रैयो हो कै जिण सुपनै रें बारै में बा कदैई कोई रें आगै जिकर तक नीं कर्यो बो आज उणरै साम्हीं आय'र ऊभो है।

“राधा जीजी, अबखायां मांय डूबती-तैरती कैयी बार लागतो कै भगवान म्हारो हाथ तो कदैई छोड दियो, पण थानैं देख'र लागै कै बो मालिक आपरो हाथ काई, समूचो आप ई म्हारै सागै ऊभो है। आज रें टेम में जद अेक लुगाई नैं दूजी री पीड़ घणी भावै, पण सुख कम, ईसको घणो चावै, पण दुख कम। अँड़ै में थे साबित कर्यो है कै हरेक लुगाई दूजी लुगाई री दुस्मण नीं हुवै, उणरी भाग-विधाता भी बण सकै। इण सुदामा कनै आपरै श्रीकिसन नैं आभार जतावण सारू आखर ई नीं है।” रेंवती भरीज्योड़ै गळै सागै राधा रो हाथ आपरै हाथ में लेंवती थकी बोली।

“रेंवती! सुदामा तो म्हे हां कै श्रीकिसन-सी उदारता दिखावता थकां थे आ नान्ही-सी भेंट स्वीकार करी है। म्हेँ अर थारा बैनोईजी आ कदैई तै करली कै थारै हाथ रो देसी सुवाद कूट-कूट ताई पूगै, जद असली मिसन पूरो हुवै। ईसको करती हुवैला पारकी लुगायां, पण म्हारी बैन रें काम रो नांव हुवै तो फूटरापो तो म्हारो ईज है नीं? बा सब छोडो। भलाई थारै कत्रै आखर ना हुवो अर भलाई सुदामा कोई भी हुवो, पण चावळ री खीर तो थे ईज बणा'र खड़ाओला। मौको भी है अर दस्तूर भी।”

राधा री बात सुण'र सगळा लोगां सागै नूवै घर रा कमरा, बंदनवास्थां अर विंड चाइम ई हांसण लागगी।





मनीषा आर्य सोनी

अंतस रा आखर मोती

दुपारै री मीठी गैरी नींद रै लैरकै मांय पसवाड़ो फोरस्यो तो नींद थोड़ीक उघड़ी। देख्यो कै अँ दूर उभा, मधरा-मधरा मुळकता किणी सूं गैरै अर धीमै कंठ सूं बातां करता हा। नींद तो उचाट होयगी ही, पण म्हें निरी देर ताई उणां नैं नींद आळी भारी पलकां सूं निरखती रैयी। बारै होठां री मुळक म्हारै वास्तै सदा सूं ई मूंगो सौदो हो, जिको म्हें कदैई नीं मोला सकी। मोबाइल पर बातां करता थकां बारै चेहरै रा आवता-जावता मौळा भाव म्हारी निजरां नैं बांध लियो। मन काची कळी-सो कंवळो हुयग्यो। जी में आई कै जाय'र उणां रै कांधै पर माथो टिका'र घड़ी भर मांय सगळी जूण जी लूं। घर गिरस्थी री सगळी खैचळ अर दीन-दुनिया सै बिसराय बांरी बाथां मांय घड़ीक खुद नैं फूल मांय सुगंधी दायी समाय दूं। पण बै म्हारी निजरां सूं बेपरवाह आपरी धुन में बातां रै झोंक मांय सैंठै पेड़ आळै दाई झूम रैया हा। कदैई हंसता, कदैई मुळकता। कदैई आंख्यां रो फैलाव, कदैई पलकां रै भारी-भरकम मुखमली परदै नैं ऊंचोवता भेर नीचै करता। कदैई बादळ री गैरी गरज जिसो हुंकारो, कदैई बेग सूं आवती हंसी नैं मूँढै मांय माडाणी काठी दबावता—आह!

म्हें पिलंग माथै आडी-तिरछीसीक ऊंधी पड़ी बानैं निरखती रैयी। अक जबर रुबाव वाळै डील नैं चंचळाव री डोरी माथै सध्योड़े बाजीगर ज्यूं संभळ-संभळ'र चालतै देख रैयी ही। म्हारी पचास रै नेडै-तेडै री उमर, पण जी मांय अक प्रेम री धूंकणी चैताय दीनी, जिकै री फुफकार कानां ताई सुणीजण लागगी। म्हें मन मांय मुळकती सोचण लागी, वा अे रुक्मण! उमर री ढळती सिंझ्या मांय प्रीत रो किसो हगड़बोटियो चैतावण चाली है... ? अर खुद ही सरम सूं मुख मोड़'र पाछी पसवाड़ो फोर लियो।

जेठ री लांबी आळसी दुपारी मांय म्हें सूती-सूती अक उडीक सूं भरीजगी। आ बात जाणता थकां ई कै म्हें जिकां नैं इत्ती देर सूं निरखूं हूं, अँ म्हारा पति साहित्य-शिरोमणि श्री माधव प्रभाकर जी नैं कदैई म्हारै नीरस साथ री दरकार ई कोनी रैयी। म्हारो अर माधव प्रभाकर जी रो कोई जोड़ ई कोनी हो। म्हें खेजड़ी सरीखी खोखी रूखड़ी अर बै लकदक करता सौवणी मधु मालती री बेल। म्हारी पसवाड़ो फोरस्योड़ी उर्णीदी उडीक अकर फेर नींद री ओछी-मोछी पाळूंडी मांय डूबण री खैचळ करण लागी अर जाणै कद आंख्यां मींचीजगी। सुपनां अर खाली सुपनां री

'मधुबन', 2 ई 16, जयनारायण व्यास कॉलोनी, बिकानेर (राज.) मो. 9460173250

सोवन माछली नैं माडाणी पकड़ण री कोसिस मांय। चमक'र उठी तो देख्यो—सिंझ्या ढळण नैं आई। कमरै मांय सागी सून्याड बापरघोड़ी ही। अठी-उठी निजर घुमाई तो समझगी कै माधवजी कठैई बारै जा चुक्या हा। म्हैं उठ'र पिलंग सूं नीचै पग धरती जित्तै ई म्हारै फोन री घंटी बाजी—“आज रात नैं मोड़ो आवूंला, खाणो ई बारै ईज है। थे उडीकजो मतना...” म्हैं बिना किणी भाव रै फोन धर दियो अर सिंझ्या रै काम काज मांय जुटगी।

कोई अलायदो दिन कोनी हो आज रो। इण घर री सूनवाड़ सागै म्हारो भायलापो हुयग्यो हो। म्हैं निसंग घर मांय कदैई गुणमुण गावती, कदैई कामकाज करती डोलती फिरती रैवूं। घर रा कामकाज ई म्हारो साहित्य हो। म्हैं नित नूंवा तरीकां सूं बरतन सजा'र धरूं तो भी औ लागै कै वाह! अैं बासण तो छंद वाळी कविता जिसा बरोबट धरीजग्या अर मन मांय गुमान सूं भरीज जावूं। बस, इसा ई छोटा-मोटा कामकाज और इण घर रो सरणाटो ई म्हारा संगी-साथी है। घर रै हर कमरै रै मांय हर चीज रो अेक पोस्टल एड्स जिसे ठांव-ठिकाणो म्हारै रटीज्योड़ो है, पण बारै कमरै मांय जावती बगत म्हैं अेक अंजाण नगरी रै बासिंदै-सी लखावूं। छत तक ऊंची किताबां री अलमाख्यां सूं कमरो सैंठो भरीज्योड़ो हो। अेकै कानी पुरस्कार अर तस्वीरां सूं भीतां अटी पड़ी ही। किसो इश्यो पुरस्कार कोनी हो, जिको माधवजी नैं नई मिल्यो हो। हां, आ बात और है कै म्हैं बारी किणी हरख बेळा री कदैई सीर नैं कर सकी। पण नगर ई नई, आखै मुलक मांय माधवजी रो नांव जिकै आदर सागै लरीजै उणरै आगै म्हारै हियै मांयली कसक री कोई गिनार कोनी। अर आ बात साची है कै कठै बारो रुबाव अर कठै म्हैं! म्हैं तो खुद ई घणी बार उणां रै भाग माथै तरस खावूं कै विधाता नैं जोड़ दुकाणो कोनी आयो, पण विधि रै विधान नैं घणै मान सूं निंवण करूं अर म्हारै भाग माथै गुमेज करूं।

आधी रात बीतण लागी, पण अजै ताई बै घरां कोनी दूक्या। सोच्यो फोन करूं, पण फेर जाणै काई सोच'र रोज री तरियां आंगणै मांय कुरसी ढाळ'र बैठगी। उडीक म्हारी आदत सूं पर्यां जाय'र म्हारो सुभाव हुयग्यो हो। म्हैं उडीकती बगत घड़ी नैं देख्या करूं। म्हारै उडीक री घड़ी म्हारै मन री अवस्था सूं हालै। पैली निरी ताळ बारणै पासी टकटकी लगा'र बैठूं, फेर अमूज'र चक्कर काटूं। पाछी थक'र बैठूं, फेर फोन नैं बीस बार खोलूं—बंद करूं, जित्तै कार रो होरन सुणीज ई जावै। ब्यांव रै सताई बरस पछै ई बांनै देख'र अेक मीठी मुळक होठां माथै अजैई आवै।

आज कार सूं उतरा तो सागै अेक लुगाई भी ही। म्हैं हाथ जोड़'र अगवाणी करी तो बा भी आधी झुक'र म्हनैं नमस्ते करी। माधवजी बोल्या, “अैं सुषमाजी है, दिल्ली सूं पधार्या है अर रात अपां रै अटै ई रुकैला।”

म्हैं सुषमाजी रै आवलां-चावलां मांय लागगी। बांनै गेस्ट-रूम लेजावण लागी तो सुषमाजी घणी अपणायत सूं बोल्या, “नई सा, आज तो आप लोगां रै सागै ई रैवणो है। रात री अेक तो बजगी है, अबै कितोक बगत बच्यो है।”

सुषमाजी अणूता फूठरा। डीगा। भरवैं डील रा। गोरो-ऊजळो दिप-दिप करतो रंग। मन मनमोवणा नाक-नकस अर ऊपर सूं ग्यान रा भंडार। लागै, मां भगवती, सुरसती अर लिछमी, तीनूं री अपरंपार आसीसां भाग मांय लिखा'र लाया हा। म्हैं राप्यां काढती इत्तो ई बोल सकी, “आप लोग करो बंतळ, म्हैं चाय बणा'र लावूं।”

सुषमाजी म्हारै आडा फिरता थका बोल्या, “अरे अरे! आ काई बात हुई, आज तो म्हें चाय बणासूं, पैली थोड़ी देर अराम करलूं।”

म्हें इण बात सूं घड़ीक अचकचाईजगी। पैली बार घरै आया है अर सीधा रसोई तक जाय पूग्या? माधवजी आपरो मून तोड़ता सुषमाजी सूं बोल्या, “अरे! थे तो निरायंती राखो, आ बणावती रैसी चाय-पाणी सै, ल्यो आवो! थानै म्हारो स्टडीरूम अर लाईब्रेरी देखाऊं।”

सुषमाजी टंकोरी-सी खणखणावती हंसी सागै माधवजी रै लारै टुरग्या अर म्हें चाय-पाणी वास्तै रसोई कानी मुड़गी। ऊपर कमरै सूं हंसी-मजाक अर बातां री बोली सुणजती ही। माधवजी री हंसी बांरो सबसूं प्यारो रूप हो, जिकै सूं स्यात बौत कम लोग परिचित हा। हंसी इयां लागै ही, जाणै कोई गरजतै बादळ री आवाज किणी गैरी ऊंडी सुरंग मांय टकरा'र पाछी आवै। म्हें आखो दिन मंतरीज्योड़ी माधवजी नैं टुक-टुक देखती मैसूस करती रैवूं, म्हारै मून री सींव रै सागै। चाय गैस माथै चरचरावती उफणन लागी तारे पाछो चेतो आयो।

म्हें चाय अर नाश्तो-पाणी ऊपर स्टडी-रूम मे लेयगी। दोनूं जणा दुनिया-मुलक री किताबां री चरचा मे लाग्योड़ा हा। सुषमाजी खासा पढ्योड़ा लागता हा अर कम उमर मांय घणी बडी डिग्री लेय लीवी ही। म्हें चाय-पाणी सूं निवड़'र बां दोनूं री बातां री मून श्रोता बण'र किनारै पड़्यै स्टूल माथै बैठगी। गजब रा पड़तर देंवता सुषमाजी। कठै-कठैई तो माधवजी ढकीज जावता सुषमाजी रै ओज सूं। म्हें घणै इचरज मांय तो कोनी ही, पण अेक सोच में जरूर ही कै आपरी बात कैवण अर साबित करण री ताकत रै आगै सुषमाजी साम्हीं कोई कोनी टिक सकै। पण अेक बात समझ कोनी आय रैयी ही कै इत्ता गुणां री धणियाणी अर साव अेकली क्रियां! म्हें बां दोनूं री चलती बात बिचाळै बीच मांय म्हारी छोटी-सीक जिग्यासा धरी, “आप अेकला आया दिल्ली सूं अठै? सागै कोई...?”

म्हारी बात नैं बिचाळै ई काटता सुषमाजी माथै मांय सळ घालता अर फणफणावता बोल्या, “सागै कोई... मतलब? म्हारै सागै कोई रो होवणो जरूरी है?” अर फेर जोर सूं ताळी पीटता ठठा'र हंस पड़्या। म्हें फेरूं अचकचीजगी। ढीलो मूंडो कर'र माधवजी साम्हीं देखण लागी तो बै आपरी निजरां री भासा सूं म्हनैं समझाय दी ही कै दो घणा समझदार लोगां री बंतळ बिचाळै मूंडो काठो भींच'र बैठणो। माधवजी बात नैं सहज करण वास्तै बोल्या, “ल्यो, अेक चाय और... सागै कीं नमकीन भी लियाओ...।”

इण बिचाळै म्हें उडती निजर सूं सुषमाजी नैं फेरूं देख्या। बै म्हारै कानी निजरां गडा'र लगोलग देखता हा। जी मांय अेक अजब-सीक सळ पड़्यो। पण म्हनैं कोई खास फरक कोनी पड़्यो। म्हें तीखी-सी निजरां सूं हड़कावणै री आदी हूं। म्हें पाछी रसोई मांय आयगी चाय रै दूसरै दौर वास्तै।

दुपारै धाप'र नींद ले चुकी ही, तो नींद आंख्यां सूं दूर ही। दिनूगै सुषमाजी नैं बईर हुवणो है, तो सोच्यो कै कीं कोनी, आज रात जागण ई सही। सुषमाजी दिनूगै बगतसर त्यार हुय'र टुरग्या। जावता-जावता म्हनैं हाथ मांय आपरी लिखी अेक किताब देय'र गया। म्हें किताब लेवण रो सऊर जाणूं हूं। किताब लेय'र अदब सूं माथै रै लगायली। बै माधवजी कानी देखता थका बोल्या, “थे

मदद कर दिया कीं पढण में...” अर जोर सू सागी टणकारै-सी हंसी सागै म्हासू बिना रामा-स्यामा कर्यां गाडी मांय बैठग्या ।

सुषमाजी बईर हुयग्या, पण म्हारै चेतै मांय बांरी छिब तस्वीर मांय फोटू आळै दाई छपगी । आज छह-सात महीना हुवण नै आया है, पण म्हें अजै ई कामकाज करती बगत बांरै बांरै मांय सोचती रैवूं । माधवजी, सुषमाजी रै गयां पछै बांरो कोई जिकर म्हासू कोनी कर्यो, बियां ई म्हासू और किसा जिकर कर्या करै !

दिन बीतण लाग्या । माधवजी लारला दिनां सू आपरी सेहत नैं लेय 'र घणा लापरवा हुयग्या हा । हाथ मांय कलम री जग्यां फोन रैवण लाग्यो । फोन हाथ सू धरै तो आंख्यां मींच 'र सूय जावै । बोल-बतळावण तो सरू सू ई कोई खास कोनी ही, पण अबै तो जाणै अबोलो-सो ई होयग्यो हो । म्हें लारला सत्ताईस बरसां मांय कदैई उणां रै पढण री बगत नै आगै-लारै टळतां कोनी देखी, पण अबै तो ना लिखणो, ना पढणो । म्हें मांय सू घणी कसमसीजूं कै जाय 'र हक सू पूछूं कै काई बात है ? पण इतो काळजो कदैई रैयो ई कोनी । म्हें ई आजकाल डरूं-फरूं रैवण लागगी ।

आज ऊपर आळै कमरै सू माधवजी रै फोन पर किणी सू जोर-जोर सू बात करण री आवाज सुणीजी, तो बरामदै सू ऊपर देख्यो, पण कमरै मांय जावण री हिम्मत कोनी हुई । बै कमरै सू ई जोर सू बोल 'र म्हें चाय रो तकदो कर्यो । म्हें चाय बणा 'र कमरै मांय गई तो देख्यो, बै सगळै कमरै नैं आखळ-बाखळ कर्योडा कीं जोवता हा । म्हें पूछ्यो, “म्हें मदद करूं आपरी ?” तो परेशान हुयोडा रीस मांय बोल्यो, “थे थारी रसोई सांभलो जिकी ई घणी...”

म्हें दो घड़ी चुपचाप ऊभी रैई । म्हारै वास्तै बांरै परेशान हुवण रो कारण जाणनो ज्यादा महताऊ हो, नीं कै बांरा म्हें दियोडा अकरा मँणां । म्हें कमरै मांय खिंड्योड़ी किताबां उठावण लागी तो बै फेर बरज दी । म्हें बांरी परेशानी समझती थकी पाछी कमरै सू बांरै आयगी । पगोथिया उतरतां सोचण लागी कै लारलै साल-भर सू माधवजी अेक ग्रंथ 'लोक आस्थाओं में दर्शन योग' त्यार करण मांय लाग्योडा हा अर जग्यां-जग्यां जाय 'र बौत-सी जाणकारियां भेळी करी ही । निरा लोक देवतांवा रा भजन, पद, टीकावां रौ संग्रै अर बीजी घणी महताऊ जाणकार्यां भेळी करी ही । बै जद कदैई फोन पर किणी सू भी आपरै लेखन री बातां सीर करता, तो म्हें बै सगळा गीत-कवितावां मन मांय है ज्यूं री त्यूं कोर लेंवती, कठैई बीं बाबत ई तो कोई अडचन नई आई हुवै । मन कर्यो कै अेकर फेरूं जाय 'र बतळा लेवूं, पण जाणै काई सोच 'र मन मसोस 'र रैयगी ।

सुबै रो खाणो-पाणी निवड्यो ई हो कै डोरबैल बाजी । बारणो खोलतां ई साम्हीं वकील रामप्रसादजी ऊभा दीस्या । अेक छिण वास्तै जी मांय भतूळियो-सो उठ्यो । बियां तो रामप्रसादजी माधवजी रा खास बेली हा, पण दोनां रै कामकाज री तासीर मांय आभै-जर्मां रो फरक हो, तो कदै-कदास ई आवणो-जावणो हुवतो । बै घर मांय पग धरतां पूछ्यो, “कठै है म्हारो माधो ! आज म्हें फोन कर 'र कियां बुलायो ?”

म्हें साव अणजाण ही—इण सगळी रामलीला सू । म्हें ऊपर स्टडी-रूम पासी इसारो कर्यो कै आप खुद ई जाय 'र पूछलो । रामप्रसादजी पगोथिया चढता-चढता घणै हेत सू बोल्यो, “भुजाईजी, थे जितै थारै सूठ रै मसालै वाळी इस्पेसल चाय तो बणावो... !”

म्हें रसोई कानी मुड़ी जित्तै जोर रो धमीड़ो सुणीज्यो । म्हें भागती ऊपर गई तो माधवजी अचेत पड़्या हा । रामप्रसादजी बांनै सांभण मांय लाग्योडा हा । म्हें देख 'र जोर सूं बोल्या, “ स्यात हार्ट-अटैक आयग्यो आंनै, थे सांभो जित्तै म्हें एंबुलेंस बुलाऊं । म्हें हाक-बाक-सी हुयगी । कांई समझती, बांनै सांभती जित्तै माधवजी म्हारी बाथां मांय सरीर ढीलो नाख दियो । म्हें बांनै फंफेड़ती रैयी । चीखती-चिरळांवंती रैयी । कदैई हथाळी मसळती, कदैई छाती पर हाथ फेरती । थोड़ीक ताळ नै एंबुलेंस ई आयगी । रामप्रसादजी सगळी भागदौड़ कर 'र माधवजी नैं अस्पताळ लेयग्या । म्हें साव सूनी हुयोडी, घबरीज्योडी, कदैई माधवजी नैं देखूं, कदैई बारी पगथळ्यां मसळूं, कदैई माथै पर हाथ फेराऊं ।

अस्पताळ मांय जावतां ई डाक्टर इलाज सरू कर दियो । माधवजी नैं आईसीयू मांय भरती कर लिया । रामप्रसादजी सै व्यस्था कर दीनी ही अर इलाज सरू हुयग्यो । म्हे दोई जणा बारै बैठा हा, जद रामप्रसादजी म्हें पाणी री बोटल झिलावता बोल्या, “ भाभीजी, अबै घबराण जिसी बात कोनी, डाक्टर इलाज सरू कर दियो है । म्हारी डाक्टर साब सूं बात भी हुयगी है । थे ठावस राखो अर पाणी पीवो । ”

इतै अपणायत रो ताप मिलतां ही म्हारा आंसू पिघळ पड़्या । म्हें पल्लो मूंडे मांय दाब 'र फफक-फफक 'र रोवण लागी । रामप्रसादजी धीजो बंधायो अर म्हारै कनै खाली पड़ी जग्यां माथै बैठ 'र पूछ्यो, “ भुजाईजी, आ सुषमा कुण है ? ”

म्हारै बैवता आंसूडां माथै जाणै अचाणचक पाळ बंधगी । म्हें आंख्यां पंछ 'र रामप्रसादजी रो मूंडो जोवण लागी । म्हें हैरान होय 'र पूछ्यो, “ सुषमा... ? क्यूं ? सुषमाजी रो थे अवार कियां पूछ्यो ? कांई हुयो ? ”

रामप्रसादजी नस नीची घाल 'र बोल्या कै सुषमा, माधवजी सूं लंबै समय सूं जुड़योडी ही । फेसबुक सूं हुई पिछाण आळी-खासी दोस्ती मांय बदळी अर फेर बा थारै घरै भी आयी । जिकै दिन बा घरै आयी उण रात बा माधवजी री लाइब्रेरी सूं केई महताऊ दस्तावेज अर बांरा लिख्योडा केई आलेख अर कवितावां, जकी प्रकाशित होवण वाळी ही, बै सब चोर 'र लेयगी अर अबै लारला केई दिनां सूं फोन करणो-उठावणो भी बंद कर दियो अर इतो ई नई, बीं सगळै लेखन मांय सूं ज्यादातर बा आपरै नांव सूं छपवाय ई लियो है । माधवजी जद सुषमा सूं बात करणी चाई तो बै वाट्सऐप चैट नैं जगजाहिर करण री धमकी देय 'र फोन माथै संपर्क ई खतम कर लियो । आज सुबै साणी अखबार मांय जद बांनै साहित्य अकादेमी रो पुरस्कार मिलण री अखबार मांय खबर बांची तो माधवजी औ धोखो सहन कोनी कर सक्या अर दिल रो दौरो पड़्यो । लारला केई महीनां सूं माधवजी डिप्रेसन री हालत मांय हा । म्हें बै सुषमा पर केस करण रै बाबत ई आज बुलायो हो, पण बांरी मानसिक हालत आज ठीक कोनी ही । बौत गहरै सदमै में हा । म्हें आ पूरी बात बतावती बगत ईज बांनै अटैक आयग्यो । म्हें चिड़ी रै बचियै आळै दांई बाको फाड़योडी सगळी रामकाहणी सुण रैयी ही । रोवतां-रोवतां होठां माथै मुळकाण आयगी । ठंडी सांस लेय 'र मूंडो पल्लै सूं पूछ्यो अर रामप्रसादजी पासो देखती बोली, “ भाईसाहब, थे तो केस करण री तयारी करो, बाकी बात माधवजी रै ठीक हुयां पछै करसां । ”

रामप्रसादजी म्हारै कानी बौत सम्मान भाव सागै देख्यो अर हाथ जोड़'र अस्पताळ सूं बईर हुयग्या। म्हें माधवजी अर सुषमा रै मेळमिळाप सूं अणजाण कोनी ही, पण सुषमा रै कळूँतें मन री तो कल्पना ई कोनी करी ही। पण हाल री घड़ी मांय म्हें पूरो ध्यान माधवजी री सेहत कानी लगा राख्यो हो। म्हें आईसीयू रै बारै चक्कर काट रैयी ही, जित्तै ई डाक्टर अर नर्स री बधती हळचळ म्हारो ध्यान फुरायो। म्हें नर्स नें रोक'र पूछ्यो तो बा बतायो कै माधवजी नें पैरालिसिस रो अटैक आयो है अर सरीर रो जीवणो हिस्सो काम करणो बंद कर दियो है। म्हें भाखर ज्यूं जड़ होयगी। दो छिण मांय खुद नें सांभ'र रामप्रसादजी नें पाछो फोन लगायो। रामप्रसादजी ऊंधापगां दौड़ता ई आया। हालत गंभीर ही, पण जाणै कठै सूं आतमबळ आयो कै म्हें कमर मांय पल्लो खसोल'र माधवजी कनै जाय ऊभी। बै अचेत हा, पण म्हें मौत अर माधवजी रै जीवण रै बिचाळै आडी भींत ज्यां ऊभी ही। माधवजी इती माड़ी-सीक घटना सूं इयां हार कोनी सकै। अेक परबत नें आवती-जावती बादळी इयां बैवा कोनी सकै, खतम कोनी कर सकै। हाल तो माधवजी रो सै सूं महताऊ ग्रंथ दुनिया साम्हीं आवणो बाकी है, अजै तो केई काज साजणा बाकी है। जीवण रै अेकाअेक पलटो खावणै सूं सो-कीं खिंडग्यो हो। बस, जी रो हौसलो म्हारै सागै हो। म्हें दिन-रात माधवजी रै सागै ही—दवा-दारू, सेवा-चाकरी री सै सींवां तोड़ती बस अेकर फेर माधवजी नें साजा-ताजा देखणा चांवती ही।

जिंदगी रा अजब-गजब खेल देख रैयी ही। मन नें सैमूदो निरमळ कोनी कर्यो जा सकै, आ लारलै दिनां मांय आछी तरियां समझगी ही। सगळी जूण बांझपणै रो दाळद धोयो, क्यूं कै माधवजी नें बाळकां सूं कोई मोह ई कोनी हो। इयां रै वास्तै टाबर लिखण-पढण मांय बाधा रो अेक कारण भर हा। म्हारी प्रीत लगाव कदैई म्हनै बां सूं आगै पग कोनी धरण दियो, हमेस बै ईज सबसूं पैली रैया। आजकाल मांय स्यात अस्पताळ सूं छुट्टी भी मिल जासी, पण मन रै कळसियै माथै पड़ी मोच पड़णी ही जकी तो पड़गी।

अस्पताळ सूं घरां आयां पछै माधवजी रो खाली स्वास्थ्य ई नई, आतमबळ अर गुमेज सै ढळग्या। म्हें सेवा-चाकरी मांय कसर कोनी छोडी, पण बै म्हनै सैयोग कोनी कर सक्या। फोन कानी सैलंग देखता रैवता, जाणै किणी री अडीक ही। पण लकवै रै पछै बोली मांय हकलाव रै चालतां ना बोलीजतो अर ना ई कोई खास दूसरा फोन आवता। म्हें सूप लेय'र जियां ई कमरै मांय मुड़ी कै फोन री घंटी बाजी। फोन रै दूसरी पासी सूं सुषमा री आवाज आई। बोली, “म्हनै नोटिस भेजायो है? म्हें भी ईंट रो जबाब भाटा सूं देवणी जाणूं।”

म्हें सुण'र हंसण लागी। म्हें बोली, “आप सक्षम हो, ग्यानी-ध्यानी हो, सो कीं भी कर सको हो, पण आप जिका पाना लेय'र गया, बै सगळ ई अधूरा हा, आपरी किताब अर पुरस्कार दोन्यां नें चुनौती है। हर पानै रो आगलो पानो म्हनै मुखजबानी याद है। या तो थे माफी मांगो, नई जणै म्हें साबित कर सकूं कै बै सब माधवजी री मौलिक लेखणी है अर बाकी कमी बेसी कोर्ट मांय पूरी कर लेसां।” सुषमाजी रीसां बळता फोन पटक दियो। म्हें माधवजी कानी देख्यो। बै सरम सूं निजरां फेरली अर म्हें अंतस ताई चिरीजगी।

महीना बीतता रैया। कोर्ट केस री लंबी लड़ाई भी म्हें जीतग्या। माधवजी अेकर फेर साहित्य जगत मांय आपरी आभ सागै पळकता हा, पण होळै-होळै म्हारै अर माधवजी बिचाळै

अबोलो और बधण लागग्यो हो। मन रै मांय बांनै लेय 'र करुणा रो भाव हो, पण प्रेम री पांखड़ी पीळी पड़ण लागगी ही।

म्हें आज निरा दिन बाद बांरै स्टडी-रूम मांय गयी। अेक-अेक किताब नैं सावळ निजर भर-भर देखी। अै ईज बै किताबां ही, जिकी म्हां दोनूं रै बिचाळै कोस भर री दूरी कर दीनी। कमरै मांय किताबां, किताबां मांय आखर, आखर अर आखर, पण कठै हा बै अढाई आखर जिका जूण सुधार सकता हा। बै आखर कांई खाली पोथ्यां मांय बंद हा? म्हें जिण अढाई आखरां मांय जूण अलूणी करी, बै ईज अढाई आखर माधव जी कोरा कागदियां पर मांड मांड'र दुनिया मांय लूँठा लिखारा बणग्या। तिरस तो कोई री कोनी बुझी। म्हें प्रेमजळ लियां उडीकती रैयी अर बै ठौड़-ठौड़ मिरगलै दांई भाजता रैया।

म्हारी निजरां साम्हें माधवजी री लिख्योड़ी आधी-पुधरी केई कवितावां मेज पर धरी ही, जिकी बै सुषमाजी नैं अरपण करतां थकां लिखी ही। जिण मांय देह अर रूप नैं परोटता भारी-भारी सबद लिख्योड़ा हा। सुषमाजी अर माधवजी री ई दबी-लुकी प्रेमकथा रा अै आखर चुगली करै हा। म्हें उण अधलिखी कवितावां नैं भरी आंख्यां सूं देखती गयी अर पसवाडै पड़ी कलम उठाय 'र बां कवितावां रै पागती साची अर खरी पीड़ सूं म्हारा अंतस रा मोती लिखण लागी। म्हें आगै सूं आगै प्रीत रा साचा अर छूट्योड़ा मरम कोरती गयी। पैली बार म्हें माधवजी रा आखरां रै सायरै म्हारी हियै री हूस रो मरम लिखती जाय रैयी ही। म्हें लिखी—म्हारै सूनै आंगणै अर निपुताई री दंस री पीड़, म्हारी अलूणी रातां री खारी ज्हेर हुबाड़। म्हें लिखी—म्हारै माथै लगायोड़े कळूँटै नासमझणी रै दाग री काळख। सै लिख 'र कलम तोड़ 'र नाख दी—जियां मौत रै फरमान नैं लिख 'र जज आपरी कलम तोड़ देवै। म्हें ई अेक मजबूत रिश्तै री मौत रा आखरी आखर लिख्या हा। म्हें स्टडी रूम मांय अेकली ऊभी म्हारै होवणै नैं अरथावण री खैचळ करती रैयी। सोचती रैयी—कोरा आखर बिना साचै प्रेमभाव रै मुरदै समान है जिण मांय आतमा रो वास ई कोनी। म्हें सगळा कागद माधवजी रै हाथ मांय लेजाय 'र धर दिया। बै म्हारी लिखी कवितावां नैं बांचता रैया, कदैई म्हनै इचरज सूं देखता अर कदैई आंख्यां सूं आंसू ढळकावता। धूजता हाथां मांय पाना नई, म्हारी पीड़ रा सवाल लिख्योड़ा हा, जिण रा उत्तर माधवजी कनै कोनी हा।

ग्यान रो सागर आज मून हो।





संतोष चौधरी

मोतिया आब

आज करमसर ठिकाणै री बडी हेली मांय नूवै उच्छब रो दरसाव दीखै हो। बारली पोळ सूं लेय 'र हेली रै ऊणै-खूणै नै नूंची बीदणी-सो सजाईज्यो हो। हेली रा कामदार आप-आपरी ड्यूटी उछव सूं निभावता निजर आवै हा।

“हाथ टूट्योड़ा है काई थारा, बेगो-बेगो हाथ चला। हाल पोळ रै बारै पासै ई बुआरी काढणी है थनै...!” हाथां सूं अर होठा सूं सगळा री निगैदासती करता काकीसा आज उच्छब मांय हेली रै इण पासै सूं उण पासै ताई चकरी-सी फिरबा लाग रैया हा। बांरी मधरी मुळक अर चैरा री चमक आज जाणै सौ गुणा बध्योड़ी ही। पूरी हेली मांय चैळ-पैळ अर आव-जाव रो रेलमपोळो लाग्योड़ो हो। हेली रा सैंग कामदारां री आज बेजा ई सखती सूं भागदौड़ हुवण लागरी ही।

काकीसा रै हरेक हेलै सागै नायण मां रो जी ओकचोक हुवै हो। नायण मां बरसां सूं हेली री रसोई री सार-संभाळ करणियां हा। आज काकीसा नीं जाणै कित्ता तो पकवान बणावण री तैयारी करी है। आज ई क्यूं, लारलै हफ्तै भर सूं काकीसा नायण मां सागै लाग 'र तरै-तरै री चटणियां, खीचिया, पापड़, दाळबड़ा, दहीबड़ा, लापसी, कैर-सांगरी री सब्जी, पुडियां, दाळ रै सीरै री पैलां सूं ई त्यारी मांय लाग्योड़ो हा। दो बारी तो छोटोड़ा काकोसा नै नेड़लै स्हैर भेज-भेज 'र तरै-तरै रा फळ-फ्रूट अर मिठयां मंगवाय 'र राखली ही। साधन संपन्न हेली मांय किणी बात री कमी तो ही कोनी। ठिकाणै मांय ओछत ही तो मिनखां री, टाबरां री। चार भायां रै परिवारां बिचाळै फगत म्हे दो भाई-बैन।

आज आ सारी खैचळ काकीसा अक्षय सारू करता हा। अक्षय म्हारो बीरो, छोटो भाई, काकोसा रो बेटो। काकोसा-काकीसा रो गोदनांव रो बेटो, पण सगै सूं ई बत्तो लाडको अर जीव री जड़ी हो अक्षय। काकीसा री तपस्या रो फळ डॉ. अक्षयसिंह राठौड़।

आठ बरसां रै लांबै अर सूनै बरसां पछै आज हेली मांय अक्षय रो आवणो हो। म्हारै ब्यांव रै टाणै ईज अक्षय रै डाक्टर री पढाई रा सेमेस्टर इम्तहान चालता हा जणै उणरै आवण रो संजोग बैठ्यो कोनी हो।

काकीसा रो रू-रू जाणै आज खुशियां मांय हळाबोळ हो। बांरी अँड़ी मुळक अर आवाज री उंतावळ मांय बिखरती हांसी में आखरी बार कदै देखी ही, म्हनै चितार कोनी आई।

अक्षय नैं सागै लेय 'र दोनूं काकोसा जियां ई आपरी स्कोर्पियो नैं पोळ री फाटक साम्हीं लाया अचाणचक पोळ सूं हेली रै आंगणै ताई जाणै सैंगां रै मन रा भावां रो मिल्यो-जुल्यो रूप ज्वार बण 'र बाँरै आयग्यो। धोक, सलाम, भरी आंख्यां सू आसीसां री झड़ी सागै निजर उतारण सारू लूण-मिरच री सैंग खैचळ कर्यां पछै अक्षय नैं काकीसा अर नायण मां उपराथळी पुरसगारी कर-कर 'र जिमायो। अक्षय रै मनभावती हरेक चीज उण सारू हाजर ही। आपरै लाडेसर सारू बरसां रै रोक्वोडै लाड नैं काकीसा अेक ई दिन मांय जाणै पूरो कर लेवणो चावै हा। ब्यांव पछै जतिन, म्हारै पतिजी रै सासरै आवण री टेम भी बरस दो बरस मांय औ लाड म्हारै अर बाँरै भी पांती आवतो हो, काकीसा तो जीव रा बियां ई व्हाला घणा हा। पण आज अक्षय री ओवर ईटिंग अर दुळ्ळतै लाड माथै म्हें घणी हंसती रैयी। अक्षय बस आपरी मा 'सा रै लाड नैं निरखतो रैयो।

जीमा-जूटै सागै भरपूर हथाई रो दौर चाल्यो अर थकैलो उतारण सारू सैंग जणा दोपारी री नींद ई लेयली। सिझ्यां नैं चाय पियां पछै अक्षय आपरै बैग मांय सू सैंगां सारू लायोडा तौफा दिया। हेली रा मुखिया म्हारा काकोसा सूं लेय 'र काम करण वाळै छोटै सूं छोटै नौकर नैं ई अक्षय कीं-न-कीं तौफो जरूर दियो। म्हें निजर आवै हो—काकीसा आपरै लाडेसर री भलमंसा माथै मन-ई-मन मांय थुथकारो घालै हा अर जोगमाया री मैर नैं निवण करै हा। धरती माथै पड्यै बीज रो विगसाव कित्तो चोखो निखरसी, आ तो बीज री रुखाळी करणियै रै वैवार सूं ईज दिख जावै। म्हारै परिवार रा चोखा संस्कारां माथै मन-ई-मन म्हें ई गर्वित भाव सूं भरीजगी ही।

अेक हळको गुलाबी रंग रो गरम शॉल निकाळतो अक्षय काकीसा साम्हीं जोवतो बोल्यो, “मां, म्हें औ शॉल आईमां सारू लायो हूं। म्हें वां सूं अबार मिल 'र धोक देय 'र आवूं...।”

काकीसा रै चेहरै माथै रीस री लकीरां सागै पसाव पळकण लागग्यो। पैलां तो बै अक्षय नैं बरज दियो कै कठैई जावण री जरूरत कोनी... पण अक्षय री असमंजस देख 'र काकीसा रीस मांय साफ-साफ ई कैय दियो, “लाडेसर! कठैई जावण री जरूरत कोनी अर उण टूणा-टोटका करबा आळी डाकण रै अटै जावण री तो दर में ई जरूरत कोनी...।”

अक्षय हाकबाक हुयोडो शॉल हाथ मांय ई लियोडो कीं ताळ तो आंगणै मांय ऊभो रैयो, पछै बोलो-बोलो शॉल नैं पिलंग माथै धर 'र डागळै माथै चढग्यो। उणनै तो टाह ई कोनी हो कै इत्ता बरसां मांय अटै काई-काई हुयग्यो है!

नायण मां ठाडै-ठाडै आमरस री गिलासां लेय 'र आयग्या। काकीसा रै चेहरै माथै अजै ताई रीस री अणमणाट दीखै ही, पण लाडेसर सारू मन ममता वीण रीस माथै भारी पडगी। म्हें गिलासां पकडावता बोल्यो, “जा शिवू, अक्षय नैं आमरस झिलाय आव। किती देर सूं अेकलो डागळै माथै बैठो है!”

म्हें गिलासां लेय 'र डागळै गई। अक्षय मूडो उताखोडो छत माथै पड्यै मुड्डै माथै बैठो आईमां री हेली साम्हीं ई कातर निजरां सूं जोवै हो। म्हारै आवण री आहट सूं सीधो बैठ 'र म्हारै मूडै साम्हीं जोवतो बोल्यो, “अटै सब नैं काई हुयग्यो है जीजा, क्यूं सब अेडो ओपरो वैवार करै! ...म्हें आवती बगत ई आईमां सूं मिल लेंवतो, पण छोटोडा काकोसा बांरी हेली आगै गाडी रोकी ई कोनी अर अबै मा 'सा ई क्यूं अेडी अबखी बात करै हा... ?”

“थूं घणा बरसां पछै आयो है नीं बीरा, जणै अठै औ सब देख 'र थनै ओपरो लागै, चिंत्या ना कर, कीं दिनां मांय आदत पड़ जासी, ले थारै पसंद रो ठंडो टीप आमरस पी!”

बेमन सू गिलास हाथ मांय लेंवतो अक्षय बोल्यो, “कोई और सू बैसी म्हें तो आपनै जाणूं जीजा, बताओ काई हुयो इत्ता बरसा मांय?”

म्हें चुप देख 'र पाछो बोल्यो, “जीजा, आईमां हमेस कैवता हा कै खुद सारू तो जीवां तो काई जीवां, जीवो तो हजारू दूजां सारू जीवो! बै म्हारी प्रेरणा है। म्हें कदैई नीं भूल सकूं कै गांव मांय कोई रै ई बीमार हुयां पछै बीस-बीस किलोमीटर रो कच्चो मारग पार कर 'र स्रैर जावणो पड़तो हो अर नीम हकीमां रै फेर मांय ई कित्ता ई जणा आपरी जान सूं गया परा। इण सारू स्रैर री चकमक ई म्हें नीं भरमा सकी। म्हें अठै ई अेक अस्पताल बणावणो चावूं, पण अठै रो सेंग माहौल इत्तो ओपरो क्यूं है जीजा?”

अक्षय रै इण सवाल सागै ई म्हारी चितार मांय बरसां पैलां रो गांव अर गांव रा हालात आयग्या। स्मृतियां म्हारै सबदां रो सहारो लेय 'र बायरै ज्यूं बैवण लागी।

टेम रै अेक पसवाडै मांय म्हारा दादाजी अर आईमां रा ससुरोजी रो भायलापणो गांव मांय बाजींदो हो। दादाजी बडी हेली रा कुंवर हा तो बै छोटोड़ी हेली रा कुंवर हा। दोनुवां रै अेकै दांत रोटी टूटती ही, पण राजनीति रो चस्को अर कुरसी रो लालच भलां-भलां रै रिस्तै मांय ज्रैर घोळण रो काम कर्यो हो। आं भायला माथै ई परिवारां री गुटबाजी रो असर पड़यो। प्रधानगी रै चुणाव मांय दोनूं आम्हीं-साम्हीं हुया अर आम्हीं साम्हीं ई अैड़ा हुया कै पछै कदैई सागै अेक थाळी में चळू कोनी कर्यो।

आईमां रै सुसुरोजी आपरै बेटे नैं डाक्टर बणाबा सारू खैचळ करता हा अर इण आस मांय बेटे नैं स्रैर भणाई सारू भेज्यो। बै तो डाक्टर बेटे नैं अडीकता-अडीकता ई राम करग्या... अर दोयं बरसां पछै जद डाक्टर बाबू गांव आयोड़ा हा अर म्हारै दादाजी री ई तबियत खराब हुई तो समाचार हुयां पछै ई आपरी स्रैरी टिम-टाम मांय बै दादोसा नैं देखण आया जित्तै म्हारा दादोसा ई राम करग्या। दादीसा सुहाग दुख मांय कळपता-कळपता कैय दियो कै जको आपरै बाप रै मरणै माथै टेमसर कोनी आयो, बो म्हारै दुख मांय कठै सूं आडो आवैला। अर उण टेम सूं दोनूं परिवारां मांय हर तरै रा संबंदां रै खातमै री घोसणा हुयगी।

इणी बिचाळै डाक्टर बाबू रो सत्ताजोग सूं ई ब्यांव तय हुयग्यो, भणियै-गुणियै डाक्टर नैं कीं सोचण-समझण सूं पैला ई आपरै मा'सा रै आदेस री पाळणा करणी पड़ी अर भणी-गुणी बींदणी सुहासिनी शेखावत बांरै आंगणै मांय पाजेबां री रुणझुण सागै कुंकुं पगल्या मांड दिया।

नख लगावतां मैली हुय जावै, अैड़ी बींदणी रै रूप री चरचा आखै गांव मांय सेंगां रै मूंडै ही। आ तो पछै ठाह पड़ी ही कै सुहासिनी रै बाबोसा रो रूं-रूं दिखावटी ठकुराइ लारै करजै मांय आयग्यो हो, जणै उणरी अेक ऊंचै घराणा मांय तय हुयोड़े सगपण छूटग्यो हो। उण रा मा'सा औ आघात नीं झेल सक्या अर मजबूरी मांय सुहासिनी रा मामोसा समझदारी सूं काम लेंवता आपरै सासरै रै अळमै लागता इण परिवार मांय जोड़-तोड़ बैठाय उणीज मौरत माथै ब्यांव रो जोग बैठाय दियो हो।

चम्पा-सी कंवळी कळी सुहासिनी पंदरा दिनां मांय ई सालिगराम भाटै जैड़ा डाक्टर सूं बंध'र छोटोड़ा कंवराणी रै नांव सूं गांव भर मांय सैंगां री जुबान माथै चढगी ही ।

“रूप रो डळो है डळो कंवराणी सा तो...”

“आंख्यां जाणै मिरगानैणी...”

“शेखावाटी रो पाणी है बाईसा, रूपाळी पूणी ज्यूं...”

जित्ता मूंडा, बित्ती बातां ।

आसीसां सागै मुंहदिखाई माथै सुहासिनी री झोळी मांय खोपरो अर अेक सौ अेक रुपिया धरता सरपंचगी री घरआळी बोली, “नेडै-नेडै चोखळां मांय अैडी रूपाळी बींदणी कोनी आया सा, डाक्टरां रा तो भाग ई खुलग्या...!”

सरपंचणी सूं टेढी चालण वाळी अेक जणी इती देर मांय ई सुहासिनी री सासू ठकुराणीसा सूं आंख्यां टमकारती बोली, “सुणी है कै बीनणी रा बाबोसा माथै करजो घणो हुयग्यो हो जणा औ रूप थारै पल्लै आय पड़्यो, साची है काई ओ आ बात ? दायजो दिरीज्यो है या लिरीज्यो है... ?”

भरी लुगायां बिचाळै जाणै कोई बम रो धमाको कर दियो हो, क्रीत चीज हो या मिनख, जका रो मोल लाग जावै, पछै उणरो कैडो सन्मान, कैडी कदर ! जका लोकचार, समाजू नियम आपरै समाज सूं निरवाळा या अबखा हुवै बांनै बिना सही गलत री पिछाण कस्यां नकार देवणो ई तो भारत रै आम जण-मन री रीत है ।

ब्यांव रै कीं दिनां पछै ई डाक्टर प्रेक्टिस सारू पाछा स्रैर चल्या गया । डाक्टर रै हफ्तै-महीनै सूं गांव पाछो आवण रो सिलसिलो धीरै-धीरै मंधरो पड़तो गियो अर महीना कद बरस मांय बीतण लागग्या किणनै ई याद कोनी रैयो । याचक ज्यूं कंवराणी भर्योड़ी आंख्यां सूं कागद-पत्री लिखती, पाछी ई अडीक राखती कै डाकियो कीं समाचार लावै, कदास डाक्टर नै स्रैर सागै लेजावण सारू याचना करती, पण पाषाण हिरदै वाळै पुरुष रै अंतस ताई बा नीं पूग सकी ।

कंवराणी सुहासिनी अबै हेली मांय अेकली रैयगी । सूनी हेली जाणै बटका भरती ।

मूंडै जित्ती बातां कै स्रैर मांय डाक्टर कोई दूजी डाक्टरणी रै सागै गिरस्थी ठावी करली है । आं बातां मांय साच कित्तो हो, आ तो राम ई जाणै, पण हेली मांय सुहासिनी रो जीवण दूभर हुयग्यो हो । मोळी रैवती तो सासू रा बोल सुणना अर थोड़ीक बण-संवर जावती तो ई सासू रा मैणा सुणना । बाकी कसर आड़ोस-पाड़ोस वाळी चाची-बायां पूरी कर देंवती ।

दो-तीन बरसां पछै सुहासिनी खुद री सुध लेवणी सरू करी । खेतीबाड़ी री कमी नीं ही । कमी ही उणनै संभाळण वाळा मिनखां री । पण सुहासिनी आपरी कमर कसी, ट्यूबवेल अर अनार रा बगीचा बटाईदारा नै सूंप्या । रात-दिन आपरी निगैदासती मांय खेत, घर, बाड़ा, धावां री सार-संभाळ सरू करी । बगीचै रो विगसाव कर 'र गांव रा टाबरां सारू खेलण री जर्मी त्यार करवाई । स्कूल री हर छुट्टी वाळै दिन टाबरां सागै रळमिल जावती, बां सूं बतियाती । बांरी स्कूल रा सबक पूछती, साफ-सफाई रो महत्त्व समझावती, टाबरां सारू नेडलै कसबै सूं ज्ञानवर्धक किताबां मंगवाती, टाबरा नै खेलण सारू बैट-बॉल, फुटबॉल दिरवाती । हिंदी, अंग्रेजी अर संस्कृत रा सबद हुवो, लोक कहावतां हुवो या सिलोक अर सरगम हुवो, सैंग टाबरां नै सिखावण री खैचळ

करती। टाबरा री मंडली ई सुहासिनी सू घणी राजी रैवती। फळ-फूल, पंखेरू, जिनावर सैगां रा नूवा-नूवा सबद अर भूगोल री नित नूवी जाणकारी सू टाबरियां आपरै ज्ञान री झोळी भरता जावता। टाबरां नैं गुड़-चिणा अर फळाहार करावती।

सुहासिनी रा सासूजी दिन लाग्यां बूढा होवता गया अर अब बै फगत ठौड़ रो ठांव रैयग्या। बै ई देख लियो कै बांरो बेटो अबै स्यात ई पाछो आसी अर कदै-कदैई मन ई मन मांय अपणै आपनैं सुहासिनी री गुनैगार ई समझता, पण करमां माथै किणरो जोर चालै, जको बांरो चालतो।

अचुम्भो तो जद हुयो कै बालमंडली रो गणेशो अेक दिन पणघट सू आवती आपरी बाई नैं रोक'र कैयो, “अम्मा! प्लीज कम फास्ट, आई वॉट टू इट समथिंग, बिकोज आई एम हंगरी...” गणेशा री अंग्रेजी मांय गिटर-पिटर सुण'र सगळी साथ वाळी लुगायां पल्लो मूंडै मांय लेय'र हाक बाक रैयगी अर गणेशा री बाई अंग्रेजी भासा नैं नों जाणै काई-काई कैवण लागगी।

नैना-मोटा टाबरिया सारू सुहासिनी अबै आईमां बणगी ही।

आईमां रो सान्निध्य म्हां दोनूं भाई-बैन नैं ई खूब भावतो। म्हारा परिवारां बिचाळै रिस्ता सहज कोनी हा, तो ई म्हे दोनूं भाई-बैन बालमंडली मांय भैळा रळ ई जावता। बालमंडली रै खेल मांय ई अेक बार आईमां कुकरियै रै घाव माथै नीमडो घस'र लगावता अक्षय नैं डाक्टर बणबा रो सुपनो दिखायो हो। अक्षय री लगन नैं देख'र पछै काकीसा ई आपरै जीवण रो धेय ई इण बात रो बणाय लियो हो कै चायै कीं भी हुय जावै, अक्षय अेक दिन डॉ. अक्षय राठौड़ जरूर बणसी। इण धेय लारै काकीसा रो स्त्रीजनित ईसको ई हो कै जठै आपसू कमती ठिकाणा रो टाबर यानी सुहासिनी रो धणी डाक्टर बण सकै तो म्हारो लाडेसर क्यूं नों डाक्टर बण सकै!

कीं टेम पछै म्हारा पिताजी, जका सरकारी अधिकारी हा, बांरो तबादलो बडै स्हैर मांय हुयो जणै अक्षय बां सागै स्हैर मांय भणबा सारू म्हारी माईमां अर पिताजी सागै गयो, पण म्हें गांव मांय ईज रैयी। माईमां सू बेसी काकीसा री म्हें लाडकी ही अर म्हारो ई मन बां सागै ईज घणो रळतो हो। काकीसा तो अक्षय नैं ई अळगो कोनी करता, पण अक्षय नैं डाक्टर बणावण सारू बै आपरै काळजा नैं वजर रो कर लियो हो।

आईमां म्हेनैं अणूता ई मनभावता लागता हा। बांरी उठ बैठ, बातचीत रो लहजो, साधारण लहंगा-चूंदड़ी नैं इतै तरीकै सू पैरणो कै म्हें बस बांनै देखती जावती। बोली मांय अेक गैराई अर अदब अर बांरो मनपसंद मोतिया गुलाबी रंग, जको फगत म्हेनैं ईज ठाह हो। बै म्हेनैं अणूता ई व्हाला लागता हा।

आईमां मोतिया गुलाबी रंग री हरेक चीज नैं सहेज'र राखता। अेक दिन म्हें पूछ्यो बांनै, “आईमां, आपनैं औ मोतिया गुलाबी रंग इत्तो क्यूं पसंद है?”

बै बोल्या, “जद ई म्हें इण रंग रो कोई बेस पैरती, म्हारा मा'सा म्हारी निजर उतारता अर थुथकारो घालता कैवता कै पवितर मोती-सी सुहासिनी, मोतिया गुलाबी रंग री म्हारी परी।”

म्हें अेक मोतिया रंग रो खिल्योडो गुलाब ई गमलै सू तोड़'र आईमां री हथेळरी मांय रख दियो, गुलाब नैं आपरी हथेळी बिचाळै लेंवता आईमां री आंख्यां री कोरा आली हुयगी।

आईमां री देखरेख सू ठाकुर काकोसा री घर, बाड़ी, खेत-खळां मांय लिछमी आपरो भरपूर वासो कर लियो हो। बा कैवै ज्यूं आईमां सागै ई लिछमी लावणै ई आई ही।

धान-चून, फळ-फ्रूट, साग-भाजी सूं खेत बगीचै री जमीन हरी-भरी दीखती। डावड़ी सागै जद सुहाग सिणगार कर आईमां आपरै खेत अर बागीचै मांय फेरो देवण जावता तो जाणै साख्यात लिछमी दीखता।

गांव-गवाड़ मांय इण रूप, गुण, ज्ञान अर वैभव सूं ईसको राखणिया ई कम नीं हा।

बैर राखणिया नैं मौको लाध ई जावै, कै कीकर ई कोई अक गलती तो आईमां री साम्ह्नीं आवै अर बै इण बात रो गूंगदो बणावै। नाडो-जाडो करण नै जावती आईमां री सासू नैं जहरीलो सांप लागग्यो। गांव भर मांय हाको मचग्यो हो। जित्ता मूंडा, बित्ती बातां कै बडी ठकराणी नैं तो डस 'र तो सांप ई खोटी हुयो च्चैला, पण आईमां तो आपरा जतन करता ई हा। जित्तै ई कोई पान उतारणियै भोपे हरिनारायण रो याद दिरवायो कै काल ई तो गांव री कांकड़ माथै हरिनारायण नैं मंतर-जंतर बोलतां सुण्यो है। हरिनारायण मन लहरी मिनख हो। लोग कैवता हा कै उणरै हाथ नैं जस है, मरतै मिनख नैं बैठो कर देवै अँड़ी उण कनै विद्या है, पण हरिनारायण रो मन पाधरो हुवणो चाईजै। बिना मन बाढी पर ई नीं मूतै जैडो है। हर तस्यां रो सांप-बिच्छू रो ज्जैर उतारण रो तो सिद्धहस्त हो। दान-दखिणा कीं नी मांगतो हो। देवै जिणरो भलो, नीं देवै उणरो ई भलो। भोळैनाथ रो पुजारी हो, सैंग उणनैं मानता देवता हा।

पान लागण री खबर हरिनारायण नैं कोई कर दी ही। डीगै अर पतळै गठ्योडै सररी रो धणी हरिनारायण ढाडी बधायोडो, गेरुआ गाभा पैर्योडो आपरी सधयोडी चाल सूं आंगणै मांय आयग्यो हो। जटै थोड़ीक देर पैलां आईमां री सासू नैं गंगाजळ मूंडै मांय देवण री खुसर-पुसर चालू हुयगी ही, बटै ई अबै भोपो मंतर्योडै पाणी सूं मन ई मन मांय कीं फुसफुसाट करतो सांप रो दंस उतारबा री खैचळ करै हो।

आध घड़ी पौर पछै आईमां रा सासूजी रो काळो पड़्योडो सररी पाछो पीळी रंगत मांय दीखण लाग्यो। डोकरी आपरी आंग्यां खोली अर सैंग भैळा हुयोडा मिनख हरिनारायण भोपा री जै-जै कार करता पाछा बावडग्या।

इण सगळी खैचळरै घड़ी भर पछै आईमां नैं चितार आयो कै भोपै नैं कीं दान-दखिणा तो दी ई कोनी! बै हेली री पोळ सू बारै निगै करी तो चौक रै चूतरै माथै बैठ्यो आंग्यां बंद कस्योडो भोपो अजै ई कीं मंतर-जंतर करता माळा फेरै हो। आईमां आखा सागै कीं रुपिया लेय 'र खुद ई बां कनै गई अर दखिणा देवती पूछ्यो, “काई मंतर धूणो हो बाबा?”

“सिद्धि मंतर है!” गैरी आवाज मांय दखिणा स्वीकारतो भोपो पडूतर दियो।

“सिद्धि मंतर कैडा?” आईमां उंतावळ मांय पूछ बैठ्या।

“संसार रो कोई भी काम अभिजीत होय सकै, अँडा मंतर...” टंडी अर गैरी आवाज सागै ई पाछो पडूतर मिल्यो।

कीं छिणरै अटकाव पछै, सोच मांय ई सोचता आईमांरै मुंडै सू निकळग्यो, “कोई सिद्ध बसीकरण मंतर जाणो बाबा!”

भोपा री आंग्यां मांय अबखी-सी चिमक आयगी।

कीं दिनां पछै ई अमावस री रात नैं आपरै डागळै री सूनी दुछत्ती माथै परदै री ओट मांय गोबर सूं आंगणो नीप 'र आधी रात नैं सिंदूर, सुपारी, धूप-दीप सजा 'र आईमां मंतर जापण सारू बैठा हा।

मिनख नैं जद जीवता लोगां सू संबळ नीं मिलै जणै बै पारलौकिक शक्तियां सू आपरी पीड़ री पुकार करै। जीवन रै किणी छिण मांय आदमी अपणै आपनै मानसिक रूप सू इत्तो टूट्योड़ो अर हास्योड़ो-सो मैसूस करै कै उण पछै उणनै सही-गलत री समझ खतम हुय जावै। विश्वास, अविश्वास सू ऊपर उठ'र फगत अर फगत आपरै अभीष्ट री चिंत्यां करतो बो कदास अँड़ो ई कदम उठावै जको उणरै व्यक्तित्व सू मेळ नीं खावै, पण आ चित्त री अेक दशा हुवै अर उण टेम जको चित्त करावै बो करै। टेम इण रा आछ-भूंडा परिणाम टेम आयां ई दिखावै।

डाक्टर तो आगला पांच बरसां ताई ई गांव साम्हिं मूंडो कोनी कर्यो। पण उण अमावस री रात पछै डावड़ी पाड़ोस वाळी नैं कैवती सुणीजी कै छोटी ठुकराणी कमरै सू आधी-आधी रात नैं जंतर-मंतर करती दीखै है।

बेगा ई बातां रा चटकार हुवण लाग्या। बात लुगायां मांयकर मोट्यारां ताई अर गांव री गुवाड़ी ताई दब्यै-छिप्यै मूंडै हुवण लागगी।

गांव-भर में आईमां सारू संशय रो माहौल बणण लागग्यो। बालमंडळी मांय जावता टाबरां री तो घरै पूग्यां पछै सामत ई ही, पण अगन मांय पूळो आगली बात सू नाखीजग्यो हो।

गांव रै रत्ती काकै रै घरां बेटी रो ब्यांव मंड्यो, सुणीज्यो कै खूब लाव-लशकर वाळी जान अर जानी आया है। धूमधड़ाको, डीजे नाच सागै गाडियां री रेलमपेळ। जान अर बींद देखण रो कोड अर कन्यादान देवण रै लालच सू आईमां ई रत्तीराम रै घरै दूजी लुगायां सागै आया। कंवर कलेवो करतै बींद नैं देख्यो, आंख्यां मांय अचुम्भो हुयो कै फगत पच्चीस साल री मीना रो पैंतीस-सैंतीस साल रो बींद। पण पछै गांव रै रीत-रिवाज अर रत्तीराम री आर्थिक दसा नैं याद कर नैछो कर्यो कै कीं नीं, बालविधवा छोरी नैं पाछो घर ई मिलै, आ ई सुख री बात है।

पण नीं, बै आपरी गलतफैमी मांय हा ?

माया आगै पीढा माथै गाभा री कोथळी हुयोड़ी रत्तीराम री बारह बरसां री छोटी बेटी सीमा बैठी ही... काळजो निकळ'र हाथ मांय आयग्यो आईमां रो।

टाह पड़्यो कै रजस्वला हुवण सू पैलां जकी छोरी रो कन्यादान मायत कर देवै, बानै हजार गरु दान रो धरम हुवै अर मीना तो बालविधवा है, उणरो ब्यांव तो होय ई कोनी सकै! ...सागै ई बरात दिनूगै सू पैलां ई रवाना करणी है, चूँकि लारै बींद रा दादोसा री हलक-चलक ठीक कोनी, बै ओछी सांसा लेवै है।

आईमां आया जका पगां ई पाछा बावड़ग्या। अेन फेरां सू पैलां दस-बारह पुलिस वाळ चंवरीयां रै कनै हा।

बारह साल री छोरी रो छत्तीस साल रै मोट्यार सू ब्यांव कोनी कराईजै, पंडितजी हरिनाम जपता कणां टेंट सू बारै भाजग्या, किणनै ई पतो कोनी लाग्यो। बराती ई आप-आपरो रस्तो नाप लियो। रत्ती काका अर बारै ब्याईजी थोड़ीक तीन-पांच करी जणां बानै थाणै लेजावतां पुलिस वाळ जैज कोनी करी।

घर भर मांय रोवण-पीटण सरू होयग्यो। रत्ती काकै री घरआळी पाणी पी-पी'र आईमां नैं कोसण लागी, “काळी मूंडो हुवै थारो, कठैसीक आई अर म्हारी छोरी रै करमां रै आडी फिरी, निरबंस रैवै थूं थारी हेली मांय कबूड़ा बोलता रैवै...!”

अैड़ा अबढा बोलां सू रत्ती काकी आपरो आफरो झाड़ण लागी । बठीनै छोटकी सीमा आपरो जरी वाळो बैस उतार फेंक्यो अर पेट मांय मिठई ऊर 'र मीना जीजी रै पासै बोली-बोली चिप 'र सोयगी । अब बीं नैं भायल्यां सू सुण्योडै पैली रात री अबखी बातां सू डर कोनी लागै हो, ठाह नीं ब्यांव पछै छोरियां सागै काई हुवै, उणरी मामा री छेरी रै तो कडियां कनी सू लोच अैड़ी पड़ी कै बापड़ी बैवती लचक खावै, कुसुमड़ी नैं तो ब्यांव रै तीजै दिन ई स्हैर रै अस्पताल लेजावणो पड़्यो, नीं तो लायण लोहीझाण हुयोड़ी बिस्तर सू ई नीं उठ सकी । अर बा कमली, बा तो ब्यांव रै दूजै बरस जापा मांय ही ! सोच 'र ई सीमा रो रू-रू कांपग्यो अर बा मीना जीजी नैं बाथां मांय कस 'र आपरी आंख्यां बंद करली ।

मिनख कीं भी कैवै, आज आईमां उणनैं बैरा मांय पड़ण सू बचायली, अर महीना भर पछै सीमा पाछी भणबा ई जावण लागगी ।

गांव-गवाड़ मांय जित्ता मूंडा बित्ती बातां । कोई कैवतो कै थाणै रो थाणेदार सुहासिनी रै रूप जादू मांय आय 'र आ कारवाई करी है, नीं तो अैड़ै कन्यादान नैं कुण गलत कैवै । आज सू पैलां तो कोई ब्यांव रोकण सारू गांव मांय पुलिस आई कोनी ? कोई कैवै भोपा कनै सू टूणा-टोटका सीखगी है आईमां, याद कोनी, कीं बरसां पैली क्रियां अमावस री रात नैं होम हवन करती ही । लूण-मिरच लगाणिया तो औ भी कैवण लागग्या कै आधी-आधी रात नैं मसाणां मांय मंतर करण सारू जावती सुणीजै आ डकण ।

इण पछै अेक दिन आपरा खेतां नैं संभाळण सारू जावती आईमां रै गांव-गळी री लुगायां आडी फिरगी । बै बांनै ओळमा देवण लागी । कीं ताळ तो आईमां बां अणपढ लुगायां नैं समझावण री खैचळ करी, पण जद देख्यो कै कोई भाव बै लुगायां मानै कोनी अर गाळ काढणी अर टोका-मारू करण नैं संभगी जणां आईमां ई हाथ मांय लट्टु लेय 'र साम्हिं मंडग्या अर सैंगां नैं ललकारता बोल्या, “ खबरदार, कोई नैड़ी आई तो, अठैई भोगना दाय कर देवूला अर म्हारै गांव मांय रैवतां जे कोई नाबालिग छेरी रो ब्यांव मांड्यो कै स्कूल भेजणो बंद करायो तो म्हारै सू भूंडो कोई नीं व्हेलो... । ”

आईमां रो अैड़ौ रौद्र रूप देख 'र सैंगां रै काळजां मांय धैळ बैठगी ।

इणी बिचाळै अेक धमाको और हुयग्यो । नेम-धरम निभावण वाळी आईमां काती रै महीनै मांय पुष्कर सिनान करण सारू गई ही । अचाणचक बठै मंगतां री भीड़ मांय सोहनराम री मां नैं बैठी देखली । डोकरी अेक गांठडी बाथां मांय लियोड़ी बैठी ही । औ काई चक्कर है ! सोहनराम तो दो बरसां पैली गांव मांय आय 'र कैयो हो कै मां नैं पुष्कर लेयग्यो हो, पण बठै दंगो हुयग्यो अर उण अफरा-तफरी मांय ई मां राम करगी । भगदड़ मांय ल्हास रो तो कादो हुयग्यो, जणां बठैई दाग देय 'र घरै आयग्या अर बारह दिन कर दिया । सरकारी मुआवजो ई मिल्यो हो डोकरी री मौत रो, पण अठै डोकरी तो सैंद-रूप बैठी है । आईमां नैं अचुम्भो हुयो । डोकरी कनै जाय 'र ओळखाण दी तो डोकरी झट्ट देणी छोटी हेली री बीनणी नैं ओळख ली । डुसका भरती डोकरी बांरै सागै गांव जावण री मंछ करी । डोकरी बतायो कै बेटो-बहू मिंदर रो पगोथियां माथै, ‘अबार आवां’ इयां कैय 'र गिया जको अजै ताई कोनी आया, आज थनैं देखी जणै जी में जी आयो ।

आईमां डोकरी नैं लेय 'र सीधा सोहनराम रै बारणै पूग्या। सोहनराम रै घरवाळा अेक बार तो हाकबाक हुयग्या, पण पछै डोकरी नैं ओळखण सूं ई नटग्या। डोकरी गांव रै मिंदर मांय ई बैठी रैसूं इयांन बोली, पण डोकरी रा बेटा-पोता इण सारू राजी नीं हा। बै डोकरी नैं गांव मांय ई राखणी कोनी चावै हा। सोहनराम रै घरआळी लुगायां काना रा कोड़ा झड़ जावै अैड़ी-अैड़ी गाळियां आईमां नैं देवण लागगी। पंचायत बैठी, पण पंचायत रो ई नकटां रै आगै कीं जोर चाल्यो कोनी। आईमां डोकरी नैं आपरी हेली मांय लेय 'र आयग्या, पण आवतां-आवतां सोहनराम अर बीं री घरआळी नैं चेता 'र आया कै मायतां री हाय भूंडी हुवै। पुरसै जैड़ो जीमणो पड़ैला, चेतै मांय सोच 'र राखजै।

आगै पौ महीनो उतरतां ई सोहनराम री बेटी रो मुकलावो तय हुयोड़ो हो। डोकरी सागै करी जकी बातां गनायतां तांई पूरी पूगै उणसूं पैला बै छोरी रो मुकलावो कर 'र घरै भेज देवणो चांवता हा अर दूजी बात आ ही कै छोरी ग्राम पंचायत मांय लाग्योड़ै अेक नीची जात रै छोरै रै चक्कर मांय चढगी ही। अैड़ा माड़ा समाचारां री खुसर-फुसर गांव मांय होवण लागगी ही। घर री साख माथै ओज्यूं बट्टो बैठै इणसूं पैलां सोहनराम आडी पाळ बांधणी चावै हो।

उंतावळ मांय गनायतां नैं बुलाय 'र छोरी नैं चूड़ो पैराय दियो अर बिदाई कर 'र सोहनराम नैछा री सांस ली। पण जोग टळणो सारे थोड़ी हुवै। समाचार आया कै जमाई पांवणा री मिनी बस रै पाछी बावड़ती टेम मारग मांय अेक बोलेरो आगी-पाछी, आडी-डोडी हुवती ही अर इणीज चक्कर मांय पुळियै माथै गाडी रो बैलेंस बिगड़ग्यो अर गाड़ी पलटगी। दो जणा तो बठैई राम करग्या अर बेहोस हुंवतै-हुंवतै जमाई अधर्मीची आंख्यां सूं लाडी नैं बरी फेंक दूजा गाभा पलट 'र उणीज बोलेरो मांय जावती देखी।

अैड़ो अबखो काम आज सूं पैलां गांव मांय हुयो कोनी हो अर आपरी छाती ठोक-ठोक 'र रोवती सोहनराम री लुगाई नैं नीं जाणै कुण आईमां रो सराप चेतै अणाय दियो हो अर दांत पीसती-पीसती सोहनराम री लुगाई सुहासिनी नैं बद्दुआ देंवती-देंवती बेहोस हुयगी अर सागै ई गांवआळ्यां रै मन मांय औ तय हुयग्यो कै आईमां टूणा-टोटका कर्या जणा सोहनराम सागै अैड़ी भूंडी हुई।

अैड़ी बातां सूं नफो उठावणियां री इण संसार मांय कमी नीं है। आईमां रै खेत अर बगीचै रै आसै-पासै रैवण वाळा परसाराम, कमलसिंह अर भीखाराम आप-आपरै खेतां री मेड़ नैं आईमां रा खेतां मांय बधावणी सरू कर दी। कठैई बाड़ बांध 'र रस्ता रोकण री बात, तो कठैई खेत री पाळ तोड़ 'र बारी जमीन हड़पण री खैचळ। कोई खेत सूं रातूरात खेजड़ी बाढ 'र लेयग्यो, तो कोई बाड़ मांय सूं बळीतो ई चोरग्यो। आईमां आपरी हिम्मत सारू हुवण आळ नुकसाण नैं रोकण री खैचळ करती, थाणै मांय अेफआईआर तक करवाई। आरआई अर पटवारी नाप-चोप कर खेतां री बाड़ बंदी हटवाई पण तो ई गांवभर रै अेकै सागै विरोध रै कारण कीं दिनां पछै ई पाछी खेत-बाड़ै री जमीन पाछी हड़पण री आफळ्यां हुवती रैयी।

सैंगां नैं लाग्यो, जाणै आईमां हारगी। सोहनराम री लुगाई हाथ नचा-नचा 'र बोलती, “भगवान रै घरै न्याव जरूर हुसी!” रत्तीराम री लुगाई आपरो राग न्यारो उगेरती, “टूणा-टोटका काम कोनी आवैला, म्हारी बापड़ी छोरी रो कन्यादान कोनी हुवण दियो नीं, डाकण कठैई री!”

पण सैंग अंदाजा धर्या रैयग्या...

चेत रा नौरतां पछै परसै रै छोरै रै माता निकळी अर उणरी आंख्यां री रोसनी साव ई कम हुयगी। कमलसिंह नै लकवे रो असर हुयग्यो अर भीखाराम रै घर री छान अचाणचक टूटगी! कोई री ऊभी खेती बळगी अर कोई रै नौकरी मांय तकलीफां हुवणी सरू होयगी।

गांव-घर-गवाडी, पणघट, सैंग जग्यां अेक ई बात री चरचा हुवती कै जको-जको आईमां रै आडी देवण री या बुरो करण री कोसिस करी, कै सैंग आज दुख पाय रैया है।

गांववाळा आईमां सूं अबै डरण लागग्या हा, कोई साम्हीं चला 'र आपरै करमां री गलती कोनी मानी, पण मन-ई-मन मांय सैंग आ मानण लागग्या हा कै आईमां मांय कीं अणूती शक्तियां है। उण पछै गांव मांय कोई छोरी रो ब्यांव अठारह बरसां री हुयां पैली कोनी हुयो अर न ई कोई आपरा मायतां नै पुष्कर मांय छोड 'र आया। पण अपरोख रूप मांय आईमां गांव रै हरेक मांगळिक अर समाजू काम सूं अळगा करीजग्या हा। तीज-तिंवार माथै लुगाया मिंदर या पीपळ री पूजा माथै आईमां नै देख 'र डर सूं या रीस सूं बिदक जावती अर बां सूं अळगी-अळगी रैवती।

बारी सासू, जकी गांव री लुगायां री पंचायतां री प्रमुख व्हेती, अब बांनै ई कोई कोनी पूछती। म्हनै ई आईमां कदैई साम्हीं दिख जावता तो ई काकीसा री आंख्यां री रीस याद कर 'र म्हारी हिम्मत कोनी पडती कै बां सूं कीं बात कर सकूं। बांरै मन री बेचारगी अर खदबदाहट म्हें समझती ही, पण म्हें ई मजबूर ही।

साल बीततां-बीततां बांरा सासूजी राम कर दियो, पण कुलजमा आठ-दस मिनखां सूं बेसी मिनख मरणै माथै कोनी गिया हा। खुद बांरा पति डाक्टर साब स्रैर सूं आया, पण तीजै रो छांटो देय 'र बै ई स्रैर पाछा बावडग्या।

धरम-करम सूं आईमां आपरी सासू रा बारह दिन करिया। बांरै अडीकियां पछै ई न्यात जीमण सारू चिडी रो बिचियो ई कोनी आयो अर सैंग बणायोडो बारवा रो खाणो आईमां स्रैर रै अनाथ आश्रम सारू भेज दियो।

गांव मांय औ सब चालतो रियो हो अर कोई भी अबखी बात अगर गांव मांय हुंवती तो उणरी भूड रो ठीकरो आईमां माथै ईज फूटतो।

गलती सूं बांरै बागीचै मांय खेलण वाळा टाबरां नै छींक ई आय जावती तो इणरो दोस आईमां रै टूणै नै दियो जावतो अर पंडितजी नै इग्यारै रुपिया दखिणा देय 'र निजर उतरारीजती। सगळै गांव सारू बै टूणो करणवाळा घोसित हुयग्या हा अर खुलेआम सगळा बांनै डाकण कैवा लागग्या। ई अेक सबद लांरै सुवारथी मिनख आपरो सुवारथ साधता अर बांरै बगीचै रै आसै-पासै ई बाडबंदी कर दी, यूं कैय 'र कै छोटा टाबरां सारू रुखाळी है, पण मूळ बात आ ईज कै आईमां नै आपरै खेतां मांय जावण सारू ई घणो पैंडो करणो पडै।

आईमां कद तांई सैंगा रो सामनो करती, कद तांई सैंगां रो विरोध झेलती। अबै हेली मांय फगत आईमां अर अेक पुराणी डावडी रैयगी ही।

डाक्टर साब गांव रो मारग भूलग्या हा अर गांव-सरपंच री खोटी नीति रो विरोध आईमां कर्यो तो बै उल्टो बांरै हाळी सूं ई बांरो नांव जोड 'र बांनै बदनाम करण सारू पूरी ताकत लगाय दी।

बडी सूं बडी लड़ाई लड़ण वाळी आईमां जद आपरै पल्लै चरितर री बदनामी देखी तो बै अेकदम चुप हुयग्या, फगत ईश्वर साम्हीं दया रा हाथ उठावतां इतो ई बोल्या कै अबै म्हारो न्याव ईश्वर ई करसी, पण बै हार तो तोई कोनी मानी ही। मुकदमै री पेसी माथै जावता, गांव री किणी पण गलत बात रो विरोध जरूर करता। गरीब-गुरबां रै हक सारू आठूं पौर त्यार रैवता, पण निकम्मा अर सुवारथी मिनखां रै दंद-फंद सूं बै समाज रूप मांय तो जाणै न्यात बारै ई है, अब की बीमार ई सुणीजै, पण कोई बां सूं मिलण नै कोनी जावै है।

विगत री स्मृतियां मांय उतरतां ठाह ई नीं पडी कै कणै सूरज भगवान आपरै घरै आराम करण नै गया परा अर रातराणी री सौरम आंगणै मांय उतरगी ही। सगळी बात सुण र अक्षय हाको-बाको रैयग्यो हो। म्हें उणनै उणरा विचारां सागै ई छोड र काकीसा साम्हीं बावड़गो।

दूजै दिन दिनौ ई अक्षय कीं काम रो कैय र घर सूं निकळ्यो अर सांझ ढळ्यां पाछो आयो। म्हारै पूछण पर हंस र बात टाळ दी, पण ब्याळू री बगत नीं जाणै नायण मां काकीसा नै कांई कैयो कै बै अेकदम रीस मांय आयग्या अर अक्षय नै कैवण लाग्या, “अैडो थारै बा कांई कर दियो लाडेसर जको थूं आज उण डाकण कनै गयो। म्हारै मना कस्यां उपरांत ई आज पूरै दिन उण कनै ई हो, कांई म्हारी बात रो कोई काण-कायदो कोनी बेटा थनै!” अणूती रीस करण सूं काकीसा रो ब्लडप्रेसर बधग्यो अर बै बेचेत-सा हुयग्या। अक्षय बिना कीं बोल्या काकीसा रो इलाज करतो रैयो अर सारी रात बारै पर्गाथियै ईज बैठो रियो।

हप्तै बाद ई अक्षय अेक कागदां री फाईल काकीसा रै हाथ मांय रख र बारै आंख्यां मांय तिरता सवालां नै छोड र बारै बावड़ग्यो।

काकीसा सानी कर र म्हनै कागद बांचण रो इसारो कस्यो। म्हें फाईल खोल र देखी तो स्टाम्प माथै लिख्योडो हो कै श्रीमती सुहासिनी राठौड़ आपरै बगीचै रै कनै री पांच बीघा जमीन अक्षय राठौड़ नै अस्पताळ बणावण सारू दान मांय देय दी है।

काकीसा जाणै सूना हुयोडा ऊभा ई रिया।

दोपारी मांय म्हें पाछी सासरै जावण सारू ब्हीर हुयगी। आईमां रै बागीचै कनै सूं निकळती देख्यो, बारै बगीचै रै आसै-पासै माडाणी बणायोडी बाड़ हटगी ही अर कनै वाळी पांच बीघा जमीन नाप र जेसीबी सूं समतल कराई जावै ही अर बाउंड्री बणावण री त्यारी चालै ही। अक्षय नै देख र मजदूर भाई जोर सूं राम-राम कस्या अर म्हारो बीरो ई मुळक र हाथ ऊंचो करतो बारै राम-राम रो पडूतर दियो।

म्हें अचुम्भै सूं अक्षय साम्हीं जोयो। अक्षय मुळकतो-सो म्हनै आईमां री हेली साम्हीं सानी कर र कीं देखण सारू इसारो कस्यो। म्हनै हेली रै डागळै माथै मोतिया गुलाबी गाभा पैर्योडी अेक मूरती रो दरसाव हुयो। म्हारी आंख्यां मांय खुसी रो पाणी आयग्यो अर भीज्योडै अंतस सूं म्हें मुळक र दोनूं हाथ प्रणाम करण सारू जोड़ दिया अर आंख्यां सूं दिखी जित्तै उण मूरत रा दरसण लेंवती रैयी।

टेसण माथै म्हें अक्षय नै पूछ्यो, “काकीसा कैवता हा कै अस्पताळ सारू आपां री जमीन ई काम ले सकतो हो नीं बीरा, औ सैंग क्यूं करो...?”

अक्षय पड़ूतर दियो, “क्यूँ कै इण तरियां इण गांव सू अंधविश्वास री बीमारी नैं आपां दूर कर सकां हा जीजा। आईमां आपांणी नीं है, पण आपां सारू आपा री मां री डोढ है। आपां कद ताई बां सारू अैडी अबखी बातां सुणता रैवांला, कोई नैं तो खैचळ करणी पड़सी नीं जीजा! आप जाणो हो, म्हैं अस्पताळ रो नांव काई सोच्यो हूं...”

म्हैं फगत अचुम्भै मांय ही!

“सुहासिनी अस्पताल एंड हेल्थ केयर... अटै बिल्कुल मुफत इलाज हुसी। अेक-दो अेनजीओ सू बात करली है। म्हारै सागै रा डाक्टर दोस्त भी इण प्रोजेक्ट सारू खूब उत्साही है। आप देखजो जीजा कै कीं टेम पछै अटै री सारी आबोहवा ई बदळ देणी है। अरे हां! आईमां आप सारू कीं भेंट दी है, आ लो...” अर अक्षय म्हारै हाथ मांय अेक गोटो जड़्योडी कोथळी पकड़ाय दी।

अक्षय टेसण रै टिकट काउंटर कानी बावड़ग्यो। म्हारै सागै आया ड्राईवर अर अेक हाळी गाडी मांय सू सामान उतारबा लागा। म्हैं जतिन नैं फोन करण सारू निकाळ्यो, इती देर मांय म्हारै कानां मांय ड्राईवर अर हाळी री बातां रा सबद सुणिजिया :


“लागै है बन्ना माथै ई टूणो असर कर दियो है। डाकण रै असर सूं कोइ नीं बच सकै रे!”

“साची रे, उणरै टोटकां रो काट दोरो भाई!”

म्हारो मन कड़वाहट सूं भरीजग्यो। नीं जाणै आईमां नैं और कित्तो औ किरोध रो दंस झेलणो पड़सी। पण उणीज बगत साम्हीं सूं अक्षय आवतो दिख्यो—आतमविश्वास अर मजबूती सूं हळबोळ।

म्हैं हाथ मांयली कोथळी नैं खोल र देखी। उण मांय ताजा-ताजा मोतिया गुलाबी गुलाब आपरी पूरी रंगत सागै मुळकै हा। म्हारै उदास होटां माथै नैछा री अेक मुळक आयगी... आंख्यां साम्हीं मोतिया गुलाबी आभ सागै लिपट्योडै आईमां री निळळ मूरत तैरगी। कानां मांय बांरा सबद गूजण लागगा :

“पवितर मोती-सी सुहासिनी, मोतिया गुलाबी रंग री परी...”





हेमलता दाधीच

सुगनां

लूमझूम गैणां में झूमती बा रंगीली गणगौर, माथै ऊपर यूं भळका मारती मोटी सोना री रखड़ी, सूटा जस्या तीखा नाक मांय नीचै लाल लटकती बा मोटी नथ बीं नैं मेळां री पदमणी रो रूप देवै। कानां रा कर्णफूल तो बीं री नानी री सैनाणी। कर्णफूल री करणां उणरी रूपाळी सूरत ऊपर सब नैं रिझावा रो काम करती। गळै रो मंगळसूत्र तो जाणै घर रो मंगळकळस हुवै, इतरो भारी कै उणरै आगै राणीहार भी पाणी भरै। उणरै लारै रूपाळी टूसी उणरी सारस जैड़ी नाड़ में चार चांद न्यारा उगावै। हाथां रा गजरा री सौरम न्यारी। गजरा रै मांय-बिचाळै रंगरंगीली चूड्यां पूरा गांव री लुगायां नैं लुभावती अर लुगायां पूछती कै या तो रातै घणी तपती करती होवैला जद बा हाथां नैं मलकाती नांवेक मुळकती अर आंख्यां में समझा देंवती। कुणी सूं ऊपरै महादेव रै गळै रा भुजंग सो तीन पळेटा खावतो टड्डो उणनैं पूरी अेक पईसावाळा घराणै री नूंवी-नवेली बींदणी साबित करै। पतळी कमर में भारी-भारी झूमरियां वाळा कंदोरा री लडियां जद बा चालै तो यूं बाजै जाणै मिंदर री पूजा री घंटियां बाजती हुवै। पगां री भारी बिच्छूडियां अर पगांमांय छमकती जोड़ तो उणरै आवण-जावण रो हवालो देंवती रूपाळा रूप माथै रूपाळी चूंदड़ री ओढणी अर घेरदार लहंगा अर हरिया रंग री चोळी या मोटी लाल टिली कजरारी आंख्यां मांय काजळियै री कोर फूल री पांखड्यां जस्या राता होट काळा केशां आगै काळी बादळी भी लजावै।

इण रूपाळी गणगौर रो नांव हो—सुगनां।

सुगनां भंवरलालजी रै पांच बेटां पछै घणा जतनां सूं जलमी बेटा। घर में सब री लाडली। भोजायां काम करै, बाईसा आराम करै। घर में ई उणरी मुळकाण, उणरी बातां बन री चुरकली ज्यूं चिं-चिं सगळां रा कानां मांय रस घोळै।

मायड़-बापू लारै-लारै आखै गांव री लाडली सुगनां नैं दादोसा कैवता, “अे सुगु, कठै गयो म्हारो बेटो...।”

“काई दादोसा, तीन आखर रा नांव नैं ई तोड़-मरोड़'र दो आखर रो बणाय दियो दादोसा?”

मुळकता तो सगळा अेकै सागै दांत काढ़ता।

बेटी कितरी भी जीव री जड़ी हुवै, अक न अक दिन तो परायै घरां जाणो ईज पड़ै। मां कैवती, “म्हारी लाडो रै चांद जिस्यो कुंवर आवैला। हाथी रै होदैं बैठ र तोरण मारैला, भोजायां मंगळ गीत गावैला अर बो मोतियां सूं मूँघो दिन भी आयग्यो।

ब्यांव रो भारी जळसो। मानखो मावै नीं। कीडीनगरै ज्यूं मिनख तीन दिन तांई जीमण छतीस साइना बतीस भोजन। गांवव रो घुमक्कड़ो धन्नो बोल्यो, “म्हें तो आंगळ्यां चाटतो ई रैयग्यो, जोरदार पकवान बणाया”, तो पन्नो बोल्यो, “घणा दिनां पछै अस्यो जीमण देख्यो। म्हूं तो अक ई मिठाई रो नांव न जाणूं। आपां नैं तो खाबा सूं काम।”

जिता मिनख, बित्ती बातां। रूपाळा जंवाईराजा, गीतां री रमझोळ अर विदाई री घड़ी। कंकु, कमला, गीता, सीता, पिंगी, रिकू, नेहा, सीमा, रेखा साथणियां अर घरवाळा, परिवारवाळा सब रै नैणां मांय गंगा-जमना रा धारा चाल रैया।

सुगनां राजसी ठाठ सूं विदा होयगी। सासरै मांय स्वागत, मंगळकळस उटेलती या लजवंती नूवै आंगणै मांय पग मेल्यो। मूंडै मांय न जाणै कित्ता लाडू फूट रैया हा।

सुगनां उण मूँघी रात री बाट जोय रैया ही जकी रात हरेक कंवारी डावड़ी नैं अक संपूरण लुगाई, अक जोड़ायत रा नांव री उपाधि सूं नवाजै। पण उण रा सोळा सिणगार निरखण वाळो न जाणै कठै कुणनैं निरख रैयो हो। सुगनां री आंख्यां मांय नींद आपरो डेरो जमाबा आयी। सुगनां री उनींदी आंख्यां कोई आय र उणनैं बाथ मांय भरली। अक-अक गैणा उतार र उण तपती धार मांय बिरखा री बूदां जिसी सौरम देंवतो उणरो हेत रो प्यालो।

सुगनां नैं आज ई ठाह पड़ी कै मरद अर लुगाई रो मिलण ई जीवण री फुलवारी नैं महकाय सकै। यो मिलण ई इण बाग में हेत री सौरम रा फुलड़ा खिलाय सकै अर बा हेत रा हिंडोळा में हींडण लागी। मरद अर लुगाई री जोड़ी अक गाडी रा दो पेड़ा। अक पर या कोनी चाल सकै। रामजी म्हांकी जोड़ी सलामत राखजै। थे म्हांनै पूरी जिंदगी भर लेरा राखजो म्हारा भरतार।

“तुम कैसी बातें करती हो पागलों जैसी?”

सुगनां उणनैं लपक र काठो पकड़ लीधो, पण दो पांच दिनां पछै धंधा रो नांव लेय र उणरो घरवाळो सगळा घरवाळां नैं मीठी गोळी देय र यूअेसअे परो गयो।

नैणां मांय आस रो दिवलो जोय आज भी “कद पधारोला?” पूछती रैवै, पण सुगनां रो घरवाळो न तो जबाब देवै अर न बात करै। उमर ढळ र सुगनां री काळा केशां री लटां धोळी पड़गी। सुगनां तो घरवाळा रा लाड में पांच पाटी भणी, पण आपणा हेत री निसाणी नैं सुगनां डॉ. बणाय मां अर बापू दोयां री जिम्मेदारी नैं पूरी कीधी।

नीं जाणै कितरी सुगनां इण दरद सूं आपरी जिंदगाणी नैं खतम कर देवै अर कितरी इण धोखो देवण आळा मिनख री थाणै में रिपोर्ट दर्ज कराय न्याय रो डंको बजावै। बिना लुगाई रै घर तो घर नीं लागै। मिनख भलाई भमतियां ज्यूं भमतो फिरो। या तो बा सौरम है जो बिना इतर के दो घरां नैं महकावै। आपरी जान नैं जोखम में न्हाख र अक टाबर नैं जलम देवै जदी तो कैवात है— नारी दो जलम लेवै। अक तो बा मां रा गरभ सूं बारै निकळै जदी अर दूजो बा मां रो रूप धारण करै जदी। आजकाल तो डाक्टर री लापरवाही सूं केई सुगनां उण नान्या-सा जीव नैं जलम देय र उण काळजै री कोर रो उणियारो भी नीं देखै।

...तो कैय सकां कै धरा अर धराणी री धीरज री होड आगै सब पाणी है। आज या काल या गुजरिया काल री बात करां तो नारी कदै पदमणी, कदै लक्ष्मीबाई तो कदै पन्ना धाय, जीजाबाई, सीता, सावित्री, अनसूया, द्रौपदी, उर्मिला, मैत्रयी, मंदोदरी, गंगा, गीता कितरा नांव गिणावूं। जळसेना, थळसेना, वायुसेना, इतिहासस, इकोनॉमिक क्षेत्र, साहित्य, राजनीति में अर कोई भी असी जगा कोनी जटै बा आपरी ओळखाण रो झंडो नीं फहरायो।

अबै इण सुगनां रूपी नदी जो गेलो देख आपरो रुख कर लेसी, न तो या सबदां रा मणियां में समावै अर न या लेखणी री उपमा में ढळ पावै। इण नदी री ठाह तो भगवान भी नीं लगा पावै तो मिनख रनी काई मजाल। विस्वामित्र अर कामदेव, रावण अर दुष्यंत, राजा री लिस्ट तो घणी लांबी। राजकाज सब भूलगया तो इण नदी रो रुख इणरी गैराई कुण भी नीं माप सक्यो। कदै या कळकळ रो मीठो नाद कर मनडै नैं सीतलहर में रमाय देवै अर कदैई या जीवड़ा नैं धक-धक कराती उफाण रो रूप लेय लेवै। पण इणरो उफाण भी अर इणरो कळकळ रूप भी स्थाई नीं रैवै। नीं जाणै कितरा रूप धारण करती, कदै ऊंचा मगरा सूं उतरती न जाणै कितरी घाटियां सूं लुढकती या सुगनां रूपी नदी सूखा मैदानां नैं हरिया करती, कितरा मैला-कुचैला बगदा नैं आपरै लारै बहा ले जावै अर पाछी रूपाळी-ऊजळी होय काच जिस्या रूप में मुळकती आपरी ई धुन में चालती रैवै। आपरै मनडै मांय सागर सूं मिलण री आस में सागर सूं मिल आपरी ओळखाण भी गमाय देवै। साची ई है, यो समरपण ईज तो इणनैं सागर सूं भी महान बणावै अर सागर भी उणरै समरपण माथै नत-मस्तक होय जावै। कदैई मिरगानैणी बण बालम नैं लुभावै। कदी झांसी री राणी बण जावै, तो कदैई मोम-सी नरम तो कदैई टेम आया काळी रो रूप धर दुस्मण नैं मार भगावै। हे धरा, थारा रूप रो पार कोई नीं पावै।





डॉ. अनिता वर्मा

गरम कचोर्यां

कोरोना-काळ रै चालतां घणा दिनां सू लॉकडाउन चाल रैयो छै। कांई बडा अर कांई छोटा, सगळा मिनख परेशान हो रैया छै, सब पे कोरोना की मार पड़ी छै। सारा मिनखां की हालत खराब होरी छै। आज म्है रसोई में काम समेटबा लाग री छी।

बाहर सू आवाज सुणाई दी, “कचोर्यां ले... ल्यो... गरम कचोर्यांऽऽऽ।” कचोर्यां को नाम सुणतां ई म्हारा कान खड़ा होग्या छ। लॉकडाउन के चालतां दुकानां बंद चाल री छी, फेर यो कचोरी हाळो कठी सू आग्यो। म्हारै मन रै भीतर विचार चाल र्या छ।

“अंटीजी, कचोर्यां ले... ल्यो, गरम-गरम काढ र ल्यायो छूं।” म्हारै तांई विचार आयो, कणा-कठी सू यो कचोरी हाळो आयो छै। फेर घर का गेट पे ऊ आ र खड़ो होग्यो छो। म्हूं सोच रयी छी, असी बेमारी फैल री छै, यो जाणै कठी सू कचोर्यां ल्यायो छै। आजकाल बाहर सू खाबो-पीबो सब बंद छै। घणा दिनां बाद कचोर्यां को नाम सुणतां ई जी मचड़बा लागग्यो छो।

“कतनीक कचोर्यां बांद द्यूं।” बो बोल्यो।

म्हूं बीं सू पूछ्यो, “भाया! तूं कठी सू आयो छै। पैल्यां कदी न दिख्यो ई मोहल्ला में।”

बो बोल्यो, “कांई बताऊं, म्हारै कपड़ा-लत्ता की छोरी-सी दुकान छी, पण कांई करां, ई बेमारी में सब-कुछ खतम होग्यो, पईसा खतम होग्या, कतना दिन बैठ र खाता, पांच मिनखां को परिवार छै। पेट तो कस्यांन कस्यां भरणो पड़ैगो।”

म्हारी नौ साल री बेटी म्हांकी बातां सुण रैया छी। बा बोली, “मम्मी, ई समै सब कै तांई पईसां की जरूरत छै, सारा मिनख परेशान होर्या छै। कांई पूछताछ कर रैया छो, आपण सब के तांई कचोर्यां ले ल्यो।” बा भीतर सू बोली छी।

या सुण र म्हूं गेट पर आय र कचोरी हाळूं सू बोल्यो, “भाया, दस कचोर्यां बांध र गेट की डोळी पर रख दै। पईसा भी डोळी पे रख दिया, दो गज की दूरी जरूरी छै।”

कचोरी बेचबा हाळी की दो उम्मीद सू भरी आंख्यां, चैरा पे लग्या मास्क सू झांक री छी। कचोरी खरीदबा की बात सू ही उंकी आंख्यां में चमक आ गई छी।”

म्हूँ काई करूँ

विवेक गुणगुणातो थको कोचिंग सून आयो छो। उनै बस्तो अेक आडी फेंक द्यो छो। आज किलास में लगातार पढता थकां थाकग्यो छो, सो तेज पंखो चला 'र बो बेड पर लेटग्यो छौ। उंकी आंख्यां में आबा हाळा टेस्ट तैर र्या छ।

“अरे! यो काई विक्की, सारै घर में फैलावड़ो कर राख्यो छै। अतनो बडो होग्यो, काई लखण कोनै? जूता कठीनै... बस्तो कठीनै, टाई कठीनै, तूं काई चीजां संभाळ कोनै सकै, सारा काम म्हूँ ई देखूं, तूं कद बडो होवैगो?” मम्मी बड़बड़वती सामान समेटबो लागगी छी।

“विवेक! अरे भाया विवेक!” दादाजी पुकारबा लाग्या छ।

“काई होयो, म्हूँ थोड़ी देर पैल्यां ही तो घुस्यो छूं। कोई काम छै काई?” बो अनमना मन सून बोल्यो छो।

“म्हारै ताई काई काम होवैगो, अबार बजार सून लौटता थकां म्हूँ थनै तीन-चार छोरां कै साथै मोटरसाइकिल पे देख्यो छो। बै छोरां जणा कस्या-कस्या कपड़ा पैर राख्या छ, वांको बैठबा को, बोलबा को तरीको म्हनै तो आछो कोनै लाग्यो।” दादाजी विवेक सून बोल्यो छ।

“असी बात कोनै दादाजी, बै सब दूसरा प्रांत सून कोचिंग पढबा आयाछै। थां चिंता मत करो, बै सब म्हारा भायला छै।” विवेक हांसतो हुयो बोल्यो छो।

“ल्यो, या काई बात होयी, चिंता कस्यां न्ह करां... आजकाल जमानो कितनो खराब छै... फेर तूं अतनो बडो भी कोनै... जे आपणो आछो-बुरो समझ सकै।” दादाजी बोल्यो।

“या ल्यो, मम्मी कहै छै तूं छोटो कोनै रह्यो, आप कह रह्या छो तूं अबार बाळक छै, अब थे ई म्हनै बताओ, म्हूँ काई करूं।” विवेक झुंझड़तो थको बोल्यो छो।





अनुपम पाण्डे

इमरत-धारा

अबकै रामजी, मिनखां नैं मारण री सोच राखी है। काई मेहड़ो बरसैला कै नई। ओ छोटो-सो गांव। कूवा, डिग्गी अर जोहड़ सै पाणी बिना सांय-सांय करै हा।

सरपंच जी रो हुकम हुयो कै अबकी रामजी नैं राजी करण सारू होम करणो पड़सी। सगळ्ठां री रजामंदी सूं सगळो गांव भेळो होयग्यो। पंचायत बैठगी। होम कर 'र मीठा चावळ्ठां रो भोग लगावण री जुगत होवण लागी।

टाबरां सूं लेय 'र बूढा-बडेरां ताई गवाड़ में भेळो होय रैया हा। चूल्हां माथै कड़ाव चढग्या हा। सगळ्ठां रा मूंडा चिलकै हा। अबै तो रामजी म्हारी सुणैलो! म्हारै गांव पर तरस खावैलो।

गदळो पाणी पीवतां सगळै गांव में महामारी फैलगी। कित्ती गायां, पसु अर जिनावर पाणी बिना मौत रै मूंडै में चला गया। टाबरां अर मिनखां री भी गिणती नीं है। भोळियै रो सगळो कुनबो काळ रो कलेवो बणग्यो। धरती माता तिस्सां मरै हा।

चावळ्ठां रो भोग लागग्यो। सो गांव हाथ जोड़ 'र रामजी सूं बिनती करी। अबै घणा ना तरसावो, परमात्मा अबै तो मेवलो बरसावो।

स्यात रामजी राजी हुयग्या। घुमड़ता बादळ्ठां री गरजणां रै साथै ई मेह बरसणो सरू होयग्यो। गांव रा सै ताळ-तळैया भरीजग्या। जिनावरां रै मूंडै पर चमक आयगी। पाणी में टर्-टर् करता डेडर फुदकण लागग्या। खेतां री तिस्साई धरती पाणी पीवतां ई मुळकण लागगी।

सरपंच जी रै घर सूं हुकम हुयो कै पाणी री किल्लत रै कारण गांव में जित्ती भी बैमारी फैली है, बीं रै इलाज सारू सगळा गरीबां री सहायता करी जासी।

इत्ती ताळ में ई भोळियै री लुगाई रो गरळाणो सुणीजग्यो। औ काई हुयो? भोळियो ई परलोक सिधारग्यो! अबै रतनी दूध पीवतै टाबर सागै कियां जीवण काअसी। पण रतनी घणै हौसलै सूं आपरै काळजै री कोर नैं छाती सूं लगायां राख्यो।

पच्चीस बरस होयग्या। नान्हो-सो टाबर हुंसियार होयग्यो। पच्चीस बरसां रो जवान मोट्यार काळूराम स्हैर में नौकरी करण लागग्यो। फूठरी बींदणी आयगी। दो टाबर है। रामजी राजी है।

रतनी बेटै रै बंगलै में बैठी स्हैर रा नजारा देख रैया है। टाबर फव्वारां हेठै न्हावै है। नौकर पोरच में खड़ी गाडी पाइपां सूं पाणी मार धो रैया है। बाग में लागी दूब अर फूलां में कानी-कानी फव्वारां चाल रैया है।

बी-216, करणी नगर, बीकानेर (राजस्थान) मो. 7597562277

काळू री बींदणी फ्रीज में बोटलां धरी अर बोली, “मां, औ बिसलरी वाटर है। म्हारा टाबर औ पाणी ई पीवे है। औ सुद्ध पाणी है। इण सूं टाबर बीमार कोनी हुवै। अेक बोटल चाळीस रुपियां री आवै है।”

औ सुणतां ई मां री आंख्यां में जळ भर आयो। बोली, “हां बींदणी, औ पाणी नई, आ इमरत धारा है। इणरो कोई मोल नीं है। इणरी अेक-अेक बूंद अमोलक है। इणरै बिना अेक छिण भी जीवण संभव नीं है। आ बात म्हारै सूं घणी कुण जाण सकै। इणरी अेक बूंद खातर तरसतां म्हारो सगळो कुनबो मौत रै मूंडै में चल्तो गयो हो। इण खातर इण इमरत धारा नै बचाय राखो। आणै वाळै बगत में रुपियां सूं भी औ इमरत नीं मिलैला। इण इमरत सूं ईज औ जीवण है। खेत-खळां, पेड़-पौधा, जीव-जिनावर सै इण धरती रो सिणगार है। इणसूं ईज सगळो संसार है। हाथ जोड़'र रतनी कैय रैयी ही :

रहिमन पानी राखिये, बिन पानी सब सून।
पानी गये न ऊबरे, मोती मानस चून॥





इंजी. आशा शर्मा

गणित

मूंडें माथै मास्क, हाथां माथै दस्ताना, पतलून माथै पेटी, गाडी मांय राख्योड़ो अंगरेजी कांटो अर ताजी-ताजी फळ-सबज्यां... दाम ई नगदी कोनी देणा, मोबाइल सूं ई पईसा चुकावो... इसो फेरीवाळो तो पैली बार देख्यो।

गळी मांय ऊभी गाडी माथै लोग-लुगायां दो गज री दूरी पर खड्या आपरी मन सारू मुलाई कर रैया हा। म्हें ई ऊभी आपरी बारी नैं उडीक रैया ही। ज्यूं ई भीड़ छंटी, म्हें लपक र गाडी कनै गई अर मोटा-मोटा लाल-लाल टमाटर छंटण लागी।

“इत्ता ई डिजिटल होग्या तो चिनेक और हुय जांवता। फळ-तरकारी ऑनलाइन ई पूगा देंवता।” म्हें हांसती-सी बोली।

“म्हें जाण-बूझ र ई कोनी कस्यो।” कैवतो थको छोरो सैज ई मुळक दियो।

म्हें तरकारी छंटणी छोड र उणरो मूडो जोवण लागगी।

“देखो सा, साग-सब्जी रो असल मजो तो हाथां रें टंटोळ, नाक री सौरम अर आंख्यां रा रंग मांय ईज हुवै, उणरै बिना मन राजी नीं हुवै अर जद तांई मन राजी नीं हुवै, तन कियां राजी हुसी?” सब्जी आळो छोरो आपरो सीधो-सादो गणित समझा दियो।

म्हें चटक पीळा आम सूंघती मुळक दी।

सवासेर

घणोई समझायो कै मिनखां सूं छेकड़ राख्या कर, पण थनैं जाणै कद अक्कल आसी, अबार आय जावतो नीं गाडी रें नीचै? कांई लेवण गयो टायर रें कनै?” गिरगिट री मां आपरै टाबर ऊपर रीस करी।

“म्हें कनै कीं लेवण सारू नीं गयो, म्हें तो नेताजी नैं पांवाधोक करण गयो हो। म्हें जद रंग बदळणो सीख्यो जद सौगन खायी ही कै जद म्हारो गुरु मिलसी, म्हें उणरै पांवाधोक करूंला।” टाबर आपरी उखड़ती सांसां काबू करतो बोल्यो।

बठीनै पंडाळ मांय नेताजी रें भासण माथै लगोतार ताळ्यां बाजण लाग री ही।





उर्मिला माणक गौड़

साच रो बोध

रामसिंह अेक होणहार, मेधावी अर साच बोलणियो मिनख होवणै सूं उणरो पूरो परिवार ई नीं, बल्कै पूरो मोहल्लो, मोहल्लो ई क्यूं, पूरो गांव ई उण माथै नाज करतो। कैबा है कै सज्जन मिनख सगळ्यां रो भलो चावै। उणरै बापू नै सराब री लत है। आ बात उणनै अखरै। अखरै ई नीं बल्कै उणरै काळजै पैठगी। बो सराब पीवणो तो दूर, उणरै हाथ तलक नीं लगावै। अठै तलक कै जे मजबूरी में सराब री जूठी गिलास ई उठावणी पड़ जावै तो तीन बार साबण सूं हाथ धोवै।

कुसंगत मिनख नै नरक में ढकेल देवै अर आ ई बात रामसिंह रै साथै हुयी। अबै बो चाळीस बरसां रो है। परण्योड़ो है अर फूल-सी दोग्य बेट्यां रो बाप ई है।

रामसिंह रो बापू रामजी रो प्यारो होयग्यो। नसाखोरी में आधी खेती तो उणरो बाप सलटायग्यो अर बच्योड़ी नै रामसिंह नसा में उडाय दी। परिवार में आजकाल फाकामस्ती चाल रैयी यहै। उणां री अैड़ी दुरदसा देख र गांववाळा उणनै समझायो, पण अेक कैबा है कै 'सीख सरीरां ऊपजै, दियां लागै डांम', मतलब सीख तो आपरै मन सूं उपजणी चाईजै। दियो तो फगत आग रो चटको ई जाय सकै। उण चीकणै घड़ै माथै पाणी रो काई असर होवै ?

च्यारां कानी निरासा, हतासा अर अवसदा फैल्योड़ो है।

अेक दिन रामसिंह री जोड़ायत भूख सूं बिलबिलावती गस खाय र पड़गी अर बठीनै उणीज दिन फीस जमा नीं होवणै सूं दोन्यूं छोर्यां नै स्कूल सूं पाछी घरां भेज दी।

रामसिंह रै हियै में चाणचक ई साच रो बोध हुयो अर सराब री बोतल फोड़ र हाथ में गंगाजळ लेय र सौगंध खाई अर उणनै निभाई भी।

बां बातां नै आज लगैटगै दस बरस बीतग्या। रामसिंह गांव री विकास अर नसा मुक्ति समिति रो अध्यक्ष है।

मौकै री तलास

बो सरीर रै मांय हट्टो-कट्टो, गोरो-फूठरो, पढाई मांय हुंसियार अर सरमीलै सुभाव रो हो। छोर्यां उण माथै मरती, आपरी जान छिड़कती, पण बो किणी नै घास नीं न्हाखतो। उणरै बापू री बदळी बीजै स्रैर मांय होयगी अर अबै अेम.टेक री पढाई बठै सूं ई कर रैयो हो।

गांव-चूटीसरा, जिला-नागौर (राज.) मो. 8742916957

बटै पाड़ोस मांय अेक छोरी रैवती । बा उणरै बारै मांय सोचती रैवती कै म्हार घरवाळा इणरै साथै म्हारो ब्यांव कर देवै तो किसोक सांतरो रैवै । बा मौकै री तलास मांय रैवती । अेक दिन बो आपरै भायलां साथै ऊभो बातां कर रैयो हो अर बा छोरी आपरै डागळै साथै ऊभी-ऊभी उणनै जोय रैयी ही अर आपरै मन मांय सोचै ही कै कांई गबरू जवान है, पण कदैई म्हारै साम्हीं ई नीं देखै । बा आपरै सुपनां मांय काठी डूब्योड़ी ही कै इतरै मांय उणरो हाथ डोळी साथै सूं फिसळ्यो अर धड़ाम सूं नीचै पड़ण लागी ।

संजोग सूं उण छोरै रो ध्यान बठीनै गयो परो । बा डागळै सूं छाजा साथै पड़ी अर बटै सूं नीचै पड़ण वाळी ई ही कै बो छोरो भाज 'र उणनै आपरा हाथां मांय झेलली । दहल सूं छोरी बेचेत हुयगी । बो झट उणनै सारला अस्पताळ मांय लेय 'र गयो अर डाक्टर नै दिखाई । डाक्टर कैयो, “आ दहल सूं बेचेत हुयी है । इणरै तो अेक ई खरोंच तलक नीं आयी । आपरै कारण आज इणरी जान बचगी ।”

बो बोल्यो, “ऊपरवाळै री किरपा सूं म्हारो ध्यान बठीनै गयो परो हो । डाक्टर साब म्हारै हाथ मांय दरद होय रैयो है । म्हनै कीं दवाई देय द्यो ।”

डाक्टर साब उणरी जांच करी अर कैयो, “हाथ रै मांय चोट आयी अर थोड़ो फेक्चर है, इण खातर प्लास्टर करणो पड़सी ।” अर उणरै प्लास्टर कर दियो ।

छोरी री बेहोसी टूटी तो बा पूछ्यो, “म्हें कठै हूं, अटै म्हनै कुण लायो ?”

“थनै अटै म्हें लेय 'र आयो ।” अर उणनै सगळी बात बतायी ।

इतणै मांय छोरी रा घरआळा ई बटै पूग्या । बै छोरा नै धिन्नवाद दियो अर उणरो नांव-पतो पूछ्यो अर आप-आपरै घरां गया परा ।

छोरी आपरै मायतां सूं कैयो, “इण छोरा सूं आपां री कीं जाण-पिछाण नीं ही, तो ई औ खुद री चिंता कर्यां बिना म्हारी जान बचायी । म्हारै मन मांय तो औ पैली सूं ई बस्योड़ो हो, पण अबै म्हें इणनै म्हारी जिंदगाणी मांय बसावणो चावूं । भलांई औ बीजी जात रो है, पण उणसूं म्हनै कीं फरक नीं पड़ै । म्हें ब्यांव करूंला तो इणरै साथै ई करूंला, नीं तो आजीवण कंवारी ई रैवूंला ।”

घरवाळा बां दोन्यां री मनस्यां जाण 'र उणां रो ब्यांव कर दियो । बै दोनूं आराम सूं आपरी जिंदगी बिताय रैया है अर अबै उणां रै अेक छोरो ई है ।

दिल रो दौरो

किरोड़ीमल खुद आखी जिंदगाणी भूख सूं बाथेड़ा करता रैया, पण आपरै अेकूकै बेटै नै पढाय 'र ऊंचा पद साथै बिठाय दियो । पढाई होवतां ई उणरी सगाई अेक खावतै-पीवतै चोखै परिवार मांय होयगी । किरोड़ीमल नै औ विस्वास हो कै छोरीवाळा ब्यांव चोखो करसी, पण बात खुल 'र सामनै नीं आयी ही । ब्यांव हुयो अर विदाई सूं पैलां बेटी रो बाप किरोड़ीमल सूं कैयो, “म्हारै सूं जुड़्यो जैड़ो देवण री खैचळ करी हूं । कीं कमी होवै तो बताय दीज्यो सा ।” पछै अेक लांबी लिस्ट दायजै री पढ 'र सुणाई । सुणणवाळं नै सगळं नै ई इचरज हुयो । किरोड़ीमल नै तो इतरी खुसी हुयी कै बो बरदास्त ई नीं कर सक्यो अर दिल रो दौरो पड़्यो । बापड़ा रै नीं देख्योड़ा रै नान्है सै काळजै में इतरी जिंसां मावै है कांई ? उणनै तो मरणो ई हो । इतरो फोगट रो सामान लेय 'र ।





डॉ. कृष्णा आचार्य

दाय मां

कुंभारां रै पूरै मोहल्लै मांय दाय मां री घणी चालती। जे कोई रै आधी रात रा ई काम पड़ जावतो तो बो बेहिचक दाय मां रै घर री कुंडी खड़काय लेंवतो। दाय मां आपरी घर री कुंडी कदैई लगावती कोनी अर नीं घर बारै ताळो देंवती। सगळ नैं ठाह ही कै दाय मां री नींद कित्ती काची ही। अेक हेलै मांय ई उठ जावती। लारलै केई सालां सू तो बै अबै आंगणियै मांय ई मांचो ढाळ लेवै। कनै ई छोटो-सो रसोवडो हो जठै झांझरकै चार बज्यां ई चाय चूल्है माथै चढ जावती। चाय पीयां पछै सिनान कर 'र बै गेडियो टेकती मिंदर जावती। औ बांरो रोजीनै रो नेम हो। सगळै मोहल्लै री बाई-बीनणी रा जापा घरां ई कराय देंवता अर जे पेट वाळी लुगायां बांरो मूढो देख लेंवती या बै कोई रै माथै पर हाथ फेर देंवती तद बीं रो दरद तुरंत दूर होय जावतो।

दाय मां जमारो बदळियो तद आपरै विचारां नैं भी आज रै विचारां सागै ढाळ लिया। कैवता, “अबै म्हैं बूढी होवण लागगी हूं अर हवा भी बदळण लागगी, इण वास्तै थे बडोडी अस्पताळो रो रुक्को जरूर-जरूर बणवाय लिया। घणी होसी तद म्हैं सागै चाल जासूं।”


दाय मां रो आस-पाडोस भी घणो ई चोखो हो। दाय मां रै साम्हीं रैवण वाळा मनसुखलाल जी तो दाय मां रै अेक हेलै सू तुरंत घर सू बारै आय 'र आपरी टैक्सी मांय रोगी नैं बैठा 'र तुरंत अस्पताळ पूगाय देंवता। दाय मां रो कैयो बै कदैई नीं टाळता। फेरूं तो दिन हुवो चायै रात। सगळै मोहल्लै रा छोटो-मोटा बांरो घणो ई मान राखता हा अर राखता भी क्यूं नीं! मोहल्लै रा आधै सू बेसी लोगां नैं दाय मां आपरै हाथां सू जणवाया हा। इण भांत दाय मां बां लोगां खातर मां सरीखी ही। इणी खातर सगळा लोग आपरै हिवडै मांय बांरै पेटै घणो आदर-मान राखता।

दाय मां कोई नैं भी कोई बीमारी होवती तद चट सू बीं रो ईलाज बता देंवती। बांरो पीहर नापासर हो। साल-छव महीनै सू जद बै आपरै पीहर जावता तद आवती बगत टैक्सी मांय चाडा भर 'र लावता। पूठा आय 'र बै मोहल्लै रै दस-बीस घरां मांय जाय 'र आपरै हाथां सू चाडो देंवती बगत कैवता, “ले बीनणी, ठंडो पाणी पीजै अर दूजां नैं ई पाईजै। ठंडा ठारिया रैया अर दूजा नैं ई राख्या!” बै चाडा भी इसा होवता कै अेकर पाणी घालण बाद पाणी चौबीसू घंटा ठंडो रैवतो अर फ्रीज रै पाणी नैं ई मात करतो। इण सारू लुगायां नैं जद भी दाय मां पीहर जावती तो आ अडीक रैवती कै बै आवती बगत चाडा अवस लेय 'र आसी।

उस्ता री बारी रै मांय, बीकानेर (राज.) 334005 मो. 8619402147

लारलै साल निरजळा इग्यारस नैं मिंदर मांय सत्संग चाल रैयो हो। सगळा मिल र भजन गाय रैया हा। अचाणचक ताळियां बजावता दाय मां ठाकुर जी रै दासै माथै गुड़कग्या अर दो मिनटां मांय बांरो हंसलो उडग्यो। मौजूद लोग-लुगायां मांय हाको मचग्यो। सांत सररीर नैं बांरै घर मांय लाय र आंगणै मांय पसार दियो। दाय मां रै बेटो तो हो कोनी, अेक बेटी ही, जिकी स्टैर रै कनै ई अेक गांव मांय परणायोडी ही। बा आ खबर सुणतां ई आपरै धणी अर बेटां रै सागै भाजती आयी। मोहल्लै मांय रात-भर कोई रै भी घरै चूल्हो कोनी जग्यो। भोर होवतां ई बांरी अरथी त्यार होयगी अर सगळा मोहल्लै वाळा बांरी अरथी नैं कांधो देंवता मसाण कानी लेयग्या। मोहल्लै री लुगायां रो तो रोवती-रोवती रो बुरो हाल होयग्यो। बेटी री गरीबी नैं देखतां मोहल्लै वाळा मिल र पूरै जतन सूं दाय मां रा बारह दिन रा कारज निभाया।

दाय मां रै सुरग सिधायां पछै सगळो मोहल्लो सूनो-सूनो लागण लागग्यो। दाय मां नैं रामसरण हुयां घणा दिन बीत्या कोनी हा कै बांरी बेटी बो मकान अेक सेठ नैं बेच दियो। अबै तो बा मकान रूपी सैनाणी भी रैयी कोनी जिकी दाय मां री ओळूं दिरावती। अबै तो बीं मकान री जगां अेक आलीसान कोठी बण र त्यार होयगी ही, पण आज भी दाय मां री ओळूं लोगां रै दिल मांय बण्योणी है अर बण्योणी रैसी।





डॉ. नीना छिब्बर

चिड़ी उड

कोरोना महामारी रै चालतां पूरो परिवार ई केई दिनां सूं आपरी इच्छा सूं घर मांय बंद हो। सगळा अेक-दूजै रो मनोबल बधावण री कोसिस करता। मिल-जुल'र घर रो काम करता अर पछै पुराणा खेल रमता। दादोसा भी सगळां साथै रमता।

अेक दिन दादोसा पोता राजू नै बोल्या, “राजिया, आज आपां थारै पापा री पसंद रो ‘चिड़ी उड’ रमांला। बाळपणै मांय म्है हमेस जीततो।”

टाबर पूछ्यो, “दादोसा, आ वा ईज रममत है जिणमें गलत पंखेरू उडावतां ई मार खावणी पड़ती, वा भी स्टाइल सूं। हथेळ्यां जोड़्यां पाछै अैना ऊपर लूण-मिरचां, हळदी बुरकण रो मंतर अर पछै दै चांटा, दै चांटा। जो खिलाड़ी हुंसियार होवतो वो कदै मार नीं खावतो।”

इण पछै राजू, मीना, पापा अर दादोसा रमवा आंगणै मांय बैठगया। चिड़ी उड, कमेड़ी उड, हाथी उड सरू होयगयो। बीच-बीच में गलती होवतां ई मंतर वाळो चांटो। सगळा हंसता। थोड़ी देर बाद पापा बोल्या, “अबै म्हारी बारी, म्है बोलूंला।”

दादोसा अेकदम राजी होयगया। औ आयो म्हारो चैंपियन। पापा सरू कर्यो—तितली उड, हाथी उड, जिंदगी उड। पण जिंदगी उड बोलतां ई पापा री आंगळी ऊपर अर बाकी सगळां री नीचै। दादोसा बोल्या, “आ कांई गलती करदी बेटा?” पण पापा री आंख्यां में पाणी अर आवाज में जोस हो, बोल्या, “बाबोसा, जिंदगी तो उडणी ई चाईजै। म्है उडाऊंला, चायै म्हनै कित्ता ई चांटा खावणा पड़ै।”

दादोसा अेक इसारो कर्यो अर सगळां री आंगळ्यां ऊपर होयगी। साची बात, जिंदगी तो उडैला ईज।





पुष्पा पालीवाल

निहिरा

रोटियां पोवती-पोवती जाणै जीव घबरायो हो बींदणी रो। पोळ माथै आय बायरै में बैठगी। कांई हुयो बींदणी? पूछतां ई बोली, “यूं ही, जीव सोरो कोनी।”

जाणै जीवडै में हजार हिलोरां आणंद री आयगी। सुपना संजोता-संजोता पांच बरस बीतग्या। अबै पाड़ोसणां रै मूंडै पाटा बंध जासी। बींदणी रो चोखो इलाज करावो जी, ई री उमर री लुगायां तो सासू मां बणवा री त्यारी करै है। कदैई बानै सीधै मूंडै जबाब कोनी दे सकी। अबै बीनणी मतैई जबाब दिराय दैसी।

नौ महीनां कठै निकळग्या। म्हें तो लाडो नैं अेक ईज बात कैयी—थारी सौगन लाडेसर, जीं दिन सूं तूं सात फेरा लेय र आयी ही, बावजी री मान लेयनै बैठी हूं। सगळ्यां सूं पैली जे थाळ बजैली तो बजावा वाळी थारी सासू मां ई होवैली। आखिर दुनियां नैं पतो तो चालै कै म्हारी साध पूरी हुयी है। या बात साची है कै बींदणी रै माथै फिकर री लकीरां साफ मंड्योड़ी देखी है। कांई कैवती, आंधा कोठा है, पर ऊपरआळो न्याव करसी। बेटी फोन माथै अेक ई रट लगावती रैवै है—भूआ बणतां ई पैलो फोन म्हारै आवणो चाईजै। जे वंस को भागीरथ आवै तो म्हें सबसूं पैली कड़ा-कड़ल्या लेयनै आवूंली, म्हारै भतीजा री दूढ करावूंली।

काल री रात निंदौरी निकळी। पाड़ोसण कैवती ही, जे मां रो रूप फीको पडै तो छोरी ढीकरो होवै है। रामजी री मरजी, पण म्हारी साध पूरावजै बावजी। “माजी, बेटी आई है”, कानां में जाणै इमरत बरसगयो। बावळी हुई म्हें कांई बधाई दूं। बटवा में हाथ घाल्यो, गुड़मुड़ सौ-सौ रा नोट कोई चार-पांच हाथै लाग्या—लेल्यो, अब ये ही लेल्यो। नर्स री मुट्टी में नोट राख्यो। म्हारी धाय फूट्या मूंडा सूं दो घड़ी देखती रैयी। माजी, बेटी आयी है, जाणै म्हें सई सुण्यो कोनी। जाणै म्हारी साध पूरीजी है। साड़ी रो पल्लो ऊंचो-नीचो खोंसती बींदणी रै पिलंग तक पूगी। कांई लाडेसर रूपआळो रूप कसान कुम्हळ रियो है। सासू मां मानता कर बैठ्या। अबै बाईसा दूढ पर कड़ा-कड़ल्या ल्यावा वाळा हा। पाड़ोसण री अटकळ फेल होयगी। नैणां नीर ढुळकता ई हा कै म्हें हथेळी मांडली, “वेंडा हुआ कांई, म्हें तो इण लिछमी खातर ई थाळ बजावण रो कैयो। इण खातर ई भाटै-भाटै देव कर्या हा। बेटो तो आपणा अेक वंस रो नांव करै, पण बेटियां तो दो-दो कुळ्यां नैं तारण वाळी है। म्हें तो नांव ई राख लियो—निहिरा।



डी. आर. हाउस, धोरा मोहल्ला, पीपळी चबूतरा, कांकरोली (राजसमंद) 313324 मो. 9001063104



मंजू शर्मा जांगिड़ 'मनी'

तिस्स

रामू काम री तलास में स्हैर गयो। स्हैर में उणरो साथी शामू कंपनी में काम करै। रामू नैं बठै ईज जाणो हो। बस सूं नीचो उतरतां ई उणनैं तेज तावड़ो लाग्यो। तपती सड़कां अर ऊपर सूं बळ्ळती लू देख 'र उणरो माथो चकरायो। मन में सोच्यो, स्हैर में तो तपती अणूती है, अठै कियां रैवणो होसी ? मन मांय विचार करतो मोटा-मोटा पांवडा भरतो आगै बधण लाग्यो।

थोड़ी जेज ई चाल्यो होसी कै पसीनै सूं हबाडोळ होयग्यो। कंठ सूखण लागग्या। थैला मांय सूं पाणी री बोटल काढी, तो बोटल खाली। घर सूं भर 'र चाल्यो, पण कलेवा करनै आयो हो, सो बस में तिस्स लागी अर बो बोटल मांय पाणी पीयग्यो हो। अबै पाणी कठै सूं लावै ? सोचतो आगै बधतो रैयो। तिस्सां मरता रा होठ सूखण लागग्या। थोड़ोक आगै चाल्यां उणनैं साम्हीं मोटो बंगलो निगै आयो।

“अरे! अँड़ो फूठरो बंगलो, घणो जोरदार बणायो औ तो, सागीड़ो बण्योड़ो है। अँड़ै बंगलै में रैवण वाळा लोग ई घणा जोरदार होवैला। देखतां ई मन हरखीजग्यो। घणो जोस आयो। अठै जरूर म्हनैं ठंडो पाणी पीवण नै मिलसी। तिस्स मेट 'र म्हारी बोटल भी पाछी भर लेसू। बंगला में लाग्योड़ा रूखड़ा देख 'र तो बो औरूं हरखीज्यो। थोड़ी देर आं बारला रूखड़ां री छियां में बिसाई खावूं, पछै बंगलै में जासूं।

थोड़ोक बैमो खायां पछै बो बंगलै में जाय पूग्यो। पण बठै तो बीं नैं कोई निगै नीं आयो। च्यारूंमेर भाळ्यो पण कोई निजर नीं आयो।

“बाईजी, बाईजी!” मोकळा हेला मारुया पण अजै कोई बारै नीं आयो। घर मांय हेला नीं सुणीज्यो होवैला। अबै करूं तो काई करूं। हाल ताई काठो तिस्स मरग्यो। इतै में उणनैं गेट रै कनै घंटी रो खटको निगै आयो। बो उणनैं दबायो। खटको दबतां ई बाईसा बारै आया। मोटी-मोटी आंख्यां तरेडता आवतां ई पूछ्यो, “घंटी कुण बजाई ?”

“म्हैं बजाई बाईसा, म्हैं घणाई हेला पाड्या पण कोई मांयनै सूं आयो नीं, जणै म्हैं घंटी बजाय दी। बाईसा, म्हैं अणूतो तिस्सो हूं। थोड़ोक ठंडो पाणी पायदो तो आतमा तिरपत व्हे जावै।” सूखै कंठां सूं आंती आयोड़ो बो नीठ बोल्यो।

“आ काई प्यारु है जको अठै ठंडो पाणी मिलसी। आ घंटी काई थानै पाणी पावण सारु लगायोड़ी है।” कैवता बाईसा रीसां बळ्ळता पाछो आडो बंद कर 'र मांयनै गया परा।

रामू मोटा बंगला नैं अजै ई बाको फाड्यां जोवै हो।





शकुंतला अग्रवाल 'शकुन'

बायरो

“सुणो!” रामकली आपरै धणी सू बोलै।

“सुणा! काई नूवी खबर है।” कैलास मखौल रा मूड में बोल्यो।

“इयां काई बोलो जी, म्हें खबरीलाल थोड़ै ई छूं।”

“चोखो कोनी तो, बात बता बेगी-सी। नीतर थारो पेट दूखण लाग जासी।”

“साची बोलो थे। घणी देर सू कुलबुला री छूं। जद सू सुण्यो, लाला रो छोरो भणबा गयो, बठै सू गोरी मेम परण लायो। थोड़ा दिनां में पाछा चलै जासी। अेक ईज तो छोरो है, लाला री सेवा कुण करसी अब?”

“काई होग्यो तो...?”

“थू-थू होय रैयी है सारै चोखळै मांय।”

“आजकाल बायरो अस्यो ई बाज रियो है। अपणाबा में ही फायदो है।”

“जणै आपणो छोरो तो थोड़ो पढ्योड़ो ई चोखो है। रैसी आपणै नख ही। जात मांय ई परणास्यां तो बीनणी भी आपणी सेवा करसी।”

“थारो तो खोपड़ो खराब होग्यो, सगळा अेक जिस्या कोनी होवै।”

“कैय दियो सो कैय दियो। सुणल्यो! म्हारै छोरै नैं घणो कोनी भणाणो, भलाई रूखी-सूखी खाय र ई पेट भर लेस्यां। परदेसां कोनी भेजणो। परदेसां जाय र सगळा लखण भुला देवै, धूड़खातै हो जावै। परदेसां रा बायरा री चपेट में आ जावै।”

डोकरी

“अस्यो काई होग्यो? पो फाट्यां सू ई थारी आवाज कानां रा परदा फाड़ रैयी है।” रामलाल बोल्यो।

“थानै तो कोई बात रो ठाह ई कोनी रैवै। मरणो तो म्हनैं पड़ै।” झल्लाट भर्या सुर मांय कजरी बोली।

‘हनुमंत कृपा’ 10 बी-12, आर.सी. व्यास कॉलोनी, केशव अस्पताळरै कनै, भीलवाड़ा (राज.) मो. 9462654500

“बोलणो होवै तो बोल, नीं तो म्हें चाल्यो।”

“मा'सा नैं साथै लेय 'र पधारज्यो। म्हारै सूं अबै बांरी चाकरी कोनी होवै।”

“या कांई बात करी, खाट सूं उठ कोनी सकै, बा थनैं कस्यो दुख देवै?”

“भगवान जाणै म्हारा करम मांय ओर कितरा पोतड़ा धोणा लिख्या है?”

“देख, भगवान! मरबो-जीणो सब प्रभु रै हाथां मांय है। थूं काहैं दोस की भागी बणै है। आखिर है तो आपणी मां।”

“कोरोना सूं घणा ई मिनख मर रैया है, पण म्हनैं मौत कोनी आवै।”

“दुख री घड़ियां भी निसर जासी। मन छोटो मत कर। डोकरी जीवड़ा मांय घणी दुखी है। बा सुण लेसी, मूंडो बंद करलै।”

कजरी रो मूंडो बंद कोनी हुयो। सगळी बातां सुण 'र डोकरी री सांसां जरूर बंद होयगी।

पेट री आग

घणा दिनां सूं चंदर स्कूल कोनी आयो तो माटसाब बीं रा भायला राम सूं पतो करवायो। पण किणसूं भी बेरो कोनी पड़्यां माटसाब खुद गया चंदर रै घरै। घरां जाय 'र चंदर री मां सूं मिल 'र बोल्यो, “चंदर स्कूल क्यूं कोनी आ रैयो?”

“म्हूं कांई बताऊं, चंदर रा बापूसा तो कदयांका म्हानैं छोड 'र चल्या गया। खाबा-पीबा का फोड़ा होग्या, जणै के करां?”

“पण सरकार तो मुफत मांय पढाय रैयी है।”

“घर मांय खाबा वाळा चार मिनख है। पेट भरण वास्तै काम पर जावां म्हे दोन्यूं। पेट री आग घणी खोटी होवै साब!”

“कतरा रुपिया देवै सेठ?”

“अेक हजार।”

“हर महीनै म्हें देसूं अेक हजार, अब चंदर नैं स्कूल भेज दीज्यो।”

“माफी चावां, मुफत को कोनी खावां सा।”

“ठीक है, स्कूल कै बाद म्हारो काम कर दैगो।”

“आप मिनख नीं, भगवान हो सा।”





डॉ. संतोष बिश्नोई

प्रीत री भासा

आज पूरो अेक महीनो होयग्यो, राधाकिशन नैं अमरीका आयां नैं। घरआळी लारलैं साल सुरग सिधारगी। अब भारत में अेकला क्यूं रैवता! अेक बेटो हो बांरो। बो भी पढ-लिख 'र अमरीका जाय बस्यो। राधाकिशन नैं भारत री घणी याद आवती। करता भी के? फोन पर कितीक बातां हो सकै! अमरीका में किणी नैं आपसरी में बंतळ रो टेम कटै! दूजी बात, भासा ई समझ में आवै जणै कीं बात करै। बेटो डाक्टर हो, पण आपरै पिताजी री मनगत नीं समझ सक्यो। बांरै मन रै खाली खूणै नैं कियां भर सकै। बो समझ नीं सक्यो। राधाकिशनजी सो-कीं हुवतां थकां ई अेकला पड़ग्या। मन री ऊंधी दिस होयगी। केई बार सोचता, पाछा भारत चल्या जावां, पण भारत में अब कीं बच्यो कोनी। नौकरी करता जद आपरी सारी कमाई टाबरां रै पढाई मांय खरच कर दिया करता। खुद किरायै रै घर मांय रैया। घरआळी केई बार समझाया कै आपणै अेक सस्तो-सो ई सई, घर तो लेय लेवणो चाईजै। पण राधाकिशनजी घरआळी री बात हंस 'र टाळ देंवता। आज अठै अमरीका में ई कोई बात री कमी कोनी ही, पण मन रो के कर्यो जावै?

अेक दिन बेटो अस्पताळ सूं आयो। बडो दुखी-सो लाग रैयो हो। कारण पूछ्यो तो बीं बतायो कै आज अेक औरत रै दिमाग रो ऑपरेशन कर्यो, पण बीं रै लारै अेक छोटो टाबर हो। बो आज तीन दिनां सूं रोटी-पाणी रै हाथ नीं लगायो। अबै बीं री मां नैं तो होस में आवण में के टाह कित्तो टेम लागसी। पण जे टाबर इयां भूखो रैयो तो बीं री हालत खराब हो जासी।

सुण 'र राधाकिशनजी रै मन मांय ई टाबर सारू ममता जागी। बोल्या, “म्हैं मिल सकूं हूं कै बीं टाबर सूं।” बेटो पूछ्यो, “थे मिल 'र के करोगा? थांसूं तो बात ई नीं कर सकै। थे कैवो तो मिला तो म्हैं देस्यूं।” थोड़ी-सी देर बाद बेटो राधाकिशनजी नैं अस्पताळ लेयग्यो।

अस्पताळ पूग 'र राधाकिशनजी टाबर नैं देख 'र बीं रो सिर पळूस्यो। फेर बां चावळ-दाळ मंगवाया। बीं नैं हाथ सूं मिला 'र टाबर नैं खवावण वास्तै आपरो हाथ आगै बधायो। बो टाबर अेक बार बांनै देखै अर अेक बार खाणै कानी। राधाकिशनजी अेकर फेरूं टाबर रै सिर पर हाथ फेर 'र खाणै रो हाथ आगै बधायो तो अबकाळै टाबर खा लियो। औ सब दूर खड़्यै राधाकिशनजी रो डाक्टर बेटो देख्यो तो बो आपरै पिताजी नैं पूछ्यो, “थे ई नैं के बोल 'र खिलायो?” राधाकिशनजी कैयो, “बेटा, प्रेम री कोई भासा नीं होवै। आप प्रेम सूं आपरै हाथ सूं किणनैं भी रोटी जिमावो, बो खा लेसी। जियां मां टाबरपणै सूं टाबर नैं प्रीत सूं जिमा देवै। बस प्रीत जरूरी होवै जीवण में। प्रेम री बात बिना भासा भी सब नैं समझ आवै।”





आजकाल

बंगलै जाय 'र असे.पी. साब रा पग पकड़तां थकां बै रूंध्यै गळै सूं कैवण लाग्या, “असे.पी. साब, छोरै कुकरम कर्यो है—टींगरी साथै। पण बीं नैं बचावो सजा सूं। थे जो भी चावो, म्हनैं मंजूर है। मालकां म्हारै तो औ ईज अेक छोरो है।

“देखो, थे तो अेक तरै सूं म्हनैं लाचार कर रैया हो। छोरै नैं बचावण खातर नीं चावतां थकां भी म्हनैं तो जीवती माखी गिटणी पड़सी। साळी महंगाई सूं सलटणै वास्तै।”

उणां रो इसारो समझ 'र बै उणां री मेज रै हेठै नोटां सूं भर्यो बैग मेल 'र ब्हीर होयग्या अर दुस्करमी छोरो बाइज्जत बरी होयग्यो।

मिनकी

मिनकी कुण मारी ? आखो दिन बीतग्यो। सिंझ्या ताई कोई नीं बोलै। मर्योड़ी मिनकी पड़ी, रोटी कियां खावां ? पंचायत में सब पंच भेळा होग्या। बात करवा लाग्या। अबै काई करां, टाबरां नैं तो भूख लागी है। आपां सब तो मोटा हां, पण बाळकां नैं कियां समझावां ? मिनकी नैं कुण मारी, पैली खबर तो पड़ै। निवेड़ो तो पछै करांगा।

लछमण दौड़तो-दौड़तो आयो, अेक सांस में कैवा लाग्यो, “म्हैं जाणूं हूं, मिनकी कुण मारी, पंच लछमण री बात सुणवा लाग्या। आज परभातै म्हैं गायां नैं चरावा जावतो हो, म्हैं देख्यो कै ठाकरसा मिनकी री पूंछ पकड़नै गळी मांय जावता हा, अबै सब जायनै ठाकरां नैं पूछो।”

पंच सब उठग्या नैं लछमण री बांवटी पकड़ी नै ठाकरसा री हवेली पर गया, “ठाकरसा ! औ लछमण काई बोलै, आप सुणो।” ठाकरसा बारै आया। सगळा पंच लछमण री बांह पकड़ राखी ही। लछमण तो निडर हो साच नैं आंच नीं आवै। औ जाणतो हो।

ठाकरसा बोल्या, “काई बात करो हो ! म्हैं मिनकी मारी ? म्हारो खानदान थे जाणो कोनी। म्हारा दादोसा भालो लेयनै शिकार सारू निकळता हा तो सूरज कैवतो लालसिंघ भालो नीचो करलो, म्हारी आंख फूट जासी अर थे म्हारो कैवो कै म्हैं मिनकी मारी ! थे कैवणो काई चावो ?”

झूठ तो झूठ ई होवै। इतै मांय तो डोढी मांय सूं सीता कंवर बारै आयनै आपरै दादोसा रो हाथ पकड़नै कैवा लागी, “दादोसा हुकम, मिनकी तो आप ईज मारी। आज परभातै जीमता हा जणै दाळ में लूण बेसी हो। आप थाळी फेंकी जणै मिनकी दूध पीवती ही। थाळी लागतां ई मिनकी हेठै पड़गी। आप ई टांग पकड़नै बारै लेयग्या हा।”

सब पंच अेक-अेक करनै जावा लाग्या। ठाकरसा बोल्या, “पचास रुपिया लेंवता जावो, मेहतर नैं कैयनै मिनकी फिंकवा दीजो।”





सुषमा राजपुरोहित

किन्नी

किन्नी उडावणी किणनें चोखी नीं लागै। रंग-रंगीली, भांत-भांत री किन्नियां बादळां में उडती दिखै जद टाबर तो टाबर, बडां रो मन भी रीझ जावै। टाबरां नीं तो किन्नियां उडावण रो अणूतो ईज कोड हुवै।

अेकर अेक टाबर हो। बो दिन ऊगतां ई डागळै चढ जावतो अर दूजा डागळां माथै मिनख अर टाबर जिका कै किन्नी उडावता, बांने देखतो रैवतो अर अर घणो राजी होवतो। अेकर बो आभै में घणी फूठरी गुलाबी किन्नी उडती देखी, जिकै रै माथै अेक काळो चेपो लागयोडो हो। बो चेपो इयां लागै हो जाणै कोई मां आपरै टाबर रै लिलाड माथै निजर सू बचावण नै काळो टीको लगायो हुवै। टाबर नीं बा किन्नी घणी ई मन भायी अर मन ई मन सोचण लागयो कै काश! बा गुलाबी किन्नी बीं नीं मिल जावै। केई ताळ तो बो किन्नी नीं देखतो रैयो, छेवट बीं सू रैयीज्यो कोनी अर बीं गुलाबी किन्नी उडावण वाळै मिनख नीं कैयो, “भाईजी, म्हनें आ गुलाबी किन्नी देय दो।” पण बो मिनख टाबर नीं किन्नी तो कोनी दी, ऊपर सू बीं पर रोळा करण लागयो। टाबर साव बिलखो होयग्यो। थोडी ताळ में सो-कीं भूल र पाछो कदै बादळां में उडती गुलाबी किन्नी नीं देखै, कदैई लटाई नीं देखै अर कदैई किन्नी उडावण वाळा मिनख नीं देखै। देखतो-देखतो इतो मगन होयग्यो कै बीं नीं इयां लागण लागयो कै गुलाबी किन्नी बो ईज उडाय रैयो है। इतै में ई गुलाबी किन्नी कटगी अर हवा में हिचकोळा खावती नीचै पडगी अर बीं री डोर टाबर माथै आय र पडि। डोर पडण सू टाबर खयालां सू बारै आयो। “अरे! गुलाबी किन्नी तो कटगी अर ताणी तो म्हारै माथै आय पडि।” बो बाळपणै में बीं ताणी नीं पकड र खींचण लागयो।

गुलाबी किन्नी उडावण वाळो मिनख बीं टाबर माथै पैलां सू ई रीसां बळ्योडो हो अर ऊपर सू कटगी किन्नी। किन्नी कटण रो सारो दोस टाबर रै माथै मंड र ताणी नीं जोर सू खींची तो टाबर री आंगळ्यां ताणी सू कटगी अर लोही री धार छूटगी। टाबर जोर सू चिरळायो। हाथ में दरद रै कारण जोर-जोर सू रोवण लागयो अर दूजै हाथ सू आंगळ्यां नीं पकड्यो नीचै कानी भाज्यो। डागळै सू लेय र आंगणै तांई लोही री धार छूटगी। आंगणै में जाय र टाबर ढबियो अर आपरी मां नीं हेलो पाड्यो, “मांSS अे मांSS।”

जेळवैल, हनुमान गळी, बीकानेर (राज.) मो. 9351340799

टाबर रो रोज सुण 'र बीं री मां रसोई मांय सूं भाज 'र बाँरै आयी। टाबर रै हाथ सूं टपाटप लोही पड़तो देख 'र मां गाफळीजगी। बीं नैं कीं टाह नीं रैयो कै बा करै तो कांई करै! छेकड़ बीं नैं चेतो बापरयो। ओरे में जायनै अेक कपड़ै री लीरी लायी अर बीं नैं पाणी सूं गीली कर 'र टाबर रै हाथ रै बांधी। थोड़ी ताळ में लोही पड़णो बंद होयग्यो। पछै टाबर नैं मां पुचकार 'र पूछ्यो, “कांई हुयो रे पपिया ?” जणै टाबर डरतो-डरतो आपरी मां नैं सगळी बात बतायी, “मां, अेक किन्नीवाळै री किन्नी कटगी अर बीं री ताणी आपणै डागळै आयी अर म्हैं बीं ताणी नैं लूटण सारू पकड़ली, किन्नी कटण री रीस में बो मिनख ताणी नैं जोर सूं खींची अर म्हारी आंगळ्यां कटगी।”

मां कैयो, “बेटा, तूं छोटो है। इण पतंग अर डोरां सूं अळगो रैया कर।” पण बो तो टाबर हो। थोड़ी ताळ में ई सो-कीं भूलग्यो अर पाछो डागळै चढग्यो उडती किन्नियां नैं देखण खातर। बो मिनख टाबर रै कानी देख 'र घूरण लागग्यो अर मन ई मन में टाबर नैं ईज किन्नी कटण रो दोसी मान 'र हिसाब चुकतो करणो चावै हो, पण कीं कर नीं सक्यो। इयां करतां-करतां किन्नियां उडावण री रुत खतम व्हेगी। टाबर रै अंतस में गुलाबी किन्नी रो चितराम छपग्यो।

आगलै बरस किन्नियां री रुत पाछी आयी। बो टाबर पैलां ज्यूं ई दिन ऊगतां पाण डागळै चढ 'र उडती किन्नियां नैं देख 'र आणंद लेवण लागग्यो। पपियो केई बेळ आपरै पापा नैं किन्नियां दिरावण रो कैयो पण ऑफिस रै काम रै आगै गिनर कोनी करी। अेक दिन ऑफिस री छुट्टी ही अर टाबर रा पापा घरै ईज हा। जणै बो टाबर आपरै पापा नैं कैयो, “पापा, आज तो म्हनैं किन्नियां दिराय 'र लावो नीं।”

बीं रा पापा कैयो, “हां बेटा, आज तो म्हैं थनैं जरूर किन्नियां दिराय लासूं। इटकै सूं त्यार होय 'र आयजा। आपां दोनूं बाजार चालसां।”

दोनूं बाप-बेटा बाजार में किन्नियां री दुकान माथै जाय 'र ढबिया। बटै जाय 'र टाबर नैं बीं रा पापा पूछ्यो, “किसी किन्नी लेसी ?” बो टाबर किन्नियां देखण लागग्यो। बटै बीं नैं अेक धोळी किन्नी दिखी। बा किन्नी बिती ई फूटरी ही जिती कै बा गुलाबी किन्नी। टाबर आंगळी सूं धोळी किन्नी कानी इसारो कस्यो। टाबर रा पापा री निजर बीं री आंगळी माथै पड़योडै निसाण माथै पड़ी अर बांरो विचार बदळयो। अरे! औ म्हैं कांई कर रैयो हूं? बै आपरै टाबर नैं कैयो, “चाल बेटा, आपां नैं किन्नियां कोनी लेणी।”

“क्युं पापा ?”

“देख बेटा, तूं किन्नियां अर ताण्यां रै चक्कर में मत पड़। तूं भूलग्यो कांई, लारलै बरस थारो हाथ ताणी सूं कटग्यो हो। कित्तो दोरो पाटियां-पोळियां करायी अर छेकड़ कठैई जाय 'र थारो हाथ ठीक हुयो हो। अबै म्हैं थनैं किन्नी कोनी दिरावूं। चाल... घरां चालां।”

पण टाबर जिद ई पकड़ली धोळी किन्नी लेवण री। टाबर रा पापा, टाबर रो बांहुडो पकड़्यो अर खींच 'र घरां ले जावण लाग्या। टाबर रोवतो जावै अर कैवतो जावै, “म्हैं तो बा ईज धोळी किन्नी लेसूं... बा ईज धोळी किन्नी लेसूं।” बो तद ताई जिद करतो रैयो जद ताई कै बीं री निजरां सूं अदीठ नीं होयगी ही बा—धोळी किन्नी।





करुणा दशोरा

अणवैती

रूपा तीसरी किलास में भणती ही। बा नित स्कूल जावती अर घणो मन लगाय 'र भणती भी ही। उणरो घर स्कूल सूं घणो छैटी नीं हो। छोरा-छापरा खेलता-कूदता पगां ई स्कूल जावता परा हा। रूपा भी आपरै आडै-पाडै रा बाळकां लारै ई जाया करती ही।

पण आजकाल रूपा घर सूं स्कूल वास्तै घंटो खंड पैलां ई निकळवा लागगी। मां केई दाण उणनै बरजी भी ही कै हाल तो वैगो है, अतरी झट क्यूं जावै है? पण बा मां री बात रो पडूत्तर दियां बिना ई कोई-न-कोई बायनो बणाय 'र झट सूं निकळ ई जावती। मां भी इण बात पै वत्तो ध्यान नीं दियो, औ सोच 'र कै छोरा-छापरा है। रमता-खेलता परा जावै है, छन्याक वैगा पूग जावैगा तो कांई हरज है!

रूपा री मां रै मन में आ बात तो आयी कै आजकाल रूपा घर सूं वैगी निकळै है, पण क्यूं? इण बात पै उण घणो ध्यान नीं दियो। पण जद ठाह पड़ी तो घणो हळबोळ वैई पूगो हो अर सिवाय पछतावां रै कीं हाथै नीं लागो।

व्हियो यूं कै रूपा रा घर सूं न्हामेक छेटी अेक बाड़ा में अेक गंडकड़ी बच्चा दिया। बै नान्हा-नान्हा लूरक्यां घणाई मोवणा अर घोळू-मोळू हा। बांनै देखतां ई किणी रो भी मन उणां नै खेलावा रो होय जावै। रूपा तो नान्हीक छोरी ही। उणनै तो जाणै अेक लारै अतरा खेलकण्या मिलग्या अर बै भी जीवता-जागता। बा आपूं आपनै उणां लूरक्या रा मोह सूं अळगो नीं राख सकी अर मारू-बापू सूं छानै-छुपकै घर सूं वैगी निकळ 'र घंटोखंड उणां लूरक्यां लारै खेल 'र जद अडै-भडै रा सगळा साथी गोठ्या स्कूल खातर उण गेला सूं निसरता तो बा भी उणां रै लारै परी व्हेती।

रूपा री घणी तगड़ी मंसा व्हेती उणां लूरक्यां नै आपरै घरां ले जावा री, पण बापू री दरपणी उणनै अस्यो करवा सूं लगोलग रोकती रैयी अर बा आपरै मन री इच्छा पूरी करण सारू नित उणां लूरक्यां लारै खेल 'र टेमोटेम स्कूल अर घरां पूग जावती।

अेक दिन रूपा ज्यूं ई अेक लूरक्या नै खेलावा खातर आपणै खोळा में लीदो कै अतराक में कूतरी आव रै परी। बा तो आवतां ई घुरावती थकी रूपा पै लपकी तो रूपा रै हाथां मांय सूं लूरक्यो बठै ई छूटग्यो, पण भुसती थकी उण कूतरी रो दांत रूपा रै हाथ री अेक आंगळी में गच्च गयो। रूपा दरपणी रै मारै बठै सूं तुरत निकळी अर स्कूल पौंचगी। बठै ई बा आखो दिन

अणमणीज 'र रैयी। थोड़ीक लागी है, साऊ व्हे जायी, यूं सोच 'र बा बेचिंता व्हेयगी अर उण हाथ कानी घणो ध्यान नीं दीधो। नीं ई किणनें ई इणरो जिकरो कीधो कै उणरै सागै काई बीती।

स्कूल री छुट्टी व्हियां बा घरै पूगी तो बटै भी मारै दरपणी रै उण आपरै माऊ-बापू नैं कीं नीं बतायो। जाणै खबर पड़्यां वै लताडैगा। उण आपरै हाथ नैं ओलै-छानै राख्यो पण आखिर कठा ताई ? चार-पांच दिन में तो बो घाव पाकवा आयो। तो ई बा किणी नैं नीं बतायो। स्यात बा आ बात घरै बताय देवती तो टेम पै इलाज मिल जावतो, पण उण इयां कोनी कर्यो।

थोड़ाक दिन ओजू निकळ्या कै रूपा तो कूतरा री गळ्यै भुसवा लागी। कूं कूं कर 'र बा तो रात-दिन कुरळवै। घर रा मिनखां रै समझ में नीं आयी कै छोरी रै काई व्हेग्यो। पण जो भी हुवो, अबै घणो मोडो होयग्यो हो।

गंडकड़ी रो ज्हेर रूपा रा सररी में पसराव करवा लागो। आखिर ही तो गांव री कूतरी। उणरै कस्या एंटीरैबिज रा इंजेक्शन लाग्या थका हा। तो ज्हेर तो असर करणो ईज हो। होळै-होळै रूपा मांय कूतरा रा सगळा लखण प्रगट व्हेवा लागो। बा कूतरा ज्युं भूंकती तो कदैई बटको भरवा री करती अर दरपी-दरपी लागवा लागी। ताव आयो जो न्यारो।

औ सब देख 'र रूपा रा माऊ-बापू हैरान व्हेग्या। उणां री समझ में नीं आय रैयी ही कै आखिर उणां री छोरी रै व्हियो काई हे! कजाणा ताव रै कारण तो अस्यान न्हिं कर रैयी है। बै सोचता रैया पण तो भी रूपा उणां साची बात नीं बतायी। देवरै ले जावा पै भी कोई फायदो नीं मिल्यो, क्यूकै मरीज आपणी तकलीफ सही-सही बतावै तो ठाबंद इलाज लागै कै।

अबै लाचार होय 'र रूपा रा माऊ-बापू उणनें सफाखानै लेयग्या। बटै रा डाक्टर तो रूपा नैं देखतां ई केई दियो कै इणमें तो कूतरा रै काटवा सूं व्हेवा वाळी बैमारी रा लक्षण दीख रैया है। इणरै गंडक बटको भस्यो हो काई ? पण मां-बाप तो इण बात सूं अणजाण हा। बै काई बोलता ! उणां तो ना में नाडकी हलाई दीधी अर रूपा जाणता थकां भी साच नीं बताय सकी। उणनें समझ पड़गी ही कै म्हारी इण दसा री जिम्मेवार म्है ईज हूं, दूजो कोई नीं।

अतराक में पाछो उणनें दौरो पड़यो। बा कूतरा ज्युं भुसवा लागी अर उणरै मूडै सूं लाळ रा रेला निकळवा लाग्या। डाक्टरां घणी कोसिस कीधी उणनें ठीक करवा री, पण कोई दवा-दारू कै दूजा जतन उणनें ठीक नीं कर सक्या, क्यूकै अबै घणी देर व्हे चुकी ही।

रूपा री अेक छोटी-सी चूक उणरी जिंदगाणी पै भारी पड़गी अर अतरो दुख देख्यो जो न्यारो। देखतां-देखतां रूपा रा प्राण-पंखेरू परा उड्या। उणनें डाक्टर ई नीं बचा सक्या। हां, रूपा टेमसर सो-कीं बताय देवती तो औ दिन नीं देखणो पड़तो। पण अबै काई ?

रूपा रा माऊ-बापू गराड़ा कर-कर 'र रोवा दूका। बै कैय रैया हा-अरे छोरी ! थूं औ काई कीधो ? म्हानै वतावती तो खरी। थारो साऊ इलाज करावता। टेमसर इलाज मिलतो तो थूं झट ठीक व्हे जावती, जीव सूं तो नीं जावती ! हाय म्हारी रूपली... !

मां-बाप रो औ विलाप हर किणी रै ई काळजै नैं चीरतो थको आखै सफाखाना में गूंजग्यो।





दमयंती जाडावत

वीजा

“आज भाबू चूल्हो नीं चेटायो। स्यात आज बा कीं ज्यादा ई मांदी व्हेगी है। उणरी सरधा कोनी, जिणसूं बा खाणो नीं बणाय सकी है। खाणा में ई कीं खास नीं बणावै। रोज खीचड़ी-थूली बणावै। पेट में आंत नीं, मूंडा में दांत नीं।” इती बात आपरी जोड़यत राधा नैं कैवतो गोपाळ माचा पे बैठग्यो अर आगै कैवण लाग्यो, “भागवान! थोड़ो पाणी रो लोटो तो झिलाय दै।”

राधा पाणी रो लोटो ल्यायी। गोपाळ उणनैं कैयो, “थोड़ी खीचड़ी बणाय दै। भाबू नैं देंवतो आवूं अर देखतो आवूं कै उणरी तबीयत कीकर है।” भाबू री धांसणै री आवाज उणां नैं साफ सुणीज रैयी ही।

गोपाळ खीचड़ी लेय भाबू रै घरै आयो। बा सूती-सूती बोली, “कुण है?”

गोपाळ बोल्यो, “भाबू, औ तो म्हैं हूं गोपाळ। आप कीं जीमिया? आपरी तबीयत कीकर है?”

भाबू धांसती बोली, “बेटा, थोड़ो ताव है, सांसां तेज चाल रैयी है, धांस-धांस र हालत कमजोर व्हेगी है अर सांस लेवण में तकलीफ व्हे रैयी है।”

गोपाळ बोल्यो, “ल्यो भाबू, थोड़ी खीचड़ी खायलो।”

बा बोली, “बेटा, खावण री मनस्या कोनी। थूं म्हारै खातर इती तकलीफ क्यूं देख रैयो है।”

“इणमें तकलीफ री कांई बात है भाबू! म्हैं आपरै बेटा ज्यूं ई तो हूं। थोड़ी-घणी खीचड़ी म्हारै खातर खायलो।” गोपाळ पडूतर दियो। बेटो सबद कान में पड़्यां उणरै आंख्यां में आंसू आयग्या। पण आपरो दुखड़ो छिपावती, मूंडो फेर र झट आंसू पूछ लिया। यूं थोड़ी वेळा भाबू सूं बंतळ कर र उणनैं दवाई देय र गोपाळ पाछो आपरै घरै आयग्यो। उणमणा मन सूं उण थोड़ो भोजन कर्यो अर सोयग्यो। घणी रात बीतगी पण उणनैं नींद नीं आय रैयी ही।

उणनैं भाबू रै जीवण री बातां याद आवण लागी। जीसा रै गुजस्यां पछै भाबू आपरै अकलडै बेटै नैं चोखा स्कूल में पढायो। अक बरस तो बरसात घणी कम व्ही। खेतां में बेचण जोग उपज कोनी व्ही। नीटानीठ खावण जोग अनाज पार पड़्यो। बा लोगां रै घरां में काम करती। कम खावती, कम बिछावती। खुद मांदी ही, आपरी दवाई नीं मोलावती, पण बेटा रै स्कूल री

फीस टेमसर जमा करावण सूं कदैई नीं चूकती। यूं ई दिन निकळता रैया। देखतां-ई-देखतां किसन जवान व्हेग्यो। पढण में बो इतो हुंसियार होय 'र सरकार री तरफ सूं उणनैं छात्रवृत्ति मिली। उण रा संगेती विलायत में पढण नै गया। उणरै मन में ई विलायत में पढण री ही। इण खातर मोटी रकम री जरूरत ही। भाबू आपरी रकमां गैणै मेली अर किसन रै विलायत में पढण रो जुगाड करचो। किसन व्हीर होवण री त्यारी करण लाग्यो। भाबू री आंख्यां में आंसू देख 'र किसन उणनैं समझावतो बोल्यो, “भाबू थूं म्हारी बिल्कुल चिंता मत करजै। म्हें कागद लिख 'र समाचार भेजतो रैवूला।” पण अपरा लाडला बेटा नैं यूं आगो जावतो देख 'र भाबू रो काळजो मूंडै आय रैयो हो, पण उणरी पढाई रो विचार करती उण आपरा मन नैं घणो दोरो समझायो। पढाई रा खरचा रै वास्तै जद कदैई धन री जरूरत पडती तो किसन भाबू नैं कागद लिख देंवतो। बा जाण-पिछाण वाळां सूं उधार लावती अर आपरो पेट काट 'र लोगां नैं ब्याज चुकावती।

किसन रै सागै पढण वाळी गोरी छोरी डायना किसन जैड़ा सीधा-सादा छोरा नैं आपरा जाळ में फंसाय लियो अर उणसूं ब्यांव कर लियो। पण भाबू नैं इण बात री भणक तक नीं पडण दी। अक-दो वेळ भाबू री बीमारी रा समाचार आया अर बो पाछो देस आवण रो मत्तो करचो, पण डायना उणनैं फटकार दियो अर आवण सूं रोक लियो। बो मन मार 'र रैयग्यो।

डायना सूं छानै उण भाबू नैं कागद भेज्यो, जिणमें उण लिख्यो कै म्हारी पढाई पूरी व्हेगी है अर म्हनैं अटै नौकरी मिलगी है। कागद रा समाचार सुण 'र भाबू रै मन में मोद नीं माय रैयो हो। बा थाळी में गुड लियां आखा गांव में दौड़-दौड़ 'र आपरै बेटै री परदेस में नौकरी लागण री खबर सुणावती, लोगां रा मूंडा मीठा कराय रैयी ही।

हडबड़ाय 'र गोपाळ माचा पे उठ बैठचो। उण किसन नैं कागद लिखण रो विचार करचो। भाबू री बिगडती हालत री बात कागद में लिखतां आगै लिख्यो कै भाबू अटै थनै घणो याद करै है। इणनैं आपरै साथै लेय जावै, देर नीं करै। झट कागद रो जबाब देवै।

केई दिन गुजरग्या। किसन रो कोई कागद नीं आयो। भाबू री हालत तर-तर बिगडती गई। गोपाळ अर राधा उणरी देखभाळ करता। भाबू नैं थावस बंधावता रैवता कै आपरा पासपोर्ट-वीजा बण रैया है। किसन रो कागद मिल्यो है अर बो आपनैं लेवण नै आवैला। अक दिन भाबू री हालत ज्यादा ई बिगडगी। उण पाणी तक नीं पीयो। गोपाळ उणनैं अस्पताळ लेयग्यो। बो उणरै कनैई बैठचो हो। बा अैसान भरी निजरां सूं उणनैं देख रैयी ही।

अचाणचक उणनैं दो-तीन हिचकी आयी। हिचकी रै बिचाळै उणरै मूंडै सूं छेहला सबद निकळ्या, “गोपाळ... किसन... गोपाळ...।” इणरै सागै इ उणरी सांस निकळगी। गोपाळ उणरी लाश घरै लियायो। घरै किसन रो कागद आयोडो हो। लिख्यो हो कै भाबू रा पासपोर्ट-वीजा बण रैया है।

गोपाळ मन-ई-मन सोच्यो कै अबै तो इणरै पासपोर्ट-वीजा री जरूरत नीं है। इणरै तो भगवान रै घर रो वीजो आयग्यो है।





डॉ. मीनाक्षी लक्ष्मीकांत व्यास

पान सड़ै घोड़ो अड़ै, विद्या बिसर जाय

चीकू खरगोसियो अर रिकू टीलोड़ी खास भायला हा। बै दोनू नंदनवन रै अेक ई स्कूल में पढता हा अर दोनू री क्लास ई अेक ही। चीकू तेज दिमाग वाळो पण थोड़ो लापरवाह हो जदकै रिकू मैनती। चीकू एक बार पढ्यां पछै बीं माथै पाछो ध्यान नीं देंवतो जदकै रिकू नेम सूं पढाई कर्योड़ी रो पाछो अयास करती। बा चीकू नैं यूं ईज करण रो कैवती, पण बो हंस'र टाळ देंवतो अर कैवतो कै म्हनैं सब आवै, म्हनैं रोज अभ्यास करण री जरूरत कोनी।

दिन निकळता गया अर इम्तिहार सरू हुया तो चीकू आदत रै मुजब खुद री धुन में ई रैयो। रिकू जद टोक्यो तो ओ कैय'र टाळ दियो कै म्हनैं सब आवै, जे जरूरत पड़ी तो देख लेवूला अेक बार। इम्तिहान सूं पैलडै दिन जद बो पढण नै बैठो, आपरी पोथ्यां खोली तो बीं रा होस उडग्या। बीं नैं पैलां सूं पढ्योड़ो कीं भी याद नीं हो अर अबै पढणो बीं नैं भारी बोझ लागण लाग्यो। सगळी रात जाग'र बो भणाई करी, फेरूं ई बीं रा इम्तिहान रा परचा खराब हुया। रिकू रै परचा चोखा हुया, क्यूकै बीं नैं नेम सूं भणनै री आदत ही।

परीक्षाफळ आयो जद पतो लाग्यो कै चीकू रै सप्लीमेंट्री आयी अर रिकू घणा नंबरां सूं पास हुयी। चीकू रोवण लाग्यो तद रिकू बीं नैं समझायो कै हाल भी घणी टेम है, थारी छोटी-सी गलती सुधार लै। जे थूं थारी पढाई माथै ध्यान देवैला, नेम सूं अभ्यास करैला तो पाछा हुवण वाळा परचां में पास व्है जावैला। बा समझायो कै नेम सूं अभ्यास करण सूं हरेक क्षेत्र में सफळ व्है सकां। बिना अभ्यास तो जको आवतो हुवै, बो ई बिसर जावां। कैवत भी है कै पान सड़ै घोड़ो अड़ै, विद्या बिसर जाय।

चीकू आपरी गलती मानली अर रिकू नैं धन्यवाद दियो कै बा सचै दोस्त रो फरज निभायो है।

चीकू पूरी लगन अर जोस सूं पढाई करण लाग्यो। अबै बो पढाई अर खेल सगळां रो नेम सूं अभ्यास करतो। इणरो परिणाम भी साम्हीं आयो। चीकू परीक्षा अर खेल दोनू में अव्वल रैयो। बीं नैं अबै नेम सूं अभ्यास री बात समझ आयगी।





शकुंतला सोनी

ठणठण पाल ई ठीक

अेक छोरी नैं नांव पूछण रो घणो चाव हो। सगळ्ळां नैं नांव पूछती अर हंसती। नांव प्रेम नै लडोकलो, नांव रूपाळी नै रूप रो पतो ई नीं। नांव शेरसिंह नै डरपोक नंबर अेक। नाम रामजी नै करम रावण रा। नांव भागवंती नै फूटा भाग री, नाम मीठालाल नै जबान नीम जिंसी कडवी। नांव संतोष नै लालची नंबर अेक। दिन निकळ्या नै ब्यांव व्हियो। बींद रो नांव ठणठण पाल। सब आखो दिन ठणठण पाल री लाडी कैय र बतळावता। घणो मन दुखी होवतो, अरे औ काई नांव!

अेक दिन रीस री मारी घर छोड र निकळगी। गेला में अेक मुरदो देख्यो। पूछ्यो—भाई, मरवा वाळो कुण? जबाब मिल्यो—अमर। नांव तो अमर अर मरग्यो?

आगै गयां अेक छोरी थेपड्यां थापै ही। नांव पूछ्यो तो बोली—लिछमी। वणी नैं हंसी आयगी। फेर आगै गई तो अेक मिनख भीख मांग रैयो, वणी नैं भी नांव पूछ्यो तो बोल्यो—धन्नो। अबै तो वा हंसवा लागी। वणी नैं समझ आयगी कै नांव सूं काई नीं व्है। वा बोली :

अमरच्यो तो मरच्यो भयो, धन्नो मांगै भीख।
लिछमी तो छाणा चुगै, ठणठण पाल ई ठीक।।





डॉ. अंजु

अपणायत रो गैरो मीठो रंग

धूप-छांही जीवण रा कई रंग अतरा ऊजळा हुवै कै याद करतां ई आंख्यां मांय इंदरधनख खिल जावै अर अपणायत रो ऊजळो उजास हियै नैं जगरमगर कर देवै। अैं रंग खून रा रिस्ता अर देसाकाळ री सींव सूं परै हुवै। अैंडो ई रंग अर छिब आंख्यां मांय समायेडी है दो भूतानी टाबरां री। उणां रो नांव है—रसिक शर्मा अर अमन। आं दोन्यूं सूं मिलणो भी बडो रोचक तरीकै सूं हुयो हो। टाबरिया छोटा हुवण रै कारण बां दिनां म्हैं म्हारै पीहर ईज रैवती ही। ब्यावर रै सरकारी कॉलेज में पढाती ही। दिनगै ड्यूटी समै माथै जावती जकैरी सिंझ्या या रात नौ बजी ताई घरां पूगती। बेटो साढी आठेक महीनां रो ईज हो। विश्वविद्यालय री परीक्षावां में कदैई दो तो कदैई अेक ड्यूटी लागती।

अेक दिन दिनगै री ड्यूटी कर 'र टेम माथै ईज घरै आयगी। म्हारै भतीजै अर बेटै में डेढ महीनै रो ईज आंतरो हुवण रै कारण दोन्यूं नैं लेय 'र हॉल में खेलाय रैयी ही। सिंझ्या रो बगत हो। म्हारो छोटो भाई अजय पाड़ोस रा प्लॉट में गायां री दूवारी कर 'र दूध ले जावण रो हेलो पाड़्यो। दूध मम्मा नैं रसोई में झिलाय 'र म्हैं फेर टाबरां नैं खेलावण में लागगी। जिती ई बार आवूं, अजय री आवाज सुणीजै, “भैया, किसे ढूंढ रहे हो?”

अचाणचक पूछ्या गया सवाल सूं घबरायोडी पडूतर देंवती दो आवाजां अेकै साथै सुणीजी, “सॉरी भैया, हम तो ऐसे ही घूमने आ गए थे।” हाथ सूं लारला मकानां कानी इसारो कर 'र कैयो, “उधर रहते हैं भैया। हम भूटान से अेआईटी में पढने आए हैं।”

“अच्छा-अच्छा, बहुत बढ़िया। लेकिन सॉरी क्यों बोल रहे हो? आप तो हमारे पड़ोसी हैं।” अजय बांनै आश्वस्त करतो बोल्यो।

“जी भैया।”

“आओ! अंदर चलते हैं। चाय पीकर जाना।”

“जी भैया।”

दोन्यूं टाबर घरै आया तो बांनै बैठक में बिठा 'र अजय चाय बणावण री कैय 'र हथाई में लागग्यो। उण दिन तो बै टाबरिया थोड़ी देर हथाई कर 'र अजय नैं किरायै रै मकान में आवण रो नूंतो देय 'र चल्या गया। घूमतो-घूमतो अजय बांरा दोस्त-भायलां सूं भी मिल आयो अर बात आई-गई होयगी। म्हैं सगळा आपरा कामां मांय व्यस्त होयग्या।

पांच दिनां पछै सिंझ्या दोन्यूं टाबर रसिक अर अमन फेर आया। म्हारै पीहर में ठाकुरजी रै दीया-बती कर र सब बेगो ई खाणो जीम लेवै। खाणो बण रैयो हो, तो अजय कैयो, “आप दोनों खाना खाकर ही जाना। खाने में क्या बनवाएं?”

चोखो करयो जको पैली ई पूछ लियो। बै टाबरिया तो उबळ्योड़ा चावळ अर साग ई खाबो जाणता हा। रोटी तो कदैई खाई ई कोनी ही। तुरत-फुरत बारै मुजब खाणो बणायो। ई बीच अजय सगळा घरकां सूं बारो परिचै करायो। थोड़ी बातचीत भी हुयगी, पण टाबरिया तो जम र बैठग्या। घरै जावण रो नांव ई नीं लेवे अर म्हे सोवां बेगा। अठी-बठी री बातां करता बोल्या, “भैया, हमें एक कमरा किराये पर चाहिए।”

“हमारे तो कोई कमरा खाली नहीं है।” भाई पडूत्तर दियो। पण बै दोन्यूं जणा तो जिद झाल ली कै म्हेँ तो अठै रैवां। थानै अेक कमरो खाली करणो ई पडूसी। घणी दुबिधा री स्थिति होयगी। घर बैझ्या घंटो गळै में घाल लियो। थाक र अजय मम्मा नैं बुलायी।

“माताजी, हमें एक कमरा किराये पर दे दो। आप हां नहीं करोगे, तब तक यहां से नहीं जाएंगे।”

घणी अबखायी री बात हुयगी आ तो। इयां लाग्यो जाणै अै तो भलाई में भाटा पडग्या। बारो जिद ही कै आगै हार र बारली बैठक किरायै पर देवणी ई पड़ी। दोन्यूं दूजै दिन ई आपरा गाभा-गूदड़ लेय र आ धमक्या। रसिक अर अमन री घणी जोरसोर सूं एंट्री हुयी। बीनणी आवतां ई बांनै साफ-सफाई राखबा अर बारला खाणा री मनाही री भोळावण देय दी। हालांकै आ बात अजय पैली ई बता दी ही, पण बीनणी मम्मा रै हिसाब सूं समझा दिया। थोड़ा दिन तो घणी अबखायी हुयी, पण धीरै-धीरै बै परदेसी आपणै रंग में ढळबा लाग्या।

कॉलेज सूं पढ र आवता, कूकर में चावळ चढा र धड़ाधड़ आठ-दस सीट्यां लगाता अर खा लेंवता। अेक दिन बीनणी रात री बच्योड़ी कड्डी गायां नैं नाखबा जावै हा। अमन बीच में ई रोक ली, “भाभी, ये क्या है? गाय को खिलाओगे?”

“अमन भैया, ये कड्डी है। गाय को ही खिलाणे जा रही हूं।”

“भाभी, आज के बाद इसे गाय को मत डालना। बचा हुआ सारा मुझे दे देना।”

दोन्यूं जणा पढता जिती देर मांयलो किंवाड़ खुल्लो ई राखता। कॉलेज सूं मोड़ा-बेगा आवता तो घरै बण्योड़ी रोटी-साग पकड़ा देंवता। पैली-पैली तो रोट्यां चाबवा में ई कैवता कै मूंडो दूखै। धीरै-धीरै तीज-तिंवारां पर पुआ-पूड़ी, सियाळै में भांत-भांत रा परांठा अर अठै ताई कै बाटिया भी चाव सूं खावण लागग्या।

सिंझ्या पड़ी म्हे सगळा डागळै पर चल्यो जावता। ठंडो-ठंडो बायरो खाबा अर टाबरां नैं ऊळ्ळई में खेलाबा। जद दोन्यूं खुल र बाताचीतां भी करता। भूटान में तो भूटानी अर अंगरेजी ई चालै, फेर अठै हिंदी कठै सूं सीखी? तो बै बतायो कै हिंदी फिल्मां देख-देख र हिंदी सीखग्या। म्हेनैं घणो अचुंभो हुयो। पण लगन हुवै तो कीं मुस्कल कोनी। रसिक रै परिवार में दादा-दादी अर मम्मी-पापा अर बडी बैन सगळा साथै ई रैवता। अमन रै तो सौतेली मां ही। अेक बैन ही जकी ब्यूटी पार्लर चलावती अर पढाई रो खरचो उठावती।

रसिक गोरो-चिट्टो, गोळ मूंडो, सुतवां नाक, काळी बडी-बडी अपणायत सूं भस्चोड़ी आंख्यां रो लंबो पूरो टाबर हो। चैरा पर भोळप ही अर हेताळु सुभाव रो। अमन दूच्योड़ा थेपड़ी जियांनका मूंडै माथै दो चीलरा लगायोड़ी-सी मिचमिची आंख्यां, पिचक्योड़ो नाक, छितर्योड़ा बाल, जका लिलाडू नै ढक'र आंख्यां ताई आयोड़ा रैवता। छोटा-छोटा हाथां आळो थोड़ो दब्योड़ो रंग रो ठिंगणो-सो टाबर हो। बोलतो भी साव कम। इयां लागतो, सौतेली मां री बेजां तानासाही रै कारण थोड़ो सुभाव मांय दबूपणो आयग्यो हो। भैण री सगळी बातां म्हणें बतावतो। रसिक आपरा होजुरबा (दादाजी) री दियोड़ी तीन चीजां हमेस साथै राखतो—अेक माळा, दूजी कोई ढाईसौ साल पुराणी ढाई बाई आधाक इंच री श्रीमद्भगवद्गीता अर भगवान बुद्ध री नैन्ही-सी मूरती। रसिक गिटार तो अमन ड्रम जोरदार बजावतो। दोन्यूं संगीत रा रसिया हा।

उण बगत अजमेर में लगैटगै ढाई-तीन सौ भूतानी टाबर पढता। बै ई कायड अर लोहागल में रैवता। सगळ्य भूतान रा राजा जिग्मे खेसर नामग्याल वांग्चुक रो जलमदिन रेस्टोरेंट में घणै उच्छब सूं मनावता हा। भोजन-पाणी रै सागै जम'र नाच-गाणो भी करता अर आपरी मायडभोम अर भासा नै पूरो सन्मान देंवता हा। ई उच्छब रो सारो खरचो भूतानी टाबरां नै सरकार सूं ईज मिलतो। रसिक सूं आ बात सुण'र घणो अचुंभो हुयो कै आं मांय सूं घणकरा टाबर तो नौकरी करबाळ्य अर थोड़ाक दो-दो टाबरां का बाप भी हा।

मोड़ा उठबा वाळ्य दोन्यूं टाबरिया अेक दिन दिनूगै बेगा उठ'र कमरै री साफ-सफाई करी अर रसिक री मोटरसाइकिल चमकाबा में लाग्योड़ा हा। गाभा ई धोय-निचोय'र सुखा रैया हा। दोन्यूं में अेक बेजां बुरी आदत ही—अेक-अेक महीनै ताई नीं न्हावता। मम्मा बेराजी होय'र प्रेम सूं लडता, “अमन-रसिक! न्हायां कित्ता दिन हुयग्या। आज नीका न्हा लीज्यो, नींतर अठै सूं भगा दूंली।”

“जी माताजी।” तुरत सिनान करबा भाजता। उण दिन सब नै घणो अचुंभो हुयो कै आज सूरज अगूणी दिसा नै भूल'र आथूणी दिसा में कियां ऊग्यो है। पूछतां ई घणै हरख रै साथै बतायो कै आज विश्वकरमा जयंती है। भूतान में आंरो उच्छब मनावै। जोरदार साफ-सफाई कर'र विश्वकरमाजी नै निवण करै। आ बात जाण'र अचंभो भी हुयो अर काळजो ठंडो हुयो कै आपणै देस री राज-रीत नै दूजोड़ा मुलक आज भी मानै है।

बातांचीतां होवती ही। रसिक म्हणें बोलतां सुण-सुण'र राजस्थानी समझणी अर बोलणी सीखग्यो हो। अेक बार बीनणी आपरै पीहर पधार्योड़ा हा अर दुपारी री परीक्षा देय'र आयो रसिक बेगो-सो मम्मा कनै रसोई में आय'र बोल्यो, “माताजी, बड़ी जोर की भूख लग रही है। जो भी हो, खाने को दो।”

बीं दिन मम्मा रो बीपी बध्योड़ो हो अर तीन टाबरां नै अेकला संभाळतां थक भी गया हा। बेराजी होवता बोल्यो, “ई छातीकूटा री कमी ही।”

मम्मा नै बेराजी देख'र रसिक बोल्यो, “माताजी, हां तो छातीकूटा, पण भूखा मर रैया हां।” कैय'र बो जोर सूं हंसबा लाग्यो। रसिक रै मूंडै राजस्थानी सुण'र मम्मा री रीस छूमंतर होयगी। दोन्यूं नै हॉल में बैठा'र नीका जिमाया। बीं दिन बाद मम्मा दोन्यूं बेई बतो खाणो बणाबा

रो नेम बणा लियो। अेक जणै रो खाणो तो दोन्यूनू बगत बेसी बणाबा रो नेम ई हो। घरै सूं कोई पांवणो भूखो नीं जावै।

रसिक बतावतो कै भूटानी चीन अर पाकिस्तान नैं पसंद कोनी करै। भारत सूं अपणायत राखै। बटै बिजळी रो ज्यादा उत्पादन होवै। बाकी पैली वरीयता भारत री रैवै। भारत-पाकिस्तान क्रिकेट मैच में भी भारत रो समरथन करै। अेकर अजय दोन्यूनू टाबरां अर बांरा भायलां नैं फारमहाउस लेयगयो। गांव में नास्तो-पाणी करबा रुक्या तो गांव रा टाबरिया—‘अरे देखो रे, चाइनीज... चाइनीज...’ कैय र टोळो बणाय र बारै लारै ई पडग्या। औ वैवार सगळा भूटानी टाबरां नैं घणो बुरो लागयो। अजय नैं भी बुरो लागयो। बो बेराजी होय र डटकार्यो जद टिंगर भाज्या। आ घटना बां सगळां नैं अर म्हानै भी घणी बुरी लागी। टाबरां रो मन घणो आहत हुयो।


दो परसंग आज भी चोखी तरै चेतै है जका रसिक नैं घणा बुरा लाग्या हा। पैलो तो औ कै अेक बार म्हैं रसिक सूं पूछ्यो कै अेआईटी री जाणकारी थानै कठै सूं मिली? तो बो बतायो कै नेट सूं जाणकारी ली, पण बटै उपलब्ध इंस्टीट्यूट री फोटू अर सुविधावां सूं अठै स्थिति साव उलट मिली। दूजी बात, अेकर रसिक नैं म्हैं म्हारा परिचित होटल मेरवाड़ अेस्टेट में ब्यांव में जीमबा लेयगी। आधेक घंटे तक तो बो व्यंजना री स्टाल देखतो थको चक्कर ई लगातो रैयो। म्हैं बोली, “कोई नै उडीकणो कोनी। पसंद आवै जको आराम सूं जीमो, टेमसर घरां चालणो है।”

जीमा-जूठो कर्यां पछै घरां बावडती बगत रसिक बोल्यो, “दीदी, आपके यहां शादियों में दिखावा बहुत है और अन्न की बहुत बरबादी होती है।”

बीं री दोन्यूनू ई बतां साची ही। मन बडो दुख्यो, पण साच सूं मूंडो नीं मोड़ सकां। अे आदतां दूसरा देसां रै लोगां रै बीच आपणै देस री छिब खराब करै। सब नैं मिल र इण दिसा में सुधार अर प्रयास करण री बडी जरूरत है।

डेढ-दो बरस घर रैयो जितै दोन्यूनू जणा घर रा सदस्य बण र ई रैया। दूर अणजाण देस रा अे टाबर म्हां सब घरआळां रै मन में आपरा संस्कार, अपणायत, मिनखपणै अर शिक्षा री अमित छाप छोड र आपरै देस भूटान तो पाछा चल्या गया, पण आपरा प्रेमभाव री अमित सैनाणी हियै में छापग्या।

आज भी कदै-कदै अजय कनै फोन आवै जद घणै अपणेस अर हेत सूं भूटान आवण रो नूतो देवै। अे दोन्यूनू टाबर सिखायग्या कै प्रेम अर मिनखपणो देसां अर भासा री सीव सूं घणो ऊंचो होया करै।





कंचन आशिया

आखातीज

धम्म-धम्म ऊंखळी, धम्म-धम्म खीच
आवण दें म्हारी आखातीज...

औ अखाणो तो घणी बार सुण्यो हो, पण इण ओखाणै सूं पैली बार रूबरू हुयी। अबकाळै गरमी री छुट्टियां पड़तां ई टाबर गांव जावण वास्तै उंतावळा होवण लागग्या। अेक-दो दिन जरूरी काम सलटाय 'र म्हें टाबरां सागै सास्रै आय पूगी। गांव पूगतां ई टाबरां नें जाणै राम मिलग्यो। दिनभर कुदड़का करता फिरे, पूरै दिन धमाचौकड़ी मचावै अर रमता नीं धापै। संग साईणा भायलां साथै रमता रैवै अर तावडियै में ई जक नीं पड़ै।

दिनूगै बेगा उठ 'र आपरा दादोसा रै सागै खेतां कानी टुर जावै। धोरां माथै रमता, रपटोळिया करता, धूड़ सूं काठा भस्चोड़ा दोपारां तांई पाछा घरां आवै। आज तो उठतां पाण टाबरां लकड़ी रो हळियो बणावण री हठ करण लागग्या। म्हारै देवर आकडै री लकड़ी रो हळियो बणाय 'र हळ रै बाजणो टोकरियो बांध 'र त्यार कस्यो। भखावटै ई गांव रा सगळा टाबर आपो-आपरा हळिया लेय 'र गांव री गवाड़ मांय जाय पूग्या अर हळां रै बांध्योड़ा टोकरियां री टणकार बाजण लागी।

म्हारा सासूजी हुकम देंवता थकां कैयो, “ बीनणी, आथण पौर खीचडै रो धान छड़णो है अर दिनूगै बेगो उठणो है। दोनूं ई देराणी-जेठाणी बेगी उठ 'र बाड़ा-बाखळ बौर लीज्यो। बूढा-बडेरा बेगा सुगन विचारैला, इण बात रो ध्यान राखजो। दिनूगै सासूजी भखावटै बेगा उठ 'र म्हां सगळां नें हेलो मास्यो। सासूजी खीच खोटण नै लागग्या। म्हें अर म्हारी देराणी जतना बाड़ा-बाखळ बौरण नै ढूकगी।

सगळा घरां मांय खीच खोटण री धमाधम सुणीजण लागी। दोय-चार घरां रै मांय ऊंखळी ही अर घणकरै घरां सूं हमामदस्ते री आवाज आवण लागी।

अठीनै म्हारो देवर टाबरां नें जगाय 'र आकडै रो हळियो लेय 'र खेतां कानी टुरग्या। च्यारूमेर हळां रै बंध्योडै टोकरियां री टणकार अर तेजा गीत रो हबीड़ो उठण लागग्यो :

गाज्यो गाज्यो जेठ असाढ कंवर तेजा रे
लगतोड़ो बरस्यो रे सावण-भादवो
इतरो काई नींद नींदाळू कंवर तेजा रे,
थारै तो साईणां बीजै बाजरो...

अठीनै सासूजी खीच बणाय र रसोई म्हानै भोळाय दी। सासूजी भळावण देंवता थकां कैयो, “बीनणी, साग चोखो बणावजो। कोटडी मांय थाळी मेलणी है।”

म्हें अर म्हारी देराणी जतना आखातीज रें तिंवार माथै बंतळ करता थकां रसोई रें काम में लागगी। गवारफळी रो साग, कड्डी अर गुळवाणी बणा रें त्यार करी। इतरें में सासूजी री आवाज आयी, “बीनणी, लाटा घालणा है।”

म्हारी देराणी पूछ्यो, “अै लाटा भळै कांई होवै ?”

म्हें उणनै समझायी, “म्हें जद छोटी ही जणै म्हारा दादीसा लाटा करता। पुरस्योडी थाळी म्हारै साथै कोटडी में मेलता हा।” म्हें देराणी कैयो, “थे सात भांत रा सवा-सवा सेर धान ल्यावो, म्हें लाटा करूं।”

देराणी धान ल्यायी अर म्हें आंगणै रें अधबिचाळै धान रा सात ढिगला कस्य। सातू ढिगलां रें माथै गुळ री डळियां अर बिचाळै पाणी रो लोटो, कांदो अर काच राख्यो।

अठीनै जीसा बेगा उठ रें खेतां कानी सुगन लेय रें घरां आय न्हावा-धोवो कस्यं पछै लाटो पूज्यो।

हाळी करै हळोतियो, आयी आखातीज।

सुगन विचारै सांतरा, रामा बेगो रीझ।।

सुगन दीठा सांप्रत, करसा कोढ करैह।

बिरखा बूठै मोकळी, सगळ काज सरैह।।

जीसा लाटो पूज रें कोटडी मांय जा पूग्या। बूढा-बडेरा आवण लागग्या। कोटडी रें मांय गवाडी रा सगळ बूढा-बडेरा भेळा हुय रें आवण वाळै बरस माथै बंतळ करण लाग्या। भेळा हुयोडा डोकरा अेक-दूजै नै आज रा सुगनां रें बारै में पूछ्यो। जीसा कैयो, “भाईडा, सुगन तो चोखा हुया, पण...।”

“पण कांई, आगै तो बतावो... ?” सगळ अेकै सागै बोल्यो।

“सुगनां में साच होवै तो जमानो तो चोखो आवैला, पण रोग बापरैला। सूरज ऊगाळी जद म्हें खेत पूग्यो उण बगत खेत में डावै कानी तीतर बोल्यो, उणरा कंठ भारी हा अर सांस फूल्योडो हो। आगै गयो तो धू दिस रें मांय कोचरी बोलै ही। इण बरस जमानो तो सांतरो आवैला, पण सांस रो रोग मानखै मांय फैलसी।”

म्हारो देवर घरां आय रें कैयो, “थाळी बेगी पुरसो, कोटडी रें मांय ले जावणी है।”

बूढळी लुगायां आवतां ई पूछ्यो, “कोटडी में सुगनां नै लेय रें कांई बातां होयी ?”

म्हारै देवर कैयो, “जीसा कैवता हा कै जमानो तो सांतरो आवैला पण मानखै में रोग बापरैला।”

म्हारी देराणी म्हानै कैयो कै सुगनां में कैडो साच, सगळी कूडी बातां है।

बात आई-गई हुयगी। म्हें म्हारी ड्यूटी माथै आयगी अर सगळी बातां नै भूलगी। इण बरस जमानो जोर रो आयो। मिनखां लाटा लाटिया अर राजी-खुसी दीवाळी मनाई। दीवाळी पछै रोग री सुगबुगाहट होवण लागी। नवंबर में खबरां आवण लागगी कै विदेसां रें मांय सांस सूं जुड्योडो कोरोना रोग फैलग्यो। मार्च रो महीनो आवतां-आवतां औ रोग आपां रें देस पूग्यो। देस

रा प्रधानमंत्री सगळा मिनखां नें घरां रैवण रो संदेसो दियो। पूरै देस में लॉकडाउन लागग्यो। आवण-जावण रा साधन जठै हा बठै ई जाम होयग्या। बापड़ा मजूर पाळा ई घरां कानी टुरग्या। उणां में घणो फोडो पड्यो।

म्हनें आखातीज रा जीसा रै कैयोड़ा सुगनां री याद आई। सुगन कित्ता साचा हुवै, म्हनें इण बात रो आज ठाह लागग्यो। अबै आखातीज पाछी आवण वाळी ही, म्हनें इणरी घणी उडीक ही। उडीक इण बात री ही कै इण बरस सुगन कैड़ा हुवैला। आखातीज रै दिन हर बरस री भांत सगळा जणा आपो-आपरै काम लागग्या। जीसा बेगा उठ र सुगन लेवण खातर खेतां कानी टुरग्या। जीसा पाछा घरां आया जणै माथै ऊपर चिंता री लकीरां देख र म्हें सोच में पडगी।

घरां सगळा इण बात नें जाणण खातर उतावळा हा कै इण बरस सुगन कैड़ा हुया।

जीसा कैयो, “बेटा, सुगन तो सांतरा हुया, पण इण कोरोना रोग नें जावण में अजै टेम लागैला। तीतर खेतां में बड़तां ई सुगन सांतरा कराया, पण आगै जाय र कांटां री झाड़ी मांय बड़ग्यो। थोड़ी ताळ पछै झाड़ी सूं बाँरै आयो जणै कांटां रा इंजेक्शन लाग्योड़ा हा। पूरो बिंधीज्योड़ो हो अर सांतरा सुगन देंवतो थको उडग्यो।

जीसा कैयो, “म्हारा सुगन कैवै, मानखै रै इण भांत वैक्सीन रा टीका लागैला अर होळै-होळै औ रोग आगो हुय जावैला।”

म्हें आ सुण र ऊंडै विचारां मांय डूबगी कै आं सुगनां रै मांय इतो साच होवै है काई ? इण जीव-जिनावरां नें इण बात रो पैली ई पतियारो लाग जावै है काई ?





किरण बादल

जात-पांत

देस-काळ अर वातावरण रो असर तो टाबर सूं लेय 'र बडै आदम्यां ताई दीखै। जिकी बात बडा लोग अनुभव करै उणसूं छोटा भी अछूता कोनी रैवै। म्हैं पैली सोच्या करती कै टाबर आ बातां सूं अळगा है। जात-पांत आद रै बारै में बै कीं कोनी जाणै। बै इण सब सूं दूर आपरै कल्पना-लोक में ई मगन रैवै अर खेलै-खावै, पण अेक दिन म्हारी आ धारणा सफा ई गलत सिद्ध हुयगी।

म्हारी प्रतिनियुक्ति अेक बंद पड़चै स्कूल में हुयगी। म्हैं उणनै नूवै सिरै सूं चालू करणी ही। म्हैं स्कूल रै बगत सूं कीं पैली ई पूगगी अर बटै जाय 'र स्कूल रो ताळो खोल्यो। स्कूल खुलतां ई आसै-पासै आळा टाबरां म्हैं घेरली अर पूछण लाग्या, “मैडमजी! आप म्हानै पढावण सारू आया हो या कोई कागद-पत्तर लेवण सारू?”

म्हैं कैयो, “म्हैं अटै पढावण सारू ई आयी हूं। आप लोग न्हाय-धोय 'र स्कूल में आ जावो।”

थोड़ी देर पछै सगळा टाबर आयग्या। टाबरां आप-आपरी कक्षावां जमा ली। म्हैं बातां-बातां में ई नूवी जग्यां री जाणकारी ली अर टाबरां सूं कीं सवाल पूछ्या जिकै सूं म्हैं बारै स्तर रो बेरो लाग जावै। टाबर घणा ई राजी लागै हा। आधी छुट्टी पछै च्यार बैन-भाई जिका इण स्कूल में पढता अेकै साथै म्हारै कनै आय 'र खड़्या हुयग्या। च्यारू ई अेकै साथै उछाव सूं बोल्यो, “मैडमजी, म्हे थारै खातर अेक बडी चोखी चीज लेय 'र आया हां। आपनै लेवणी पड़सी।” आ कैय 'र अेक छोरो म्हारी आंख्यां साम्हिं आपरी मुट्टी खोल दी। उणरी हथेळी माथै च्यार रंग-बिरंगी मीठी गोळ्यां ही, जिकी बंद मुट्टी कारण पसेवै सूं भीजगी। म्हैं बोली, “अै तो थां टाबरां खातर ई है। थे खाओ।” इतरो कैय 'र म्हैं रजिस्टर फिरोळण लागगी।

इतरै में बारी सै सूं छोटी भैण बोली, “मैडमजी! थे इण कारण ई म्हारी गोळी कोनी खाओ, क्यूकै म्हे छोटी जात रा हां। नीं तो इतरी मीठी चीज भलां कोई छोडै?”

उणरी बात सुण 'र म्हारै गाल माथै चपीड़-सो लाग्यो। म्हारै काळजै में अेक हूल-सो उठ्यो। म्हैं उणनै उठाय 'र आपरी गोदी में बिठाली अर उणरो हाथ पकड़ 'र गोळी मूंडै में धरली।

औ देख 'र उण छोरी नै जोस आयग्यो अर आपरै बैन-भायां सूं बोली, “अरे! मैडमजी तो आपणी ई जात रा है।” सुणतां ई म्हारी आंख्यां भरीजगी अर म्हारी समझ में आज ताई आ बात कोनी आयी कै बात-बात माथै लड़ण आळा बां च्यार भैण-भायां बै बाकी बच्योड़ी तीन गोळ्यां किण भांत आपस में बांटी हुवैला।





सुनीता बिश्नोलिया 'सुनीति'

भूआ कैवती

म्हें अर म्हारी भूआ... ना-ना, म्हें अर म्हारी भूआ नीं कैय सकूं। खाली म्हारी भूआ कैयां तो सगळा बडा अर छोटा भैण-भाई बुरो मान जावैला कै बै तो आपणा सगळां री भूआजी था, थारी अकली रा नई।

उण दिनां री बात ई न्यारी ही जद 25-30 मिनखां रा परिवारां रा सगळा टाबर भूआ रै कने सोवण अर उणां री पुराणी बातां सुणण ताई आधी रात तक उणां कनै धरणो दियां बैठा रैवता। उण बगत म्हनै 'कजिन' सबद रो मतलब बेरो कोनी हो। बस, इतणो बेरो हो कै अक गवाड़ी में रैवणिया सगळा ई भाई-भैण हुया करै। कोई पूछतो तो बतावता—दस भाई अर सात भैणां हां। जद ई तो म्हां सगळा भैण-भायां रै बीच में काका-बाबा रा टाबरां री तरियां कोई औपचारिकतावां कोनी हुया करती बल्कै हक हुया करतो अक-दूजै री बात मानण अर मनवाण रो। म्हांनै तो खाली इतणो बेरो हो कै म्हारै दस भाई है अर म्हे हां आंरी लाडली भैणां। स्यात म्हारी भूआ रो म्हारै सागै रैवणो भी इण रो अक कारण हो।

म्हारी 'मोकी' भूआ म्हारै बापूजी अर बाबोसा री बडी भैण नई ही वै तो बाजीगर री बा चिड़कली ही जिणमें उण जादूगर रा प्राण बस्या रैवै, यानी भूआ नैं खांसी भी आ जावै तो बापूजी स्कूल नई जावै अर बाबोसा आपरी दुकान पै।

बापूजी अर बाबोसा नैं म्हे भूआजी रै साम्हीं टाबर बणकै उणां सूं डांट खावता अर भैण री चिंता में रोवता देख्या हा। भूआ सगळा भैण-भायां सूं बडी ही। उणां रै चार टाबर हा। बडो बेटो उमर में म्हारा बापूजी सूं स्यात सात-आठ साल ई छोटे हो। छोटी उमर में विधवा हो जाणै रै कारणै भूआजी ज्यादा करकै म्हारै सागै ई रैवती। कुल मिला र म्हें समझण लागी जद सूं भूआजी नैं म्हारै सागै ई रैवतां देखी। पण बीच-बीच में भूआजी आपरै सासरै भी जाया करै ही। भूआजी री बातां री पोटळी में इतणा किस्सा, इतणी बातां है कै मांड्या तो पांच किताबां भी कम पड जावै। बाबूजी री बात बतावतां भूआ अक किस्सो भोत बार सुणावती।

अक दादी अर भूआ घणी सुंवारे उठ्याई क्यूकै बीं दिन गूगाजी रो त्युंवार हो। दोन्युं मिलके गूगाजी धोकण ताई बेगी-बेगी गुलगुला-पकोड़ी, खीर अर सक्करपारा बणा लिया, क्यूकै

धोक लगायां बाद में दादी नैं खेत जाणो हो। दादी अर भूआजी मिलकै पूजा कर्यां पाछै गाय-ढांडां नैं चरावण लागी। बटै सूं निबट्यां पाछै भूआजी टाबरां नैं यानी कै छोटी भूआजी, बापूजी अर बाबोसा नैं जीमण ताई हेलो दियो। म्हारा बापूजी नैं छोडकै सगळा टाबर जीमण ताई आयग्या अर गूगाजी कै धोक खा-खाकै जीमण नै बैठग्या। भूआजी म्हारा बापूजी नैं हेलो पाड़ती गई, पण बापूजी कठैई नीं मिल्या। चाणचक भूआजी अर दादी नैं लाग्यो कै गुलगुला अर पकोड़ी इतणा कम क्रियां हुयग्या। बापूजी रो घरां नई हुवणो अर गुलगुला-पकोड़्यां रो थोड़ो होवणो देखकै भूआजी माथो पीट लियो अर भागकै कमरै में जाकै आपरी खाट री गूदड़ी हटाई तो ऊंकै नीचै अेक परची मिली जिणनै लेय'र भूआजी भाज'र कमरै सूं बारै आया। बारै आय'र दादी रै हाथ में कागद देय'र बोल्या, “मां, आज थारो लाडलो लोहाघरजी (लोहार्गल) गयो, बापूजी नैं थे बता दीजो।”

“हे रामजी! अेक तो हो, अब औ दूसरो भी...” सिर पीटती थकी दादी बोली, “अे बाई! बेरो पाड़ कै कुणकै सागै गयो है छोरु... बो बटै के खासी?” कैवती-कैवती दादी रोवण लागगी। दादी नैं चुप करवावता भूआ बोली, “चिंता ना करो मां, चौथू अर माधो भी गया है सागै अर भूखा मरबाळा कोनी कोई सा भी। सगळा गुलगुला-पकोड़ा लेयग्या है—आप-आपका घरां सूं। काल आ जावैला, कागद में लिख'र गयो है थारो लाडलो।”

अठै सगळा घरका चिंता कर रैया हा, उठीनै बापूजी भायलां रै सागै मौज-मस्ती करण निकळ पड़्यो। थोड़ी मौज-मस्ती रै बाद तीनुं भायला नागकुंड में न्हाणै की सोची। कुंड गैरो हुवण रै कारण चौथू अर माधो बारै बैठ'र ई न्हावण री कैयी पण म्हारा बापूजी ठैरिया खतरां रा खिलाड़ी। कोई क्युं कवै या बानै रोकै उणसूं पैलां ई बापूजी बिना सोच्या-समझ्या लगा दी नागकुंड में छलांग अर भायलां नैं जीं बात रो डर हो, बो ईज हुयग्यो।

के हुयो...? अजी बापूजी रै सागै हुयग्यो अेक खतरनाक हादसो। छोटा-सा तो हा ई। हांजी, म्हारा बापूजी सिरफ दस बरस रा ई तो हा। लंबाई भी कम ई ही। अब लंबाई कम होवणै सूं कुंड में पग ई नीं टिक्या, ई कारण बै डूबण लाग्या। बटै कोई भी नीं हो जको बानै बचा लेंवतो। भायलै नैं डूबतां देख'र दोनुं छोरा रो रोवा-कूको बधग्यो। और तो कोई जोर चाल्यो कोनी, ई वास्तै बै रोवण-चिरळावण लाग्या।

पाणी में हलचल कम व्हेती देख'र दोनुं छोरा अठीनै-बठीनै भाजण लाग्या। चाणचक माधो नैं अेक पंडितजी मिलग्या। डर सूं कांपतो माधो कीं बोल तो नीं सक्यो, पण पंडतजी नैं कुंड कानी लेय आयो। छोरां री हालत देख'र पंडतजी समझग्या, पण कीं अणहोणी होवण सूं पैलां ई पंडतजी कुंड में कूदग्या। घणी मुस्कल सूं बारै हाथ बापूजी री चोटी आयी। फेर धीरै-धीरै कर'र पंडतजी, बापूजी नैं बारै निकाळ ल्याया। ऊं दिन बापूजी बच तो गया, पण भोत दोरा। भूआजी बताया करता हा कै घरां आयां बाद में दादाजी खूब खबर ली बापूजी री... पण बापूजी तो मस्त-मलंग हा। बां पै आं छोटी-छोटी बातां रो कठै असर होवतो। बै तो महीनै में अेक बार तो जानलेवा स्टंट कर'र ई बैठ्या करता।





डॉ. रेणुका व्यास 'नीलम'

चांद

'चांद' सबद नैं बोलतां ई मन मांय अेक सुहावणी-सीक टंडक मैसूस हुवै। रस अर मीठै परस रो रळ्योड़ो-सो भाव मन मांय उपजै। कल्पना री आंख्यां साम्हीं घर री मुंडेर माथै मुळकतै पूर्णमासी रै चांद री छिब झिलमिलावण लागै। किती इचरज री बात है कै महीनै में पैलै पंदरै दिन चांद घटाव लेवै अर आगलै पंदरै दिन बधाव, पण मिनख रो मन उण घटत- बधत नैं नीं, चांद री पूरण छिब नैं पकडै। इण रो कारण स्यात मिनख रै अंतस री चावना है। 'पूरण' हुवण री हूस मिनख रै मन में अणंत काल सूं हबोळा खावती रैयी है। इणी वास्तै प्रतीक रूप में बो पूरण चांद नैं पसंद करै। प्रतीक री भासा मिनख रै मन नैं भोत चोखी लागै। जद ई तो बो आतम रै उत्थान वास्तै बळ्ळतै दिवलै नैं, आतम रै फैलाव वास्तै अणसीव समदर नैं, ज्ञान वास्तै चमचमावतै सूरज नैं अर जीवण री अणथाग गति वास्तै बेंवती नदी नैं आपरो आदर्श बणावै। वानै पूजै अर वारै जिसो हुवण री कामना करै।

जतै ताई चांद रो सवाल है तो कैय सकां, कै चांद खंड-खंड हुयोड़ै मिनख नैं अखंड हुवण री कामना सूं भरै। बो बतावै कै हर चढाव रै पछै अेक उतार आवै अर हर उतार रै पछै अेक चढाव। मिनख नैं चढाव वास्तै भरपूर कोसिस करणी चाईजै अर उतार वास्तै स्वीकार भाव राखणो चाईजै। चांद रै मुजब जीवण में कोई भी गत अंतिम नीं है। चढाव अर उतार दोनूं रै संजोग रो नांव जीवण है। परगास अर अंधकार जीवन रा दो पख हुवै अर वारै मैळ सूं जीवन मांय संपूरणता आवै।

विज्ञान मानै कै चांद धरती रो उपग्रह है। किणी टेम धरती सूं जुड़्योड़ो हो, पण परकत री किणी उथळ-पुथळ रै चालतां धरती सूं अळगो होय 'र' उण रै च्यारूंमेर चक्कर काढण लागग्यो। पण पुराण कैवै कै चांद समदर रो जायो है। समदर-मंथन रै टेम निसर्योड़ै चवदै रतनां मांय सूं चांद भी अेक रतन है। दोनूं दीठां भलाई न्यारी-न्यारी बात कैवो, पण अेक बात तो साव साफ है कै धरती अर चांद रो रिस्तो जबरो गैरो है। स्यात मां अर बेटै जिसो, कै दादी अर पोतै जिसो। जद ई तो चांद धरती रै च्यारूंमेर नैन्हा टाबर दाई घूमै। उणनैं निरखै अर हरखै। उण माथै चांदणी रो इमरत बरसावै। सूरज रै पूठ फोरतां ई बळ्योड़ी धरती रै जख्मां माथै मलम लगावण सारू हरेक सिंझ्या भाजतो आय जावै। समदर सागै भी प्रीत निभावै।

श्रीकृष्णम, सीताराम द्वार रै मांय, हनुमान मिंदर रै कनै, बीकानेर (राज.) मो. 9414035688

इयां तो परकत री हरेक शै अणमोल, सांतरी अर सहेजण जिसी हुवै, पण चांद री तो बात ई न्यारी है। चांद सगळ्ळां रो प्यारो है। सगळ्ळां रो दुलारो है। टाबर, लुगाई, मिनख कै डैण कोई भी हुवो, चांद सगळ्ळां नैं चोखो लागै। स्यात इण रो कारण चांद री सीतळता, रूपै जिसो सुहावणो रंग अर गोळ-मटोळ रूप है। चांद री नित-नित बदळीजती छिबां हैं।

ज्योतिषशास्त्र चांद नैं मन सू जोड़ै। धरती रै जळ सू जोड़ै। मिनख री कल्पनाखिमता सू जोड़ै। मिनखां मांय कवि जबरो कल्पनाजीवी हुवै। उण रो मन भावनावां रो अणथाग समदर हुवै, जठै रात-दिन कल्पना री लैरां उठती अर गिरती रैवै। इणी कल्पना री लैरां सू कवि चांद री नूवी-नूवी छिबां आपरी कवितावां मांय रचै। इण छिबां नैं देख 'र चांद जाणै हरखै अर कवि री कल्पनारूपी लैरां नैं औरू उकसावै।

दुनिया रो स्यात् कोई कवि इसो नीं हुयो हुसी, जको चांद रै रूप माथै मंतरीज्यो नीं हुवै। चांद नैं निरख 'र जकै रा भाव कविता रै रूप मांय नीं ढळ्या हुवै। कवि कदै चांद नैं आपरी कविता रो विसय बणावै तो कदैई प्रतीक। बो कदै चांद नैं रूपक बणावै तो कदैई उण री न्यारी न्यारी-उपमावां सू आपरी कविता नैं सजावै। औ ईज कारण है कै दुनिया री हरेक भासा में चांद नैं लेय 'र बेजोड़ कवितावां रचीजी है।

कवि नैं चांद उणरै मन री गत मुजब अनोखी, रूपाळी अर न्यारी-न्यारी छिबां में दीसै। कदैई चांद उणनैं उणरी प्रेमिका रै सुंदर मुखडै जिसो लखावै तो कदैई प्रेमिका री दाय भवां बिचाळै सज्योड़ी चमकीली टीकी जिसो लागै। कदै तो कवि नैं लागै जाणै चांद काळी तारांआळी चूंदड़ धार्योड़ी उणरी प्रेमिका री नाथ रो पळकतो नगीनो है। और तो और, प्रेमिका रै रूप री चमक अर उण री हंसी में भी कवि नैं चांदणी झरती लागै। बिरह में तो चांद नैं देखतां ई कवि नैं आपरी प्रेमिका री याद आय जावै अर चांद री सीतळता उणरै तन अर मन नैं दाङ्गण लागै।

कवि दुनियादार भी पूरो हुवै। बो लेण-देण बरोबर करणो जाणै। जे बो चांद नैं आपरी प्रेमिका रै मुखडै री बरोबरी रो मान देवणो जाणै तो उणरी कीमत भी पूरी वसूलणी जाणै। इणी कारणे कदै-कदैई बो दूर देस में बैठी आपरी प्रेमिका नैं सनेसो पुगावण सारू चांद सू दूतगिरी भी करावै। कवि फगत प्रेमी ई नीं हुवै, घर गिरस्थीआळो भी हुवै। जद ई तो काळै आभै बिचाळै बिराज्योड़ै चांद नैं देखतां ई उणनैं मां रै खोळै मांय मुळकतै आपरै गोरेगट टाबर री याद आय जावै अर आजू-बाजू भळकता तारां रा गट्ट उणनैं आपरै टाबर रा साथी-संगी लखावै।

भोजनभट्ट कवि नैं कदै चांद आभै आंगणै पुरस्योड़ो खीर रो कटोरो-सो लखावै तो कदैई थाळ मांय राख्योड़ो बडो झूर मळई रो लाडू जिसो लागै। चौथ रो नूवो- पीळो चांद तो आभै री भींत माथै खड़ी राख्योड़ो पीतळ री बडी परात जिसो लागै, जकै री अेक कानी री किनोर मुचगी हुवै। दूज रो चांद आभै रै आंगण में फेंक्योड़ो नारैळ री गिरी री पतळी-सीक कतरण जिसो लागै कै कदैई रात रूपी नायिका रै नाथ रो चांदी रो टूट्योड़ो तार-सोक लखावै। सिंझ्या हुवतां ई खितिज सू झांकतो चांद किणी अचपळै टाबर जिसो लागै, जको पाड़ोसी री भींत ऊपर चढ्योड़ो ताका-झांकी करै है अर मौको लाधतां ई उणरै आंगणै मांय कूदण री मनस्या राखै तो भोर रो मांदो हुयोड़ो चांद उण बटाऊ जिसो लखावै जको जातरा रै थाकेलै सू अधगावळो हुययो हुवै।

अेक लूठा विद्वान फरमावै कै अणूतै बरताव सू सबद घिसग्या है। उपमान बासी हुयग्या है अर प्रतीकां री चमक गमगी है। बात ठीक भी लागै। अबै टेम भी तो बदळीजग्यो है। जीवण री मुस्कलां बधगी है। अबै अेक भूखै कवि नैं चांद मांय प्रेमिका रो मुखडो नीं, गोळमटोळ रोटी

लखावै। तारां सूं घिस्चोड़ो चांद कवि नैं भीड़ में अकलै स्रैरी मिनख जिसो लागै। रात री नाव में सवारी करतो चांद कोई ऊकतायोड़ो अणमनो रईस जिसो लखावै।

बोलचाल में तो चांद नैं लेय'र ईद रो चांद, दूज रो चांद अर पूर्णमासी रो चांद जिसा मुहावरा भी घड़ीज्या है। सप्फाचट टाट नैं तो मखौल उडावण सारू चांद भी कैयीजै।

मखौल सबद सूं याद आयो कै किणी टेम चांद अणंतो चंचळ हो। खी-खी करतो किणी रो भी मखौल उडा देंवतो। कैवै कै अेकर बो गणपतिजी रो भी मखौल उडायो। सजा भी पाई। जद ई तो लोग अजताई भादवै री चौथ रै चांद रा दरसण कोनी करै।

आलोचक चांद री भद् ई घणी पीटी है। पीट सकै। बां सूं तो लूंठा-लूंठा लिखारा अर राजनीतिज्ञ ई डरै। बांरै मूठै आडै हथाळी कुण लगाय सकै? बांरो कैवणो है कै चांद सुंदरता रो पूरण प्रतीक कोनी, क्यूकै उण मांय दाग है। बात तो साची है। दाग तो दीसै। पण विज्ञान कैवै कै अे दाग कोनी। अे तो चांद रै ऊबड़-खाबड़ धरातळ रा निसाण है। बांरी बात भी सई हुय सकै। पण विज्ञान रै दरसण री अेक सींव हुवै। विज्ञान ऊपरली परत देख सकै। मन मांय नीं ज्ञांक सकै। चरित्तर नै नीं परख सकै। पण लोक परख सकै, क्यूकै लोक कनै मन री पड़तां नैं भेदणआळी लेजर जिसी ऊंडी दीठ हुवै। बा दीठ कैवै कै अहल्या सागै घात करण में चांद भी देवराज इंद्र रो साथी हो। संगी तो बरोबरी रो दावेदार हुवै। ईनाम मांय भी अर सजा मांय भी। काई ठाह चांद नै आपरी काळी करतूत री सजा मिली कै कोनी, पण उण रै मन रो मैल तो जगत साम्हें आय ई गियो। जिण रो मन मैलो हुवै उण रो तन ऊजळो कींकर हुय सकै? चांद रा अे दाग अेक लुगाई सागै घात करण री सजा है। ए दाग मन री काळख है। अहिल्या तो बिना अपराध रै सजा भी भुगत ली अर मुगत भी हुयगी, पण चांद अजताई दागल है। लोक री कचैड़ी सूं अर आपरै मन री अदालत सूं बो बरी नीं हुय सक्यो। हो भी कोनी सकै, क्यूं कै ज्योतिषशास्त्र चांद नैं नवग्रहां मांय सूं अेक ग्रह अर पुराण उणनै अेक देवता मानै। देवता, गुरु अर नेता रो तो फरज भोत बडो हुवै। सनमान अर बिस्वास री रिच्छ्या उणां रो धरम हुवै। बै ई जे घात करसी तो बिस्वास कठै सरण लेसी? बै देवता कींकर कैवाय सकसी?

कमी किण मांय कोनी हुवै। गलती करणो गलत नीं हुवै, गलती नीं सुधारणो गलत हुवै। मन रा केई-केई रंग हुवै। बो ई मन जको किणी स्वार्थ रै चालतां धोखो करै, किणी ऊजळी घड़ी मांय त्याग अर सेवा रा ऊजळ्या पगलिया भी मांडै। चांद भी मांड्या। भगवान नीलकंठ रै तन सूं काळकूट बिस री जळण मिटावण सारू चांद आपरी सेवा अरपित करी। भगवान उणरी सेवा स्वीकारी अर आपरै माथै ऊपर सजाय लियो। चन्द्रशेखर हुयग्या। जीवण तो भगवान शंकर जिसो ई हुवणो चाईजै, जका जगत-कल्याण सारू काळकूट बिस पीयग्या। देव-दानव कोई भी सरणागत हुय'र साम्हें आयो तो बिना भेदभाव रै खिमा बगस दी। झट करतो वरदान देय दियो। बिस्वास अर प्रेम रो मान राख्यो। चन्द्रमौलि हुय'र चांद रो भी मान बधायो।

संगत रो असर भी जबरो हुवै। बो मन माथै पक्कायत ई लागै। चांद माथै भी लाग्यो। जगत रै कल्याणकामी भगवान शंकर रै सागै सूं अबै चांद री चंचळता अेकदम थमगी है। अबै बो पुराणकाल जिसी धोखेबाजी नीं करै। ना किणी रो मखौल उडावै। अबै तो हुय सकै जित्तो जगत रो भलो करै। आपरो फरज निभावै। सीतळता बांटे अर खुद भी तिरपत, आनंदमगन अर मुळकतो लखावै।





शकुंतला पालीवाल

मज्जन

“राम-राम बैनजी।” कानां मांय मिसरी घोळती मीठी बोली सुण 'र म्हें म्हारो काम छोड 'र ऊंचो जोयो तो सामहीं दो जोडी काळी आंख्यां म्हारी ठौड उडीक रैयी ही। माथै पै काठी चोटी साणै चांदी रो बोरलो गूंथ्योडो। मूंडो पूनम रै चांद ज्यूं अेकदम गोळ अर रंग जाणै दूध ज्यूं धोळोफट। तावडै सूं आवा रै कारण उण रा गाल लाल होय रैया हा। बा मुळकी तो सगळ्य धोळा दांत निजर आयग्या, जाणै मक्की दा दाणा व्हे अर बै अेक लैण मांय चमक रैया हा। करंगच्या रंग री ओढणी ओढणी उण रा गोरा रंग पै ओपै ही अर लहंगो असी कळी सूं वत्तो ईज हो, स्यात अेक सौ दस कळी रो व्हेला। दोय पगां मांय आधा-आधा किलो री चांदी री कड्यां अर कमर में चांदी रो भारी कंदोरो। पगां मांय चामडै री पगरख्यां। हाथां मांयनै चांदी रा कातर्या अर डंक री चूडियां माथै सोनै रो टड्डो। म्हें उणनै निरखती उणसूं उणरो नांव पूछ्यो तो पडूतर मांय 'मज्जन' नांव सुण्यो। व्हे सकै, म्हें सुदो नीं सुण्यो। म्हें पाछो पूछ्यो, “नांव कांई है थारो?”

“मज्जन नांव है म्हारो।”

“हें... ? मज्जन ? औ ई कोई नांव व्हियो ? थारै नांव रो कांई अरथ है ? म्हें तो औ नांव पैली दाण सुण्यो।”

“बैनजी, अरथ तो म्हें ई कोनी जाणूं, जद सूं समझ पकडी है, म्हें तो औ ईज नांव सुण्यो म्हारो अर अरी तो कदैई पूछ्यो कोनी किणी सूं।” बा इत्ता भोळपणा सूं जबाब दियो म्हनै कै म्हें उणनै उडीकती रैयगी। व्हे सकै, किणी नांव रो बिगड्योडो रूप व्हे। म्हें कैयो तो बा भी म्हारी बात री नस हिला 'र हांमळ भर दी।

“कोई खाद-बीज आयो व्हे तो म्हानै भी दिरावो। म्हारा खेत-कुडा थारै ओफिस रा पाडोस में ईज है। थे जद चावो पधारो, पण थे पंखां रो टंडो बायरो खावण वाळा...” बा आगै कीं कैवती उणसूं पैलां ई म्हें कैयो, “मज्जन, म्हारी नौकरी तो खेत-कुडा गुदवा री ईज है अर म्हें इणसूं घणी राजी हूं।”

“म्हारै मूंफळ्यां मांय कांई रोग आयो है, थे उणरी दवाई देय दो।”

म्हें कैयो, “पैसेंट नें देख्यां बिना दवाई कोनी दे सकूं। म्हें थारै खेत आय 'र पैलां पैसेंट नें देखसूं, पाछै दवाई देसूं।”

“वा जणै, जै रामजी री, थारी उडीक रैसी।” कैवती थकी बा हवा रै फटकारै ब्हीर व्हेगी।

म्हें उणरै खेत पूगी उण टेम बा रिजगो काटै ही। म्हें देख र दांतळी रिजगा रा क्यारा मांयनै मेल र मुळकती थकी बोली, “राम-राम बैनजी। भला पधार्या। म्हें तो सोच्यो थे कोनी आवोला।”

म्हें कैयो, “मज्जन, थारै सूं घणी बंतळ करुंला, पण सगळा सूं पैलां म्हार पैसेंट नें देखणो चावूं।”

बा आगै अर उणरै पाछै म्हें। मूंगफळी वाळा खेतर मांय जाय पूग्या। बा बोली, “बात आ है बैनजी कै इण मांय पीळा फूल तो आय रैया है, पण हाल ताई इणरै मूंगफळ्यां कोनी लागती दीखी। कदै लागसी मूंगफळ्यां ? हें ! बतावो नीं।”

म्हें झट सूं मूंगफळी रो अेक डांखळो जड़ामूळ सूं उखाड़ र उण मांय लटकती नान्ही-नान्ही मूंगफळ्यां उणनै बताय दीधी। बा मुळकवा लागी। म्हें जूठ-मूठ री रीस करती कैयो, “तो थे असी रोळ करण खातर म्हें अठै बुलाई अर सरकारी टेम खोटी कीधो।” म्हें खेत री पाळी सूं पाछी धिरगी।

बा दौड़ती थकी आगै आय र ऊभी व्हेगी अर कैयो, “थे तो घणा झट रिसाणा व्हेग्या। म्हें तो इयां ई रोळ कीधी कै कूलर-पंग्वा री हवा खावा वाळा बैनजी नें खेत री बारखड़ी आवै कै कोनी ?” बा टाबर जियां घणी सरलता सूं आपरी बात कैयी तो म्हें उण पै लाड आयगयो। म्हें उणनै कैयो, “मज्जन, म्हें तो सगळी भणाई खेती-बाड़ी री ई कीधी है।” उणनै खेत रा सगळा रूख, खरपतवार, फसल सगळां रा नांव अर महत्त्व बतावा लागी तो बा आंख्यां फाड़ती म्हारो उणियारो उडीकती रैयगी। फेर कैयो, “थानै तो घणी चोखी समझ है खेती-बाड़ी री। बैनजी, असी भणाई म्हारै टाबरियै नें ई कराय देवो, म्हें भी उणनै अफसर बणाय र उणरो जमारो सुधारणो चावूं।”

“हां, जरूर मज्जन।” म्हें उणनै उडीकती कैयो।

मज्जन सूं म्हारी दूजी भेळप ही, पण यूं लाग्यो जाणै कितरा ई बरसां सूं म्हें उणनै जाणूं। लगैटगै हमउमर होवा सूं म्हे पक्की साधणियां बणगी। मज्जन री साफ निरमळ बंतळ अर मुळकतो उणियारो, उणरी बंतळ मांय दिखावो कोनी। साचै मन री धणियाणी। अबकै पाछी भेंट व्ही तो म्हें रोक र कैयो, “आज थानै चाय-पाणी बिना कोनी जावा देवूं।” कुडा रा मीठा पाणी सूं भस्योड़ो लोटो म्हें पकड़य र बा चाय बणावा लागी। म्हें उणरी तुरता-फुरती देखती रैयगी। फेर म्हें पूछ्यो, “कितरा टाबर है थारै ?”

“नान्हा-मोटा सगळा मिलाय र तीन कम पच्चीस टाबर।”

“हें... ?” म्हें उणियारो जोवण लागी।

बा बोली, “बो सै सूं मोटो टाबरियो साम्हीं आय रैयो है।”

म्हें उणरी आंगळी री दिसा मांयनै देखवा लागी तो काई देखूं के पचास-पिचपन बरस रो मिनख आपरी पागड़ी नें जमावतो थको आय रैयो हो। म्हें विचार कीधो—मज्जन रै बापू री उमर रो औ मिनख इणरो टाबर कियां व्हे सकै ? आ तो पैतीस बरस री अर औ अधबूढ इणरो टाबर ?

बा म्हारा विचार ताड़गी अर कैवा लागी, “बैनजी, है तो औ म्हारो घरआळो, पण औ भी किणी टाबर सू कम कोनी। सगळं सू पैली इणरी नौकरी बजावो, कोई भी चीज आपरै हाथां सू कोनी लेणी-मेलणी। सगळा काम इण मज्जन रै माथै। पछै व्हियो कै नीं टाबर ?”

“पण मज्जन, औ किण भांत रो ब्यांव ? कठै इणरी उमर अर कठै थारी ?” म्हें आगै और कीं पूछती उणसू पैलां ई बा बोली, “बैनजी, म्हां करसां री लुगायां रो ब्यांव अेक मिनख सू कोय होवै, उण मिनख रा घर-गवाड़ा, खेत-कुडा अर ढोर-डांगरां सागै भी ब्यांव व्हे। फेर म्हारै पीहर मांय म्हारी मां कोनी अर बापू छोरी रो बोझ आपरै माथै सू झटपट उतारणो चावै हो, अर इणरै घरआळी मरगी। इणनें फेर ब्यांव करणो हो। लुगाईजात नैं अैं मिनख किणी ढोर-डांगर सू वत्तो कोनी समझै। जिण खूंटै पै बांधै उणीज खूंटै बंधणो पड़ै। म्हें भी बंधगी।”

म्हें उण कानी देखती ई रैयगी अर बा मुळकती म्हारै साम्हीं बैठ रै चाय पीवा लागी।

म्हें पाछी बोली, “थूं कैयो कै थारै बाईस टाबर। औ कियां व्हे सकै, इण हाड-मांस में अतरो जीव कोनी अर पछै थारी उमर! म्हारै तो आ बात गळै उतरी कोनी।”

बा पडूतर देंवती बोली, “अेक तो औ घरआळो सगळं सू मोटो टाबर, फेर पंदरै ढोर-ढींगर। च्यार टाबरिया पैली वाळी रा अर दो टाबर म्हारा। थे गिणती लगावो, व्हिया कै नीं तीन कम पच्चीस।”

“हां भई व्हेयग्या तीन कम पच्चीस।” कैवती थकी म्हें फेरूं उपरै उणियारै कानी जोवण लागी।

बा कैवा लागी, “बैनजी, आ घर-गिरस्थी बळदागाडी में जूत्या दो बळदां ज्यूं है। जद दो बळद अेक तरियां सू चालै तो घर-गिरस्थी रो मजो है। पण अठै तो अेक बळद इण गेलै जावै अर अेक बळद उण गेलै। पछै थे बतावो, गाडी सांतरी कीकर चाल सकै ? म्हारी घर-गिरस्थी रो तो सगळो बोझ म्हारा कांधा पै ईज है। औ मिनख तो सगळा टाबरां सू भी मोटो टाबर। टाबर आपरो काम कर लेवै, पण इण रा सगळा हुकम बजावणा पड़ै। जे टेमसर हुकम नीं बजावो तो मातमपुरसी करता देर कोनी करै। अमल-पाणी रा नसा में भमतो फिरै अर म्हारै सू लड़ायां करै। बैठो-बैठो म्हारै काम मांय मीन-मेख काढै। बैनजी, आ तो बा ईज बात हुयगी कै काळी भेंस धोळी गाय यनें कैवै कै देख, थारी पूंछड़ी रा बाल काळा। पण भेंस तो पूरी ई काळी, औ उण भेंस नैं कोनी दीखै। औ ईज हाल इण मिनख रो है। आपरी गलती निजरां कोनी आवै।”

हमेस मुळकती मज्जन रा उणियारा पै गैरी उदासी री लकीरां साफ निजर आय रैयी ही। बा उणनें छुपाय नीं सकी। उणरी आंख्यां रातीचुट व्हेगी अर उणसू गंगा-जमना बैवा लागी। हमेस मुळकता उणियारा रै पाछै कितरो दरद है, औ देख रै म्हारो काळजो बैठग्यो। उण दिन ओफिस आय रै घणो विचार कीधो। म्हें मज्जन रै काम आय सकूं अर इणरो जबाब म्हारै साम्हीं ईज हो। उणनें खेती मांय आगै बधाय रै उणरी मदद करणो संभव हो।

उणरै पाछै खेती रा नितनूवा प्रोग्राम अर स्कीमां सू उणनें जोड़ी अर मज्जन भी पूरी मेणत अर लगन सू काम करती रैयी। खेती रा नवाचार, महिला-कृषक पुरस्कार अर जैविक खेती करण री वजै सू मुख्यमंत्री रै हाथां सू अेक लाख रुपियां रो नकद पुरस्कार। मज्जन लुगायां री मारगदरसक

अर प्रेरणास्रोत बणगी । अेक नूवी स्कीम रा संबंघ मांय उणसूं फेर मिलणो व्हियो । म्हें उणनें कैयो, “फळां रो बगीचो लगावणो है ।”

बा फट हुंकारो भर लियो । म्हें उणनें कीं कैवती उणसूं पैलां ई बा कैवा लागी, “बैनजी, दाडम अर जामफळ लगावणा है ।”

म्हें कैयो, “दाडम अर जामफळ तो मिटुडा, टाल्यां अर दूजा पंछी भी घणै चाव सूं खावै, इणसूं बचावण खातर अेंटी बर्ड नेट लगावणी पडसी । ओ खरचो बाधू रो करणो पडसी । इणसूं तो आछो नींबू रा गाछ उगाय देवां, कोई जीव-जिनावर उणनें नीं खाय सकै ।”

बा बोली, “बैनजी, बात तो थारी सोळै आना साची है, पण अै जीव-जिनावर खेती करणी कोनी जाणै, जद सगळा नींबू उगावैला तो अै बापडा पंछी आं फळां रो स्वाद कद चाखैला ? बैनजी, म्हें तो दाडम अर जामफळ ईज उगास्यां अर एंटी बर्ड नेट भी कोनी लगावां । आं सगळा पंछी-पंखेरुआं नें भी फळ चखावां, इणां रा भाग रो अै खासी अर म्हारा भाग रो म्हे ।”

उणरी बातां सूं अेक दाण फेर मज्जन म्हनें निरूत्तर कर दीधी । म्हें उणरो उणियारो निरखती रैयगी । किरसा नें अन्नदाता यूं ईज कोनी कैवै । घणो मोटो अर खुल्लो काळजो चाईजै जको सगळां रै मांय नीं व्हे सकै ।





सिया चौधरी

पन्नो बाबो

यूं तो पन्ना बाबा नैं याद करूं जद भोत ई गंभीर सुभाव रा खेतीखडि़या आदमी । धोती-कुरता सागै साफो राखता । पक्को रंग, पतळो-लांबो-सो मूंडो । छह फुट री कद-काठी, हाथ में इत्ती ई बडी लाठी राखता । कदै-कदैई हाथां में नाचतो-घूमतो ढेरियो भी आ जावतो अर बाबा रै इण सिणगार नैं पूरो करतो रेडियो, जको सदां बाँरे सागै रैवतो ।

म्हां टाबरां नैं तो रेवड़ चरावता, जेवड़ी बंटता अर डपटता ई याद आवै । म्हे टाबर तो पन्ना बाबा रै नांव सूं ई लुक जावता । लाठी रो डर घणो लागतो, पण जियां-जियां समझणा हुया तो बेरो लाग्यो कै पन्ना बाबा आपरै ठीमर सुभाव रै सागै भोत मजाकिया इंसान भी है । बांरा केई किस्सा गांव में चावा है ।

भणाई री बात करां तो पन्नो बाबो आपरै रेवड़ में ईज मस्त । स्कूल नैं जावता, जदकै बांरा बडा भाई स्कूल जावता अर पढता । जद कोई पूछतो कै पन्ना ! तूं स्कूल क्यूं नैं जावै तो बाबोजी रो अेक ईज जवाब कै मोटो भाई पढै, तो म्हैं मत्तैई मास्टर होय जासूं । बात सो टक्का सही, भाई जो भी पढतो बाबा नैं घरां आय'र बता देवतो । बाबै नैं देश-बिदेश रो पूरो ग्यान । इतिहास हुवो अर भलाई भूगोल, पन्नै बाबै सूं कीं छानो नैं । खास कर'र विश्वजुद्धां री घणी जाणकारी ही । कुण किणरो गुट रो, कुण किणसूं अर क्यूं लड़्यो, बाबा नैं पूछल्यो, पण बस आखर ज्ञान में प्रौढ शिक्षा में फगत नांव लिखणो सीख्यो, बो भी जोरांमरदी, स्यात बाबा नैं आखर बांचणै में कोई दिक्कत होती होसी । यूं करनै मोटा बाबा तो मास्टर बणग्या पण पन्ना बाबा अणभणिया ग्यानी ईज रैयग्या ।

बाबा रै तो बस रेडिया रो चस्को । चायै कांई भी प्रोग्राम आवतो हुवै, रेडियो कदैई बंद नैं हुवतो, भलांई कोई भी भासा रो स्टेशन लाग्यो तो बो ईज चालतो रैसी ।

इयां ई अेक बार कोई भोळो आदमी पन्ना बाबा नैं पूछ्यो कै इण रेडियै में बोले कुण है ? पन्नो बाबो तो पन्नो बाबो, आपरै मजाकिया सुभाव मुजब उणनैं भोत बढिया तरीकै सूं समझायो कै यो रेडियो किण तरियां जापान सूं बण'र आवै अर जापान रा लोग भोत छोटा हुवै, इत्ता छोटा कै रेडियो में आय जावै, तो म्हारै रेडियै में भी धणी-लुगाई रैवै, कदै-कदैई दोनूं री आपस में ठण जावै, जद बै आपरी भासा में कौतक भी करै । यूं कैयनै बाबो इयांकली-सी कोई भासा रो स्टेशन

लगा दियो कै बीं आदमी रै आ बात पूरी जचगी। घणा दिनां पछै कोई उण भोळा मिनख नैं समझायो कै भाई, इयां कोनी हुवै, बाबो तनैं बावळा बणा दिया। तद बो पन्ना बाबा नैं ओळ्ळो देवतो बोल्यो, “पन्ना रे, आछोबणायो?”

पन्नो बाबो आपरै सुभाव सरूप गंभीर होयनै बोल्यो, “किणनैं कुण बणावै, सगळा ऊपर सूं बण्यो-बणायो ईज आवै! बात मजाक में कैयी, पण बाबा री बात में बजन हो।

बाबा री गंभीरता सूं मजाक करबा रो अेक किस्सो गांव में भोत चालै। बात पन्ना बाबा रै ब्यांव री है, बाबा रो ब्यांव आखातीज रै सावै पर हो अर उण दिन बडिया (बीनणी) रै गांव में घणकरा ब्यांव हा। बिदाई री बेळा सगळा लोग गुवाड़ में भेळा होवता अर बटै सूं बिदाई होवती। इयां करनै कोई चार ब्यांवला जोड़ा अेक ईज जगां भेळा होयग्या। बींद अेक कानी अर बीनण्यां दूजी कानी। लुगायां रै जमघट में ठाह नीं पड़ै हो कै किणरी बीनणी कुणसी है अर बाळक बीनणी सरमाती बोलै नीं। बिदाई नैं मोड़ो होवतो देख र सगळां रै ई घालमेल होयरी ही, पण ठाह कियां पड़ै, तो बाबोजी सीधासट बोल्यो, म्हैं तो तनैं कोनी पिछणूं, तूं तो अब ताणी जाणगी होसी, तो आपणै तो ‘गोरुआळी मां’ अठीनैआज्या! बाबा री बात सुण र जाणै हंसी रो बम सो फूटग्यो, पण बाबो आपरी बात रा पक्का रैया अर पैला टाबर छोरै रो नांव गोरू (गोरधन) ई राख्यो। छोटी-सी बीनणी नैं पूरो गांव गोरू री मां ईज कैवतो अर आज भी बडिया गोरू री मां रै नांव सूं ईज जाणीजै।

भलां ई टाबर पन्ना बाबा सूं डरता अर पन्नो बाबो भी कदै कोई टाबर नैं बतळायो कोनी, पण बाबा रै बाड़ै में बडो-सो नीमड़ो हो, जिणरी मोटी-मोटी पोड ही, अेक सीधी-सी पोड पर पन्नो बाबो गरमी री छुट्टी में लाव अर लकड़ी का फंटा को बडो-सो आरामदायक हींडो घालता, जिण सूं पूरा दिन घरां में दड़बेड़ा टाबर आथण री बगत पन्ना बाबा रै बाड़ै में भेळा होय खूब खेलता अर हींडता। बांनै कोई तरियां री मनाही कोनी ही।

इयां ई हरियाळी तीज पर बाबा रै बाड़ै में ईज तीजणियां रो मेळो लागतो। औ बाड़ो ईज तीजणियां रो ठावो ठिकाणो बणग्यो। बाबो मूंडै सूं तो कदै कीं नीं बोलता, पण आ बात सगळा ई जाणता कै बाबा नैं टाबरां नैं यूं राजी देख र घणो हरख होवतो।

पन्ना बाबा नैं हांसता-मुळकता तो कोई नीं देख्यो, बै सदीव गंभीर रैवता, पण बाबो मन में मस्तमौला सुभाव रा ईज हा, सीधो सरल जीवण जियो। लारलै दिनां पन्नो बाबो सौ बरस पूगग्या। बांरो बो ठीमरपणो अर संतोखी मुख सदां ओळ्ळूं में रैसी अर गांव में बांरी बातां सदा चालसी। बाबा नैं सादर सरधांजळी।





विमला भंडारी

किस्सो बडी बहू रो

अम्मा सू मिलणो व्हियो हो मथुरा में। संजू भैया, रिचा, बाळक अर अम्मा नें दौसा सू लियाया हा। रात री साढी नौ बजै ही। अम्मा री मरजी ही कै बै म्हनैं आपरै सागै मथुरा घुमावै। बगत निकळतो गयो पण संजोग नी बैठयो। अम्मा दिन-दिन दानी व्हैती गई। थाकवा लागी। वणां री अणी साध नें पूरी कीधी वणां रै नानकिया अंजीव, जणीं नें मिनख अंजीव 'अंजुम' रै नांव सू ओळखै। म्हैं भी 'अंजुम' ईज कैयनै बतळावूं। कम उमर मांय ई अंजीव नें राजस्थान साहित्य अकादमी रो युवा पुरस्कार मिलगयो हो। नानी 'क उमर में 106 पुस्तकां लिखवा वाळा अंजीव पे म्हनैं भी घणो अंजस है।

मथुरा, 28 अक्टूबर री परभात रो बगत। बो खास दिन म्हां तीनूं ई जणा मथुरा रा सतजुग, द्वापर अर त्रेताजुग री दीठ सू खास तीरथधाम रा दरसण करवा री मंशा राख बोलेरो गाडी सू रवाना व्हिया। दोपारी री बगत बारह बज्यां तांई म्हे बलदेव जनपद पूग्या। गाडी सू उतरनै अंजीव म्हां दोई पति-पत्नी नें पैली राधागोविंदजी पाठक रै घरै लयगयो। अंजीव, राधागोविंदजी सू म्हांरो परिचै करवायो अर दाऊजी रै मिंदर में दरसण करबा री मंसा राखी। उत्तरप्रदेस हिंदी साहित्य संस्थान सू साहित्य भूषण सू पुरस्कृत अर ब्रजभाषा रा रसीला कवि राधागोविंदजी घणा राजी व्हिया अर भोजन री मनवार कीधी पण म्हांनै जल्दी ही। औ तो पैलो ईज मुकाम हो अर म्हनैं मथुरा रा सगळा दरसण करनै सांझ रा वृंदावन जावणो हो, जठै विष्णुशरणजी म्हारज रै लारै दरसण करणा हा। पछै सिंझ्या रै जीमण रो नूंतो संतोषजी रै घरै मथुरा में तै हो। बठै छिणेक देर बैठनै ठंडो पाणी पीधो अर राधागोविंदजी नें सागै लेय 'र दाऊजी रा दरसण करवा म्हां चारूं ई जणा पाछा जीप में बैठनै चाल पड़्या।

ज्यू ई म्हां जीपड़ी सू उतर्या, दो-चार पंडा म्हांरै कनै आयग्या। पूछवा लाग्या, "कठै सू आय रैया हो?"

"उदयपुर सू।" भंडारी सा तड़ाक सू उथळो दियो।

"काई जात-बिरादरी हो? दिखो तो महाजन हो।" पंडे पूछ्यो।

"महेसरी हां।" पतिदेव फेर बोल पड़्या।

"कस्या महेसरी?" फेर पंडे पूछ्यो अर पाछै लागग्या। जद अंजीव कैयो, "रे भाया, म्हां तो अठा रा ईज हां। मथुरा रै कनै राया गांव रा रैवासी ही।" अबै तो बात ओज्यू उळझगी। पंडा अबै म्हांरै पाछै चाल पड़्या।

भंडारी सदन, पैलेस रोड, सलूंबर (उदयपुर) राज. 313024 मो. 9414759359

“भैणजी, आप कस्या महेसरी हो?”

म्हें मुळक दीधी अर पाछी आयनै बतावा री बात कर आगै बधग्या अर आपरो लारो छुडायो।

तीरथधाम रा पंडा जात्री सूं भेंट चढावा रै नांव पे लूट-खसोट करै। भगतां री भावना भांपनै पईसा-कौड़ी अँठवा रै कारणै ईज बदनामी रो कळंक ढोवै। अणी कारण वणां री आछी बात भी दबी जावै। अणां पंडां रै कारण ईज अबै राधागोविंदजी म्हारै लारै आवा में हिचकवा लाग्या। कैवा लाग्या, “आप जावो, दरसन कर आवो। म्हें बारै ईज बैठो आपरी वाट जोऊंगा।”

“क्यूं आप क्यूं नीं चालो?” म्हां दोई पूछ्यो।

“म्हारै तो अटै ईज रैवणो है। आप चल्या जावोगा तो ई पंडा म्हारै सूं राड़ करैगा। भूंडा बोल सुणणा पड़ैला।”

तीरथधाम पे पंडां रै आतंक रै दाण, केई जिग्या मैसूस व्हियो पण राधागोविंदजी जस्या विद्वान री हालत देखनै घणो खारो लाग्यो अर म्हें हठ करनै वणां नैं सागै लेय चाल्या। म्हारै लारै वणां नैं देखे र पंडा ओसा-मौसा बोलवा लाग्या। म्हानै राधागोविंदजी नैं बटै ई छोडणा पड़्या।

दाऊजी रा दूरा सूं बारणै सूं ई दरसन कीधा। परसाद चढायो, पण घणो दोरो। धक्का-मुक्की ही। जद देख्यो कै मिनख गरभघर में भी दरसन कर रैया तो पूछवा पे पंडे छह सौ रुपिया मांग्या। बात तीन सौ पे तै व्ही अर रुपिया लेय र म्हारै वास्तै मिंदर रै गरभघर रो दरवाजो खोल दीधो। देव दरसन रो म्हारो मनोरथ अतरो आगतो हो कै औ भी नीं विचार्यो कै बारली मूरती मांय कांई राख्यो है, जरा मन री मूरत ई देखल्यो। पण कांई करां! घुट्टी में जे संस्कार आया तो पंडा री रोजी बणगी।

मिंदर मांय दो मूरत्यां ही, जकी कनै-कनै नीं होयनै आम्हीं-साम्हीं खड़ी ही। सीधी साम्हीं अेक दाऊजी कृष्ण रा बडा भाई री अर दाऊजी रै साम्हीं टेढी रेंवती मैया री। रेंवतीजी दाऊजी री परणायत, पण लारै नीं बिराज र साम्हीं ड्योढी ऊभी थकी ही। म्हें मोबाइल सूं मूरत्यां रा फोटू लीधा।

“घणा आराम सूं दरसन व्हिया।” बारै आयनै म्हें कैयो।

“रुपिया तीन सौ लाग्या।” भंडारी सा रोळ कीधी।

“रे रुपिया थारी रात में कोई नीं जनमियो।” म्हनै भी म्हारा पापा रो औ ओखाणो याद आयग्यो। म्हां जीप में बैठे र राधागोविंदजी रै घरै आयग्या।

तीरथजात्रा रो असल मरम तो वंडी लोककथावां है। राधागोविंद जी पाठक कैवा लाग्या, “दाऊजी बलराम है। बिरज रा राजा है। कृष्ण रा बडा भाई है। कृष्ण जद कंस नैं मार न्हाख्यो तो राजा उगरसेन बिरज रो राज कृष्ण नैं सूपवा लाग्या तो कृष्ण बोल्या, “बडा तो दाऊजी है। आप अणां रो राजतिलक कर गादी सूपो।” अणी भांत बिरज री गादी पे दाऊजी नैं बैठायनै कृष्ण द्वारिका परा गया। आ बात तो आप सगळ्य जाणो ईज हो।”

छन्याक रुकवा पछै वणां कैवणो जारी राख्यो, “औ दाऊजी रो मिंदर है। रेंवती मैया दाऊजी री जोड़ायत है।”

“अै मूरत्यां आम्हीं-साम्हीं कियां लागी है?” म्हें आगै पूछ्यो, “राधा-कृष्ण, सीता-

राम, गौरां-शिव तो आपणी जोड़ी में लारै बिराजै। औ काई राज है जो आम्हीं-साम्हीं बिराज्या थका है। आ बात म्हारी समझ नीं आयी!”

जद पाठकजी पूरो वृत्तांत सुणावा लाग्या। बोल्या, “आप तो खरा दरसण कीधा है। मिनख तो हाथ जोड़'र पूठ फेर लेवै। म्हे दाऊजी चाळीसा में पूरो बखाण कीधो है। बै दाऊजी चाळीसो लेय आया अर म्हनै हरख सूं संपता बोल्या, “आप पढोला तो खुशी व्हेगा।”

“पण अबार आप सगळो वृत्तांत सुणावो।”

बै कैवा लाग्या, “अठै पैली अेक काचै पाणी रो तळब हो। नांव हो क्षीरसागर। श्यामा गाय सब गायां लारै चरनै बठै पाणी पीवा जावती तो आपरा थण रो दूध बठै ईज किनारा पे छोडी आवती। जद गुसांईजी म्हाराज गाय रै थण खाली व्हेवा री बात पतो लगाई तो वणी धरती रै नीचै सूं दाऊजी री मूरत निकळी। दाऊजी री मूरत सूं थोड़ी डोढी रेंवती मैया री मूरत निकळी। मिंदर बणायो अर दोई स्वप्राकट्य मूरत्यां री थापणा जथाठौड़ कीधी। आप दोनूं रा दरसण मिंदर में कीधा है।” अतरो कैयनै बै छिणेक रुक्या। पाछा बोल्या, “आप पूछ्यो कै अै मूरत्यां डोढी क्युं है? अणी रो भी किस्सो है।” राधागोविंदजी बतावण लाग्या अर म्हे चित मन सूं सुणवा लाग्या।

“रेंवतीजी सतजुग रा हा। धरती पर राजा रेंवतजी व्हिया। रेंवतीजी वणां री बेटी हा। रेंवतजी रो सीधो संपर्क ब्रह्माजी सूं हो। वणां रेंवतीजी वास्तै ब्रह्माजी सूं वर पूछ्यो—आप म्हारी बेटी वास्तै किणी वर नैं सोच्यो है? जद ब्रह्माजी बोल्या—रेंवतीजी तो त्रेताजुग में दाऊजी सूं परणेंगा। रेंवतीजी नैं आ बात खबर पड़ी तो बै तप पे बैठग्या। घोर तपस्या कीधी। अतरी कै वणां पे उदाई घर घाल दीधो अर माटी चढगी। रेंवतीजी आखा माटी सूं ढकग्या। जद दाऊजी बिरज रा राजा बण्या तो रेंवतीजी नैं सोध्या अर माटी सूं बारणै काढनै लेयनै आया।” पाठकजी किस्सो सुणावा में डूब्या थका पण नारीचेतना रै सवाल पे म्हारो मन सजग होयग्यो।

“राजा रेंवतजी रेंवती रो ब्यांव मांड्यो। दाऊजी बरात लेयनै परणवा आया। मंडप में रेंवतीजी नैं देख'र गुवाळ-बाह हंसवा लाग्या। ठिठोळ करता बोल्या—बडी बहू, बडा भाग। रेंवतीजी सतजुग में जनम्या। दाऊजी सूं दो जुग बडा हा। दाऊजी रै बात चुभगी। वणां आपरै हळ सूं रेंवतीजी नैं खींचनै माथै मूसळ धर दीधो। रेंवतीजी छोटा होयग्या। दाऊजी रै अणी बरताव सूं रेंवती जी नैं अपमान री पीड़ा व्ही। रेंवतीजी बोल्या—बींद आपरै घरै लेजायनै आपरी ब्याहता सूं कस्यो भी वैवार करै, पतिव्रता स्त्री सब सहन करै अर आपरो धरम निभावै, पण अठै तो म्हारा पीहर में सगळा साम्हीं मंडप नीचै अस्यो वैवार? अस्यो तो कोई नीं करै। रेंवतीजी रूसग्या अर दूरा जायनै डोढा बैठग्या।”

पाठकजी घणी सारी बातां कर रैया हा, पण म्हारो मन सतजुग सूं लेयनै कळजुग री स्त्री री दसा पे विचरण करवा लाग्यो। इण संसार में पुरुस श्रेष्ठता खातर लुगाई री लघुता जरूरी है। राधागोविंदजी सूं विदा लेयनै म्हां आगै बधग्या। गाडी रा पहिया रमणरेती रै लक्ष्य पे आगै बध रैया हा, पण म्हारो मन स्त्री रो काई कान अर काई अपमान व्हे, आं विचारां में उळझ्यो थको सगळा काळ नैं पुराणां नैं खंगाळ रैयो हो? मिनख तो आवै, दाऊजी रा दरसण पावै, जैकारा लगावे। रेंवतीजी तो खूणां में ऊभा ई लुक्या रैवै। दूजी खिड़की सूं दरसण करणा पडै!





सुशीला शर्मा 'कंचन'

जगन्नाथपुरी री जात्रा

आ बात है जनवरी, 2019 री। भिड़तां री साल री सरुआत पुरी जात्रा सूं हुयी। आज बैठ्यां-बैठ्यां चितार आयगी। अबार राड़रावणा कोरनो-काळ में तो या ही लागै कै म्हें मुगती रा द्वार च्यारूं धाम भी कर सकूंली या नीं, या फेर म्हारी बा आखरी जात्रा ही।

सियाळ्य री छुट्ट्यां ही 25 दिसंबर सूं लेयनै 6 जनवरी तलक। स्कूल री छुट्टी होयगी। निसरण लाग्या कै हैड माटसाब पाणी हाथ में थमातां सागै कैयो, “बाईसा, संस्कृत भाषा रा प्रशिक्षण में आपरी ड्यूटी लागी है। 26 सूं 31 दिसंबर तलब आपनै महापुरा ईज रैवणो है।” अठीनै म्हांकी पुरी जात्रा री टिगट पैलां सूं ई बण्योड़ी ही।

घरां आवतां ई पैली साबजी नै आ खबर सुणाई। साबजी तसल्ली सूं म्हनै कैयो, “कोई बात कोनी, जात्रा कैसिल।” ब्याळू करती बगत अनिल जात्रा रा सामान-सट्टा बैई पूछ्यो, म्हें सारी बात बतायी तो बां टिगट पैलां आळा कैसिल करवायनै 1 जनवरी रा पाछा बणवा दिया। दिन-रात बठै रैवणियो प्रशिक्षण हो। घरां आवतां ई गाभा-लत्ता... कियां होसी, सब घबराटी छड़गी, पण समै नीसरग्यो।

जयपुर सूं दिल्ली अर दिल्ली सूं पुरी, औ म्हारो जात्रा-मारग हो। अेक दिन सुनील कनै दिल्ली में रुक्या। तड़काऊ 6 बज्यां री रेल ही, सो बहू बेगी उठनै परांवाठा बणा दिया गेला वास्तै। बेटो मोबाइल फोन सूं टैक्सी बुक करवा दी। टेसण माथै पूगावण सागै गयो। बुढापा रो सुख भी अेक अलग ई आणंद होवै है। टाबरां री ब्याह-सगाई पछै लारली चिंता नीं रैवै। जिम्मेवारी सूं मुगत हुयां पछै री जात्रा हनीमून सूं कम कोनी लागै। बरसां पछै भरतार रै सागै म्हें अेकली जात्रा करी ही। मन हुलारां मारै हो। हिवडै हेत उमग्यो आ-जा रैयो हो। मोकळी बातां गैलरा किस्सा ज्यूं-ज्यूं याद आया, बतळा लिया, लारै ई ओळमा भी देंवता रैया। भागदौड़ री जिंदगाणी अर टाबरां रै भविष्य री चिंता में कद बूढा होयगया, बेरो ई कोनी पाट्यो।

3 जनवरी री धोळी दोपारी जगन्नाथ पुरी पूगग्या। साब री मैरबानी सूं अेस.बी.आई. रा विश्रांति-गृह में कमरो बुक होयगयो हो। विश्रांति-गृह काई, जाणै पांच सितारा होटल हो बो तो। 13 नंबर कमरै में ठैर्या हा म्हे। न्हाय-धोयनै बैठनै भोजन जीम्यो। घणो सुवाद खाणो हो, स्यात पवित्तर थान रो परताप हो या फेर म्हनै भूख घणेरी ही।

थोड़ी बार आराम करनै म्हे नीचै गया। बटै पैलां सूँ ई टूर कंपनी आळा बैठ्या हा। वणां नै अेडवांस रुपिया देयनै म्हे जगन्नाथजी रा मिंदर कानी चाल पड़्या। टैक्सी ई छोटा-सा स्हैर री अळियां-गळियां घुमावती मिंदर सूँ आधा कोस दूर उतार दिया।

बजार रो नजारो देखतां थकां म्हे मिंदर रै साम्हीं पूग्या। बटै मोबाइल अर बाकी सामान नै थड़ी में जमा करवाया, पछै लैण में लाग्या। जूता-चप्पल भी बटै ई खोल दिया हा। आधो घंटो लैण में लाग र मिंदर रै साम्हीं जा पूग्या। हाथ-पग धोयनै मिंदर में प्रवेस कऱ्यो। गाइड रै लारै म्हे घूमता रैया। बो बतावतो रैयो :

“भगवान जगन्नाथजी रो मिंदर 12वीं सदी में गंगबंस रो प्रतापी राजा अनंगभीम देव बणवायो हो। आठ सौ बरस जूनो पुरी मिंदर स्थापत्य अिर शिल्पकला रो नायाब नमूनो है। इणरी ऊंचाई 214 फुट अर दरसाव पंचरथ जिस्यो है। इण मिंदर रै च्यारूंमेर री भीतां नै प्राचीर कैवै, जिणरी लंबाई 660 फुट अर ऊंचाई 20 फुट है। मिंदर रा चार खंड है—विमाण, जगमोहन, नाट्य अर भोगमंडप।”

गाइड बतावतो रैयो, मिंदर री अणगिणत विसेसतावां अर चमत्कारां रै बारै में, पण म्हानै इतरी भीड़ में नीका तरीकी छोड र समझ में भी कोनी आयो कै आपां दरसण करनै धक्का-मुक्की में कटै जा पड़्या। दरसणां री कसक मन में रैयगी। भारी मन सूँ बटै ईज अेक भोजनालय में भोजन जीम-जूठनै बारै नीसऱ्या तो जयपुर रा अेक पुराणा जाणकार मिलग्या। रामा-स्यामा करनै सिंझ्या पछै बटै आवण रो कारण छीड़ में दरसण करणो बतायो। म्हैँ घणी राजी हुयी, अब आपां भी नीका तरीकी सूँ दरसण करस्यां। म्हे बजार में घूमनै बीच रो टेम पास कऱ्यो अर पछै नौ बज्यां पछै नैण भर-भरनै जगन्नाथजी रा दरसण करनै आ जातरा अर जलम दोनू सफळ कऱ्या।

आगलै दिन विश्रांति-गृह रै साम्हीं टूर कंपनी री बस दिनगै पूगगी। म्हे बीं में बैठग्या। गाइड बतावणो सरू कऱ्यो, “आपां सब सूँ पैली चालस्यां गुंडिचा मिंदर में। औ मिंदर जगन्नाथजी रा मिंदर सूँ दो कोस री दूरी माथै उत्तर दिसा में है, इणरो निरमाण राजा इंद्रमदुमन आपरी राणी गुंडिचा रा नांव पे करवायो हो। इण मिंदर री जगचावी ‘पुरी रथजात्रा’ में घणो महत्त्व है। आसाढ में ऊजळा पख री दूज नै तीन रथां में बैठनै तीनू भाई-भैण गुंडिचा मिंदर में प्रवेस करै है। जगन्नाथजी रो रथ नंदिघोस, बलभद्रजी रो रथ तालध्वज अर भैण सुभद्रा रो रथ देवदलन नांव सूँ होवै है।”

म्हैँ तो आपनै आ बतावणो ई भूलगी कै नाथजी रा मिंदर में तीन काठ री मूरत्यां है। अै तीनू विग्रह नीम री लकड़ी सूँ बण्योड़ा होवै। यां मूरत्यां रो नवकलेवर 12 बरस में हुवै है। जीं बरस इधक मास आवै है, बीं बरस ई नवकलेवर होवै।

अबै बस म्हानै पुगाया लोकनाथजी रा मिंदर में। औ मिंदर पुरी रो सै सूँ जूनो महादेवजी रो मिंदर है। अै जगन्नाथजी रा भंडारा रा रखवाळा मान्या जावै। अठे हरेक साल सौरती नै बडो मेळो भरीजै। कैयो जावै कै रामजी लंका जावता थका अठै भोळैनाथ री पूजा करी ही। बटै सूँ गाडी म्हानै चिलिका झील कानी लेयगी। पूरै गेलै सड़क रै किनारै छोटी-छोटी सी तळायां मनमोवणो चितराम हो। चिलिका झील भारत री बडी अंतर्देशीय झील है। आ झील उड़ीसा रा उपकुल में 1100 वर्ग किमी छेत्र में फैल्योड़े है। घणेसरा सरोवरां सूँ पूर्योड़ी चिलिका झील में दूर

देस-परदेस रा पंखेरू आनै इणरी सोभ्या रै चार चांद लगा देवै है। पुरी सूं आ झील 100 किमी सूं भी ज्यादा दूर हुवैली स्यात। अठै रा मछेरां रो अेक रुजगार पर्यटकां नैं नाव में बैठा रै झील में दूर तलक घुमावणो अर डालफिन दिखावणो है, पण बांरी हालगत देखतां थकां तो यो ईज लागै कै बिचोळिया ई खा जावता होवेला अणां री मोटी दिहाड़ी नैं। म्हे डीजल सूं चालण वाळी नाव में बैठनै घणी दूर निकळग्या हा। फटफट री आवाज करती नाव आपरै पाछै पाणी में लीकटी मांडती जा रैयी ही। पंछी किलोळां कर रैया हा। लोगबाग वीडियो बणाय रैया हा, चाणचुक डालफिन साम्हीं आयगी। सगळा खुसी रा मास्या उछळ पड़्या। नाव मुड़ण लागी, कीं डगमगागी, स्यात डीजल बीतग्यो होवैलो। नाव थोड़ी दूर जायनै थिर व्हेगी। म्हारो जीव धगधगाट करण लाग्यो, पण चनी-सी टेम में ई अेक मोट्यार आय रै म्हांरी नाव नैं खुद री नांव सूं जोड़ रै खींचतो ई पूगा दिया बंगाल री खाड़ी रा किनारा माथै, पण अब बठै मन कोनी लाग्यो। वापसी आवतां रात व्हेगी। आज भी रात नै नौ बज्यां निरांत सूं जगन्नाथजी रै मिंदर रा दरसण करनै विश्रांति-गृह आया।

आज जात्रा रो तीजो दिन हो। म्हानै भुवनेश्वर जाणो हो। काल म्हे चंदन तळाब अर साक्षी गोपाळजी रा मिंदर में भी जायनै आया हा। आज म्हे सब सूं पैली कोणार्क सूरज मिंदर पूग्या। बठै सूं पैली समंदर रै किनारै बस रुकी। घणी दूर तांई समंदर नैं निरख रैया हा, की चाणचक लहरां आयी आ गोडां तांई भिजोयनै चली गई। या भी जात्रा सफळ होवण रो संकेत हो।

कोणार्क मिंदर पुरी सूं 36 किमी री दूरी माथै है। इण मिंदर री थापना उत्कल राजा लांगुला नरसिंघदेवजी 1200वीं सदी में करवायी ही। 1200 कारीगर 12 बरस तांणी राज रा खरचा सूं इण मिंदर रो निरमाण कर्यो गयो। थानै इण मिंदर रा शिल्प री जित्ती सोभा बतावूं, बिती ई कम है। सूरजदेवजी री तीन मूरती उदित, मध्य अर अस्त सूरज देवता। इण मिंदर रो रूप सूरज रा रथ जिस्यो लागै है। इणमें 24 पहिया है। हरेक पहियै में आठ-आठ आरा, ज्यांरो व्यास 9.9 फुट है। मिंदर रै दक्षिण में दो भड़कीला घोड़ा है, बांनै उड़ीसा सरकार आपरी सरकारी मोहर में छाप राख्या है। इण मिंदर री पूरब दिसा में सिंघ हाथी नैं दबाय राख्यो है।

अठै सूं म्हे भुवनेसर में ईज लिंगराजजी रा मिंदर में गया। भुवनेश्वर उड़ीसा री राजधानी है। लिंगराजजी भगवान संकर रो विग्रह है। अठै रो कला-कौसल अचंभाजोग है। अब म्हे पूग्या खंडगिरी-उदयगिरी धुरायां में। खंडगिरी री ऊंचाई 133 फुट है अर इणमें 16 धुरायां (गुफावां) है। बीजा परबत उदयगिरी री ऊंचाई 110 फुट है अर इणमें 44 धुरायां है।

अंत में म्हे नंदन कानन चिड़ियाघर में पूग्या। चिड़ियाघर भुवनेश्वर सूं 25 किमी दूरी पे है। अठै रा बंगला बाघ अर धोळा बाघ प्रसिद्ध है। अठै म्हनै सन् 1982 री कश्मीर जात्रा याद आय रैयी ही। हास्या-थाक्या पुरी पूग्या, फेरूं वा ईज सागी नौ बजी मिंदर गया। लगोलग तीन दिन तलक निजरां री तिरपती जगन्नाथजी रा दरसण करनै व्हेगी। भगवान इस्या दरसण सब कोई नैं करावै।





बसंती पंवार

दंतकथा

दांत है तो उणां री कथा ई हुवै। अक कथा अँड़ी है जिकी थां सगळ्यां नँ सुणायां बिना म्हारो आफरो नीं झड़ सकै। चावै माडाणी रो पाडो ई हुवै, पण सुणणी तो पडैला। तो सुणो सा!

अक गांव में डोकरा-डोकरी रैवता हा। उणां नँ स्हैर री पळपळाट... स्हैरियां ज्युं रैवणो, बोलणो घणो चोखो लागतो। डोकरो दो-चार अंगरेजी रा सबद ई सीख लिया हा। मिनखां रै बिचाळै जद बो बैठतो तो अंगरेजी बोली सूं आपरी धाक जमावण री अणूती ई कोसिस करतो।

साठां पार, पण कोई बूढा कैय 'र तो बतळावो, बै उणां रै दोळा व्है जावता। कैवत ई है कै 'साठां बुद्धि न्हाठां। टीवी देख-देख 'र बै आपरा नांव ई हीरो-हीरोईन रा राख लिया हा। अक-दूजै नँ जद बै बुलावता तो... "ओ म्हारी करिश्मा कपूर...!"

"बोलो सा, म्हारा सलमान खां जी...।"

भीतां रै ई कान हुवै। होळै-होळै गांव में छोरा-छोरियां नँ ठाह पड़गी तो बै उणां नँ छेड़ण लागग्या :

"ओ बा 'सा, थे सलमान खां कीकर हुया?"

"कुण बा 'सा ? थे किणनँ कैवो ? काई म्हें थानै बा 'सा लागू ? अर थानै काई मतलब है म्हारै नांव सूं... ?"

"क्यूं कै थारो नांव तो...।"

"भागो अठै सूं। बा 'सा हुवोला थे अर थारो बाप... आया बापड़ा म्हनँ समझावण नँ... गो आउट...।"

छोरला जे नीं मानता तो बा 'सा बानै मारण नै दौड़ता। औ ईज हाल डोकरी रो हो।

"ओ मा 'सा ?"

"अे सीढीकाडियां ! थानै म्हें काई मा 'सा दिखू ?"

"थानै मा 'सा नीं तो काई करिश्मा कपूर कैवां !"

"मा 'सा व्हेला थारा बडेरा... म्हारो तो नांव ई करक्सा कपूर है।"

करक्सा कपूर... करक्सा कपूर करता-करता टींगर हंसता अर बोलता—

“करक्सा रो मतलब तो लड़ाईखोर ई हुवै, थे तो साच्याणी रा करक्सा ई लागो, पण कपूर कियां हुयो, औ तो सरनेम है। थे तो...।”

“तो म्हारो ई सरनेम है। अठै सूं जावो हो कै बुलावूं बाँनै... ?”

“भागो-भागो रे... हमार सलमान खां जी आय जावैला।”

बगत यूं ई निकळण लागो। अेकर भावाजोग सूं दोन्यूं रा दांत दुखण लागग्या। निरा दिनां ताई तो बै अेक-दूजै नैं ई नीं कैयो। पछै डोकरै सूं तो सैन नीं हुयो, तो बो बोल्यो, “ओ म्हारा करिश्मा कपूर जी...!”

“बोलो सा म्हारा सलमान जी ?”

“म्हारा तो दांत घणा कुळै, कितरा ई दिन हुयग्या।”

“अरे म्हारा ई घणा कुळै, पण म्हैं तो मूंडो सीव'र बैठी हूं। यूं कित्ताक दिन चालैला। स्हैर चाल'र डाक्टर नैं देखावां ?”

“हां, औ ईज ठीक रैवैला, पण थूं किणनैं ईज कैयीजै मतना।”

डाक्टर नैं देखायो तो बो डोकरी नैं कैयो कै थे तो दवायां सूं कीं बगत धिकाय सको, पण छेवट तो दांत निकाळणा ई पडैला। अर डोकरै नैं कैयो कै थां तो अबार ई निकळवाय ल्यो तो ठीक रैवैला। पण बाई बतीस तो बीरो छत्तीस लखणो। बै दोन्यूं दवायां लेय'र घरां आयग्या। दवायां ई लेयली, पण दांत तो सावळ हुवण रो नांव ई नीं लेवै। बै दोन्यूं आप-आपरा दांतां नैं समझावण लाग्या :

“अे सीढीकाडियां! थां आखी उमर म्हारा मूंडा मांय काढ दीवी, अबै यूं क्यूं मूंडो मोड़ो हो ? थे तो म्हारा जबड़ा जाया बीर हो, जबड़ां रै मांय ई बिराज्या रैवो। थे तो म्हारा थोबड़ा रै मांय बैठा ई फूठरा लागो... थारी कदर हुवै। बारै पड़्यां पछै थांनै कुण पूछैला। आपरै सिधारियां सूं म्हारो चौगटो ई चिप जावैला, जाणै नीचोयोड़ो नींबू हुवै। सगळो फुठरापो ई धूड़ में मिल जावैला...। थे तो देखो ई हो कै माथै बाल तो माथै में ई काई, आखी जिनगाणी में ई धूड़ न्हाख दी, थे तो यूं मती करो! पछै थे तो म्हारा बतीस जोध-जवान हो, सरकार रै दाई परिवार नियोजन मती करो कै घटतां-घटतां आपां दाय अर आपां रा दाय ई रैय जावां।

“इत्ता बरसां ताई तो थे ग्यानी-ध्यानी जियां आप-आपरै ठायै बैठ्या रैया... नीं हिल्या, नीं डुल्या... नीं धूज्या... नीं कदैई कीं कैयो। थारी तपस्या नैं तोड़ण खातर कीं दांत-दाढ कुबद करै दीसै। खुद तो नाचो-कूदो जिका ठीक है, पण थे तो आखै डील नैं ई नचाय देवो... थे तो रात-बिरात ई नीं देखो। म्हनैं तो यूं लागै कै थे भायां ज्यूं न्यारा हुवण री तेवड़ली है। पण भेळापै मांय जिको आणंद है, बो न्यारा हुयां नीं मिलैला। मिलजुल नै चबावो तो चबावण रो काम ई सोरो करोला... अेकला हुयां चबाईजैला नीं, ध्यान राखजो। पछै भलाई माथा फोड़जो!

“थे तो जाणो ईज हो कै दांत अर आंत रो मां-जाया ज्यूं हेत हुवै। थे कुरळवो तो आंत ई कुरळवै, क्यूं कै थारै बिना म्हे जीम नीं सकां अर नीं जीमां तो आंतां तो बापड़ी कुरळवैला ई। करां तो काई करां! जे डाक्टर थांनै बारै काढ देवैला तो अै आंतां तो विधवा हुय जावैला।

“म्हे तो सोच्यो हो कै पळपळावता दांत देखावण सारू टीवी माथै आवांला... नांव अर परईसा दोन्यू कमावांला... अरे गैलां! म्हारै सागै थारो ई नांवको हुवतो... पण अबै जे थे यूं किनारो कर लेवोला तो म्हारा सुपना रो काई हुवैला ?

“म्हे थानै हाथ जोड़ां... थारै पगां पड़ां... थानै घणा सो 'रा राखांला... कदैई करड़ी चीजां नीं खवावांला... थानै ऊनो-ऊनो सीरो जीमाय 'र सूता राखांला। म्हारै मूडै रा लाडेसरां! थे मूडै मांय ई बिराज्या रैवो। थां जैड़ा हो वैड़ा ई म्हानै फूठरा लागो। थे भलाई लूला-लंगड़ा... उबड़-खाबड़ कै टेढा-मेढा हुय जावो, पण म्हारै मूडै मांय बसिया रैवो... थे ईज तो म्हारा भगवान हो।”

इण तरियां सू बै दातां नैं घणाई समझाया, पण बै तो चीकणा झाड़ा हुयग्या। करिश्मा जी तो हिम्मत राख 'र बोला रैया। सोच्यो, घणा कूका कर्यां तो दातां नैं कोयलड़ी गावणी पडैला।

अबै करै तो काई करै! नीं तो दातां... नीं आतां... नीं रातां चैन। सलमानजी, करिश्मा नैं लेय 'र पाछा डाक्टर कनै पूग्या... उणां रै पगां पड़्या कै ज्यूं व्है ज्यूं इण दरद नैं मिटावो। डाक्टर उणां रै सुई लगाय 'र बैठाय। थोड़ी ताळ सू मांय बुलाया।

कुरसी माथै बैठाय 'र ओजारां सू डोकरै रो बाको फाड़ो। बो कीं कैवै तो कीकर कैवै... मन रा सुपना बाकै मांय सू बारै निसर रैया हा... उणां रो दाणो-पाणी इत्तो ईज हो... आंख्यां डबडबीजगी। अँडो कोई माई रो लाल नीं हो जको उणां रै दातां नैं बचाय सकै। बा करिश्मा ई बारै बैठी ही।

डाक्टर नैं मन मांय घणी ई गाळ्यां काढी, पण उणसूं किसा गूमड़ा हुवणा हा... बो तो आपरो काम पूरो कर दियो... सलमानजी बोखा हुयग्या...। सोच्यो, अबै कैडो सलमान? बारै आय 'र घरवाळी नैं देखी—आ तो हाल ताई करिश्मा लागै... पण म्है... ?

पोपला गाल मांय धंसग्या... सावळ बोलीजै कोनी...। सोच्यो, मूडै माथै तो अबै अलीगढ रो ताळो लगावणो ई चोखो है... बारै तो भूल 'र ई नीं जावणो... नीं तो छोरला...

टाबर तो टाबर ई हुवै, पण करक्सा कपूर नैं देखो—म्हणै देख 'र कैड़ी मुळकै है अर पछे घरै आवै जिणनैं ई आ दंतकथा कित्ता लावा लेय-लेय 'र सुणावै... पण डाक्टर रै घरै देर है अंधेर नीं... जद इणरी बत्तीसी न्यारी हुवैला... इणनैं ई ठाह पड़ जावैला... जणै म्है ई हंस-हंस 'र लावा लेवूला... पण कीकर ?

अरे म्हारा मूडै रा सुहाग... थे म्हानै छोड 'र क्यूं गया ओ? अबै कीकर जीवूला... ? हे राम... !



धनलक्ष्मी म्हे



विमला नागला

मां रो कागद बेटी रै नांव

केकड़ी

9 मई, 2021

म्हारी लाडली,

घणी आसीस।

म्हे सगळ्ळा अठै राजी-खुसी हां अर ठाकुरजी म्हाराज री किरपा सूं थूं भी राजी-खुसी होवैला। आज रो दिन तो घणो खास है अर थूं म्हासूं घणी दूरां सात समंद रै पार है, थारै सूं मिलण सारू म्हारो हिवडो घणो उगमाय रैयो है। घड़ी-घड़ी लागै, जाणै पांखड़ा होवता तो उड'र आय जावती। कदैई लागै, म्हें भी कुरजां सागै सात समंद पुगाय देवूं म्हारी लाडकड़ी रै नांव लिख्योडो हेत रो परवानो।

हां रे बेटा, रात री बारह बजतां ई थारै सूं वीडियो-कॉलिंग होयगी। थनै जलमदिन री मोकळी बधाइयां देय दी, जी-भर बातां करली, पण फेरूं भी म्हारो मन कोनी भरीज्यो। थारी ओळुंवां रा चितराम नैणां मांय जाणै फिल्म री रील दाई चालण लागग्या। अँ कणैई म्हारी आंख्यां मांय हरख रो उजास भरै तो कदैई थारी चितार सूं गंगा-जमना ज्यू बैवण लागै। इणी भांत रा जंजाळ मांय म्हारो मनडो थनै कागज लिखबा सारू उकळबा लाग्यो।

हां म्हारी लाडकड़ी! म्हनै ठाह है, अक दाण तो थूं कागद नै देख 'र जोर सूं हांसती थकी झट सूं कैय देसी कै मां! थे भी इण इंटरनेट रै जमानै मांय अँ कुणसा जमाना ज्यू लिखण लागग्या। पण बेटा, अकर म्हनै थारी भायली बतायो कै थारै पापा रो लिख्योडो पैलपोत रो कागद जद थारै होस्टल मांय पूग्यो तो थूं हरखबावळी-सी उणनै लेय 'र सगळी भायल्यां नै बतावती फिरी ही। अर उण पाती नै पढती बेळा पापा री चितार मांयय थूं रोवण लागगी ही। थारी सहेली बतायो कै थूं बोली, इण कागद नै पढती बेळा यूं लागै जाणै म्हारा पापा ईज म्हारै कनै ऊभा बोलै है, अर पछै थूं उण कागद नै आपरै सिरांथियै मेल 'र सूयगी ही अर नौद उडी जणै घणी दाण उणनै बांचती रैयी आ आपरा आंसू पूंछती रैयी।

लाडो! म्हें भी थनै कागद मांडबा तो बैठगी, पण म्हनै खुद नै ई ठाह कोनी कै म्हारै मनडै मांय प्रीत रो उफणतो समंद नीं जाणै कांई-कांई मंडासी।

चीकूड़ी! थारै जलम सूं लेय 'र आंगळ्यां पकड़'र धीमै-धीमै भरता पगल्यां सूं थूं कद चीलगाडी मांय सात समंद पार उडगी, म्हंनै जाणै समै रो लखाव ई नीं व्हियो। पण टाबरां सूं बिछड़्यां पाछै रो टेम तो जाणै बैरी व्है जावै, जो काटियो ई कोनी कटै। उणरी चितार घणी पीड़ देवै। देख नीं, हमेस कम बोलवा वाळा थारा पापा आज तो थार अेक्सप्रेस ज्युं दिनुगै सूं थारी बातां मांय ई नीं जाणै कितरी बातां कर 'र घड़ी-घड़ी भावां मांय बैवण लागै है। बियां भी बेटियां बाप री जान होवै ईज है रे बेटा!

बेटूड़ी, थारै नटखट बाळपणै रै पाछै भी थूं कदैई ओळबा रै गेलै तो गई कोनी, पण मोट्यारपणै री डेळ चढती बेळा थोड़ी रीसाळू जरूर होयगी है। पण म्हें जाणै ही कै इण औस्था मांय टाबरां री प्रकृति माथै बदळव आवै ईज है। जणै ई तो किशोर अवस्था नै 'तूफानी काळ' कैवै। पण टाबरां रै सागै मायतां री भी इण टेम घणी जिम्मेवारी बध जावै जावै है। म्हें आ जाणै ही अर इण सारू म्हें थनै ऊंच-नीच रो भेद समझावती थकी चोखी पोथ्यां भणबा सारू हमेस ई प्रेरित करै ही, जिणसूं कै थूं पोथ्यां भणती-भणती कद नूवी रचनावां मांडण लागी, म्हंनै तो ठाह ई कोनी पड़ी। थारी पैली रचना छपी जणै म्हें भी हरखबावळी होयगी ही अर बो अखबार सगळ्यां नै मुळक-मुळक 'र बतावै ही। थारै लगोलग पढण री हूस अर पोथ्यां सूं प्रीत रै कारणै ईज तो थनै इतरो लूंटो प्रोजेक्ट मिल्यो। थारी योग्यतावां रै कारण ईज तो म्हारा पगल्या धरती माथै ई कोनी पड़ै है रे बेटा!

अरे हां, बियां तो थूं हमेस ई स्कूल री सगळी गतिविधियां मांय ई पैलो नंबर लावै ही, दूजां नै थारी उपलब्धियां बतळावती म्हारी जीभ कदैई थाकती कोनी ही, पण इण बात रो तो घणो ध्यान राखै ही कै थनै इण बातां सूं अणूतो गरब नीं होय जावै। थूं हमेस म्हारै सूं बेराजी भी रैवै ही कै मां, थे म्हारी कदैई बडाई कोनी करो...। पण म्हारी लाडकंवर, म्हारी मां हमेस कैवती ही कै सुपात्तर बीनणी कर बेटी बा ईज होवै जिणरा घर मांय कर्योड़ा काम नै पैलां सरावै। दूजा जणां रै मूंडै सूं आपणा घरां री बडाई ही हमेस आपां नै गरब देवै।

म्हारी लाडू! थूं हमेस ऊंची पढाई सारू म्हारै सूं घणी दाण अळगी रैयी अर म्हंनै कदैई कैबा-सुणबा रो मौको कोनी दियो, पण अबकाळै तो थूं मायडभोम सूं भी अळगी होयगी है नीं, जिणसूं म्हंनै थोड़ी चिंता है। बठै देस परायो, भोम पराई, मिनख पराया होवण सूं कदै-कदैई म्हारै हिवडै मांय अणर्चीती डरपणी भी बापर जावै। अरे... अरे सुण, म्हें जाणूं कै थूं तो घणी स्याणी-समझणी है, पण दुनिया मांय तो भांत-भांत रा जीव हुवै है नीं। जियां महासागर रै मांय हीरा-जवाहारात भी हुवै अर जैरीला जीव-जिनावर भी। जीवण मांय धोळी फट पूनम री चांदणी रात हुवण रै सागै ई अमावस री स्याह काळी रात भी तो आवै है नीं बेटा! थूं नामेक सबदां मांय म्हारी बात समझणी नीं। चोखी संगत मांय रैईजै अर मोबाइल माथै थूं हावी रैईजै, पण कदैई मोबाइल नै थारै माथै हावी मत होबा दीजै। मोबाइल रा गेम तो अैड़ी भूत-प्रेम हुवै कै पछै पूछ ई मत बेटा, अै तो लाग्योड़ा ई खोटा।

अरे हां लाडूड़ी... म्हें थनै कैवणो ई भूलगी कै आज थारै जलमदिन माथै हरेक बरस री भांत रूख लगायो। थनै ठाह है अबकाळै साल कुणसो रूख ? हारसिंगार रो। ठाकुरजी सूं बिणती

करूं कै इण रूख रा केसर जैड़ा रूपाळा फूलां री सौरम दाई म्हारी लाडली री भी सफळता री डम्पर चारूं दिसावां मांय फूटै ।

बेटा! म्हें थनै अबै जकी बात कैवणी चावूं बा घणी चिंता री अर महताऊ होवण सू ध्यान देवण जोग है । थूं पर्यावरण विग्यान रै मांय लूटा प्रोजेक्ट सारू परदेस गई है तो म्हारी घणी इच्छा है कै थारै प्रोजेक्ट आपणी मायडभोम नैं प्रदूषण सू किण भांत मुगती मिल सकै, इण पर भी देसहित मांय घणो महताऊ काम सीखजै । आपणी मायडभोम घणी निरवाळी है । सुरग सू भी सुंदर अर मोवणी है । अठै रा लिखारा कविसरां, साहित्यकारां परकत रा घणा सोवणा चितराम मांडता थका सांतरो बरणाव करै । अठै री धरा घणी रंगीन है, अठै सात सुर मांय नदियां कळ-कळ गीत गावै, बादळियां री गड़गड़ट, चिड़ियां रा चुरकला री चूंचाट, भंवरा-तिलतियां री गुणगुणाट, बिरखा री बूदां री छमछमाट, चांद-तारां री बरात, रूखड़ां रा पाना या मीठा गीत, पहाड़ां री बात अर इटलाती तितलियां, इतरती धरती री बासंती बहार है । अठै परकत कदै परवाई मां रो नरम हाथ पकड़ै तो कदैई उणनैं सियाळै रै तावड़ै मांय नरम-गरम असास करावै । डूंगर साधु बाबै जैड़ा मून साधै तो नदी आपरै पीव समंद सू मिलणै सारू उंतावळी निगै आवै । कितरा फूटरा चितराम है रे बेटा । अठै भांत-भांत री रितुवां, तीज-तिंवार होवै, सगळां रो आप-आपरो महत्त्व है, नीतर दूजा देसां मांय तो कठै तो कोरी गरमी पड़ै अर कठै कोरो सी... पण आपणै माथै ठाकुरजी री घणी मैरबानी है, जे सगळी रितुवां रो मजो आवै ।

पण बेटा... अठै रा मिनख है नीं जका आपरै लोभ सू इण रूपाळी भोम मांय सुवारथ रो ज्हेर घोळै । नदियां नैं मैली मट कर दी, प्रदूषण री काळी बादळी अठै रा चांद-सूरज री आभा नैं ईज मंदरी कर दी । पंखेरुआं रा आलणा उजाड़ र आपरै सारू म्हैल-माळिया चुण दिया, रूखड़ां नैं काट र जंगळ खतम कर दिया, जिणसू घणकरा जीव-जिनावर तो अबै कोरा पोथ्यां रा पानां मांय ईज रैयग्या । आवण वाळी पीढियां इणनैं कोरा इंटरनेट माथै ईज सर्च करसी ।

बेटू! प्रदूषण रा दुष्परिणाम नैं तो चोखी तरियां जाणै है थूं, बस म्हारो औ कैवणो है कै थूं धरा सारू अड़ै कोई काम करजै जिणसू सही अरथां मांय पतझड़ र पाछै री बसंत बहार सू धरती मां री हरी-भरी चूनरी माथै पीळा कसीदा री बूटी चमकै, जिणसू आभै मांय हरख रो इंद्रधनख तण जावै । आपणी आवण वाळी पीढियां अर उणरी संतानां पाछा रूपाळा बादळ, पेड़-पौधा, लूटा रूखड़ा, झरणा, नदियां, समंद, चांद, तारा, सूरज, बादळ, रंग-बिरंगा पंखेरू, चिड़ी चुरकला, मोर, कोयल देख-देख र हरख सकै । नीतर तो मिनख री अंतहीण लालसावां रै कारणै जो परकत उणनैं भगवान बणावै उणनैं करमफूटो बणतां जेज कोनी लागैला । कोरोना महामारी नैं देखै नीं, कितरी बैरण है आपणी । पण देख, मिनख त्राहि-त्राहि करै, पण धरती माता रै मूंडै पर जरूर हरख बापरै है । बा भी मां है, जिणसू आपरी संतानां रो दुख है उणनैं पण... रिस मांय तो मां टाबरां नैं सीख देवण सारू कोप करै ईज है । मिनखां रै घर मांय कैद होवण सू प्रदूषण काम होयग्यो, घणी ठौर रा रैवासियां नैं तो अबै जाय र आभै रा चांद-तारा निजर आया, पण मिनखां नैं मरता-बिलखता देख र हिंवड़ो घणो घबरावै । आक्सीजन कोनी मिलबा सू झट देणी कढता प्राणां नैं देख र भी लोगां रै मांय रूख लगावण री चेतना, प्रदूषण सू धरा नैं मुगती री बात समझ कोनी आवै तो पछै दण रा मिनख-जमारा नैं धिक्कार है ।

लाडली ! सदैव समै आपरा पांखड़ा पसाखोड़ो उडै है । थनै भी देखजै, बठै टेम री ठाह ई कोनी पडैली । इण सारू थूं घणी मैणत कर 'र आपरो काम पूरो करजै । अरे हां... थारी लाडकड़ी थारी भायल्यां चिड़कलियां जद रोजीना दाणा-पाणी सारू आवै है नीं, उण दाण थारी घणी चितार आवै । बेटियां अर चिड़कलियां दोनूं अकसी ई लागै है नीं घर मांय फुदकती-सी ।

लाडूड़ी, खूब फळो-फूलो, म्हारी उम्मीदां पर सोळा आना खरी उतरजै अर मायड़भोम सारू आपरो पूरो फरज निभा 'र इण रो करज उतारजै । ठाकुरजी सूं भी आ ईज बिणती है कै कोरोना री मांदगी सूं मुगती देबा रै सागै ई मिनखजात मांय पर्यावरण री रिच्छा सारू भी चेतना जगाईज्यो, जिणसूं कै आवण वाळी पीढियां भी सोरी सांस लेवै अर आपरी सोवणी-मोवणी परकत पर गरब-गुमेज कर सकै अर पीढी-दर-पीढी इणनै धरोहर रै रूप मांय संभळा सकै ।

थारो पूरो ध्यान राखजै—खास तौर सूं खाबा-पीबा रो । बाळपणै सूं ई थारै खाबा-पीबा रा घणा नखरा है । थूं जाणै है नीं—पैलो सुख नीरोगी काया ।

चाल, अबै अक बार बोल दै... “म्हारी लाडूड़ी ।”

“म्हारी मां...” म्हनै यूं असास होय रैयो है जाणै थूं हमेस री जियां म्हारै काळजै सूं लाग 'र पडूतर देवै है अर म्हारो रूं-रूं ममता मांय हिलोरा लेवै है । अबै घणो कोनी लिख सकूं लाडू । पापा कानी सूं घणो-घणो लाड । थारो बीरो, दादीसा, दादोसा भी थनै घणी चितारै ।

घणी-घणी आसीस, म्हारी लाडली ।

— थारी जामण





अरुणा अभय शर्मा

टेम चोखो है

मुख्य पात्र

1. मां 2. नारायण (बेटो) 3. रमिया (नारायण री लुगाई)

दूजा पात्र

1. बाबोसा 2. पाड़ोसण काकी 3. नारायण रा दो भाई
4. नारायण रो दोस्त, गांव रा लोग-लुगाई

(नारायण अेक सीधो-सादो छोरो है, जिको पढणो चावै, ढोर जियां जूण पूरी नीं करणो चावै। पण उण रा मां-बाबोसा रैया अणपढ, लकीर रा फकीर। इण खातर उणनें पढाई छोड 'र खेत अर पसु संभाळणा पड़्या। आगै जावतां नारायण आपरी लुगाई अर दो बेटियां री जूण कीकर सुधारी, आ ईज कहाणी कैवण रो प्रयास इण नाटक में करीज्यो है।)

(नारायण रो जीव हरमेस किताबां में ई रैवै। कामकाज सूं जी नीं चुरावै, पण बाकी बगत में अेक ईज काम करै, भणबा रो। अचाणचक बाबोसा नैं हवा बैयगी। अेक हाथ अर अेक पग में लकवो मारग्यो। इब भर-भर मूंडा अमल लेवैला तो अेक दिन तो भुगतणो ईज हो। नारायण मां नैं घणी समझायी कै बा बीं नैं स्हैर जावण देवै, पढाई रै साथै-साथै काम भी करूंला अर बाबोसा रै इलाज रो इंतजाम भी हो जावैला, पण अणपढ मां गांव रै बारै निकळण नै त्यार नीं ही।)

मां : (रीस में भस्योड़ी) सुण नारायणिया, अबै बारह किताब तो थूं भणली, इब स्हैर जावण री जिद करीतो इण घर में थारी कोई जग्यां नीं है। थारा बाबोसा मांदा पड़्या है, बांरी सेवा करण रो अर इण घर रो चूल्हो जगतो राखण रो थारो ई फरज है। तूं बिचार करलै, तनें कांई करणो है। (बड़बड़ाट करती मां बाबोसा कनै जाय 'र बैठगी)

रिलायंस पेट्रोल पंप रै लारै, विनायक विहार, देवासियां री ढाणी, मकान नं. 67, खसरा नं. 147, सारथी सरोवर कॉलोनी रै कनै, पाल गांव, जोधपुर (राज.) मो. 8875015952

(नारायण घर रो मोभी बेटो, करै तो काई करै। विचारां में पड़गयो। छोटा दोनूं भाई अबार तो सातवीं अर पांचवीं में भणै है, कीकर सगळा परिवार नैं छोड 'र स्हैर जावूं? आखिर नारायण बाबोसा रै साथै-साथै सगळा परिवार री सेवा में लागग्यो।)

बाबोसा : (तीन बरस सूं मांचा में ई है) नारायण री मां, अरे सुण तो! इब पोतां रो मूंडो देखलूं तो सांसां सोरी निकळ जावै।

(इब मां नारायण रै ब्यांव री जुगत में लागगी। नैड़ा ई गांव में बात पक्की होयगी। चौमासो निकळण री बाट नीं जोई, भर उन्हाळै ब्यांव कर दियो। रमिया बींदणी नैं सात मास पूरा होया ई हा कै बाबोसा सुरग सिधारग्या। ढाई महीनां पछै रमिया रै पीहर सूं छोरी होवण रो समाचार आयो।)

मां : (रमिया रै घरै आवतां ई) देख बींदणी, पैली बगत तो इण छोरी नैं थारा बाबोसा री आसीस मान 'र राखूं हूं, पण इब म्हनैं बेगै सूं बेगो पोतै रो मूंडो देखणो है। आखिर नारायण रो नांव तो बेटो ई आगै बधावैला।

(सवार-सिंझ्या आ ईज सुणतां-सुणतां तीन बरस होयग्या। छोटोडै भाई नैं ई मां इण सियाळै परणाय दियो। नारायण री लुगाई पीहर जावै है, भाई लेवण नैं आयो है।)

मां : सुणो छोटा ब्याईजी! ब्याणजी (रमिया री मां) नैं म्हारो संदेसो पूगतो कर दीजो कै जे अबकै छोरी होई तो थारी धीय नैं अठै पाछी मत मेलजो।

(आज नारायण घरै आयो मां चबूतरा माथै बैठी उणरी ई बाट जोवती मिली)

मां : थारै सासरै सूं फोन आयो हो। थारी लुगाई अबकाळै फेरूं छोरी जामी है। म्हैं तो पैलां ई संदेसो भेज दियो हो अर आ बात थूं जाणै ई है। तो अबै ना-नुकर कर्यां सूं कोई फायदो नीं है। काकी (पाड़ोसण) बात पक्कीर कराय दी है। सांमलै नैं थारै पैलै ब्यांव सूं कोई अंतराज नीं है। बै जाणै है कै आपां घर-घराणै रा मिनख हा। सवारै त्यार रैईजै।

नारायण : मां, थूं यूं कीकर कर सकै है। म्हारै छोरी होई है तो इणमें रमिया रो तो कोई कसूर नीं है। छोरा-छोरी रै जलम रै वास्तै बाप ई जिम्मेवार होवै। म्हैं जाणूं हूं। तूं भलाई डाक्टर साब नैं जाय 'र पूछलै।

मां : वा-वा, चुप हो जा। म्हनैं ग्यान मती दै। चार किताब भणली तो तूं मां नैं सिखावण चाल्यो है। तूं कित्ता ई हाथ-पग पटकलै। आवती सुधनम रो थारो ब्यांव पक्को है, गीता रै सागै। इब रमिया इण घर री थळकण पाछी नीं चढ सकै। तूं बीं नैं भूल ई जा इब।

(मां त्यारियां में लागगी ब्यांव री। बठीनै नारायण भी मन में धारली ही, कै ना दूजो ब्यांव करूंला अर ना रमिया रो साथ छोड़ूंला। सुधनम रै दिन ई बीं री छोरी इक्कीस दिनां री होवण वाळी ही।)

(आज सुधनम है, चार दिनां सूं मां सगळी रीतां-भांतां में लाग्योड़ी ही। आज तो मां रै पगां नीचली जर्मीं खिसकण आळी है।)

मां : अरे नारायण! कठै है, मोड़ो हो रैयो है। बेगो आव! सुण रे भरतिया (नारायण रो छोटी भाई), भाई कठै है?

भरत : म्हैं तो सवारै सूं ई नीं देख्या भाईसा नैं। काई ठाह कठै है बै?

(सुण र मां रा हाथ-पग टंडा पड़ण लाग्यो। दोनूं भायां नैं मेल र पूरो गांव जोवाय लियो। नारायण रो कठैई पतो नीं लाग्यो। जान चढण री टेम टळ्गी ही। सगळ गांव में औ ईज हाको हो कै नारायण घर छोड र भाजग्यो। सिंझ्या पड़तां नारायण घर रै मांय बड़यो अर लुगाई-टाबरां नैं पितरां रै पगै पड़ा र झटपट बारै आयग्यो। रमिया सासूजी रै चरणां में इण आस सूं झुक्योड़ी ही कै मां रीसणो छोड र रोक लेवैला बांनै, पण मां रीसां बळती साम्हें ई नीं जोयो।)

नारायण : अरे रमिया, कठै रैयगी तूं? टैम्पू आळो खोटी हो रैयो है। बेगी आव। आज टेम चोखो है—म्हारा लुगाई-टाबरां री नूंवी जूण सरू करण रो।

(पेटी, थैला सब टैम्पू में मेल र नारायण जिकी बात सगळ गांवआळां रै साम्हें कैया, उणनैं सुणतां ई तो मिनख अर लुगायां सगळां रा बाका फाट्योड़ा ई रैयग्या।)

नारायण : सुण भई नेमाराम (पाड़ोसी अर नारायण रो बाळपण रो बेली), म्हैं तो अस्पताळ सूं अपरेसन करा र आयो हूं। छोटी-सो चीरो जिंदगी भर रो आराम। ऊपर सूं घरआळी नैं कोई तकलीफ नीं देखणी पड़ै। परिवार, धणी अर टाबरां री सेवा-चवाकरी में घर री लुगायां जूण पूरी कर दै अर मिनख काई करै? सरकार, डाक्टर ससगळा बतावै, रोज टीवी में देखो, पण हिम्मत नीं करो थे कोई। रैयी बात म्हारा नांव लेवाळ री, तो म्हारी छोरियां नैं भणा-लिखा र हुंसियार करूंला। आपरै नांव सूं जाणीजैला म्हारी छोरियां। म्हारी रमिया घणी हुंसियार है, पण बीं रो सगळो टेम घर अर खेत में ई पूरो व्हे जावै। इब बीं नैं आगै री पढाई पूरी करावूंला। चाल रमिया, बैठ गाडी में।





पूरुणमा मित्रा

लूठो जलमदिन

पात्र

1. नदीम
2. रसीदुल
3. मोनिका
4. जैतून
5. मंदाकिनी
6. बल्ली
7. टल्ली

(पड़दो खुलतां ई दो दस-इग्यारै साल रा टाबर मंच माथै उतावळा-सा आवता निगै आवै।)


- सुनील : अरे बाप रे! किती गरमी पड़ रैयी है। तिस्स सूं म्हारो जीव आकळ-बाकळ होय रैयो है। (लड़खड़ावतो-सो हेठो बैठ जावै।)
- नदीम : (सुनील रो बूकियो झाल 'र) अरे भई, इण तावड़ै मांय क्यूं बैठग्यो? कन्नै आळै नीमड़ै रो रूंख है। उणरी छियां मांय छिणेक सुस्ता लै।
- रसीदुल : (उतावळो-सो उणरै कन्नै जाय 'र) सुनील, लै आ संतरै री फांक चूसलै। (आपरी गोजी सूं संतरै री फांक उणनै देय 'र) मोनिका! हथाई बंद कर अर बेगी-सी अटै आव। सुनील अर म्हनै पाणी री बोतल झिला।
- नदीम : (रुमाल सूं आपरै लिलाड़ रो पसेवो पूंछ 'र) अबकाळै तो जबरदस्त गरमी पड़ रैयी है। लागै है, आभै सूं खीरा बरस रैया है। काल तो म्हारै पापा नै ऑफिस सूं आवती बगत लू लागगी।
- रसीदुल : (चिंता भरी आवाज मांय) घणकरा स्कूल अर दफ्तर अैड़ी जग्यां थिर है, जटै सड़क रै असवाड़ै-पसवाड़ै रूंखां री छियां ई कोनी। जटै देखो, बटै लीला रूंखां री जग्यां टूंट ई टूंट निगै आवै।
- मोनिका : अबै लतीफ चाचा री तबीयत कियां है? चाचीजी उणां नै डाक्टर कनै लेयग्या हुवैला।
- नदीम : अम्मी जान बांनै फौरन डाक्टर कनै लेयगी। अबै तो बै सावळसर है।

करणी नगर, नागणेचीजी रोड, बीकानेर 334003 मो. 8002038941

- मोनिका : (मंच रै प्रवेशद्वार कानी मूंडो कर'र) जैतुनिया, बेगी-सी आव। (आपरै कनली पाणी री बोटल सुनील नैं झिला'र) पैली चोखी तरियां सूं मूंडै मांयपाणी रा छांटा न्हाख अर फेरूं घूंट-घूंट पाणी पी।
- जैतून : (मटकती सी मंच माथै आय'र) अरै भाईजान देख्यो, बै दो जणा नीमडै रै रूख नैं बाढ रैया है।
- रसीदुल : (नीमडै रो रूख बाढता लोगां कानी पांवडो बधावतो) अरे, अै तो बल्ली-टल्ली है। बल्ली-टल्ली आजकाल थे स्कूल क्यूं कोनी आवो? अर ई बापडै नीमडै नैं क्यूं बाढ रैया हो?
- टल्ली : (आपरो गॉगल्स गोजी मांय घाल'र) म्हारी मरजी। म्हारै निजू मामलै मांय टांग अड़ावण री कोई जरूत कोनी।
- नदीमा : (नरमाई सूं) पण थे औ रूख क्यूं काट रैया हो? औ बापडो तो आपां नैं छियां अर निंबोळिया देवै।
- टल्ली : (इतरावतो) क्यूं औ रूख काई थूं लगायो है? फोकट मांय म्हारो भेजो मत खराब कर। म्हैं तो होळिका दहन खातर चिन्हीसीक लकड़्यां काट रैया हां।
- सुनील : औ तो अगस्त रो महीनो है। होळी तो फागण में मनाईजै।
- बल्ली : म्हारै गांव तो तीज अर दीयाळी री तरियां होळी भी दो बार मनाईजै।
- जैतून : (हंस'र) कूड़ो कठैई रो! म्हानै गैलसफा समझै है।
- मोनिका : (समझाइस देवती) कोई थारै हाथ-पगां नैं कुल्हाड़ी सूं जख्मी करै तो थानै किसीक लागसी?
- बल्ली : (आपरी जीवणी कनपटी मांय आंगळी घुमा'र) मेंटल कठैई री। रूख तो बेजान हुवै है। म्हैं तो इंसान हूं, इंसान। बेजान चीजबस्त नैं बाढणै सूं पाप कोनी लागै।
- नदीम : थूं गलत कैवै। रूख भी आवणी तरै सजीव हुवै है।
- टल्ली : फेरूं तो इण रा भी नाक-कान अर हाथ-पग होवता होवैला। पण म्हानै क्यूं कोनी दीसै! स्यात श्री डी चस्मै सूं दीसता होसी।
- मोनिका : जियां आपां नाक सूं ऑक्सीजन ड्राई ऑक्साइड लेवां हां अर कार्बन ऑक्साइड बारै काढां हां, बियां ई अै रूख ज्हेरीली कार्बन ड्राई ऑक्साइड लेय'र आक्सीजन बारै काढै।
- टल्ली : पण कठै सूं?
- सुनील : पानड़ां रै लारै नेन्हा-नेन्हा रोमछिद्रां सूं।
(इत्तै मांय गुलाबी प्लाजो सूट पैस्योड़ी अेक फूठरी सी नार, हाथ मांय गमलो लेय'र हाजर हुवै।)

- मंदाकिनी : (मधरी आवाज मांय) काई बात है टाबरां? थे इण तावडै मांय ऊभा काई कर रैया हो?
- जैतून-मोनि. : मंदाकिनी दीदी, अँ बल्ली अर टल्ली है नीं, अँ दोन्युं इण नीमडै नैं बाढ रैया हा। म्हे लोग आनैं रोक रैया हा।
- मंदाकिनी : बल्ली-टल्ली! रूखां नैं बाढणो अधरम हुवै है। अँ आपां री तरियां संवेदनशील अर सरजीव हुवै है। थानैं ठाह है, आ बात कुणसै भारतीय वैग्यानिक सै सूं पैली प्रमाणित करी ही?
- सुनील : (ऊभा होय 'र) सर जगदीशचंद्र बोस। इण सूं पैली बै बेतार रो आविष्कार कर्यो हो।
- मंदाकिनी : शाबास! अच्छ्या थानैं ठाह है, अंधाधुंध रूखां री कटाई सूं आपां नैं काई-काई नुकसाण उठावणो पडै?
- मोनिका : (गमलै मांय लाग्योडै पौधै नैं लाड सूं लावती) इणसूं ग्लोबल वार्मिंग बधै, जिणसूं ग्लेसियर गळ'र प्राकृतिक आपदावां रो रूप धारण कर लेवै।
- जैतून : नदियां अर समंद मांय जळजळो आ जावै, जिणसूं अणगिणत जान-माल रो नुकसाण हुवै है।
- टल्ली : (उबासियां लेंवतो) मैमजी, आखी दुनिया मांय लुगायां लकड़ी बाळ'र ई खाणो बणावै है।
- मंदाकिनी : जद ई तो इसी लुगायां दमै अर आंख्यां री बैमारियां री चटकै सूं सिकार बण जावै।
- मोनिका : (आपरै बस्तै सूं किताब काढ'र) इण मांय लिख्योडो है कै जळावण अर फर्नीचर बणावण वाळी लकड़ी अलग किसम री हुवै। औ नीमडो तो पर्यावरण सुद्ध करै।
- रसीदुल : नीम री छाल, निंबोळी, नीमझरे सूं दवायां बणै। इणरै साख सूं दांतण बणै।
- मंदाकिनी : (लाड सूं रसीदुल रो माथो पळूस'र) वाह, थे साचा पर्यावरण प्रेमी हो। थे तो आपरै पाठ्यक्रम री बातां रोजीना रै वैवार मांय अंगेज लीनी। थारै गळी-गवाड़ मांय कुण-कुणसा रूख लाग्योडा है?
- रसीदुल : म्हारी गळी रै कनलै सड़क पे असवाडै-पसवाडै लाग्योडा रूखां नैं ठाह नीं कुण बाढग्यो? दोनूं तरफ टूट ई टूट निगै आवै।
- टल्ली-बल्ली : (डरप सूं हकलावता) मैमजी, बाय गॉड, म्हैं तो रूखां रै टच ई कोनी कर्यो।
- मोनिका : इणनैं कैवै, चोर री दाढी में तिणकलो।
- मंदाकिनी : (रीसाणै सुर मांय) ठाह है बल्ली-टल्ली, एक पौधै नैं रूख बणवा मांय कित्ता साल लागै है? अमृता देवी खेजड़ली रा रूखां नैं बचावण सारू आपरा प्राण देय दिया हा। आ बात तो थे थारी मां के दादी सूं अवस सुणी होसी।

- बल्ली : (संकतो सो) बां दोन्यूनं नैं तो आपसरी मांय राड़ करणै सूं ई फुरसत कोनी । दादी मंचली माथै पड़्या म्हानै गाळ पाड़ता रैवै ।
- बल्ली : अर पापा दारू पीय 'र रात नै माराकूटा करै ।
- मंदाकिनी : अबै म्हारी समझ मांय आयगयो कै थे आपरी भड़ांस उण अणबोला रूंखां नैं बाढ 'र बाँरै काढो हो ।
- टल्ली : (आपरी आंख्यां सूं आंसूड़ा टळकावतो) मावड़ी नैं तो सेठां रै घरै बुहारी अर अँठोड़ा बासण मांजण सूं ई फुरसत कोनी । म्हारा सै सागड़दी म्हानै चिंघावता रैवै ।
- मंदाकिनी : जद थारो हियो परेसान हुवै तो म्हारै घर में लाग्योडै बगीचै मांय निराई गुड़ाई कर 'र आपरो आफरो काढ सको ।
- मोनिका : (ताळियां बजा 'र) वाह दीदी, आ बात आप घणी सांतरी बताई, पण आपरै हाथ में औ पौधो कियां ?
- मंदाकिनी : (गळगळी होय 'र) हर साल म्हें आपरै जलमदिन माथै किणी पोसाळ मांय गुलाब रो पौधो भेंट करूं । आज भी म्हें थारै पोसाळ मांय जा रैयी ही ।
- जैतून : म्हारी स्कूल री तो पूरी छुट्टी होयगी । आप औ गमलो म्हां मांय किणनैं भी संभळा देवो । म्हें इणनैं काल स्कूल मांय जाय 'र इणनैं प्रिंसिपल साहब नैं देय देस्यां ।
- मंदाकिनी : (जैतून रै हाथ मांय गमलो पकड़ावती) आज सूं पैली इतो व्हालो जलमदिन म्हें कदैई कोनी मनायो । चालो, इण बात पर थे सगळा टॉफी खावो । (आपरे परस सूं टॉफियां काढ 'र टाबरां नैं देवै)
(सगळा टाबर जलमदिन री मोकळी बधायां कैय 'र ताळियां बजावण्ण लागै । पड़ो गिर जावै)





डॉ. गीता सामौर

मध्यकालीन नारी रै अंतस री पीड़ रो गान 'बीसलदेव रास'

नरपति नाल्ह विरचित 'बीसलदेव रास' अेक गीति प्रबंध है जिको राजमती राणी रै प्रणय अर विजोग रो सुंदर गान कैयो जाय सकै। प्रथम दीठ सूं औ ग्रंथ बीसलदेव नायक रै नाम रै मुजब नामकरण सूं उणरी कीर्ति रो बखाण करतो लखावै, पण गंभीर अध्ययन अर गैरी दीठ सूं देख्यां औ मध्यकाल री अेक नारी रै अंतस री पीड़ रो गान है।

विश्वकवि गुरुदेव रवीन्द्रनाथ टैगोर अेक जगां कैवै, "मैं कुछ नहीं लिखता। मेरे हृदय में एक विरहणी स्त्री रहती है, वह रो देती है और मैं उसका दुख कागज में उकेर देता हूँ।" आ बात सोळा आना साच बीसलदेव रास रै कवि माथै लागू हुवै। इण ग्रंथ री नायिका राजमती राजस्थानी साहित्य री अेक अनूठी नारी रतन है, जिकी आपरै भांत री अेकली नायिका है। सगळै साहित्य मांय राजमती जैड़ो दूजो चरित निगै नीं आवै।

धार नरेश भोजराज परमार री कन्या राजमती रो ब्यांव अजमेर रै सासक बीसलदेव चौहान सूं कर दियो जावै है। ब्यांव रै उपरांत राजमती नैं लेय 'र राजा बीसलदेव अजमेर आ जावै।

अेक दिन अचाणचक राजा बीसलदेव आपरी राणी राजमती सूं गरब अर अहंकार मांय कैवै कै म्हारै समान दूसरो राजा धरती पर नीं है, क्यूकै म्हारै राज मांय सांभर सर सूं लूण निकळै है। अब यूं तो मध्ययुगीन मानसिकता रै हिसाब सूं आ कोई अनोखी अर अप्रत्याशित बात नीं है, क्यूकै राजा अर सामंतां रो चरित सदा सूं ई इस्यो ई होवतो आयो है। बांनै चाटुकारिता अर आत्मप्रशंसा ईज सुहावै। पण अठै राणी राजमती रै चरित रो अेक ऊजळो पख उभर 'र साम्हीं आवै कै बा चाटुकारिता करण वाळी, झूठी हां मांय हां मिलावण अर स्वांग री चासणी मांय लपेट 'र चापलूसी करण वाळी अर पुरुस नैं भरम मांय राखण वाळी नारी नीं है।

गरब करि बेलियउ संइभरि वाल।

मो सारिषउ नहीं अवर भूआल।।

जणां राजमती पाछो कैवै :

गरब म करि हो संइभरिवाल।

तो सारिषा अवर घणा रे भूआल।।

एक उड़ीसा कउ धणी ।

जिउं थारइ सईंभरि उग्रहइ ।

तिउं आं धरि उग्रहइ हीरा कइ षाणि ॥

राजमती साफ सबदां मांय कैवै कै राजा ! आपनैं गरब नीं करणो चाईजै । ई धरती पर आपरैं समान अनेक राजा है । अेक तो उड़ीसा रो ई राजा है, जिणरै राज मांय हीरां री खान मांय सूं ठीक बियां ई हीरा निकळै जियां आपरै राज में सांभर सूं लूण निकळै है ।

...अर अठै सूं ईज इण ग्रंथ री कथा नूंवो यूटर्न लेवै अर अठै सूं ईज सरुआत हुवै राजमती रै आगै रै दुखपूरण जीवण री कथा । मध्यकाल रै सामंती प्रवृत्ति रै राजा नैं आ बात चुभ जावै अर आपरै अहंकारवश राजा गुमान कर बैठै । बीसलदेव नैं राजमती री आ आकरी अर खरी बात लाग जावै अर बो कैवै कै राजमती म्हारी बिसराहना करी है, इण वास्तै अबै बो उणसूं कोई संबंध नीं राखैला :

चितह चमकियउ बीसलराव ।

धणकउ बचन बस्यउ मनमाहि ।

म्हे बिसराह्या गोरडी ।

राजा रो मान देख 'र राजमती नैं आपरी भूल रो औसास हुवै । बा राजा सूं घणो अनुनय-विनय करै, पण राजा माथै इणरो कीं असर नीं हुवै । राजमती स्वीकार करै कै म्हैं राजा री बिसराहना कर 'र दोस कर्यो है :

हूं विरासी राजा मइ कीयउ दोस ।

पगरी पाणही स्यउं किसउ रोस ।

कीड़ ऊपर कटकी किसी ।

म्हे हंस्या थे करि जाणियउ साच ।

ऊभीय मेल्लिह किउं चालीयउ ।

स्वामी जळह विहूणा किम जीयइ माछ ॥

अठै कवि मध्ययुग री उण मानसिकता नैं उजागर करै जिण मांय लुगाई नैं पग री जूती मानी जावती अर कीड़ी रै बराबर उपमा देईजती ही । आज रै संदर्भ में आ बात आपां नैं मामूली लाग सकै, पण मध्यकाल में नरपति नाल्ह कवि अेक राणी राजमती रै मुख सूं आ बात कैवाय 'र अणूती लूंठी बात करी है । इणनैं आपां नैं ई बात नैं जुग रै संदर्भ मांय समझण री दरकार है ।

कवि राजमती रै मूंडे सूं कैवावै :

कइ मुडइ लेइ नइ ऊलग जाइ ।

कइ रे जोगी हुइ नीसरइ ।

मध्यकाल मांय अेक राजा रै साम्हीं उणरी राणी सूं आ बात कैवावणी भोत बडी बात मानीज सकै है, पण जियां कै सामंती मनोवृत्ति मांय हुया करै है, राजा कैवै :

हूं न पतीजूं गोरी थारइ बइणि ।

राजमती रोकण रा सगळा जतन करै, पण सगळा अकारथ चल्या जावै । जणां राणी रै हियै सूं उद्गार निकळै :

छंडी हो स्वामी म्हें थारी हो आस ।
 मइला हो थारउ किसउ बेसास ।
 बांदी करि धणि नीव गिणी ।
 म्हांकी सगा सुणीजा मांहे लोपी छै भाम ।
 जीवतड़ी मूयां बडइ
 बालुं हो धणी तुम्हारऊ हाम ।

बा कैवै कै हे स्वामी ! म्हें थारी आसा छोड दी। थूं मलिन हियै रो है, थारो किस्यो विस्वास ! अटै बडी बात आ है कै कवि नरपति नाल्ह नारी (राजमती राणी) रो हियो पढ लियो है अर आ ईज बात उणरी रचना नैं काळजयी बणावै। राजमती री पीड़ अटै सगळी नारी जाति री पीड़ बण जावै।

आज खुद स्त्रियां भी आपरै हियै री पीड़ नैं उजागर करणी चावै तो घणी संभावना है कै बै भी इण कवि रै उपमानां नैं दोहरावै।

उण सामंती जुग मांय बीसलदेव नैं अँड़ी चुभती उपमा देवण वाळो भलां नरपति नाल्ह रै अलावा कुण साहस कर सकै हो :

म्हांकउ मूरख राव न जाणइ सार ।
 राउ नहीं सखी भइंस पीडार ।

अंतपंत बीसलेदव राणी राजमती नैं छोड 'र प्रवास माथै निकळ जावै। तद सखी-सहेल्यां राजमती नैं समझावै :

सात सहेलीय बइठी छइ आय ।
 भोली तोथी भलीय दवयंती हे नारि ।
 सो नल राजा मेल्हि गयउ ।
 पुरुष समउं निगुणी नहीय संसारि ।

कवि कैवै कै पुरुस रै समान निगुणी इण संसार मांय दूजो कोई नीं है। आ बात अेक कवि मध्यजुग मांय कैवे, आ भोत साहस री बात है।

राजमती री पीड़ नैं उघाड़ 'र सब रै साम्हीं उजागर करती वेळ मानो कवि आपरो काळजो खोल 'र साम्हीं राख दियो है :


अस्त्रीय जनम काइं दीधउ महेस ।
 अवर जनम थारइ घणा रे नरेंस ।
 राणी न सिरजीय रोझडी
 धणह न सिरजीय धवळीय गाय ।
 बनखंड काळी कोइली ।
 हउं बहसती अंबा नइ चंपा की डाळ ।
 भखती द्राष बीजोरडी ।
 इण दुख झूरइ अबला जी बाळ ।।

राजमती कैवे कै हे महेस ! लुगाई री जूण थूं म्हनें क्यूं दी ? हे नरेस ! थारै कनै और बहुतेरा जलम हा । फेर भी थूं म्हनें जंगळ री रोझड़ी (नीलगाय) क्यूं नीं बणायी ? नारी नीं बणाय 'र सांघणै जंगळ री धोळी गाय क्यूं नीं बणायी ? अर बनखंड री काळी कोयल क्यूं नीं बणायी ?

इण भांत बा अबला नार आपरै दुखां मांय झुर रैयी है । इण भांत लुगाई चायै बडै राजा री राणी हुवो अर भलाई साधारण नार, सब रा दुख अेक जैड़ा ईज लखावै । लुगाई नीं बणाय 'र बा विधाता सूं रोझड़ी, बनखंड री काळी कोयल अर धोळी गाय तक बणाबा री अरदास करै ।

सदी कोई सी ई होवै, जुग कोई सो भी होवै, लुगाई री पीड़ रो कोई पार नीं, लुगाई जात री पीड़ अणंत है । बीं रै हिस्सै वेदना, अणंत पीड़ अर आंसू ई आया है, जिणां रो आज भी कटैई अंत नीं है । काई मध्यजुग री राजमती री आ पीड़ आज री लुगायां नैं आपरी पीड़-सी नीं लागै ? इण भांत राजमती सगळी लुगाई जात रो प्रतीक बण जावै ।

धित्र है कवि नरपति नाल्ह ! धित्र राजमती राणी !!





दमयन्ती कछवाहा

संत नागरीदास अर विष्णुप्रिया (बणीठणी)

आज किशनगढ रै राजम्हैलां में घणै ई आणंद, उमाव अर उच्छब रो दिन है। आज वांरा पाटवी कंवर युवराज सांवतसिंह, बूंदी रै जैतसिंह हाड़ा नैं हरायनै रणभोम सूं जुद्ध जीतनै पधार रैया है। उण जैतसिंह जोधार सूं जीत हासिल जिको कै टणको वीर बाजतो हो। युवराज सांवतसिंहजी री उमर फगत तेरह बरसां री ही, इण वास्तै आ जीत औरूं अंजस अर गुमेजजोग ही।

किशनगढ राजदरबार में भी सगळी त्यारियां बगतसर संपन्न हो चुकी ही। राज रा सगळ ताजीमी सरदार अपणी-अपणी जोड़ायतां अर राजपरिवार रै साथै वारै वास्तै मुकरर ठौड़ माथै बिराजमान होयग्या हा। दरबार रै मुख्यद्वार माथै मंगळ बाजा बाज रैया हा। रणिवास रै खास दरवाजै माथै शहनाईवादक सुरीली रागनी उगेर रैया हा।

किशनगढ रा महाराणीसा चतुर कुंवरी आपरी खास दासी विष्णुप्रिया नैं उडीक रैया हा, सो कैवण लागया कै विष्णुप्रिया थारो सिणगार हाल तक पूरो नीं हुयो काई ? इणी बीच कुंवराणीजी री दासी आयनै महाराणीसा री जुहार करनै कैयो, “महाराणीसा री जै होवै। हुकम, कंवराणीसा आपरै चरणारविंदां में धोक देवण नै पधार रैया है, आपरी आग्या चावै।”

महाराणी चतुर कुंवरीजी, “आ तो घणी खुसखबरी सुणाई। मानगढ रै कछवाहा राजा यशवंतसिंहजी री राजकंवरी अर म्हारै लाडलै सांवत रा जोड़ायत म्हारी कुळवधू कुंवराणीसा दरबार में पधार रैया है, तो वारो घणै मान स्वागत है। वारो ओपतो आदर-सत्कार करणो है। खास दरवाजै सूं लेयनै दरबार महल तक वारै मारग में फूल बिछावो अर पूरे रास्तै वारै माथै फूल अर अंतर री बिरखा करावो।”

दासी बोली, “जो हुकम महाराणीसा।”

इतै में संगीत रै मंगळ वाद्यां रै साथै युवराज सांवतसिंहजी रै जयकारै री आवाज नजदीक आवती सुणीजण लागगी। दरबार हॉल पूगनै सांवतसिंह सबसूं पैली आपरै पिताश्री महाराजा राजसिंहजी अर कुळगुरु रै धोक दियां पछै ताजीमी सरदारां री बधाई अर मुजरो अंगीकार कर्यो। दरबार महल री सारी कारवाई पूरी होयां पछै युवराज सांवतसिंहजी रणिवास सारू ब्हीर हो जावै।

महाराजा पिताजी अर राजदरबार रै सभासदां सूं भेंट करीज्यां पछै अबै कंवरजी आपरी माता किशनगढ री महाराणीसा नैं धोक देवण सारू उतावळा हा।

61, पोलो प्रथम (पावटा) जोधपुर 342006 मो. 9414034510

सोळै फूठरी डावड़ियां मंगळ कळस ऊंचायां सै सू पैली पाटवी कंवर सांवतसिंहजी रो स्वागत कर्यो। कंवरजी रा कारिंदा बां सगळ कळसां में अेक-अेक मोहर अर रोकड़ रुपियां रो नेग बख्सीस कर्यो। मंगळ वाद्यां शंख अर कंवरजी रै जयकारां री आवाज महाराणीसा रै कानां में इमरत री बिरखा करै ही।

सांवतसिंह कैयो, “महाराणी मां रै चरणारविंदां में आपरो सेवक सांवतसिंह घणै मान सू धोक देवै हुकम।”

महाराणीसा आसीस्यो, “जुग-जुग जीओ म्हारा लाल, भगवान नृत्यगोपाल सदैव थांरी रक्षा करै। राठौड़ां रो कुळ गौरव में बधोतरी करण री दिन दूणी रात चौगणी शक्ति प्रभु प्रदान करै। इण आसण माथै बिराजो।” कैयनै महाराणीसा उठै मौजूद दासियां नैं बधाई गावण रो हुकम देवै।

बाजै बधाई ब्रज में नंद घरनि सुत जायो।

गोपी गीत मनोहर गावत भावत तान तरंगनि छायो।।

कोतुक मोहे देखि देवगन देवलोक बिसरायो।

नागरिदास उछाह छके अति आनंद उर न समायो।।

दासी आयनै कैयो, “राजनरतकियां री प्रधान विष्णुप्रियाजी महाराणीसा सू दरबार में हाजर होवण री आग्या चावै हुकम।”

महाराणीसा फरमायो, “आग्या है, उणनैं फौरन हाजर करो।”

विष्णुप्रिया आवतां ई बोली, “खम्मा घणी महाराणीसा, कंवरजी री जै होवैला। विष्णुप्रिया री बधाई मंजूर करावो हुकम।”

महाराणीसा कैयो, “विष्णुप्रिया आज म्हारै पाटवी कुंवर नैं अपणै नाच अर गाणै री आपरी कला दिखावै।”

विष्णुप्रिया बोली, “जो हुकम महाराणीसा।”(आपरै मन में सोचै) कंवर सांवतसिंहजी नैं तो पैली बार अँडै रूपाळै वीर-धीर नैं सैमूडै देख रैयी हूं। म्हनैं तो यांरी सूरत म्हारै सांवरै सलौनै जैड़ी लाग रैयी हयै। जित्तै उणरी जोड़ीदार सखियां साज माथै स्वर छेड़ दिया। बा अेकदम जाणै सुपनै सू जागी। बा नाच रै साथै गावण लागी :

बनी बिहारिनी रस सनी निकट बिहारीलाल।

मान कियो इन दृगन ते—अनुपम रूप रसाल।।

रतनारी है थांकी आंखड़ियां।

प्रेम की छकी, इस बस अलसानी जाणि कंवल की पांखड़ियां।

सुंदर रूप लुभाई गति-मति, हाई गई ज्यों मधु माखड़ियां।

रसिक बिहारी वारी-प्यारी कवन बसी निस कांखड़ियां।।

गीत सुणनै कुंवरजी पूछ्यो, “आ कुण है महाराणी मां। पैली तो इणनैं म्हैं कदैई नीं देखी अठै।”

महाराणीसा बतायो, “आ तो थोड़ा दिनां पैली ई म्हारै पीहर कामां सू आयी है। म्हारा भोजाईसा म्हारै जलमदिन माथै म्हनैं जीवती-जागती भेंट भेजी है। बां फरमायो कै आ विष्णुप्रिया

नृत्य अर संगीत री ग्याता है अर केई भासावां जाणै। आ बणाव-सिणगार में घणी रुचि राखै, इण वास्तै सगळा बणी-ठणी कैवै।”

कंवरजी कैयो, “जणै तो अचरज रो भंडार है। गावै भी बहुत सुरीलो अर इणरो नृत्य भी मन नैं मोवण वाळो है।”

महाराणीसा बोल्या, “इणनैं भी म्हें वृंदावन रै रसिक बिहारी मिंदर रा महंत रसिक देव सूं वैष्णव धरम री दीक्षा दिराय दी हूं। आ काव्य रचना अर पद रचना भी घणी आछी करै।”

कंवरजी कैयो, “हां सा, म्हें इण बात रो अंदाजो इणरी अबार गायोड़ी रचना सूं होयो। आ रसिकबिहारी रै नांव सूं लिखै।”

महाराणीसा बोल्या, “हां बेटा, कदैई आ बणीठणी तो कदैई रसिकबिहारी नांव सूं पद-रचना करै।”

कंवरजी कैयो, “ज्यूं कै म्हें नागरीदास रै नांव सूं पद-रचना करया करूं।

महाराणीसा बतायो, “भगवान नृत्यगोपा री तो आ इती भक्ति करै कै अपणै आपनैं राधा रो अवतार ई समझै।”

कंवर आपरै म्हैल में बैठा। केनवास माथै अेक चितराम उकेर रैया हा। साथै ई कीं ओळ्यां गुणगुणा रैया हा :

छवि को रेखाओं से बांधूँ,
छल छलात यौवन को सागर,
चन्द्रज्योत्सना तन धरि आई।
अलक ललक घूमत कपोल,
मुसकान अधर मख शिखा सुधराई।।
नयन कंटीले लाज भरे से
नागर कैसे साधूँ।
छवि को रेखाओं से बांधूँ।

किण बिध बणाऊं म्हें इण मनमोवणी सुंदरी रो चितराम। औ म्हें कांई देख रैयो हूं। कांई म्हारो अधूरो चितराम सजीव होयगयो है, कै म्हें कोई सुपनो आयो है।

बणीठणी री बोली सुणीजी, “कंवरजी री जै होवै सा। म्हें महाराणीजी री आग्या आपरी सेवा में हाजर होयी हूं। आपरा महाराणी मां म्हें आपनैं, आपरै जलमदिन रै मौकै उपहार रै रूप में भेंट दीनी है। जैतसिंह सूं जुद्ध करती बगत गैरा घाव आपरै सरिर माथै होयग्या है। म्हें पट्टियां खोलनैं घावां नैं साफ कर दूं। राजवैद्यजी पधारण वाळा ई है।”

कंवरजी कैयो, “बणीठणी, थारै सरूप में तो म्हें अपनी आराध्या राधा नागरी री छिब देख रैयो हूं। म्हें थारै हाथ भी नीं लगा सकूं, तो सेवा रो तो सवाल ई कटै उठै? थे तो म्हारै कनै बैठ जावो, इणसूं म्हारै हिवडै में थावस आय जासी।”

बणीठणी बोली, “तो फेरूं आपरो प्रेम संसार वास्तै आदर्श बण जावै जिणसूं कंवरानीजी री ईष्या रो कारण भी नीं बणै।”

कंवरजी कैयो, “बणीठणी, थां तो जिंदगाणी रै वास्तै इमरत हो, मदिरा नीं।”

बणीठणी बोली, “अबै म्हारी पचासवीं बरसगांठ आवण वाळी है।”

कुंवरजी कैयो, “म्हारी तेरहवीं बरसगांठ रै दिन आपां दोनां री जाण-पिछाण हुयी है। उणरै पछै अबै सैंतीस बरस बीतग्या। थारै रूप में छिनभर भी फरक नीं पड़्यो। थे आज भी वैड़ा ईज रूपाळा हो जैड़ा सैंतीस बरस पैली हा।”

बणीठणी कैयो, “आ कोई कमती अचरज री बातनीं है कै इतै बरसां तक लगातार साथै रैवता थकां भी आप म्हारी देह रो स्पर्श तक नीं कर्यो।”

कुंवरजी बोल्या, “आप तो म्हारी आराध्या रो सरूप हो। म्हैं आपरै बाबत अँड़ा विचार सोच भी नीं सकूं।”

अेकर सांवतसिंहजी दिल्ली आपरै परिवार समेह पधार्योड़ा हा। वारां सुपुत्र सरदारसिंहजी भी कोई मुहिम माथै गयोड़ा हा। उण दौरान महाराजा राजसिंहजी रो सुरगवास होयग्यो, तो सांवतसिंहजी रा छोटा भाई बहादुरसिंहजी उण बगत रा जोधपुर नरेश री मदद सूं किशनगढ रा राजा बणग्या। इणरै पछै सरदारसिंहजी आया तो बहादुरसिंहजी आपरै भतीजै नैं किशनगढ रै मांयनै भी नीं बड़ण देवै। समाचार पायनै सांवतसिंहजी भी दिल्ली सूं आयग्या। बहादुरसिंहजी आपरे बडे भाई नैं भी किशनगढ री सींव में घुसण नीं दिया।

दिल्ली री बादसाहत तो बां दिनां कमजोर ही, इण वास्तै सांवतसिंहजी मराठा सूं मदद लेयनै किशनगढ माथै धावो बोल दियो। घणो ई मिनखां रो घाणियो होयो, जिणनैं देखनै सांवतसिंहजी नैं राजकाज सूं विरक्ति होयगी। किशनगढ रा दो हिस्सा होयग्या। सरवाड़, फतहगढ अर रूपनगर रा परगना माथै सांवतसिंहजी अश्विन सुदी दशमी संवत 1814 रै दिन आपरै पुत्र सरदारसिंहजी रो राजतिलक करनै आपन वृंदावन रो वास कर लियो।

यूं सांवतसिंहजी घणा शूरवीर हा। दस बरस री अवस्था में अेक मतवाळै हाथी माथै कटार रै अेक ई वार सूं विचलित करदे। तेरह बरस री उमर में रण में बूंदी रै जैतसिंह नैं मार दै। अठारह बरस री अवस्था में थूण री गढी जैड़े दुरगम गढ नैं जीतनै आपरी वीरता रो परचम फहरा दियो। सांवतसिंहजी दो आंगळ चौड़ी बाढवाळी नूंवै ढाळै री तलवार रो आविष्कार कर्यो जिको सांवतसाही बाढ रै नांव सूं जाणीजै।

आपरै सुपुत्र सरदारसिंहजी रो राजतिलक कर्यां पछै आप वृंदावन बसग्या अर कृष्ण भक्ति में लीन होयग्या। आप नागरीदास रै उपनाम सूं पद-रचना पैली सूं ई करता हा। यांरा रचिया पद थारै वृंदावन वास सूं पैली ई जनता में चावा हा, इण वास्तै वृंदावन में लोग थारो घणो आव आदर करता।

अेकर नागरीदासजी किशनगढ रै गेलै हा। बांनै जयपुर में पड़ाव करणो पड़्यो, जणै महाराजा सवाई माधोसिंहजी नैं इण बात री जाणकारी मिली तो बै नागरीदासजी सूं मिलण खातर वारै डेरै पधारिया। बातचीत करता थकां महाराजा साब बां सूं केई सवाल कर्या जिणरो जबाब नागरीदासजी अेक सवैयै में देयनै तत्काल जयपुर सूं रवाना होयग्या। हाजर है वो सवैयो :

जाति के हँ हम तो बनवासी, जू ना रही ओरहूँ जात की बाधा।

देस हँ घोष नै चाहत मोख को, तीरथ श्रीजमुना सुख साधां।

संतन को सतसंग आजीविका, कुंज विहार अहार अगाधा।

नागर के कुलदेव गोवर्धन मोहन मंत्र अरु इष्ट है राधा।।

किशनगढ मांय संवत 1755-1757 रै बिचाळै बणीठणी रो चितराम बणनै पूरो हुयो। अेक बार सांवतसिंह बणीठणी नैं राणियां रा गैणां अर पोशाक पेरायनै चितराम बणायो तो चितराम सांगोपांग हूबहू वैडो नैं बणयो जैडो बणणो चाईजतो। पछै आपरै दरबारी चितरामकार नैं बुलायो। दोनूं मिलनै जिकी कसर रैयगी उणनैं पूरी करी तो सांगोपांग हूबहू बणीठणी रै रूप रो चितराम बणगयो। इण चितराम रो आकार 48×36.6 से.मी. बतावै।

लोग यां दोनां रो खूब लाड-चाव करता। विष्णुप्रिया, बणीठणी, लवलीज, उत्सवप्रिया, कलावंती, नागररमणी, कीर्तिनिन, राजस्थान री राधा रै नांव सूं बणीठणी रो बिड़दाव करता तो सांवतसिंहजी भी चितवन, चितेरे, अनुरागी अर नागरीदास रै नांव सूं भी जाणीजता।

नागरीदासजी नैं संगीत, चितरामकारी, काव्यकला आद ललित कलावां रो आछो ग्यान हो। सबसूं सिरै राधानागरी रा भक्त हा। अै कवियां रा आश्रय दाता हा। केई कवि तो वृंदावन में किशनगढ हवेली में ईज वास करता :

धन-धन वृंदावन जो आवै।

सुंदर करत प्रीति संतन सौं नित प्रति न्योत जिमावै।

मन क्रम सौं सेवत साधन चरननि लागि लपटावै।

नागरीदास भाग तिनको कोऊ कहां लागि बरन सुनावै।।

नागरीदासजी रा गुरु वल्लभ संपद्राय रा गोस्वामी रणछोड़दासजी हा। आप छोटा-बडा 78 ग्रंथ रचिया जिका तीन खंडां में है—वैराग्य सागर, श्रृंगार सागर अर पद सागर।

नागरीदास री प्रेरणास्रोत प्रेमिका बणीठणी जिकी स्वयं अेक गायिका अर कवयित्री ही। आनै पूरै संसार में जगचावो करण रो श्रेय अलीगढ विश्वविद्यालय अर लाहोर कॉलेज रा प्रोफेसर एरिक डिकिन्सन नैं जावै। सन् 1943 में जद प्रोफेसर मेयो कॉलेज रो मुआयनो कर्त्यां पछै किशनगढ राजघराणै री कलाकृतियां देखी—पुरुषाकृति लंबो छरहरो बदन, उन्नत ललाट, लंबी नाक, पतळा होठ, सुंदर नैण। नारी रो गौर वर्ण, काजळ सूं अंजिया विशान नयन, चौडो ललाट, तीखी सुंदर नासिका अर सुराहीदार गर्दन नैं देखनै मंतरमुग्ध होयग्या। प्रोफेसर डिकिन्सन आपरै भ्रमण रै पछै किशनगढ शैली माथै अेक किताब लिखी। इण तरै बणीठणी (विष्णुप्रिया) री ओळखाण पूरै जगत में फैलगी। बणीठणी रै चितराम माथै सन् 1973 में भारत सरकार अेक डाक-टिगट जारी करनै देसभर में नूवी पीढी नैं बणीठणी री जाणकारी करायी।

नागरीदासजी रो सुरगवास संवत् 1821 में वृंदावन में किशनगढ राज्य री कुंज में होयो, जिको कै आज भी नागरकुंज रै नांव सूं जाणीजै। उठै यांरी छतरी अर चरणचिह्न बणयोड़ा है, जिणरी पूजा होया करै। समाधि माथै लेख खुदयोड़ो है :

श्री राधाकृष्ण गोवर्धन धारी।

वृंदावन युमुना तट चारी।

ललितादिक बल्भ बिठलेस।

मोहन करो कृपा आदेस।

सुत को दै युवराज आप वृंदावन आये।

रूपनगर पति भक्ति वृंद बहु लाड़ लड़ाये।

सूरबीर गंभीर रसिक रिझवार अमानी ।
 संत चरनामृत नेम उदधि लौं गावैं बानी ।
 नागरीदास विदित सो कृपा ढार नागर ढरिय ।
 सांवतसिंह नृप कलि विषै सत त्रैता विध आचरिय ॥

बणीठणी रो जन्म नाम विष्णुप्रिया हो । औ कविता में आपरो नांव रसिकबिहारी लिखता ।
 विष्णुप्रिया भगवान कृष्ण री बचपन सूं ई भक्त ही । जणै नागरीदासजी रो सुरगवास होयो जणै औ
 वारै कनै मौजूद हा । नागरीदासजी रै सुरग सिधास्यां रै अेक बरस पछै संवत् 1822 री आषाढी
 पूर्णिमा रै दिन यांरो भी देवलोक गमन होयगयो । नागरीदासजी री छतरी रै कनै यांरी भी छतरी
 बण्योड़ी है, जिणरै माथै औ लेख खुदयोड़ो है :

श्री बिहारिन बिहारि जो, ललितादिक हरिदास ।
 नरहर रसिकनि कृपा, दियो वृन्दावन वास ॥
 श्री रसिकदास गुरु की कृपा, लहमा भर सत्संग ।
 विष्णुहि वृन्दावन मिल्यौ, भक्त बिहार अनंग ॥
 रसिक बिहारी सामरो, ब्रजनगर सुर काज ।
 इन पद पंकज मधुकरी,विष्णु समाज ॥





डॉ. प्रकाश अमरावत

राजस्थानी कहाणी अर महिला रचनाकार

मायड हेज जैडी मीठी, हिचै हिंवळास, आवै अंतस में अपणास, गीरबा सूं गमकै, माण में मटोठ, मनवार में मूंघम अर साहित्य में सिमरथ। कठै लग बात करां इण राजस्थानी भासा री, जिणरै आखर-आखर में अपणायत अर जस री जोत जगै। इत्ता सिमरथ साहित्य में अमोली रचनावां अर अणगिण विधावां है। बगत रा पाना पलटां तो हरेक जुग, बरस, मास अर घड़ियां में बदळाव निजर आवै। साहित्य में नूवी विधावां जलम लेवै—गुडाळियां, थड़ी, पगै चालती दौड़ण लागै। होड में आगै बधण लागै अर रेस में जीतण री खैचळ करती जीत ई जावै।

राजस्थानी में ई साहित्य लेखन में महिलावां री लूठी परंपरा रैयी है। गद्य अर पद्य री सगळी विधावां में महिला रचनाकार दखल राखै। कवितावां अर कहाणियां में तो झाल भरी महिलावां लाध जावैला। कहाणी गद्य री सबसू चावी अर सरल विधा मानीजै। आज तो कहाणी पढतां ई लेखिका रो नांव टाह पड़ जावै, लिख्योड़ो साहित्य या कहाणी साम्हें हुवै। आ 'फलाणी' लेखिका री कहाणी है। पण टाबरपणै में आपां नानी, दादी, मासी, भूआ सूं बातां सुणता आया हां। आपां री पैलड़ी पीढी रा लोग ई सुणी होवैला। बै बातां कठै सूं आयी ? कुण कथी ? काई इणां री रचना करण वाळी ई कोई नानी, दादी रै रूप में महिला ईज तो नीं ही ? अै बातां कहाणी रो जूनो या आदू रूप कोनी काई ? काई बातां सूं ई कहाणी रो जलम होयो ? अैड़ा केई सवाल म्हारे मन-मगज मांय उठ्या। आज जद राजस्थानी कहाणीकारां री बात करां, कहाणियां रै विसयां री बात जठै ताई करां, रचना संसार री बात करां तो अैड़ो कोई विसय कोनी जिको आंरी लेखनी सूं अदीठो रैय आखरां नीं ढळ्यो या कोरो रैयो।

कहाणीकारां में म्है सबसू पैली नांव राणी लक्ष्मीकुमारी चूंडावत रो लेवूला। बांरी घणकरी कहाणियां में लोकजीवण री झांकी अर जूनी बात परंपरा री सौरम है। सामंती परिवारां रा पात्र, रजवाड़ी रीत-पांत, आचार-विचार साथे लुगाई रै ओळै-दोळै फिरता चित्राम, नारी री वीरता, उछाव, धीरज, सतीत्व, वचन पाळण, कर्तव्य पाळण रै साथै नारी रै मन रा कंवळा भावां रो बेजोड़ वरणाव है। वरणन री इधकाई, ओपमावां, कैवण रै आंटे साथै भासा रा सबदां नैं परोटण री खामचाई आपनैं सिरमौड़ लेखिका रै ठेट आभै लग ऊंचै आसण माथै बैठावै। राणीजी महिलावां वास्तै सीख रा साखीधर रैया।

मकान नं. 37, पोलो द्वितीय, जोधपुर (राज.) मो. 8118818039

इण परंपरा नैं आगै बधावण में जिकै कहाणीकारां रा नांव आवै बै इण भांत है :

तारा लक्ष्मण गहलोत, पुष्पलता कश्यप, आनंदकौर व्यास, चांदकौर जोशी, सुखदा कच्छवाह, माधुरी मधु, जेबा रसीद, कमला कमलेश, कुसुम मेघवाल, प्रकाश अमरावत, विमला भंडारी, सावित्री चौधरी, बसंती पंवार अर पछै मंजू सारस्वत, संतोष परिहार, ऊषाकिरण जैन, चम्पा देवी। इणीज भांत नदी रा वेग ज्यूं आगै बधतजी कहाणी परंपरा में किरण राजपुरोहित 'नितिला', संतोष चौधरी, शकुंतला पालीवाल, कीर्ति शर्मा, अनुश्री राठौड़ रा नांव गिणावण जोग। कहाणीकारां रा नांव तो बात नैं आगै बधावण वास्तै लिख्या है, किण रो नांव छूट जावै तो आमनो करण री बात कोनी, क्यूकै औ अंदाजो है अर इणसूं म्हारी बात कैवण रो आधार बणैला। इणसूं पैली अर पछै ई केई महिला कहाणीकारां रा नांव छूटण री संका है, आ अछेह परंपरा टूटणी नैं चाईजै। इणनैं तो ठेट आभै रै उण पार ताई ले जावण री खेचळ करण वास्तै ई बगत-बगत माथै साहित्य रा हेताळू, साहित्यरा साधक जण अेक बीड़ो उठावै कै काम में नूंवी बात काई आयी है? कठैई जात्रा में ठैराव तो नैं आयो है। काई महिला चिंतक सावचेत है? बदळता परिवेस, बदळती सभ्यता अर सगळो हवा-पाणी रो बदळाव उण साथै बदळती चिंतन री साख भरती अै कहाणियां। बरसां पैली साहित्य अकादेमी, नई दिल्ली सूं खैचळ सरू व्ही। शारदा कृष्ण जी बीड़ो उठायो अर बीसवैं सईकै रो राजस्थानी महिला लेखन री कूंत 'आंगणै सूं आभो' में करीजी। बरसां पैली राजस्थानी भाषा, साहित्य एवं संस्कृति अकादमी, बीकानेर सूं जागती जोग रो अेक महिला रचनाकार विशेषांक निकळ्यो हो। केई बीजी साहित्यिक पत्रिकावां भी इण तैरै रा महिला रचनाकारां रा विशेषांक निकाळ्या अर घणो अंजस कै 'राजस्थली' जैड़ी चावी तिमाही पत्रिका पाछो औ बीड़ो उठायो है, जिणमें महिला सिरजणकारां री गिणती देख 'र ई जीव सोरो होवै। घणो आंझो काम है, अेक सूं अेक जोड़ इग्यारा अर यूं सौ-सवासौ सूं ऊपर ताई गैरी लांबी गिणत बधावणी, पण राजस्थली रा संपादक री मैणत अर लगन सूं औ झीणो काम साहित्य समाज में दीपैला।

खैर, कहाणी-लेखन री बात करां तो विसय-वस्तु री दीठ सूं पैलड़ी घणकरी कहाणियां में लुगाई जीवाजून री खैचळ है, जिणमें टाबरपणै में ब्यांव होवणो, भणाई-लिखाई में अबखायां या अणपढ जीवण री जूझ, रूढियां-परदा, नौकरी नैं करकणी, बारै आवण-जावण, बोल-बतळावण रो बरजणो, विधवावां साथै होवण वाळा भूंडा सलूक, हीण भावना, जिणमें बांनै घरां में ई रैवण रो आदेस होवतो। बारै पैरवास, रैण-सैण सब माथै समाज री दाखल रैवती। लुगायां माथै खास कर 'र विधवावां घर रा मिनख रूपी जिनावरां रै शोषण री शिकार होवती, पण लाज री मारी अबोली ई जूण काटती। आं कुरीतां रो कूंडो लुगायां रै माथै ई खाली क्यूं करीजै? अेक महिला रचनाकार अै बातां लिखै तो समाज नैं चेतावण वास्तै कै लुगाई भी समाज री जमी है। इणनैं नैं पोखो, इणरो सम्मान नैं करोला तो समाज आगै कीकर बधैला? लुगाई री जूण दोरी अर अबखी। भूंड रो ठीकरो उणरै माथै, तो घर-परिवार री चाकरी करण री जिम्मेदारी रो भार ई उण ऊपर। जीवण आदर्सां री पूतळी बणाय 'र घड़ी उणनैं बैमाता। फगत मिनखां री भूखी वासनावां नैं तिरपत करण खातर नैं घड़ी उणनै। उणमें ठैरै ऊंडी धीरज कळा अर निसरै अर चूंवै तो फगत

इमरत री धार, जिकी हरेक जीव आपरी मां रै हांचळ सूं पी है। उणरै हियै री पीड़, नीति, धरम, मरजादा, सेवाभाव, समाज रा काण-कायदा, जीवणमूल्यां री घणी-घणी बातां आं कहाणियां रा विसय रैया है। इण आलेख सारू पैलड़ी कहाणियां नैं छोड र अेक बगत विसेस, जिणमें लारला पांचेक बरसां में लिखीजी कहाणियां रा कीं दाखला आपनैं देवूं, जिणसूं कहाणी परंपरा में आया बदळाव री कूंत सोरी होय जावैला।

घणी दीठ पसार र बात करां तो संदर्भा सूं आ कूंत सबळी होय सकैला। पैलड़ी कहाणियां में ई कोई विसय छूटियो तो है ई कोनी। अेक कहाणीकार री कहाणियां में ई विसयां री बोहळाई लाध जावै तो झाल भरी कहाणीकारां री लेखनी तो पूरा समाज रै ओळी-दोळी जिकी घटनावां, मिनखां रा वैवार, समाज री दसा अर अबखायां रो आवखो वरणाव आं कहाणियां में होया है।

2015 में आयो किरण राजपुरोहित 'नितिला' रो कहाणी-संग्रै 'कांठळ' कळायण बण र बरस्यो है। लुगाई री अमूझती जूण नैं हरी करण, तो कदैई साथण रै मिस 'विधवा' रो दुख पूछ्यो ई नीं, काळजै बंधिया होड़ा नैं मिटावण रा जतन करती दीसै। लुगाई, लुगाई रो दुख-दरद अर पीड़ नीं जाणै तो हियो पासण जैडो। पण किरणजी री कहाणियां में लुगाई रै जीवण री जूझ में ऊंडी धीरज कला ई है। 'छेकड़ली अरज' री कथा नायिका सोनी 'जलम दुखी सो जरा दुखी' ज्यूं जागीरदारां री हेठवाळ रैया र बाप रा परिवार नैं पोखै। बेटियां नैं ब्यांव रै ओळावै ई बेचण री कुरीत रो खुलासो करती लेखिका सोनी नैं हरेक रूप में कमाऊपूत री संग्या दी। औ समाज माथै आकरो व्यंग्य, डोढा बोल है। आपरी कथ्य सैली इधकी है। 'कदास आ जी भर रोय लेवै' कहाणी में भावी सुखी है। बधतै जीवण री ताकत है, मजबूताई है, तो टूटोडो ताळो ई मुछाळो पौरादार है। ताळो अठै अपूरण रैयागी मनस्यावां रो प्रतीक ई है। काळै अतीत अर सोनी रै बेरंग भविष्य, दोनां में कीं फरक कोनी, पण कैवण में फरक है जिको सरावणजोग। अेक सवाल और, कै लुगाई रै टाबर नीं होवै तो कांई उणरी बा अेकली दोसी है? हेत, अपणास अर प्रीत तो फगत अेक सागै ई करीजै, पछै तो संतान जामण वाळी मसीन ई होवै। 'राजीपो' में धणी-लुगाई रो संबंध विस्वास री जड़ां सूं हरियल होवे। लुगाई कमावण वाळी तो होवै, पण धणी रो मनचायो पैरणो, रैवणो, बा खुद री मरजी सूं तो आज ई नीं चालै। धणी भलाई उणरी निजरां साम्हीं दूजी लुगाई कै छोरियां नैं गळै लगाय लै, पण खुद री लुगाई वास्तै बो बिना कीं देख्यां अणदीठा आरोप लगावण में पाछ नीं राखै, पण कहाणी अैडो मोड़ लेंवती दीसै जठै आ कहावत सिद्ध होवै कै 'मूंगां रो कांई पीसणो अर धणी-लुगाई रो कांई रीसणो!' जय अर हर्षा रो राजीपो होय जावै। बो लुगाई नैं मापणै रो प्रतीक है। अै कहाणियां कैवे कै समाज बदळै है। लुगाई-जूण रै वास्तै सोच री आ 'कांठळ' धुप र समाज नैं सैंचन्नण करैला, अैडो विस्वास है।

2017 में बसंती पंवार रो कहाणी-संग्रै 'नूवो सूरज', जेबा रसीद रो कहाणी-संग्रै 'कदै तांई' अर कीर्ति शर्मा रो 'हेत रो उजास' कहाणी-संग्रै आयो। आं कहाणियां रा विसय ज्यूं लुगाई री जीवाजूण साथै समाज रो हरेक अंग, हरेक घटना जुड्योड़ी है, पण पुरुस उणनैं आपरै ढाळै सोचै तो लुगाई आपरै माथै बीत्योड़ी बातां नैं घणी गैराई सूं अर पूरा साच सूं जाण सकै, निवड सकै, इणरो खुलासो करीज्यो है। अेक ई विसय नैं न्यारी-न्यारी लेखिकावां आप-आपरी लेखनी अर सोच रै मुजब न्यारा-न्यारा ढब सूं कथै।

‘हेत रो उजास’ री कहाणीकार कीर्ति शर्मा री कथन शैली सरावण जोग, बगत रै बायरे मुजब बदळता विसय ई निजर आवै। ‘धूज’ कहाणी में सियाळै री धूजणी कोनी, मांयलो डर ई कोनी, पण साच ई कैयो कै ‘नागो जाणै म्हारै सूं डरै पण मिनख तो इज्जत सूं डरै’। इण कहाणी री नायिका नरमाई सूं किण तरै अलपती, लड़ाईखोर मोवनिया री मां नैं अबोली कर मोवनिया सूं साच बोलाय दै। पढी-लिखी रै च्यार आंख्यां हुवै, यूं ई नीं कैवै। संस्मरणात्मक शैली री किशोरी काका री ओळ्छूं है। अधूरा प्रेम री पीड़ अर वेदना नैं उकेरण में लेखिका री कोरणी में सजीवता है, मरमपरसी भावां री। दादी-पोती में दोय पीढी रो आंतरो, पण उणरी अमूझती लाचारी पोती दुरगा जैड़ी ताकत रै रूप में समाज रै साम्हीं ऊभी करे। रूढियां नैं तोड़ती बेटियां नैं ई अबै बडेरां रै कांधो देवण रो हक दिरावती आ कहाणी साचै अरथां में लुगाई री जड़ां समाज में सैंठी करै। केई चरित नायिकावां ज्यूं रुकमी भूआ ई हेत-अपणास रो दूजो नांव है। हौरै-फोरै बगत में गांव-गळी रा मिनखां रै आडो आवणो, बांरी हारी-बैमारी में तन-मन सूं सेवा करणी। आतमविस्वास अर स्वाभिमान रै साथै मीडिया रो काम करती भूआ अँड़ा पात्र किणी अेक रा नीं हुवै, आखै समाज री बा रुकमी भूआ ही। हेत देंवती अर सगळीं रै हियै उजास भर देंवती। अँडी ई कहाणियां में ‘केतकी भोजाई’ अर ‘उडीक’ है। जठै लुगाई, लुगाई री लाज रुखाळी बण जावै तो समाज में सुधार अवसर आवैला। बेटियां रै जलम सूं ई जिण लुगाई नैं परिवार छोड देवै जूझण वास्तै, उणरो धणी कुण! पण दुखां री खाण लुगाई सेठ-साऊकारां, कामदारां, मुनीमां री खोटी नीत कदै ताई झेलती रैवैली। लुगाई नैं भोग री वस्तु समझण वाळां वास्तै ‘काजळी’ अेक जबरो पड़तर है। मिनखां रा मन सुद्ध होवै तो लुगाई बां सूं आगै बध सकै, पण बा तो सदियां सूं अेकण सागै केई मोरचां माथै जूझ रैयी है।

कृष्णा आचार्य रा दोय कहाणी-संग्रै ‘लाल चूड़ो’ अर ‘मांयली बात’ री कहाणियां ओपती, सबळी अर सरावणजोग है। आंनै छोटी कहाणियां कैय सकां, जकी लघुकथावां सूं आकार में कीं बडी है। कृष्णाजी री कहाणियां जिकी तीन-चार पानां मांय आपरी बात पूरी मठोठ साथै सार रूप में कैवण री कला अंगेज्योड़ी है। आपरी सगळी कहाणियां री घटनावां अर पात्र जाणै आपां रै आसै-पासै रा सैंधा लखावै। ‘लाल चूड़ो’ कहाणी है तो लुगाई रै जीवण-संघर्ष री, पण दूजी कहाणियां सूं कीं न्यारी है, जिणमें लेखिका कैवणी चावै कै लाल चूड़ो सवागण रो सिणगार, सुवाग री सैलाणी तो है ईज, इणरै साथै मरद री घर-परिवार या लुगाई, टाबरां वास्तै जिम्मेदारी अर लुगाई रो उणरै पेटै विस्वास है। पछै उणरो मोल कोनी रैवै। बो सवागण रा हाथां में ओपै, खुलियां पछै फगत कचकड़ो कै सीप रैय जावै। चूड़ो उतार लिछमी सब भावां-संबंधां सूं जाणै मुगत होयगी। कैवत है कै ‘बाप किराडी अर भिखारण’, पण भूखी मां ई टाबरां नैं पोखण री जुगत बैठा सकै। खुलती पोल में ललित जैड़ा मिनख भोळी-ढाळी छोरियां नैं प्रेमजाळ में भरमाय र मौका रो फायदो उठावै, पण जूली री मां री सावचेती, चतुराई, समझदारी, भावी री सोच अणव्हैती नीं होवण देवै। चौथो चितराम ई न्यारो-निकेवळो है। कथ्य री दीठ सूं जीवण री चार अवस्थावां रै ज्यूं जीवण में आया बदळावां नैं लेखिका चितराम रै रूप में उकेरिया है। दुनिया साम्हीं तो थाप देय र मूंडो रातो राखणो पडै। पछै ‘पाणी तो पाणी री ढाळ’ बैवै। मिनख स्वभाव तो जठै जावो, कागला काळा ई लाधै। ‘सवालां वाळा बैनजी’ कहाणी में किण भांत अेक पढी-

लिखी लुगाई ई भावां में बैवती जावै पण धणी माथै भरोसो नीं करै तो कठै जावै! बो भरमाय 'र पईसा-टक्का लेय 'र उणरी काई भूंडी गत करी कै मिनखपणो लाजां मरै। जद बाड़ खेत नैं खावै तो उबारै कुण? 'अकली लुगाई', 'सहायता', 'सुपात्तर बीनणी' सेती इण संग्रै मांय छत्तीस कहाणियां है। सगळी समाजू कहाणियां जीवणमूल्यां री सीख देवै। 'मांयली बात' (2019) कृष्णा आचार्य रो दूजो कहाणी-संग्रै है, जिणमें 32 छोटी-छोटी कहाणियां में जीवण रो सार है। कहाणी 'मांयली बात' री पारबती रो सुपनो हवाई जहाज में बैठण रो कोनी अर नीं ई सिंगापुर री सैर करण रो, पण सुपनो तो सुपनो होवै। ऊंटगाडै माथै बैठ 'र परिवार साथै बाबै रै मेळै में जावण रो टाबरपणै सूं सुपनो हो। धणी पिचका-पापड़ी रा ठेला सूं गृहस्थ रो गाडो चलावै, पण मेळै रै अैन बगत बाबै री पैदल सेवा रो चंदो लेवण नै आयोड़ा काकोजी नैं घर री इज्जत राखण खातर भेळा कस्तोड़ा पांचसौ रुपिया देवणा पड़ै अर आपरो सुपनो ऊंचो टांग देवै। धरम अर संस्कार संस्कृति नैं रुखाळै। अैडै लोकजीवण री झांकी आपरी कहाणियां में केई ठौड़ निजर आवै। माईतां री चोखी सीख मिलै तो टाबर-छोरू भूल कस्यां पछै ई सुधर जावै। घर टूटता उबर जावै। सीख रो असर पड़ै। ईमानदार मास्टरजी अर रिश्वतखोर पटवारी रै मिस लेखिका कैवणी चावै कै रैण-सैण में फरक तो रैवै, पण खरी कमाई तो सोळवों सोनो है, नचींती नींद है अर खोटी कमाई सूं मिनख सोनै तुलै तो ई बगत आयां जेळ री हवा खवाय देवै। स्कूलां में आवण वाळो पोषाहार बो ई मास्टर अर बाबू छोडै कोनी, पण लुगाई पात्रां रै मिस कर्तव्यबोध जगाईजै। लुगाई री मनतग, सावचेती, वचनां री पालणहार अर समझ भरी बातां सूं समाज संभळ सकै। लुगाई घर बणावै अर बा ई बिगाडै। सरल भासा में अै कहाणियां समाज नैं सीख देवै। सब कहाणियां री अलायदी विसय-वस्तु है। पात्रां मुजब भासा है।

'कदै ताई' जेबा रसीद रो कहाणी संग्रै है। इण संग्रै री कहाणियां ई लुगाई री जीवाजूण सूं जूझती कहाणियां है। लेखिका कैवणी चावै कै 'हाथां कीधा कामड़ा, किणनैं दीजै दोस', कैवत रै ज्युं ई लुगाई खुद जिम्मेदार है आपरी भूंडी गत री। काई करै ममता। हिंवळास अर कंवळा भावां रो मन उणनैं ऊंची उठण ई नीं देवै। धणी माथै भरोसो नीं करै तो जावै कठै? 'बंधिया जटै छूटणा' है। माईत जिणरै लारै घालै उणसू नीं निभावै तो जावै कठै? मजबूरी रो नांव महात्मा गांधी। घरां में काम करण वाळी नौकराणियां साब नैं बिगाडै कै साब उणरी लाचारगी रो लाभ ले लेवै। कठैई ऑफिसां में बाँस आपरै अधीनस्थ काम करण वाळी महिलावां नैं आपरी हवस रो सिकार बणावै। इणसू परिवार टूटै कै कळह बधै। 'काचा घरां रा आंगणा' ब्लैक मेलिंग करती नौकराणी अर गैली बणाय 'र मानसिक रूप सूं मालती नैं तळणो, जिणसू बा साच्याणी गैली होयगी ही।

अैडी ई सामाजिक अबखायां, सामाजिक सरोकार अर समाज नैं सुधारण री दीठ सूं बसंती पंवार रो 'नूवो सूरज' कहाणी-संग्रै साम्हीं आवै। संग्रै री छोटी-छोटी कहाणियां जाणै जीवण री छोटी-छोटी बातां री सीख देंवती दीखै। 'तीन रो वैम', 'टोटको' आद मनोवैग्यानिक कहाणियां है। पछै वैम री दवा तो हकीम कनै ई कोनी होवै। पण टूणा-टोटका जैडी बातां सामाजिक सोच री हेठी न्हाख देवै। भोपा-डफरी सूं घर धुप जावै, मिनख धन अर मन सूं निबळो बणतो जावै। बसु जैड़ा पात्रां सूं समाज नैं आं बातां सूं निरांयत मिली। सूरज तो बो ईज है—आद-

जुगाद सूं ऊगै अर आथमै, पण भटक्योड़ो जे सूवै मारग आय जावै तो उणरै जीवण में अवस नूवो सूरज ऊगै। मिनख तो खामियां रो खजानो है। भटकाव किणरै जीवण में नीं आवै। भौतिक सुखां री चावना कुण नीं करै। मिनख रो मन आं सुखां खातर सूवो मारग छोड 'र कुमारग पकड़ै। बसंती री कहाणियां सुधारवादी दीठ देवै। नूवी चाल, नूवी सीख अर बदळव रो नांव ई जीवण रो नूवो सूरज है।

2018 में सावित्री चौधसरी रो कहाणी-संग्रै 'अपणायत रो असास' पाठकां साम्हीं लुगाई री घणकरी मनगत अर समाजू सोच साथै साम्हीं आवै। आंख्यां रो फूट्यो भलाई होवो, हियै रो फूट्यो नीं होवणो। हियो उजास रै मारग रो चानणो बण बीखो काढै। दिव्यांग वरग वास्तै संवेदना जगावै आ कहाणी। शिक्षा सारी अबखायां मिटावण री कूजी है। ओपरी दीखता थकां ई केई बार अक चुप सौ सुख रो काम करै। धीरज राखो, ओखो नीं बोलणो, घमंड अर रीस करुयां गिरस्थ री गाडी नीं चालै। विवेक सूं काम करणो। तलाक लियोड़ी लुगायां वास्तै समाज रो धारो न्यारो। लुगाई नैं जीवण रो धारो बणावो पड़ैला। भूंडा कामां सूं सुख किणनै मिल्यो है। 'लूंटो डूंगर' जे दुख रो है तो लुगाई री समझ सूं उणनैं घुड़ायो जाय सकै। लुगाई ही लुगाई रो साथ देवै। उण रा दुख नैं खुद रो मानै। बहू री गलतियां नैं सासू बेटी जाण 'र कै टाबरपणो मान 'र उणरी रुखाळी रै रूप ओट रो लूंटो डूंगर बण सकै। बेटी बचावण री सीख सुलखणी नार रा सुलखणां लेखै समाज में मिनखापणो जीवतो है, इण बात री साखीधर अै कहाणियां नूवै ढाळै कथीजी है।

'काया री कळझळ' संतोष चौधरी रो कहाणी-संग्रै हे। अै कहाणियां आज री समकालीन भारतीय कहाणियां सूं होड करती कहाणियां कैयी जाय सकै। 'आपथापै' री नायिका नीलम कांई आपरो सत छोड 'र धणी रै बरोबरी री तनखा वाळी नौकरी पाई हे ? औ उर्मिलाजी नैं क्यूं भरम होयो, बै आसीस रो हाथ अधबिचाळै क्यूं राख दियो। पढ-लिख 'र आगै बधण में नारीत्व आडो नीं आवै, आवै फगत मिनखां री सोच। सत-पत नैं राखतां आगै बधणो ई लुगाई री साची जीत है। कथा में नीलम पैली बतावै कै नौकरी खातर अक-दो बार कंपनी रा मालिक नैं राजी करणो पड़ैला। दूजी बात, नीलम कैवे कै रोटी, कपड़ा अर घर में रैवण री छत खातर बा रोज धणी विनीत रो बलात्कार झेलणो पड़ै, म्हारी आतमा सागै बलात्कार ई तो करै, क्यूंकै मन नीं मिलै अर हियै हेत नीं रळै तो धणी-लुगाई रै दैहिक मिलाप में नर अर नारी रो मिलन ई रैय जावै। उणमें अक री रजामंदी नीं होवै तो बलात्कार बण जावै। कांई इणीज भावां सूं अमूझती बा मालिक नैं राजी कर दियो ? संतान नीं होवै तो मिनख री अरथी माथै केई आपरा बण संपत्ति रा हकदार बण जावै, गोदनामो करावै। मोहनराम चौधरी री गवाड़ी में ई सब इण सारू त्यार बैठा हा, पण चौधरी री धण केसर री पाकी सोच सूं बा बरसां पैली शरण आया सरूपा अर पारू रा बेटा नैं मोहनजी रो खून बताय 'र बांरी मोटी रै लकड़ी देवण रो हक देय घर रो रुखाळो बणाय दियो। कहाणी अक सस्पेंस साथै आगै बधे अर अंत में बो सस्पेंस खुलै—“म्हारा चौधरी नैं अगन उणरो खुद रो लोही देसी, अर हांडी शिव रै हाथ में पकड़ाय दी। पारू ई दोनू हाथां री अक-अक चूड़ी उतार चौधरी री माटी री देह माथै राख दी।”

'काया री कळझळ' कहाणी दिनेश रै मनगत रा भावां री संवेदना जगावण वाळी बा कहाणी है, जिणनैं समाज अंगेजै कोनी। समाज सूं कट्योड़ो बो बरग जिणरी न्यारी दुनिया है। पण

मासी लिछमी अर उणरी नानी दिनेश रो साथ दियो। बो ऑपरेशन कराय 'र आपरै साथी महेन्द्र साथै लुगाई बण 'र रैवण रो तेवड़ लियो। कहाणी जिण भांत आगै बंधै, उणरी कथ्य-सैली अलायदी है। लेखिका पूरो वातावरण बणावै। होळै-होळै उणरा कामां में सुघड़ताई, लुगायां जैड़ी जिम्मेदारी, सेवा रो भाव, पछै मेळै में लुगाई बण नाचणो। जाणै अँ दिनेश री मांयली अमूझ अर थ्यावस रा थंभ हा। हद घरवाळा उणरी बात री गिनरत नीं करी तो बो फांसी खाय 'र मरणो मांडियो अर अंत में नानी नैं सैंठी सांभणी पड़ी। थर्ड जेंडर रै रूप में समाज रा उण उपेक्षित वरग नैं ई मिनखापणो रो मान देवणो है। 'टूंटियो' लोकरंजन, लोकनाट्य, लोकसंस्कृति रो रूप, पण उण मिस लुगाई री मनगत, अमूझती, उकळती दब्योड़ी नारी देह री कळझळ ई साचै अरथां में पूरी चौड़ै-धाड़ै साम्हों आवै। नीं चांवता थकां ई उमर रा अेक पड़व माथै मरदां री अगन बुझावणी पड़ै। लुगाई, लुगाई है—उठै बा सासू, भाभी, बैन, बेटी या नूंची बीनणी नीं, फगत लुगाई है, अेक जैड़ी। 'मन री डोर' जिण माथै बंध्योड़ी होवै उठै ईज जुड़ै। तन तो स्नेहा अर उण मोट्यार रा अेक हुया, पण अेक रै होटां सुहैल रो नांव अर मोट्यार रै होटां कविता जिकी उणरी जोड़ायत रो नाम हो। देह तो माटी री, जिणरी तिरस बुझगी पण मन री डोर तो बंधै जटै ईज बंधै। 'हियै च्छै सो होटां आवै' बा ईज बात स्नेहा अर मोट्यारसाथै होयी। संतोष चौधरी री कहाणियां में नारी रा कंवळा भावां साथै समाजू थितियां रो नूंवो दीठाव है।

'केसर रा छांटा' शकुंतला पालीवाल री कहाणी में नूवा कथ्य निगै आवै। आ कहाणी भी काया री कळझळ री हामळ भरै। जटै संतोष चौधरी रो पात्र आपरा भायला साथै घर बसाय लुगाई जूण जीवणी चावै उठै शकुंतलाजी री नायिका रो घर बसण सू पैली उजड़ जावै, पण बा पीहर आय 'र समाज-सेवा रो बीड़ो उठावै। बा आपरी खामी नैं जीवण रो मंतर बणावै। 'केसर रा छांटा' आदिवासी समाज रो अेक उच्छब है। केसर घोळ 'र गांव रा मौजीज मिनख रूंखां अर परकत नैं रुखाळै। जिण रूंख माथै छांटो लागै, बो काटीजै कोनी, बो पूजनीक बणजावै। अँड़ो ई छांटो छोरियां रै स्याणपणा री सैलाणी व्हिया करै। आंबवी कदैई नीं समझ सकी कै बो स्याणपण रो छांटो कांई है, पण आज बो उच्छब केसर रा छांटा रो आंबवी री अगवाई मनाईज्यो। बा खुद नैं अर्द्धनारीश्वर रूप में देख्यो, जिको शिव रो प्रतीक है। आपरै डील री कमी नैं कमी नीं जाणी। गौणां माथै सासरै गई अर दूजै ई दिन धणी पाछी पूगाय दी। उण दिन सू समाज-सेवा करण रो धेय बणाय लियो।

कैवत है कै 'माथो बाढ 'र देवो तो ई लोग कैवै खांगो है'। लुगाई रै त्याग में ईज उणरै बेचाल री बात कर्यां बिना समाज नीं रैवै। समाज तो छोडो, घर रा लोग ई सक करै। कांई लुगाई सूदैं मारग चाल 'र मोटो काम नीं कर सकै ? कांई उणरो सामरथ आद पुरुसां सू कमतर है। बा समाज री नींव है। 'ढळता सूरज रो उजास' री प्रो. माधवी रो चरित्र ई ऊजळो पण नींव रै भाटै नैं कुण देखै। ऊपरी फरूकती धजा इत्ती क्यूं उडै ? इणरो पडूतर फगत धजा कनै, बा कद बोलै ? माधवी आज ई अबोली वृद्धाश्रम में सेवा रो काम अपणाय घर छोड दियो। अेक मिनख नैं तो जलम री देवाळ मां पछै बैन, बेटी, लुगाई रै रूप में ई मां मिलै, क्यूंके बा हर रूप में पैली मां है, पछै दूजो रूप या किरदार। पण अेक लुगाई नैं तो जलम री देवाळ मां ई औ सुख देवै। इण संगै

री सगळी कहाणियां नूंची कहाणियां है। कथन-सैली सूं कहाणी री विसय-वस्तु, पाठक रै हियै हाथ घालै, बो पढतो जावै। भासा में मेवाड़ी बोली री मीठास-मटोठ घणी मन भावै।

लारलै साल 2020 में छप्योड़ो कहाणी-संग्रै 'नेव निवाळी' किरण राजपुरोहित 'नितिला' रो दूजो कहाणी-संग्रै है। इण मांय राजस्थान री गांवठी संस्कृति सूं झीणी झळक है। केई बरसां पछै गांवठी संस्कृति रा मरता सबदां नैं इण कहाणी-संग्रै में सरजीवण होवता देख्या जाय सकै। उणां रा अरथ मिनखाजूण माथै कित्ता फिट होवै, अरथावू लागै। घर रा पड़वा में बरतीजण वाळा साधन मिनखां नैं मिनखाचारो, मरजादा, नीति री सीख देवै। नंदिता रै रूप में स्याणी होवती बारह-तेरह बरसां री किशोरी रै वयःसंधि अवस्था रो वरणन, वामा रै रूप में अधूरी नारी भावनावां रो मरमपरसी वरणाव, जिणनैं मैसूस करण वाळी रमा भूआसा है। वामा नैं नारीत्व रो सुख मिलणो चाईजै, उणारी जूण अलूणी नीं रैवै, जीवण लूखो नीं रैवै, कित्ता खरा सबदां में बै आपरा भाई-भोजाई नैं कंवारी वामा अर संतजय रै नर-नारी संबंधां नैं जोड़'र पुन कमावण री बात कर देवै। अधरम नैं धरम बणाय राखण री कला इण कहाणी में है। जिकी धरती तिरसी रैवै बा नेपै नीं होय सकै, बंजर बण जावै। धरती अर लुगाई री रीत अेक। लुगाई जूण मांय उमर परवाणै आवता बदळाव, परकरूपा नारी मन में हेत-हिंवळास पांगरतो रैवै। केई बार देह उमर बतावै, पण मन सोळा बरसां रो बण पाछो प्लेस बैक में जावण री खैचळ ई नीं करै, जावै ई परो। समाज रा काण-कायदा, रीतां-पातां, धरम अर नीति री जाडी जेवड़ी सूं बडेरा बांध'र राखी है। मन नैं कोई कीकर बांधै। जे बो आतमा रा मेळ सूं काम करै तो चौगणो चाव बधै अर जे मन अनीति कर बेलगाम घोड़ो बण जावै तो इण धरम री जाडी जेवड़ी रा सटीड़ पड़्यां बिना नीं रैवै। नीति री नकेल अैड़ी घालै कै मन डाफाचूक, हाणफाण होय'र पाछो ठाणो झेल ई लेवै। किरणजी नारी देह रो विग्यान अलायदो बतायो है। नर-नारी संबंधां नैं परकत सूं जुड़ी अेक प्रक्रिया पण कैवै, जिणसूं तन-मन तिरपत होय जावै। आप फ्रायड रै सिद्धांत री बात ई करै। मन बेलगाम घोड़ो है, मन री गति असीम अर अणंत रै उण पार ताई है। मन रा लाडू खावणा कोई यूं तो नीं कैवै? बैठा अटै हां अर मन बो जाय... बो जाय...। मन नैं कोई कीकर पकड़ै, कीकर रोकै? कीकर थाम सकै? पछै मन सूं छानी चोरी कोनी, मन जाणै मनां रा घाव जाणै। बो सावळ-कावळ सब सोचलै, पण आतमा जिकी परमातमा रो अंस है उणनैं सूवै मारग जावण रा जाझा जतन कर सदबुद्धि देवै। मन भटकाव सूं बच जावै। मन कीं अपजोगती करणी चावै तो अेक सबद पण? उणसूं पाछो पडूतर मांगण या जाणण नै त्यार रैवै।

घर री 'थळगट' मरजादा है तो 'आगळ' नैतिकता है, धरम है। मरजादा री रुखाळी है। सामाजिक रीत है। कैवत ई है कै चोरां रै कैड़ा ताळ्य? ताळ्य साऊकारां रै वास्तै। ओढाळ्योड़ी डोढी अर जड़्योड़ी आगळ मन नैं काबू करण रा चाबुक है। मधु रा विचार जाण'र सासू सूखी जर्मी हरी होवै। बगत परवाणै बदळाव, लुगाई री पीड़ नैं जाणणो, मैसूस करणो अर आई अबखाई रो निवेड़ो आपरी कहाणियां में है। नर-नारी संबंधां नैं इलेक्ट्रान अेकलो है तो ऋणात्मक सूं चाव नीं आवै, प्रोटोन मिलतां ई उणमें चाव रो संचार होवै। जित्तै दोनूं अेक नीं होवै नर-नारी बित्तै वै न्यूट्रान ज्यूं आवेश बिना उदास, नीरस, अेकलपा जैड़ा भावां सूं पीड़जता रैवै। बांरो मन

रीतो रैवै। इण भांत आपां मिनख रै भावां नैं विग्यान री दीठ सूं ई जाण सकां। किरणजी री कहाणियां में चौड़ै-धाड़ै नारी देह रा रंगभीना चित्राम सबदां मंड्योड़ा, फाबता नै ओपता लागै। 'नेव निवाळी' में कंवळो, थळी, आगळ, पड़वा री बणगट में काम आवण वाळी सैंग चीज-बस्त—चांदो, कण्काी, बरंगो, नेवा, गार, मुरड अर पछै लेवडां री बात कर जाणै स्रिस्टी री रचाव, बसाव अर पछै परळै री चेत करावै। घर बणावण रा सगळा साधन मिनखाजूण सूं जोड़'र आपरै सिरजण पेटै परोटीज्या है। घर मिनख रो आसरो कहीजै। पैली लोग पूछता कितरा आसरम है। घर में टैराव-बसाव री ठौड़ (कमरा, पड़वा, छान, ओरो, तिबारी) उण आसरै नैं बणावण वाळो मिनख खुद कितरो बंध्योड़ो है उणसूं? घर कच्चो कै पक्को, पण बणावण वाळो कुण? अेक कारीगर, जको साचो सिल्पी है। देखण वाळो उणनैं देखै, फेर उणरै बणगट नैं मन मुजब कथै, उणीज भांत किरणजी अेक सिल्पकार री भांत निरवाळै सिल्प सूं आं कहाणियां नैं कथी है।

आज री राजस्थानी कहाणी आंगणै सूं पांवडा भरती आभै अड़ती दीखै। नारी-विमर्श नैं लेय 'र खुल्लै-खाळै लेखिकावां लिख्यो है, जिको सास्वत साच है। अणजाण कुण? ओछी सोच नैं पसवाड़ै न्हाख 'र कहाणियां रा पात्र आगै बधता दीखै। सासू रो चरित अबै पैली वाळो कोनी तो समाज नर-नारी सूं अलायदी तीजी जूण नैं हियै में ठौड़ देवण लाग्यो है। अवस ई राजस्थानी कहाणी जात्रा रो भविष्य ऊजळो है।





मोनिका गौड़

राजस्थानी उपन्यासां मांय नारी-विमर्श (महिला उपन्यासकारां रा उपन्यासां रै संदर्भ मांय)

किणी भी सभ्यता री विकास जात्रा साहित्य री भेळप बिना आगली पीढी ताई नीं पूग सकै। वाचिक परंपरा सूं आखरां रै ढाळै ढळती साहित्य री विकास यात्रा आगै बधती, फलांगती, जूनी-नूवी परम्परावां नैं पोखती, पांगरती अर सामाजिक बदळाव नैं दिखावण अर अंवेरण रो अेक जरियो हुवै।

राजस्थानी भासा रो तो खुद रो अेक गौरबैजोग इतियास है। सईकां री धरोड़ नैं अंवेरण रो काम भासा माथै ई हुया करै। श्रुति सूं लेख ताई री इण जात्रा में केई पड़ाव छूट ई गया होसी, पण भासा जद आखरां री आंगळी पकड़'र टुर व्हीर हुयी तो आपरै काळ रा सुख-दुख, पीड़, अंवळायां-अबखायां नैं आपरै खजानै में भेळी करती रैयी। उण खजानै नैं फिरोळियां ठाह पड़ै कै बदळाव रा कित्ता नगीना, रतन या कित्ता कांकरा है। हरेक बगत रा लिखारा आपरी समझ मुजब इण थाती नैं संभाळै अर कीं नूवा एंगल काढ'र आपरी पीढी नैं सूपै।

राजस्थानी भासा ई आपरी सभ्यता, संस्कृति अर संस्कारां नैं सांभ राख्या है, साथै ई राजस्थान रो राजस्थानीपणो भी चोखी तस्यां अंवेर रख्यो है।

राजस्थानी साहित्य में वीरता, भगति, प्रेम, त्याग, वैराग, दर्शन, अध्यात्म अर जीयाजूण सूं जुड़्या सगळां विसयां माथै अठै रा लिखारा आपरी कलम सू अलेखूं चितराम मांड्या है, जकां नैं पढतां ई उण बगत विसेस री सामाजिक, आर्थिक, राजनीतिक स्थितियां रै साथै-साथै मानखै री स्थिति रो भान हुवै।

गीतां रै जरियै कंठां सूं लोक साहित्य सहेज्यो गयो। आखरां पाण अमित रैयो। धूप-छांव, आंधी-मेह, सीत-घाम ज्यूं बगत री लूवां-डांफरां सूं बाथेड़ो करतो साहित्य आपरो धरम निभावण री बस पूगतां पूरी आफळ करी है। इणीज कारण आपां इक्कीसवीं सदी रै आंगणियै बैठा थकां ई बीत्योडै सईकां नैं समझ सकां हां।

सभ्यता री विकास जात्रा कदैई मधरी, कदैई खतावळ भरी रैयी। साहित्य इणनैं चोखी तस्यां सांभ'र राखी। साहित्य री काव्यधारा छंद सूं मुक्त छंद ताई आयी। गद्य कथा-वार्ता सूं कहाणी, रेखाचित्र, संस्मरण अर डायरी सूं गुजरतो उपन्यासां ताई आयो।

माजीसा री बाड़ी, बीकानेर (राज.) 334001 मो. 9829610939

आजादी सू पैली अर बाद में खास तौर सू लारला बीस बरसां मांय जित्तो डाफाचूक करणियो बदळाव हालिया पीढी देख्यो है, उणनै सबदां मांय ढाळणो अर बांधणो मुस्कल काम ।

मशीनीकरण, नगरीकरण, गमता गांव-गवाड़ी रै साथै उपभोक्तावाद, शिक्षा रो प्रसार, व्यक्तिगत स्पेस सू लेय 'र फोन सू वीडियो कॉल तक री लांबी छलांग सू आगली, लारली कम सू कम तीन-चार पीढियां नै अकै ठौड़ लाय 'र ऊभो कर दियो है। आं बदळावा रो सीधो असर रोजमर्रा री जिंदगाणी में दिखै तो साहित्य ई किण भांत उणसू अळगो रैय सकै !

सगळा जाणै कै राजस्थानी साहित्य में सर्ईकां ताई मरद-सत्ता रो बोलबालो रैयो । अटै तक कै स्त्री मनगत नै ई पुरुस ई आपरी लेखनी सू सगळां साम्हीं लावण रो काम करता रैया है । स्त्री-चेतना रा सुर छिद्दा-माड़ा मिलै साहित्य में । उणां री हाजरी लोकगीतां, हालरिया, हरजस अर बन्ना-बन्नी ताई रैया ।

मीरां बाई, समान बाई, गवरी देवी जैड़ा आंगळ्यां माथै गिणीजण वाळा नांव ई भक्ति रै खातै खताईज्या । मां मीरां नै अवस औ श्रेय दियो जाय सकै कै बै आपरै बगत री दशा-दिशा नै सांवरियै रै मिस आपरै गीतां-पदां में मांड्यो है ।

पण स्त्रीलेखन में सून्याड़ ई रैया । आजादी पछै लक्ष्मीकुमारी चूंडावत रो नांव लियो जा सकै । बै कीं पारंपरिक साहित्य-सिरजण सारू ईज काम कर्यो, स्त्री-चेतना, उणरी मनगत नै बै ई खास तवज्जो नीं दी । इण बिचाळै सावित्री डागा, आनंदकौर व्यास, प्रेम जैन, कमला कमलेश, जैड़ी लेखिकावां आपरी कलम सू अेक ओळखाण दी । स्त्री रै अंतस भावां नै साम्हीं लावण री आफळ करी । हालांकै आदर्श, त्याग, मर्यादा रो भाव लेखन में प्रमुख हो । कहाणियां, कवितावां माथै काम भी घणो ई होयो, पण आधुनिक गद्य विधावां, जियां—रेखाचित्र, संस्मरण, डायरी, रिपोर्ताज अर उपन्यास पर उल्लेखनीय काम नीं हुयो । हालांकै पुरुस लेखक लगोलग राजस्थानी भासा में सिरजण कर रैया हा । आ गीरबै जोग बात है कै राजस्थानी भासा सगळी वैश्विक विधावां नै परोटण रै सागै नूवो रचाव भी कर सकै । भासा विरोधियां रो मूंडो बंद करण मांय साहित्यकारां री महताऊ भूमिका है । साहित्य री आधुनिक विधा उपन्यास में पुरुसां रा नांव ई आंगळ्यां पर गिणावण जोग है । लगैटगै 108 राजस्थानी उपन्यासां रै ताण शिवचंद्र भरतिया रै 'कनक सुंदर' सू सरू हुयी आ उपन्यास जात्रा श्रीलाल नथमल जोशी रै 'आभै पटकी' अर अन्नाराम सुदामा रै 'दूर दिसावर' सू होवती मधु आचार्य रै 'गवाड़' रै सागै आगै पूरण शर्मा पूरण रै होम ताई री अेक लंबी सूची बणै ।

जटै तक कविता, कहाणी री बात है, इणमें लेखिकावां गीरबैजोग काम कर्यो है, पण गद्य री बीजी विधावां री बात हुवै तो महिला लेखन में मून फैल जावै । खास तौर सू उपन्यास लेखन री स्थिति पुरुस लेखकां री तुलना में थोड़ी मौळी है । फेरू ई इण साहित्यिक सून में आपरी लेखनी सू नूवा गीत रच 'र आपरै होवण नै थापित करती लेखिकावां में बसंती पंवार, जेबा रशीद, मनीषा आर्य सोनी, अन्नूश्री राठौड़, सीमा भाटी, डॉ. रेणुका व्यास नीलम अर संतोष चौधरी आद रो नांव लियो जा सकै ।

खास तौर सू लारलै बीस बरसां रै साहित्यिक परिदरसाव नैं देखां तो बसंती पंवार रो 'सौगन', मनीषा आर्य सोनी रो 'आठवीं कुण', सीमा भाटी रो 'हेत री हूस', अनुश्री राठौड़ रो 'जीया जूण रा कापा', डॉ. रेणुका व्यास रो 'धिंगाणै धणियाप', संतोष चौधरी रो 'रात पछै परभात' जैड़ा उपन्यास अेक ताजगी रो अैसास करावै अर सागै इण बात री संभावना ई जगावै कै आवण वाळै बगत में लेखिकावां री भागीदारी बधैला, नीं फगत गिणती री दीठ सू बल्कै गुणात्मक स्तर माथै ई। फिलहाल, आं उपन्यासां री जे कप्पड़छाण करां तो केई बातां साफ निगै आवै।

लेखिकावां नैं घुट्टी में मिल्योड़ा नैतिकता, त्याग, समर्पण जैड़ा संस्कार लेखन में भी साफ दीसै। बगत रो बदळाव आं उपन्यासां में है, पण जियां नूवी बीनणी संकती, सरमावती पग मेलै, इणीज भांत लेखन में सामाजिक बदळाव घूंघटै री ओट लियां दिखै, चटकै हुया भौतिक बदळावां नैं तो घणी सोरपायी सू मांड्यो है, पण मनगत री मुखरता में संको है। फेरुं ई रसोई रै आंगणै सू बारै आभो नापण निकळी स्त्री अबार ई जिम्मेदारियां रै चक्रव्यूह में अभिमन्यु दाईं उळझयोड़ी है। औ उळझाव लेखन में निगै आवै। आपरी पिछाण, ओळखाण नैं सोधती जड़ां सू ऊंडी जुड़योड़ी है।

उपन्यासां में पसवाड़ो फोरतै बगत री फिरोळ करता कीं बदळाव रेखांकित करया जाय सकै।

परिवेश : उपन्यास रो कैनवास खासो मोटो हुयो है। छोटै गांव-कस्बै सू लेय 'र महानगर भी कथावस्तु में आधार ज्यूं बरतीज्यो है। केळू रा घर, छपरा, ओबरी रै साथै डीघी बिल्डिंगां, बैलगाडी सू मोटर-कार ई सहजतां सू कथा-वस्तु री जरूरत मुजब आया है। घाघरो, लूगड़ी, साड़ी सू जींस तक रो सफर तै हुयो है। रोजमर्रा रा छोट-छोटा रीत-रिवाज—भात मुकलावो, नातो, झगड़ो, पीळो, सेवरो जैड़ा सबदां सू आंचळिक परिवेश ई परतख हुवै। लेखिकावां घणी खामचाई सू इणनै सहयोगी पात्रां रै रूप में बरत्यो है।

विसयां री विविधता : विसयगत रूप सू देखां तो विसयां री न्यारी-न्यारी छिब मिलै। महिलावां सू जुड़योडा विसयां माथै बांनै आपरी मनगत नैं आपरै मुजब कलम रै ढाळै ढाळण रो हक है। शिक्षा री जोत चेतन हुयां पछै भूमिकावां भी बदळी है, तो बदळाव लेखन में आवणो लाजमी है। इंटरनेट चलावण वाळी लेखिकावां परंपरा नैं परोटती थकीं स्त्री-संघर्ष रा अलायदा रंग अर ढबां नैं रच्या है। टूटतै-खिंडतै परिवारां री पीड़, विधवाविवाह, प्रेम री सात्विकता, मर्दसत्ता सू बगावत, परित्क्यता, नौकरी करणी अर उण सू उपन्या सवाल, अेकल महिला, अेकल मां री अबखायां नैं साम्हीं लावण में लेखिकावां समर्थ हुई है। स्त्री-मन री अंवाळ्यां-कंवाळ्यां नैं चोखी तरियां सबदां रो बानो पहरायो है।

आं उपन्यासां री कीं मूळ बातां अर बदळाव आवण वाळै बगत रै साहित्य री दशा-दिशा नैं तय करसी। विगत रो अनुभव अर आगत री हुंकार रै साथै अेक मोटो कैनवास खोलै। कसमसीजती स्त्री री पसवाड़ो फोरण री आफळ रा मंडाण पण है।

भूमिकावां में बदळाव : कदैई मजबूरी अर कठैई आपरी इच्छा सू स्त्री जद घर री थळगत छोड 'र रोटी कमावण सारू निकळी, आरथिक आजादी आयी तो समाज अर परिवार में उणरी आवाज भी सुणीजण लागी। सामाजिक भूमिकावां रो डायनैमिक बदळ्यो। लेखन में अै बदळाव आवणा ईज हा। संदर्भित उपन्यासां में भी सामाजिक उथळ-पुथळ मूळकथा रै रूप में है।

‘सौगन’ री मंजू हुवै, चायै ‘रात पछै परभात’ री नायिका। पर्स में आपरै पसीनै रा नोट सांभता भी अंतस री मिठास अर ममताळु स्वरूप कायम राखै। पाई-पाई नैं तरसती अस्मिता अेक सुघड़ सशक्त घरधिराणी अेक सफळ कामकाजी महिला रै स्वरूप में साख्यात दुर्गा ज्यूं लखावै। आपरी कमाई रै पाण खुद रो आपो तो संभाळै ईज है, साथै ई पतिरूपी जीव नैं तो परोटै ई, सागै बदळती भूमिकावां, पसवाडो फोरतै सामाजिक परिदरसाव नैं भी चवडै करै।

अै उपन्यास स्त्री री मनगत, अस्मिता, आपरै पगां ऊभण री हूस अर बदळव री झलक नैं देखण रा झरोखा अर बारियां है। भविष्य में भी अै कहाणियां-पात्र बदळव री सीव मांडसी।

आ भूमिकावां नैं आपरी आफळ सूं समझण, समझावण री कोसिस करती स्त्री आपरै पांति रो मान, सम्मान, हक मांग रैयी है। ‘जकै री खावां बाजरी, बांरी भरो हाजरी’ रा पुरुसपरक मुहावरा नैं गलत साबित कर रैयी है। ज्यादातर लेखिकावां खुद भी नौकरी करै है। बै परिवार में निर्णायक भूमिकावां मांय है। आर्थिक आजादी री भोम माथै ऊभी थकी आपरी ओळखाण नैं सोध रैयी है, बणा रैयी है, पण जियां निजू जीवन में ई बै आपरै संस्कारां नैं परोटै उणीज भांत बांरी नायिका भी आपरी चेतना, चिंतना में इत्ती ऊपर उठै कै मरद-सत्ता नैं उणरै आगै झुकणो पडै। पण औ झुकणो, पुरुस नैं दबाणै कै नीचै दिखाणै सूं साव अलायदो है। इण तथ्य नैं भी थापित करै कै आपरी लुळतायी, ममता नैं अखूट राखतां थकां ई पईसा कमाया जा सकै, साथै ई परुस रो मान-सम्मान बच्यो रैय सकै।

कर्तव्य निभांवती महिला आपरै हक सारू कोई भी हद तक आ सकै। आर्थिक स्वावलंबन वैचारिक मजबूती रो आधार बण रैयो है। खास बात आ भी है कै स्त्री पात्र पुरुस सूं बदळै री भावना नीं राखै, बां जियां आर्थिक आजादी कै मुगती री आड़ में शोषण री पैरोकारी नई करै। लेखिकावां आपरै स्त्री पात्रां सूं थ्यावास भी दिरावै कै मिनखाचार ई अेकूको मोटो धरम है। चावै कोई भी स्थिति हुवो, उणरी रिच्छा करणी जरूरी है।

परंपरा नै बदळण रो साहस : महिला लेखन जात्रा में अैड़ा केई मोड़ है जटै परंपरा रो मुखमलिया बदळव पाठक नैं आनंदित करै। अेक बीज उणरी चेतना में छिड़कै जिकै सूं औ बदळव स्थायी जड़ां पकड़तो लागै। मानवी जीवन नै रूंधण वाळी रूढियां री जकड़बंदी जकी, उणरै विगसाव में आडी आवै, उणनैं तोड़णो जरूरी हुया करै, लेखिकावां परंपरा अर रूढि रै झीणै आंतरे नैं समझ्यो अर आपरै कथ्य-कथण री बुणगट में घणी खामचाई सूं गूंथ्यो है। विधवा-विवाह रै नांव माथै सळ घालतै समाज नैं उण सारू त्यार करण रो जिम्मो जिण भांत लेखिकावां लौकिक जीवन में ई उठायो अर निभायो है, इणीज भांत आपरै लेखन सूं भी आ मौन क्रांति पैदा करी है। आं उपन्यासां नैं पढतां केई सबळ महिला पात्र समाज में दीखण लागै। उणां रो संघर्स, अबखायां समझ में उतरै। पाठक री चेतना जद काल्पनिक कथावां में पड़तख दाखला देखणा सरू करै तो रचना अर रचनाकार नैं सफळ समझणो चाईजे। साथै ई अेक बात और रेखांकित करती आगै बधै कै शिक्षा हर बदळव रो मूळ हुवै।

मनगत रचण री आजादी : आज री मनगत नैं समझै ईज नीं बल्कै कैवै, लिखै। जिण भांत न्यारा विसयां माथै कलम चलावण री हूस दिखाई है, बा सरावण जोग है। बदळव नैं मांडता अकै ई नीं संकै, चायै दैहिक आजादी री बात हुवो या कूख रो धणियाप लेवणो हुवो, जेंडर

भूमिका या यौनिकता की बात हुवे, औं निरभै होय र आपरी कलम चलाई है। औं लाजमी भी है, क्यूँके समाज सशक्तीकरण अर स्त्री आजादी की जकी घालमेल हुई है, उण रा दुष्परिणाम देखण-सुणण रै सागै भोग ई रैयी है।

‘धींगाणै धणियाप’ की नायिका हुवै या ‘हेत की हूस’ की निष्ठा। बै छोरै-छोरी रै कुदरती भेद नै सामाजिक भूमिकावां अर भेस पैरावै की घालमेळ में पजायां अेक जीव किण भांत दुख पावै, इण मानसिक घाण-मथाण नै लिखण की जोरदार कोशिश करी है। जेंडर यानी समाज द्वारा तय कस्योड़ा नेम-कायदा स्त्री-पुरुस की भूमिकावां है, जद कै यौनिकता कुदरत रो उपहार है। समाज में अेक मोटी चूक आ होय रैयी है कै आदमी-लुगाई की बराबरी अर समानता नै बाहरी पहरावै छोटा केश, पैंट-बुशर्ट पहरणो, नशो-पत्तो करण नै मान्यो जा रैयो है। औं भौतिक दिखावो जेंडर गेप नै नीं बल्कै कोई छोरै नै माडाणी छोरै जियां रैवण पर मजबूर करणो है। मासूम मन बाहरी पलकै नै साच मान लेवै। कुदरत की दियोड़ी भेंट यानी आपरी स्त्रीत्व की पिछाण सूं दूर भाजै, पण कद ताई ? आखिर तो आपरै अस्तित्व सूं रूबरू होवणो ईज पड़ै। अैड़ी स्थिति सूं बाथैड़ा करता केई चरित्र आपाणै आजू-बाजू ईज है। मानसिक अर सामाजिक चक्रव्यूह में फंस्योड़ो जीव आखिर अपघात नीं करै तो दूजो काई तोड़ है ? छोरी नै तो छोरै दाई राखण नै त्यार, पण जे छोरै नै छोरी दाई राख्यो जावै तो ? औं ‘तो’ ईज सगळी चिंतावां अर विमर्श नै जलम देवै, साथै ई समाज की दोगली रीति-नीति रो पड़दो फाश भी करै। स्त्री नै देवी मानणियो समाज उणनै इंसान नीं मान्यो। स्त्री की सहनशक्ति, धारणखिमता, उण रा सगळा गुण पितृसत्तात्मक समाज में हथियार रूप बरतीजी। पण आज की लुगाई इण अन्याय रै साम्हीं छाती ठोक र ऊभी है। आपरै पांती रो पानो पावणो चावै। जेंडर नै समझती थकी आपरी आवाज सूं दाकळ देवण रो जबरो काम ई आज की लेखिकावां घणी खामचाई सूं कस्यो है।


लेखिकावां शिल्प, बिम्ब, प्रतीकां रा नूवा प्रयोग रंज-रंज कस्यो है। भासा की लुळताई, कंवळ्योई नै अखंड ई राखी है अर सागै आंचळिक परिवेस सूं रचना नै नूवा आयाम ई दिया है।

नितार : राजस्थानी महिला उपन्यासकारां आपरी कलम की कोरणी सूं समाज, व्यवस्था, मिनख अर उणरी ऊंडी चिंतना, स्त्री की बदळती भूमिकावां साथै उणरी जूझ रा सांतरा चितराम मांड्या है। उपन्यासां रै पात्रां रै जरियै स्त्री-विमर्श की बात सखरै ढंग सूं मांडी है। तकनीक रै साथै आधुनिक गैजेट्स नै कैवटतां आपरी मनगत नै मुखर करी है। सबदां रै बहानै मन में उकलतै भावां नै अंवेस्यो है। आं उपन्यासां अेक आस तो जगाई है, पण घणो कात्यां पछै ई घणोई कातणो बाकी है। आधुनिकता की पैरोकारी करतां कीं संकती-सी लेखिकावां स्त्री की पारंपरिक त्याग, समर्पण की छिब रै मोह सूं पूरी नीं निकळी है। स्यात बांनै औं डर लागै कै कठैई बांरी निजू छिब पर आंच आ सकै ? पाठक बांरै पात्रां में लेखिका नै देखणो-जोवणो सरू कर सकै। कथ्य रै स्तर पर खासा सुखद बदळाव दिखै, पण अबार ई घणाई अैड़ा विसय है जिण माथै स्त्रीपक्ष या नजरियै सूं लिखण की दरकार है, चायै ‘लिव इन...’ की बात हुवे, थर्ड जेंडर, सास बहू रै बदळता रिश्तां या यौन हिंसा, कार्यस्थल पर मानसिक शारीरिक शोषण, अवसाद आद रा मुद्दा हुवे।

लेखिकावां व्यवस्था सूं टकरावण री हूस तो दिखाई, पण पैलां हद ताई सहन करती स्त्री रै रूमन नैं रच्यो है, स्त्री रो सुतंतर अस्तित्व अजै लेखन में आवणो बाकी है। लेखन में अेक झिझक है, जकी समाज रै गळ्योडै-सड्योडै तानै-बानै नैं सहेजै है। अबार ई चरित्र बेलडी सरीसा मरद-पात्र में आपरो भविष्य सोधै। आपरै मतै खड्यो होवणो शेष है, आपरै जुद्ध रो खुद ई सेनापति, सैनिक अर विजेता बणण में कीं कसर है, अेक झिझक है जकी उठता पगल्यां नैं ठिठका रैया है।

गीरबै जोग बात आ भी है कै आज री लेखिकावां हरावळ में शामिल है। आ उम्मीद छाती ठोक र करी जाय सकै कै अेक लीक पर बैवता थकां बै बदळाव रो अेक निरवाळो मारग सोध्यो है। अब बै आपरी मांयली स्त्री री दैहिक, मनोवैग्यानिक तिरस, उणरो भौ, हरख, मांयली कळझळ, मुल्क नैं बिना सकै पडतख करसी। आपरी ओळखाण रा पगल्या मांडती पीढी रै प्रयासां नैं साधुवाद है।

आपरी सांस्कृतिक धरोडू, आंचळिकता नैं अंवेरता-परोटतां जिण भांत री त्यारी आं उपन्यासां में दीसै, बा भविष्य कानी संभावना री पूरी अेक खिडकी खोलै कै आवण वाळै बगत में आं नींवां माथै, नूवा विचार, कटेंट, ट्रीटमेंट, शिल्प, बिंब-प्रतीकां सूं जड्योडी मंजिला खडी होसी, जिण पर राजस्थानी भासा अर साहित्य नैं गुमेज होसी।





रेखा लोढ़ा 'स्मित'

परंपरा अर संस्कृति रै विकास में महिला लेखन री भूमिका अर योगदान (राजस्थान रै संदर्भ मांय)

संस्कृति अर परंपरा किस्या भी समाज अर खेत्र री ओळखाण व्हिया करै। मिनख जद सू सामाजिक ढांचे में जीवन जीवा री सरुआत करी तद सू ई उण रा नित रोज रा कामां सू लेय 'र सामाजिक वैवार सब किस्या न किस्या कायदा में बंध्या थका है। बात, वैवार, रैण-सैण रा अै कायदा ईज परंपरावां बाजै। अै परंपरावां अेक मिनख अर अेक परिवार सू सरु होय 'र उणीज परिवार तक सुकड़ीज 'र ई रैय सकै अर समाज रा दूजा लोगां री मान्यता पाय 'र सारा ई समाज री, खेत्र री परंपरा भी बण सके। अै परंपरावां परिवार अर छोटा समूह सू निकळ 'र बडै समूह अर खेत्र री परंपरा बण जावै। असी परंपरावां ई आगै जाय 'र उण खेत्र नै समाज री संस्कृति बाजै। संस्कृति इ उणी समाज अर खेत्र री सोच, विचार, वैवार नै उणां री दीठ व्हिया करै। बां परंपरावां अर संस्कृति रै आधार माथै ईज उण समाज अर खेत्र रो बरताव अर वैवार व्हिया करै। मिनख सरुआत सू ई प्रगतिशील जीव है। जद सू स्मिस्टी सरु हुयी, तद सू आज तलक मिनख री जीवणचर्या अर सोच, विचार अर वैवार में केई बदळाव व्हिया अर आज ई व्है रैया है। यो बदळाव कदैई सकारात्मक होवै है तो कदैई नकारात्मक भी व्है सकै। सकारात्मक बदळाव ई परंपरा अर संस्कृति रो विकास बाजै।

आपणो देस न्यारी-न्यारी संस्कृतियां अर परंपरावां री भेळप रो देस है। अठै हरेक राज्य री न्यारी-न्यारी सांस्कृतिक ओळखाण है। इणमें राजस्थान तो आपरी रंगीली तबियत सू ईज पिछाण्यो जावै, पण जियां-जियां तकनीक अर विग्यान रो विकास हुयो, बियां-बियां अेक खेत्र अर समाज रा लोगां रो दूजा खेत्र अर समाज रा लोगां सू मेळजोळ अर वैवार रा अवसर बदळावा लागग्या। ई मेळ-मिलाप सू यां खेत्रां रा सांस्कृतिक मूल्यां रो आपसी लेण-देण व्हैणो सरु व्हैग्यो। ई सू लोगां रै रैण-सैण, खाण-पीण, विचार-वैवार में खासो बदळाव आबा लागग्यो। इणसू परंपरावां में बदळाव रै साथै सांस्कृतिक विकास भी हुयो अर समाज में आधुनिक अर तकनीकी स्तर माथै भारी आंतरो भी दीख्यो।

आपणा देस अर वैसेस करनै राजस्थान री घणकरी परंपरावां महिलावां पे केंद्रित निजर आवै अर आवै भी क्यूं नीं! अेक महिला परिवार री धुरी अर समाज री रीठ व्है। कैवै है—अेक

पुरुष कोरी अेक इकाई ईज व्हे, पण अेक महिला अेक पूरी संस्था व्हे। इणीज वास्तै किणी भी संस्कृति रा बेसी भाग में महिलावां री भूमिका घणी महताऊ होवै। अेक महिला ईज मिनख री पैली गुरु व्हे। अेक टाबर रै जलम रै पछै उणनै मां जो भी बरताव, वैवार सिखावै या यूं कैवां कै टाबर नैं संस्कार देवै, बो परंपरा अर संस्कृति नैं हस्तगत करणो ईज व्हे। ई बात रो अरथ आपां यूं भी लगा सकां कै हर परंपरा महिला रै हाथ सूं निकळ'र ई आगली पीढी तांई पूगै।

मतलब समाज री घणकरीक परंपरावां अेक महिला रै जीवण पर बेसी प्रभाव न्हाखै। परंपरावां अर संस्कृति उण समाज री नित रोजरी चर्या भी व्हे अर उणां री पूजा-पद्धति, खाण-पीण, ओढण-पैरण रो तरीको भी व्हे। जितरा भी बरत-वास, पूजा-नेम, रीत-भांत होवै उणां में महिलावां री ई खास भूमिका दीखै। जिण बात, वैवार सूं महिलावां बेसी प्रभावित व्हे, बां बातां नैं समझणो, उणां रो समाज पे पडबा वाळो आछो-बोदो प्रभाव अेक महिला ईज नेडै सूं समझ सकै।

मिनख सरू सूं ई ईस्वरीय सत्ता सूं भै खावै। ई कारण आपणा बडेरा आपणी परंपरावां रो पक्कायत पाळण करावा सारू उणां नैं धरम री खौळ पैरायी। जीवण जिण सोळा संस्कारां में बंट्योडो है, उणां संस्कारां नैं अपणावा रै वास्तै उणां नैं भी धारमिक रंग दियो।

अै बरत, पूजा री बेसी परंपरावां तो समाज री भलाई सारू ईज व्हे अर प्रकारांतर सूं परकत री हेताळू पण व्हे। बारै मिस रूखां सूं प्रेम अर उणां रै जीवण सारू महत्त्व बतायो जावै। नीम, पीपळ, बड, आंवळी, कैळ रो पूजन करनै रूखां रो महत्त्व बतावा री ई खैचळ करी जावै। चांद, सूरज, नदी अर पोखर रो पूजण जळ अर परकत री दूजी चीजां, नखतरां रो महत्त्व समझावै, सिखावै। पण कीं परंपरावां नासमझी कै बगत री जरूरत मुजब व्हे सकै। किणी बगत जरूरी नै सही री व्हे पण बगत निकळ्यां पछै उणां रो कोई महत्त्व नीं रैवै। बै अेक कुरीति बणनै समाज में सडांध फैलावा लाग जावै। असी परंपरावां सतीप्रथा, बालविवाह, औसर-मौसर, डायजो, नाताप्रथा, आंटो-सांटो, बहुविवाह जिसी कुरीतियां, जिणां रो समाज पे तो बुरो प्रभाव पडै ई पडै, पण महिलावां री तो जिनगाणी ई दोरी व्हे जावै। कैवै है कै जो भोगै बो ही जाणै। महिलावां ई सब थितियां नैं घणै नेडै सूं देखै, भोगै तो अणां पे अधिकार सूं कोई भी बात बै ईज कर सकै।

साहित्य सरू सूं ई समाज री आरसी बाजै। जका ई लिखारा व्हिया बै समाज री आछी-बोदी बातां नैं मिनखां साम्हीं लावा री खैचळ करता रैया। पण म्हें ऊपर भी मांड्यो अर अठै फेरुं कैवणो चावूं कै भलाई आपणो समाज पुरुस प्रधान रैयो है, पण संस्कृति अर परंपरावां नैं निभावा अर आगै बधावा री खैचळ महिलावां ईज करती रैयी है। तो उणां रो बखाण भी महिलावां ईज बेसी सुथरा तरीका सूं कर सकै। इणीज कारण महिलावां रा लेखण री भूमिका लूठी व्हे जावै।

वैदिक काल में ई महिला लेखण री बहुतायत रैयी व्हेला, पण उणरा बेसी प्रमाण देखबा में नीं आवै। उण बगत रा साहित्य रो रचाव भी संस्कृत भासा अर पछै पाली, प्राकृत में ईज मिलै। वैदिक काल रै पछै महिलावां री सामाजिक स्थिति में केई बदळ्या व्हिया। महिला नैं दोयम दरजो मिलबा लागग्यो हो, पण फेर भी समाज रै पेटै आपरी जिम्मेवारी निभावा में महिलावां लारै नीं रैयी। भक्तिकाल में मीरां बाई, समान बाई अर केई जैन साधव्यां अर छत्र कुंवरि, सूरज कुंवरि जिसी लेखिकावां उणी समै रै समाज री थिति रै मुजब लेखन कीधो। सबळ नै ठावी परंपरावां नैं अपणाबा रै साथै बोदी परंपरावां नैं छोटतां बारी दीठ उणां रै लेखन में दीखी।

आधुनिक काल में लेखिकावां री अेक मोटी सूची है जो आपरै लेखन सूं सांस्कृतिक अर पारंपरिक विकास अर समाज नैं आरसी दिखावतो लेखन करवा री खैचळ में लगोलग लिख रैयी यहै। आज री लेखिकावां परदै सूं बारै आय र आपरो मून तोड़्यो है। बै अेक सांतरे लेखन रै माध्यम सूं समाज री आंख्यां खोलबा अर केई नवाचारां नैं जीवण में अपणाबा री अणथक मैणत कर रैयी है।

राणी लक्ष्मीकुमारी चूंडावत सूं सरू हुयी आ जातरा केई पड़ाव पार करती थकी आधुनिक साहित्य रो परमाण समाज साम्हीं राख्यो है। डॉ. तारा लक्ष्मण गहलोत, कमला कमलेश, सावित्री चौधरी, प्रेमलता जैन, प्रेम जैन, डॉ. प्रभा ठाकुर, डॉ. सुखदा कच्छवाह, चांदकौर जोशी, सुंदर पारख, हुसैनी बोहरा सहित केई अस्या नांव है, जे महिलावां रो प्रतिनिधित्व करता थकां आपरै लेखन में म्हांरी संस्कृति अर परंपरावां रो ऊजळो पख समाज अर नूवी पीढी रै साम्हीं मेलता थकां कुरीतियां अर दुस्परिणामां सूं सावचेत करती रचनावां रो रचाव पूरी खिमता रै साथै कीधो। इणां रै अलावा शिक्षा अर आधुनिक तकनीकी विकास सूं हुया बदळाव नैं भी स्वीकारवा री दीठ पेदा करवा री खैचळ भी उणां रा साहित्य में दीखी। ई बगत री लेखिकावां री ई खैचळ रो यो परिणाम व्हियो कै इणां रै बाद री नूवी लेखिकावां मांय अस्या अणछूया विसयां री हूंस बधी अर उणां रो लेखन समाज रा थोप्या गया बेहूदा कायदा री कैद सूं बारै निकळ र नूवी लेखिकावां अस्या अणछूया विसयां माथै आपरी कलम चलाई जका विसय महिला तो महिला, पुरुस लेखन में भी वरजित अर उपेक्षित हा। इणी उपेक्षा रै कारण आपणी संस्कृति अर परंपरावां रो बहाव रुकग्यो अर अेक खाडै में भर्या पाणी ज्यूं म्हारो वैचार अर विचार सड़ांध मारबा लागग्यो हो।

ई पीढी रै पछै राजस्थान में राजस्थानी लेखिकावां री अेक लांबी पांत त्यार हुयी। अै लेखिकावां आपरी बात पूरा दमखम सूं राखबा खातर साहित्य री गद्य-पद्य री केई नूवी-जूनी विधावां में आपरी कलम चलावणी सरू कीधी। यां विधावां में गीत, छंद, दोहा, कविता, गजल, कहाणी, लघुकथा, उपन्यास, डायरी, रेखाचित्र, संस्मरण, यात्रा-वृत्तांत, आलेख जिसी केई विधावां भेळी है। लेखिकावां रा केई नांव अबै साम्हीं आवा लाग्या जकी कोई अेक विधा या बेसी विधावां में सिरजण कर रैया है।

बां नांवां में (नांव अकारादि क्रम में लिख्या है, या सूची लेखिकावां री वरिष्ठता निर्धारित नीं करै) अंकिता 'कागदांश', अनिता जैन 'विपुला', अभिलाषा पारीक, अलका अग्रवाल सिगतिया, आशा पांडेय ओझा, आशा शर्मा, उषाकिरण, उषा प्रजापत, ऋतुप्रिया, कविता किरण, कमला जैन, कामना राजावत, किरण राजपुरोहित 'नितिला', कृष्णा आचार्य, कृष्णा कुमारी, कीर्ति परिहार, गीता जाजपुरा, गीता सामौर, जेबा रसीद, दीपा परिहार 'दीप्ति', नीलम पारीक, प्रकाश अमरावत, प्रीतिका पुलक, पूर्णिमा मित्रा, बसंती पंवार, भारती व्यास, मंजू किशोर 'रश्मि', माधुरी मधु, मधु सोनी, मानसी शर्मा, मीनाक्षी बोराणा, मीनाक्षी दवे, मोनिका गौड़, राजेश दुलारी सांदू, रेखा लोढ़ा 'स्मित', डॉ. रचना शेखावत, डॉ. रेखा व्यास, रेणुका व्यास 'नीलम', विद्या भंडारी, शकुंतला शर्मा, शारदा कृष्ण, शीला संचेती, श्यामा शर्मा, संजू श्रीमाली, संतोष चौधरी, संतोष मायामोहन, सिया चौधरी, सीमा भाटी, सीमा राठौड़ 'शैलजा', सुंदर पारख, सुनीता बिश्नोलिया, सुमन पड़िहार, सुमन बिस्सा, सुमन मनोत जैन आद है। इणां रै अलावा भी केई नांव व्हेला, उणां सब रो अठै उल्लेख करणो दोरो है।

आं सब लेखिकावां री अेक ईज खैचळ रैयी कै म्हारा सनातन सांस्कृतिक मूल्यां नैं बचावता थकां आज रा आधुनिक बदळावां नैं अपणाणो अर जका कायदा समाज री प्रगति में बेडियां बणै बांनै आपरै लेखन री धार सूं काटणी। ई सब खैचळ यो परिणाम रैयो कै महिलावां कछुवे ज्यूं आपरी खोळ में समटी थकी ही, जिणसूं बै बारै निकळबा री हिम्मत अर जुररत करबा लागी। अेक पांवडो ई सही, पण बै बारै काढ्यो तो सही। नीं तो अजै ताई महिलावां खुद री बणायोड़ी कैद में ईज जाळा में उळझी माकड़ी ज्यूं उळझी थकी ही। म्हें जाणू हूं कै आ सब खैचळ ऊंट रै मूंडे में जीरो रै उणमान है। हाल भी घणकरी लुगायां ई मक्कड़जाळ में ईज फंसी है, पण आज दो पग काढ्या है, कालै सौ काढैला। यो पतियारो भी है।

अबै मूळ बात करां तो यां लेखिकावां आपरै लेखन रै माध्यम सूं सूत्योडा समाज नैं हेलो पाड़'र जगाबा रा साचा जतन कीधा है। बै सनातन संस्कृति नैं ई सबद दिया तो नूवी दीठ रो भी मान राख्यो। बै जड़ां सूं जुड़ाव भी राख्यो तो पींजरा नैं तोड़'र उडबा रा जतन ई कीधा। माटी सूं तिलक भी कीधो तो आकास नैं बाथां में भरवा री ई जबरी खैचळ कीधी। आपणी लोक संस्कृति अर उच्छब-तिंवार नैं ई गीतां में गाया तो प्रेम रो ऊजळो रंग भी कवितावां अर गीतां में भस्यो, जकां सूं आपणी संस्कृति जीवंत रैय सके। समाज री विसंगतियां पे भी करारी चोट करतो रचाव भी कविता रै माध्यम सूं व्हियो है। कहाणियां में तो आं बरसां में जबरो ई प्रयोग देखबा में आयो। सादीसुदा लोगां री असी बातां जिणसूं आपणै समाज रा ताना-बाना में ई टूटण आवा लागी ही, बां बातां नैं भी कहाणियां में उगेरी। पश्चिम रा प्रभाव में बिना ब्यांव रै साथै रैवा री हूंस, ब्यांव पछै निभावा री खैचळ कम नैं तलाक री बेसी नौबत रै पाछै रा कारणां नैं ई कहाणियां रै माध्यम सूं समाज सामर्हीं मेलबा रा महतारु प्रयास व्हिया है। नाता अर आंटा-सांटा जैडी कुरीति पे प्रहार करती कहाणियां अर उपन्यासां रा रचाव सूं आपणी संस्कृति रै बोदा पख नैं कम कर'र उणरा ऊजळा पख रै विकास री खैचळ महतारु है।

आधुनिक लेखिकावां साच कैवां तो आपरी जीयाजून सूं अेक जुद्ध लड़ती थकी खुद रै अस्तित्व रै साथै पूरै समाज रै अस्तित्व नैं सांतरो राखबा रो अणथक प्रयास कर रैयी है। औ प्रयास आज भलाई थोड़ो कमजोर लाग सकै, पण आ खैचळ आबा वाळा काल री मजबूत नींव त्यार कर रैयी है। आज री लेखिकावां परंपरागत, उपदेशात्मक लेखन री लीक छोड़'र नूवी दीठ अर नूवा बुणगट री रचनावां रो रचाव करै, जको लोगां री मनगत ई कैवै अर उणां रै हिरदै नैं परसबा रो सामरथ भी राखै। जटै तक साहित्य लोगां रै भणबा में नीं आवै, उणरो प्रभाव किस्तर पड़ सकै। ई वास्तै इस्या साहित्य री आज जरूरत है जको लोगां में भणवा री रुचि जगावै ताकि लोग ई उण साहित्य नैं भणै अर आपणी परंपरावां अर संस्कृति रो महत्त्व समझै। कुरीतियां री बेडियां नैं काटबा री हामी भरै।

आधुनिक महिलावां रो लेखन संस्कृति में आया संक्रमण नैं उजागर करबा री कोसिस भी करै। आज सोसल मीडिया, इंटरनेट रै कारण पश्चिम रो बेसी प्रभाव आपणी संस्कृति नैं गंदलो कर रैयो है। केई अस्या बदळाव आज री पीढी री जीवणचर्या में आय रैया है, जका किणी भी कीमत पर अपणाबा लायक नीं है। आपणी आज री लेखिकावां अस्या विसय ई आपरै लेखन में भेळा कस्या जिण साथै पुरुस लेखक भी बहुतायत में खुल'र नीं लिख्यो। जे लिख्यो भी तो उणां री अेक न्यारी दीठ ही, जकी महिला लेखन री दीठ सूं अेकदम अलग ही। आं विसयां में लिव-इन

रिलेशनशिप, सेरोगेसी, विवाहेतर संबंध, बलात्कार, शारीरिक शोषण, समलैंगिकता, वर्जिनिटी जिस्या विसय है। इणां पे पूरी जिम्मेवारी अर पूरी मर्यादा रो पालण करता थकां कश्चोड़ो लेखन आपणी संस्कृति रै बचाव अर विकास री ई खैचळ है।

जद कस्या ई समाज में अनाचार अर अनैतिकता बधबा लागै, जद स्वारथपरता रिस्ता पे हावी व्हे तो नैछै ई यो उण समाज रो सांस्कृतिक पतन ईज बाजै। राजस्थान री चावी-ठावी लेखिकावां इस्या पतन माथै ई आपरी कलम चलाय र समाज नै जागरूक करवा री लगोलग कोसिस कीधी है। कन्या भ्रूणहत्या अर यौन शोषण जिस्या विसय पर लेखिकावां री बदोतर रचनावां भणी जा सकै, जकी समाज नै पतन सूं रोकबा रै वास्तै अेक मजबूत खंबा ज्यूं खड़ी है। हालांके दूसरा माध्यम जियां टीवी, मोबाइल, कंप्यूटर, इंटरनेट, फिल्मां आद साहित्य सूं बेसी प्रभावी है, पण फेरू ई साहित्य लोगां पे आपरो असर छोडै है। ई रो असर भलाई मोळो होवै, पण यो प्रभाव स्थाई व्हिया करै। इणीज वास्तै साहित्य री भूमिका महताऊ है। लेखिकावां रो लेखन साहित्य में तो आपरो ऊंचो ठाव राखै ईज है, इणरै साथै ई संस्कृति अर परंपरावां रै विकास में ई खासो योगदान लखावै।

यूं तो आज री लेखिकावां आपरी बात कैवा में मरजादा रो लंघण नीं करै। बै आपरी बात तरीकै सूं इसारा में ईज कैवण री जुगत करै। पण कैवै है—फूल रै लारै कांटा व्हेणो लाजमी है। यूं ई कोई-कोई लेखिका बेसी चाव में बोलडनेस रै नांव या अत्याधुनिकता रै प्रभाव में कदै-कदैई थोड़ा खुला सबदां में आपरी बात कैय देवै या साच नै ज्यूं को त्यूं बतावा री खैचळ में अस्या चितराम मांडे जिकां सूं कोई नै मरजादा रो लंघण लाग सकै। म्हारो सोचणो है कै आपां नै असी स्थिति सूं बचणो चाईजै। आज जस्यो बगत चाल रैयो है, इणमें समाज में महिलावां अेक दळदळ सूं निकळ रै अेक मजबूत जमीं पे आपरा पग जमावा री कोसिस कर रैयी है। यौन शोषण अर कन्या री जलम रै पैली हत्या, बलात्कार जस्या दंस सहता थकां ई समाज में आपरी थिति नै बेहतर करवा सारू प्रणप्राण सूं जुटी थकी है। अस्या बगत में महिला रो जीवण खांडै री धार पे चालबा जस्यो है। उणी दसा में कलम अर भासा रो सावचेती सूं बरतारो करणो अर केई विसयां पर जोरदार पण मरजादा में रैय रै लिखणो बगत री मांग है। म्हानै ई री पूरी खैचळ करणी चाईजै।

केई चावी-ठावी लेखिकावां री केई चावी-ठावी संस्कृति अर परंपरावां रो पोसण करती अर कुरीतियां रो समूळ खातमो करवा री लोगां में जागरूकता पैदा करती केई सारी पोथ्यां रा नांव म्हारै ध्यान में आवै, पण अठै उणां पोथ्यां रो नांव लिख पावणो संभव नीं लागै। व्हे सकै ई खैचळ में केई जरूरी नांव छूट जावै, इणीज वास्तै म्हनै पोथ्यां रो उल्लेख करणो चोखो नीं लाग रैयो है। पण आ बात म्हें पूरै विस्वास सूं कैय सकूं कै म्हारै राजस्थान री निरवाळी संस्कृति रै संरक्षण अर विकास में महिला लेखन री महती नै गरब करवा जोग भूमिका अर योगदान रैयो है। म्हनै आसा है कै अबार तक जकी लेखिकावां रा नांव अर काम साम्हीं आया है अर दूजी नूवी लेखिकावां भविष्य में आवैला, बै सब आपणा समाज नै नूवी दीठ अर दरसाव देंवता थका आपणै विरासत में मिली संस्कृति में बधापो करण में आपरी पूरी खिमता सूं लगोलग लागी रैय रै आपरो योगदान देवैला।





डॉ. शारदा कृष्ण

आधुनिक राजस्थानी महिला काव्य में प्रगतिवादी सुर

लोक में लुगाईं री प्रज्ञा-प्रतिष्ठा वेद सूं प्रमाणित है। भरतखंड रो औ बो ईज आर्यावर्त है जटै वैदिक ऋषियां रो उद्घोष स्त्री री महताई बखाणतां ऊंचै सुरां उच्चर्यो गयो हो—‘यत्र नार्यस्तु पूज्यते रमन्ते तत्र देवता ।’ इतियास रे पांवडां सोनलिया आखरां स्त्री री सिरजण-खिमता वेद मंत्रां, ऋचावां अर शास्त्रार्थ-चर्चावां पाण आज रै नूवै स्त्री-लेखन लग बरोबर प्रगटीजती रैयी है। ऋग्वेद अर अथर्ववेद में श्रद्धा, कामायनी, वैवस्वती, पौलोमी, वाची, रोयशा, ब्रह्मवादिनी, लोपामुद्रा आद ऋषिकावां मंत्र अर श्लोक रच्या है। वेद सूं आगै लौकिक संस्कृत साहित्य में केई प्रतिष्ठित रचनाकार सिरजणरत हुई। हिंदी में महादेवी वर्मा, सुभद्रा कुमारी चौहान री परंपरा में आज स्त्री लेखिकावां री अेक लांबी डीघी पांत सरावणजोग सिरजणा में रत है।

राजस्थानी रो महिला लेखन आदिकाल, मध्यकाल अर आधुनिक काल ताणी बिचै-बिचै अंतराल छूटतां पाण भी बरोबर अबाध गति सूं जारी है। आदिकाल में 12वीं सदी में झीमा चारणी रो उल्लेख मिलै। मध्यकाल में निर्गुण अर सगुण भगती धारा में रामकृष्ण भक्ति पदां री रचना करण वाळी अर समाजू चेतना जगावण वाळी अलेखूं महिला सिरजकां रो उल्लेख मिलै। जैन साध्वियां अर राजपरिवारां री राणी-राजकुमारियां तकातक साहित्य साधना में लीन ही। समान बाई, मीरां बाई रा पद आज भी घणै कोड सूं भगती भावां समाज में गाईजै।

मध्यकालीन राजस्थानी महिला साहित्य में भक्त कवयित्री मीरां बाई रो नांव सबां सूं सिरे मान्यो जावै जटै सूं राजस्थानी महिला-लेखन-जागरण अर चेतना रो प्रारंभ आपां मान सकां। पंद्रहवीं सदी में स्त्रीचेतना अर जागरण-जूझ री प्रतीक मीरां आपरै समै रै पितृसत्तात्मक समाज अर राजस्थान रा बंधणां री सबळी सांकळ तोडूंर आपरै सांकळपां, स्वायत्तता पाण आपरै प्रेय अर श्रेय नै समरपित रैयी। मीरां रचित पदावलियां अर भक्ति रचनावां में बां आपरै इष्ट नै ध्यावण अर पावण रै बिचै आवण वाळा किणी बंधण-बाधावां नै नीं सीकार्या। मीरां री आ द्रिढता अर संघर्ष-सामरथ आज री जुझारू अर लक्ष्य नै समरपित स्त्री री जीवटता रो बीज-मंतर है। मीरां रै पछै मध्यकाल में भक्त कवयित्रियां आपरै भगती पदां री सिरजणा अर भजनावलियां री रचना समैसार करती रैयी।

‘आशादीप’, पिपराली रोड, सीकर (राज.) 332001 मो. 9928743194

मध्यकाल अर आधुनिक काल रै अंतराल री वैचारिक मूर्च्छना अर सोच-समझ री मांदगी री जड़ता आजादी पछै स्त्री री नूवी चेतना अर चिंतन रै जागरण साथै टूटी। आखै जगत री आधी दुनिया आपरी मांयली पीड़ अर अमूझ नैं कागद माथै उतारण रो हिम्मत-हौसलो बपरायो। राजस्थान में आ चेतना मीरां पछै राणी लक्ष्मीकुमारी चूंडावत रै हियै हरफ मांडण दूक्या अर बां कहाणी-कथा, लोककथावां री सांतरी अंवेर आपरै सिरजण में करी। राजस्थानी में गद्य अर पद्य दोनूं विधावां माथै महिलावां आपरी कलम-कोरणी करी।

आधुनिक राजस्थानी महिला लेखन में कविता रै सीगै बात करां तो मीरां पदावलिवां पछै राजस्थानी कविता परंपरा रै खोळ्यै सूं बाँरै नीसर र प्रगतिवादी विचारधारा कानी पांवडा बधावती लखावै। संजोग-बिजोग, सिणगार अर रूप-वरणन माथै रीझती महिला-कविता अबै जथारथ अर सामयिक दुख-दरदां री पड़ताळ करण लागगी, क्यूँकै कविता मिनख रै भौतिक परिवेस सूं अळगी नीं होय सकै। कविता आपरै समै रो पड़बिंब हुवै। समाज में लुगाई री ठौड़ दोयम दरजै री मानीजण रै कारणै बीं रा दुख, दरद, पीड़, अमूझ अर अन्याव-अत्याचारां रै प्रतिकार री भावना बांरी विचारदीठ नैं प्रभावित करी।

प्रगतिशील कविता रो मूळ सुर सामाजिक, राजनीतिक अर आर्थिक बदळाव रो हुवै। आम आदमी रै दुख-दरद री बात, किसान री दसा अर सैंग भांत रा सोसण अर अन्याव री खिलाफत प्रगतिशील कविता रो आधार हुया करै। आजादी पछै सेठ-सामंतवाद रो विरोध, मजदूर-किसानां री दुख-दरद गाथा रो प्रगटाव कवितावां में होवणो सरू होयग्यो हो। समाजू विडरूपतावां माथै दायजो, पड़दा प्रथा, औसर-मौसर, बालविवाह, बुढापै में ब्याह जैड़ी कुरीतियां माथै रचनाकारां कलम चलाई। पारंपरिक छंदबद्धता सूं कविता मुगत होवण दूकी। थोड़ी और आगै बध र ऐड़ी कवितावां 'नई कविता' रूप में थरपीजण लागगी। इण कविता में गेयता, छंदबद्धता अर यति-गति, आरोह-अवरोह रो कोई बंधण कोनी हुवै। सीधी सपाट बात सैली रो सो रूप धारण वाळी आ कविता प्रयोगवाद री जमीं माथै ऊभी है। नूवी कविता रो नूवोपण इणरी नूवी अभिव्यक्ति अर भासा रै मुहावरै रै पाण है। मिनख, मिनखपणो, परिवेस में व्यापी सगळी अबखायां, अन्याव, छळछंद, लूट-खसोट जैड़ी सगळी समस्यावां नूवी संस्कृति री विशेषता या गुण-रूप नूवी कविता में दरसाया जावै।

राजस्थानी महिला काव्य री परंपरा अर प्रगति बिचाळै पुळ बांधण री भूमिका में आशादेवी शर्मा, तारा लक्ष्मण गहलोट, राजेशदुलारी सांदू, सावित्री डागा, जेबा रशीद, कमला कमलेश, प्रेमलता जैन, बसंती पंवार, सुंदर पारख आद कवयित्रियां रो सिरजण गिणीज सकै। आं सिरजकां री कविता परंपरागत कविता रै सुभाव नैं साथै परोटतां थकां नूवो विसय अर कथ्य अपणावती लखावै।

महिला काव्य री दूजी धारा में वै कवयित्रियां सामल होय सकै जकी नूवा बिंब-प्रतीकां अर नूवा भासा-मुहावरा अंगेजतां थकां नूवी कविता री तर्ज में आपरै सिरजण नैं नूवै शिल्प में नूवै भावबोध सूं जोड़ै अर साथै-साथै सिरजणा री समकालीन जमीं सूं आगै बधण री बात करै।

नूवी कविता रै कलेवर री इण भावछाया में शारदाकृष्ण, सुमन बिस्सा, मोनिका गौड़, संतोष माया मोहन, ऋतुप्रिया, रेणुका व्यास 'नीलम', रचना शेखावत, अभिलाषा पारीक 'अभि',

सीमा भाटी, मानसी शर्मा, कुसुम जोशी, कृष्णा आचार्य, लीला मोदी, किरण राजपुरोहित 'नितिला' आद कवयित्रियां रा नांव गिणावण जोग है।

भारतीय मनीषा सत्यं शिवं सुंदरम् अर विश्व कल्याण री भावना रा ऊंचा आदर्शां सूं ओत-प्रोत है। जीवणमूल्यां अर मिनखाचारै री मरजाद री अंवेर अठै रै साहित्य री मूळ भावना रैयी है। राजस्थानी महिला काव्य परंपरागत समाज री तिडकण नैं परोटतां थकां नूवै समाजू मूल्यां री बात आपरी जर्मीं सूं जुड़ाव राखतां थकां करै। मध्यकाल में नारी री पीड़ अर दयनीयता आधुनिक समाज में नीं सीकारीजी। नारी मुगती आंदोलन अर स्त्रीविमर्श री विचारणा बठै सूं उठ'र आज ताणी अेक बडो सामाजिक मुद्दो रचनाकार या आम आदमी नैं भी ऊंडै असर प्रभावित करै। अैडै बगत प्रगतिवादी कविता मजदूर, किसान अर स्त्री रै पख में समाज-सुधार रो सुर साध'र आगै बधी। नूवै अर आधुनिक राजस्थानी महिला लेखन में इण चिंतन अर विचारणा रो सूत्र केई काव्यकृतियां में प्रगट्यो है। प्रमुख काव्यकृतियां रो संखेप में विवेचन—

चंदाबरणी (आशादेवी शर्मा) 1971

राजस्थानी काव्यकृतियां में प्रकाशित पैली पोथी रूप में 'चंदाबरणी' अेक चावो संकलन है। इण कविता पोथी में राष्ट्रभक्ति, श्रृंगार अर प्रकृति-चित्रण री कवितावां साथै नारी जागृति अर चेतना रा सुर भी मुखर है। छंदबद्ध अर छंदमुक्त दोन्यूं भांत रा गीत कवितावां में लुगाईजात री मांयली पीड़, दरद, परबसता, लाचारी अर दोघाचिंती रा भाव प्रगट्या है। राग बिजोग साथै दारसनिक दीठ में आशा शर्माजी लिखै :

मैं चाल पड़ी पणिहारण,
पग में पायल बांधी रे
समदर भर्यो पड़्यो है,
म्हारी गागर खाली रे

स्त्री री सामरथ नैं चेतावती अेक कविता रा भाव इण भांत है :

कंवळी हो थे पण कोमलता,
थारो साचो नाप नहीं है
सुंदर हो थे पण सुंदरता,
जीवण रो अभिशाप नहीं है

उगाळी री उडीक (सावित्री डागा) 2004

सावित्री डागा राजस्थानी री समरथ कवयित्री है। आपरै पैलै कविता-संग्रै 'उगाळी री उडीक' में परंपरा सूं जुड़ाव राखतां थकां आधुनिकता अर प्रगतिवाद कानी बधती कवितावां बां रची है। बांरी कविता री जर्मीं राजस्थानी महिला काव्य में प्रतिरोध अर प्रतिकार री संभावना सिरजै। अठै कथ्य में नूवोपण, परिवेसगत संवेदनावां सूं जुड़्यो थको अर प्रभावी भी है। नूवा बिम्ब अर प्रतीक बरततां थकां सावित्रीजी भासा अर शैली रै सीगै भी सावचेत रैया है। स्त्री रै वजूद अर सबळ्यई नैं अन्याव अर शोषण रो विरोध सिखावतां बै लिखै :

सदियां सूं गोळ व्हेती म्हारी ओळखाण
नीं रैवैला गोळ
गोळ जिनसां में घाणी रै बळद ज्यूं
गोळ-गोळ फेरतां
थां म्हनें गोळ गींठी मत बणाओ।

‘उगाळी री उडीक’ रो शिल्प नूवो अर कथ्य प्रभावी है।

सुपनां रो सिणगार (राजेशदुलारी सांदू) 2002

इण काव्य-संग्रै में नारी रै सुपनां रो साज-सिणगार करती नूवी उम्मीदां अर संकळपां री सिरजणा नूवी काव्य-भासा में हुयी है। समाज में ऊंडी जडां जमायोडी स्त्री नै दायम दरजै धकेलण वाळी कूडी मानतावां अर मनगतां नै अेक सबळी, सुतंतर अर ऊरमावान स्त्री री ओळखाण रा भाव जगावती आं कवितावां रा बिंब अर प्रतीक भी ठावा है। धरती अर आकास रो स्त्री अर पुरुष रूप में मानवीकरण करतां बै चैतावै :

घणी जेज मत भाळै भोळी
इण आभै साम्हीं
अकडीज जावैली थारी घांटी
थूं निरख अर परख फकत इण जमीं नै
फगत आ थारै काम आवैला
जलम सूं मरण ताणी
इण सारू
अळगी रहजै आभै रै छळ सूं।

कैक्टस मांय तुळसी (तारालक्ष्मण गहलोत) 2001

इण कविता पोथी रै शीर्षक मुजब कवितावां लुगाईजात री जीवट जूझ अर जिजीविषा माथै रचीजी है। अठै तुळसी रो कैक्टसां बिचै सीधो सट्ट ऊभो रैवणो आंकसां बिचाळै ऊभो रैवणो है। कविता रा भाव प्रभावी प्रतीकां प्रगटावै।

धोरां पसरयो हेत (डॉ. शारदा कृष्ण) 2004

गीत, गजल अर कवितावां में नूवा प्रयोग अंगेजतां थकां शारदा कृष्ण री सिरजणा राजस्थानी महिला काव्य में आपरी अेक निकेवळी ठौड़ बणावै। ‘धोरां पसरयो हेत’ रै पत्तैप माथै आदरजोग मालचंद तिवाडी लिखै, “शारदा कृष्ण रै कवि री मूळ प्रकृति गीत री है। बारै गीतां में ही तो बांरो कवि रूप घणै सेंजोरै ढाळै साम्हीं आवै। पाठक मन री काव्य-स्मृति बांरी कविता रै वस्तु-विन्यास, छंदप्रयोग अर भासाई ठाठ रै सैंग औजारां सूं पाछी चेतन हुवण दूकै अर बो शारदा कृष्ण री कविता रै मिस आधुनिक राजस्थानी कविता रै केई गम्योडा सुरां री झणकार ई आपरै कानां मांय मैसूस करण लागै।” मुक्तछंद अर छंदबद्ध दोनूं भांत रो सिरजण इण संग्रै में मूल्यां री छीजत, कुदरत अर मिनख बिचै बधतो आंतरो, टूटता आस-भरोसा, रिस्ता-नातां रो छीजतो अपणेस, मिनख मनां में छळ-छदम अर परायैपण रो पसराव, घर-गळी-गांव री सून्याड आं कवितावां रो विसैगत बरणाव है।

सिमरण अर जळविरह (संतोष माया मोहन) 2004, 2008

साहित्य री कविता-विधा में 'सिमरण' री कवितावां आपरै कथ्य अर विचार-दीठ में निकेवळी अर घणमोली है। संतोष माया मोहन री कवितावां मांय अरथविस्तार घणो व्यापक अर डीघो दायरो अंवरै। आं कवितावां में घणै धीजै सूं दारसनिक विचारणा साथै स्त्री री अस्मिता नैं आपरै मांय भीतर, बारै अर वीं रा बीजा रूपाकारां मां, बेटी, बहू, सास, नणद, भोजाई अर बहन रा रिस्तां में प्रगटावै। कवयित्री लिखै :

पिता थे

थे ई जामण जाया बीर

थे म्हारी भावज घर गीगला

थे थिर अम्बर म्हारा बाप

चूंधो म्हारी भावज रा हांचळ्यां।

सूरज रो सनेसो, अंतस भर्यो उजास अर आंतरो झीणो है (डॉ. सुमन बिस्सा)

सुमनजी रो पैलो कविता-संग्रै 'सूरज रो सनेसो' 1999 में छप्यो। इणरै पळे 'अंतस भर्यो उजास' 2004 अर 'आंतरो झीणो है' 2013 में साम्हीं आया। सुमनजी री काव्य-भाषा घणी परिष्कृत अर मौलिक है। चिंतनप्रधान विसय-वस्तु नैं निकेवळा बिंब-प्रतीकां रै प्रयोग सूं बै असरदार ढंग सूं आपरै कविता-कथ्य नैं परोटै। सामयिक सोच री बडी कविता बा हुवै जिण मांय बीं बगत री चिंतावां, पीड़ अर दौरप रा सुर साव परतख प्रगटै अर सुमन बिस्सा इण सीगै तीनू ई कविता-संग्रहां में सावचेत लखावै। 'निवण है थारै तप तेज नैं', 'हांचळ रो हेज' जैडी कवितावां इणरी साख भरै। नींव अर गुम्बद रै प्रतीकां में बै मायतां अर संतान री उपेक्षा-अपेक्षा भाव इण भांत प्रगटावै :

— आ बात सुण 'र नींव नीं बोली

पण, धीमै-सीक अेक भाटो सिरकायो

गुम्बद डगमगायो

भुंवाळी खाय 'र कीं संभळ्यो

फेर धीमै-सीक फुसफुसायो

औ अचाणचक भतूळियो कटै सूं आयो!

अठै परंपरागत कविता रा वात्सल्य भावां सूं अलायदा अेक नूवो चेतावणी भर्यो भाव उकेरीज्यो है। अठै कविता प्रगतिशील हुय जावै।

बखत री बातां, बोली रा बाण, मुखर मून अर सूळी ऊपर सेज (डॉ. कविता किरण)

मंच अर कागद दोन्यां माथै आपरी कलम री कोरणी री करामात प्रगटावतां थकां कविता किरण गजलां, गीतां री सखरी सौगात लेय 'र राजस्थानी महिला काव्य री जागती जर्मीं माथै अवतरै। कविता रो पैलो गजल-संग्रै 'बखत री बातां' 2003 में, 'बोली रा बाण' अर 'मुखर मून' 2006 में अर 'सूळी ऊपर सेज' 2012 में छप्यो। च्यारू गजल-संग्रहां में छोटी बहर री असरदार सीधी सरल भासा वाळी गजलां कविताजी रची। राजस्थानी महिला काव्य में गजल रो औ नूवो प्रयोग कविता किरण री कलम रै पाण कोरीज्यो। कविता किरण री गजलां मिनखपणो, जीव-

जगत री जूण-जात्रा, मूल्य अर मरजाद गमावती समाजू अबखायां अर विडरूपता री विसय-वस्तु नें केंद्र में राख 'र रचीजी है। छोटी बहर री काया में बडो अर ऊंडो अरथ भाव, नूवा बिंब-प्रयोगां मांय अवतरयो है। बै लिखै :

गूंगा समझ रिया हो म्हानै
होट सिंया गम खावण सारू
कितरा कूड़ साच करिया है
सत रो साथ निभावण सारू

आभै री आंख्यां अर बगत रो बायरो (डॉ. जेबा रशीद) 2004, 2015

जेबाजी रा दोन्यूं संग्रै पारंपरिक कविता रै कलेवर नैं नूवी साज-सज्जा साथै राजस्थानी में उर्दू रो सहज सामंजस्य करतां भासा रै प्रयोग में संजोवै। जेबाजी कहाणीकार रूप में ओळखीजै, पण कविता-कोरणी में भी बांरो सुभाविक सिरजण-पख उजागर हुवै। कविता री उत्पत्ति रै तथ नैं सिरजतां बै लिखै :

इच्छावां धूळ ज्यूं / कीं फूल-सी / पंछियां रै लारै / उडै मन पंछी ज्यूं / तद अफसाना सी जलमै है कविता।

अटै 'अफसाना' अर कविता रो मेळ 'कविताई' नैं भासा प्रयोग रै सीगै 'अफसानियत' सूं जोडै।

सपना संजोवती हीरां अर ठा नीं कद हुज्यावै प्रेम (ऋतुप्रिया) 2013, 2018

ऋतुप्रिया री 'सपना संजोवती हीरां' साहित्य अकादेमी, दिल्ली सूं पुरस्कृत हुई है। सहज सरल लहजै में छोटी कवितावां जनजीवण सूं जुड़्या मुद्दां री विसय-वस्तु साथै घणी प्रभावी बण पड़ी है।

ज्यूं सैणी तितली (किरण राजपुरोहित 'नितिला') 2011

किरणजी रो औ पैलो कविता संग्रै नूवै बुणगट अर टाळवै शिल्प नैं अंगेजतां भासाई मटोठ रो जागतो उदाहरण है।

हथेळी में चांद अर अंधारै री उधारी अर रीसाणो चांद (मोनिका गौड़) 2012, 2017

मोनिका गौड़ आधुनिक राजस्थानी महिला काव्य रो उल्लेखजोग नांव है। मंचां माथै राजस्थानी कविता री लोकप्रियता रै बधेपै में मोनिका री प्रस्तुति प्रभावी हुवै। परंपरा अर आधुनिकता रै सांगोपांग मेळ अर न्यारै-निरवाळै भासा-बिंबक-प्रतीकां सूं मोनिका आपरै कथ्य अर विसय-वस्तु नैं पाठक अर श्रोता रै हियै ऊंडै भावां चितावै। आपरी कविता 'हारी नीं है स्त्री री हूस' में 'फीनिक्स' रै ओळवै अेक नूवै बिंब अर प्रतीक री अवतारणा करतां मोनिका लिखै :

हर बार हारती स्त्री
बावडै आपरी भसम सूं
फीनिक्स पाखी री जात
क्यूं कै हारी नीं है जुगां सूं
स्त्री री हूस।

आधुनिक सूँ उत्तर आधुनिक काल कानी बधतो राजस्थानी महिला काव्य प्रगति अर प्रयोग रा पांवडा भरतो नित नूवै बधेपै सधतो जा रैयो है। इण ढाळै सिरजणा रै समचै नूवी कवयित्रियां री अेक और पांत आज कविता लेखन रै छेत्र में नूवै तेवर अर अभिव्यक्ति री अंजसजोग ऊरमा साथै ऊभी हुयी है, जिणमें अभिलाषा पारीक 'अभि', सीमा भाटी, मानसी शर्मा, रेणुका व्यास 'नीलम', कुसुम जोशी, तारकेश्वरी सुधि, गीता जाजपुरा, कृष्णा आचार्य, स्व. रचना शेखावत, दीपा परिहार, प्रेम जैन, डॉ. लीला मोदी, करुणा दशोरा आद कवयित्रियां आपरै प्रकाशित काव्य संकलनां सूँ राजस्थानी महिला काव्य जात्रा में घणमोला पड़ाव रच्या है।

प्रकाशित पोथी रूप में आयोडै सिरजण रै अलावा भी आखै राजस्थान रा न्यारा-न्यारा हलकां में राजस्थानी कविता नूवै ढंगढाळै आज री कवयित्रियां री कवितावां बीजी राजस्थानी पत्र-पत्रिकावां में बरोबर प्रकाशित होय रैयी है, जिणमें सिया चौधरी, अंकिता पुरोहित, प्रियंका भारद्वाज, अनिता जैन 'विपुला', सपना वर्मा, सुनीता बिश्नोलिया, कामना राजावत, गीता सामौर, शकुंतला शर्मा, सुमन परिहार आद रा नांव गिणावण जोग है।

प्रकाशित कृतियां समेत आपरै प्रभावी सिरजण लेखै प्रवासी कवयित्री सुंदर पारख, पूजाश्री रा काव्य संकलन ई कविता-सिरजणा रै नूवै मानदंडां रच्या गया है। शकुंतला सरूपरिया, बसंती पंवार, डॉ. प्रकाश अमरावत, श्यामा शर्मा, कृष्णा कुमारी, डॉ. लीला मोदी जैड़ा नांव राजस्थानी महिला कविता में सरावण जोग इजाफो करणजोग गिणीजै।

डॉ. प्रेम जैन री कविता पोथी 2012 में प्रकाशित 'रोशनी रा रूख' में सामल कवितावां परंपरा अर आधुनिक कविताई रै बिचाळै आपरो मौलिक चिंतन प्रगटावै। वरिष्ठ लेखिका कमला कमलेशजी रो कविता-संग्रै 'भांत-भांत रा रंग' नांव सूँ 2018 में प्रकाशित है। कमलाजी मूलतः गद्य लेखन घणो कस्यो है। कविता लेखन में बांरी नूवी दीठ सरावण जोग है।

अटै होय सकै केईक मानीजता अर सखरी कलम-कोरणी रा उल्लेखजोग नांव छूटग्या हुवै, इणरो औ तात्पर्य कतई नीं समझ्यो जावै कै बांरै सिरजण में कोई गिणावण जोग बात कोनी ही। आ म्हारी चूक अर दीठ री व्यापकता में कमी कथीजैला।

गीरबैजोग बात आ है कै जिण राजस्थानी महिला लेखन अर खास तौर सूँ कविता माथै कदैई कोई जिक्र-चरचा या बंतळ साहित्य जगत में सुणीजी कोयनी, नीं आलोचना, समीक्षा में सामल हुयी, बा कविता अर बो लेखन आज नूवै कविताई मुहावरै अर दीठ नै आपरी सिरजणा में घणै सायरपणै संजोवै। आ खिमता दिन दूणी रात चौगणी बधै अर सवाई हुवै।

आखै जगत रो महिला सिरजण साहित्य री लगैटगै सगळी विधावां में घणो खरो, खांटो अर सखरो रच्यो जा रैयो है। राजस्थानी कवयित्रियां रै अध्ययन, निरीक्षण अर अनुभव रो दायरो अबै देस-दुनिया री सम-सामयिकता अर जुगबोध सूँ जुड़तां थकां आंगणै सूँ आभै ताणी पूग जावण रा जतन करतो आगै बधै अर आपरी ऊरमा पाण दुनिया रै सशक्त, सामरथवान अर सजग सिरजण री पांत में ओळखीजै, इणी सुभकामना साथै। जै राजस्थान, जै राजस्थानी।





रूख भायलो

पीपळी री सीतल छाया
अर बड़ रै नीचै बैठ
घड़ी-दो घड़ी रो बिसराम
हार्या-थाक्या मिनख नैं
जाणै फेरूं नूंवी ऊरजा सूं
भर जावै है...

नीमडै रै डाळ पर घाल्या
सावण रा हींडा
लहरियै में सजी-धजी
सुहासणां रै हिवडै मांय
अपार हेत-प्रेम भर जावै है...

खेजड़ी री सांगरी
कैर अर गूदां री लूंजी
किणरै मन नैं कोनी भावै
बबूल्या री पातड़ियां
मौज सूं बकरियां खावै
अर गूंद सूं मां
घणा स्वाद लाडू बणावै...

रूखां सूं रीती आ धरती
बंजर अर उजाड़

तपता जेठ रो
सीतळ बायरो हो
या हो फेरूं
सावण में बरसतो मेह
सारी बरकत
हर्या-भर्या रूखां सूं ईज
आवै है

रूख
मिनख रै जीवण रो
प्राणदाता होवै है
साची कैयग्या बडेरा
औ रूख भायलो होवै है।

वीर दुर्गादास

राजस्थान रा साचा सपूत
वीर दुर्गादास
इण धरती रा लोग
करी थांसूं
वीरता री आस
इणरी आन-बान री
राखी थे लाज

सगळा साचा ऊजळा
थारा काज

अस बैठ्या असवार
सगळा नर-नार
करै थारी जैकार...

राजस्थान रै
मान रै खातर
स्वामी री मूंघी
जान रै खातर
जीवण दियो लगाय
बिना परवा कर्यां काया री
देस नैं लियो बचाय
साची थारी वीरता
साची थारी सगती
साची थारी महिमा वीर
साची देसभक्ति।

◆◆





अनिला राखेचा

थारी कविता

जद भी पढूं हूं
म्हें थारी कविता
पढण रै बाद
पसर जावै है मून
सबद
जिका कुदड़का कर रैया हा
घणी बगत सूं
हुय जावै है
बै अबोला-सून
अर हिवडै उतर
ऊंडै काळजै
करण लागै है
भांत-भांत रा नाद
जणै चुप री हथाई सूं
हुवण लागै बात
अेक अैड़ी बात, जिणनै
थूं म्हारै अणकैयां ई सुण लेतो
म्हारै अणलिख्यां ही
म्हारी आंख्यां मांय पढ लेतो
म्हारा अै अणकैया-
अणलिख्या सबद
थारै पढतां ई झरण लागता

म्हारी पलकां री कोरां सूं
म्हारी अलकां रै छोरां सूं
गूंथण आ जातो
थूं फेरूं उणनै
थारै फुरसत रा डोरां सूं
चुग-चुग पुष्पां रा आखर
अर सबदां-सबदां रो पातो
थारो सिरजणधरम
फेरूं अेक
नूंवी कविता रच पातो
बीं नै ही आज म्हें
फेर सूं पढण बैठी हूं
जाणूं हूं, जकी नै पढ्यां पछै
फिरती पसर जासी मून
छ्या जासी अबोला
अर सबद हुय जावैला मून!

◆◆



124 ए, मोतीलाल नेहरू रोड, आशीर्वाद बिल्डिंग, फ्लैट-2बी, सैकंड फ्लोर, कोलकाता-700029
मो. 9051806915



पांखड़ल्यां

दे दै, पांखड़ल्यां म्हारा राम
उड आ जाऊं थारै पास
क्युं तरसावै दिन अर रैण
सह ना पाऊं इब यो भैम
या काया थारी माया सारी
रमरी जीं में दुनिया सारी
भांत-भांत का जीव-जिनावर
केई जूणां में अटकी सारी....

अंडीनै-उंडीनै पग-पग
खींचाताण मची घर-घर
आप-आपकी मोह-माया का
भरम भंवर भर-भर....

म्हारो मनडो टेर लगावै
छिण-छिण यो तनें बुलावै
मनडो-तनडो-जिवडो थारी
बस, थारी ही बात बतावै....

सब भरमां सूं पार लगा दै
यां भरमां नै 'तू' मिटा दै
दे दै, निजरां की पांखड़ल्यां
निजरां सूं आ जाऊं थारै पास....

अभिलाषा पारीक 'अभि'

मिजमानी

झीणी-झीणी चूनरी सूं
झाकै मत गोरड़ी
थारै निजरां की मिजमानी
म्हानै घणी प्यारी लागै

पीळो पोमचो, लाल चूनर
फकर-फकर लहरावै
भंग पीयां ज्युं कोई भंगेड़ी
गोता अश्यां खावै

ई चूनरी नै मत फहरावै, ओ गोरड़ी
थारी चूनर की मिजमानी, म्हानै...

चंदरबाई को चुड़लो थारो
खनन-खनन जद बाजै
हिवडो म्हारो बावळो भागै
थारै लैरां लागै

ई चुड़लै नै मत खणकावै, ओ गोरड़ी
थारै चुड़लै की मिजमानी, म्हानै....

पायल थारी बाजणी
छनन-छनन जद बाजै
मनडो म्हारो मोस्यो बण
धिन-तिक, धिन-तिक नाचै
ई पायल नै मत छनकावै, ओ गोरड़ी
थारी पायल की मिजमानी म्हानै....



अरुणा जी. मेहरू

मन रै आंगणै

आज चावूं कै नाचूं मन रै आंगणै
भूल सभी नैं नाचूं मन रै आंगणै
जो दबिया पड़्या है दुनियादारी रै कारणै
आज चावूं कै....

वा सारी सुगंध, वा सारी ताजगी
भरलूं फेफड़ां रै मांयनै
जिणरी घणी जरूरत है
म्हारै ठेठ अंतस रै मांयनै
आज चावूं कै....

बसंत नैं भरलूं बाथां रै मांयनै
झूलूं हिंडाळै निसंक
पूरी ऊरमा सूं रासां थामनै
आज चावूं कै

चावूं अेक नूंवो चित्राम बणावूं
पाछो जीवण रो
म्हारी हिवड़ा री कलम सूं
दूर हटाय दुनियादारी रै पूरा कैनवास नैं

आज चावूं कै नाचूं मन रै आंगणै
भूल सभी नैं नाचूं मन रै आंगणै ।

आंधल घोटो

रमे सै जणा आंधल घोटो
आंख्यां पर पाटी
पण हाथ-पग पूरा जोर-सोर सूं माँरे
मंजल नैं पकड़ण सारू
अर मंजिल मूंडो चिड़ावती
जीभ बतावती दांत काढती
सर सूं कनै सिरक जावै
रमणियार नैं पतो ई नीं लागै
फकत हाथ-पग मारतो ई रैय जावै ।

औ डांव कीकर जीतीजैला
बंद आंख्यां सूं कोई
कीकर मंजिल तक पूगैला
अर जो पूग भी जावै तो
'चमत्कार नैं नमस्कार' वाळी कहावत
चरितार्थ हुईं लखावैला ।

रमणियां रै रमत री कुंवत
तोई नीं आंकीजैला
टाबरियां रौ औ खेल
मानखै नैं सीख देवण सारू ई
रच्यो गयो है स्यात ।

◆◆

पूर्व सरपंच, पोस्ट-दयालपुरा (आहोर), जिला-जालौर (राजस्थान) मो. 9928457700



इन्द्रा सिंह

म्हारी प्रीत

होवै फूलां सूं म्हारी बातां
चिडकल्यां सुणै है म्हारा गीत, रैवै सै सूं म्हारी प्रीत

आंख्यां मांय जादू है बो, खिंच्या-खिंच्या सै आवै है
सद्भावां सूं भस्या है जो, निरमोही कद होवै है

करूं सदा जंगळ मांय मंगळ
होवै सदा साच री जीत, रैवै सै सूं म्हारी प्रीत

म्हारा पांव नहीं रुक पावै, आगै बधता जावै है
कांटा घणा-घणा चुभ जावै, फाला पड़ता जावै है

राखू नहीं म्हैं कदै भी रीस
नाखूं आडी बैर री भींत, रैवै सै सूं म्हारी प्रीत

अैसास घणोई पल-पल रो, तिरस मोकळी है बाकी
बिस्वास घणोई कण-कएण रो, निरख मोकळी है बाकी

ध्याऊं सदा धरम री रीत
गाऊं सदा आस रा गीत, रैवै सै सूं म्हारी प्रीत ।

◆◆





जटै हर नारी नवदुर्गा

देख कोरोना
कियां काळै अंधियारै नैं
हौसलां कै दीपक सै म्हे सब मिल भगाया हां,
जद रात बणा ली इतरी सुहाणी
तो सोच सवेरो कितणो सुंदर आणै आळो है,
जटै अेक-अेक नारी है
नवदुर्गा काळी भवानी को रूप
जिणकै हाथ में है खड्ग, तिरसूळ
अर खुद बा भयंकर ज्वाला की
निशानी है,
हर पुरुस-पुरुस में है
हर हर जटाजूट शिव शंकर त्रिपुरारी
जिणकै नेत्र सूं
अब नहीं तूं बचणै आळो है ।
अब सै मिलकर कर लियो हैं संकळप
इण सारू थारी मुस्कल निकट
अब आणै आळी है
हो जा अबै बेगो-सो तूं चलतो
नई तो बदत्तर मौत तूं मरण आळो है
अेकला रहकर भी नई म्हे अेकला
म्हे सै बंधु-भाई आज बतळाय्या हां
तो सोच कोरोना!
जद रात बणाली म्हे इतरी सुहाणी
तो सोच सवेरो कितणो सुंदर आणै आळो है ।

जद तूं खुद है ज्वाला

है तूं खुद धधकती ज्वाला,
अंधेरा सूं फेर्यूं किसो डर ?
भिड़जा तूफानां सूं
अपणै हौसला पे विश्वास कर

जद तक मंजिल ना मिलै
चाल, ना रुक अेक पल
पगां नैं लोहीझ्याण कर

दिव्य है जद तूं दिव्यांग
जीतबा की जिद को
संधान कर

टूट पड़णो है बाज बण
रास्तै की सगळी मुस्किलां पर

थारो सो कोई नई अटै शक्तिमान
स्वयं की परीक्षा कर
और भर हुंकार सीनो ताणकर ।

◆◆



इला पारीक

के लिखूं मैं... ?

आवैगो अेक टाबरियो
आ सोच परिवार हरसावै है
पण कूख में बेटी सुणतां ई
मायत-सा मर जावै है
करवा दे बहू सफाई
आ बात सासू समझावै है
सुणतां ई कूख में बैठी कन्या
कुररी ज्युं कुरळावै है
मेरो मनडो बोल पड़्यो
अनजायी कन्या को चीत्कार लिख
पांच बरस री हुई या लिछमी
सगळा मिल हरसावै है
छमछम करती फिरै आंगणै
मोद में मुळकावै है
जद फांक्यां रो लालच देय 'र
पाड़ोसी ई भरमावै है
रक्षक ई भक्षक बण 'र
मानवता नैं सरमावै है
मनडो मेरो बोल पड़्यो—
ई कन्या रो चीत्कार लिख ।
सोळै बरस री हुई जद कन्या
काच में दुख मुळकावै है
आगै री कर-कर कल्पना
सुपणै में हरसावै है
पण हे राम! औ जुलमी माणस

तेजाब डाल झुळसावै है
देख-देख पुराणी फोटू
आ कन्या अब कुरळावै है
मनडो मेरो बोल पड़्यो—
ई कन्या रो चीत्कार लिख ।
दादोसा री लाडली जद
छोड चाली घर बाबुल रो
मन में घणो हरसाव लियां
पहुंच घर साजन रै ।
गैणा-गाभा किसान ल्यायी
ताना मारै जद सासरला
फेर अेक मायडू री प्यारी
झुळसण लागी आग में
मनडो मेरो बोल पड़्यो
तूं दुल्हन रो चीत्कार लिख ।
बूढी मां मंचली में पड़गी
बेटो हुयो जवान अबै
घरवाळी सूं मुळक 'र बोलै
मां री सुण मत बात अबै ।
खसू-खूं करै डोकरी
पण बीं नैं के परवाह
बिरधास्रम में छोड मावडी
होग्यो बेपरवाह ।
मनडो मेरो बोल पड़्यो—
तूं मां को हाहाकार लिख ।

◆◆

डी-52, समता नगर, बीकानेर (राज.) 334001 मो. 9460172951



डॉ. उषा श्रीवास्तव

जगतो सवाल

घर सूं बारै भेजवा में डरपै है
 मां-बाप
 बेटियां नीं कर पा रही पूरा
 आपरा ख्वाब ।
 गळी-गळी, बस्ती-बस्ती
 चोर-लुटेरां रो राज है
 काई भारत
 साच्याणी आजाद है ?
 'बेटी बचाओ बेटी पढाओ'
 बस नारो बण 'र रह जावैगो ?
 कै ईं नैं देस सई अपणावैगो ?
 मौनसभा कर 'र अन्याव सूं
 लड़ नीं सको
 खोखला वादा करनै
 किणी रा घाव भर नीं सको
 नोचवा-खसोटवा नै
 नरपिशाच घूमै है हर मोड़ पे
 औरत की इज्जत
 मनरंजन साधन भर ?
 कदी थारा ठंडा खून में
 उबाळ आवैगा
 कदी सई में
 मिनख बण पावैगा ?

पीड़ितां नैं कभी न्याव,
 इज्जत दिलावोगा ?
 कै बस ट्रायल, केस
 जांच री खानापूति कर
 अपणो फरज निभावोगा ?
 मौन दुपट्टा ओढनै
 किणी री आबरू बचावोगा ?
 खाली-माली विरोध
 जुलूस, कैडल मार्च सूं
 बहू-बेटी री आबरू नीं बचै
 दिखावटी राजनीति सूं
 दरिदगी कदी मिट नीं सकै
 अँड़ा दुष्कर्मियां रो जे
 साच्याणी करबो चावो अंत
 तो लटकाई दो
 अँड़ा निरधर्मियां नैं
 चौरायै पर तुरंत
 तद कैवो—
 'बेटी बचाओ, बेटी पढाओ'
 आगै बधावो
 बेटियां रो भविस
 सुखमय बणाओ ।

◆◆





आयो आसाढ

आयो रे आयो आसाढ आयो
काळा बादळ ऊमटिया रे

हरिया-भरिया खेत होया
बिरखा इसी होई रे
नाडी-तळाब सगळा भर्या
हिवडो घणो हरखायो रे

सावण झूम्यो सुहावणो-सो
साथणियां संग आओ अे
साज-सिणगार थे करलो
हींडा हींडण चालो अे
मोरिया गावै गीत गैहरा
सावणी झडी लागै रे
औ भादरवो उमड-घुमडियो
सागै कजळी ती लायो रे

घर-घर सातू सिकण लाग्या
जीभडल्यां लाळा टपकावै रे
मूसळाधार मेघ बरस्यो
जीवडो ई हुयो सोरो रे
औ आसाढ, सावण, भादरवो
बिरखा चोखी लायो रे
बिरखा चोखी लायो रे

प्रकृति में रमणी चावूं

प्रकृति में रमणी चावूं
उणमें ई खुद गमणी चावूं
लहरां सूं बहणी चावूं
हवा रै सागै झूमणी चावूं

तावडा ज्यूं तपणी चावूं
तो रेत मांय बसणी चावूं
दळदळ माथै चालणी चावूं
फसलां जियां लैरावणी चावूं

आभै सूं मिलणी चावूं
करैला जैडी कडवी यादां नें
चूरमा जैडी मीठी यादां में
बदळणी चावूं

फूठरी दुनिया में जीणी चावूं
प्रकृति री गोद में होणी चावूं
प्रकृति में रमणी चावूं

◆◆





घर

अेक

आज म्हें गई
 म्हारै पुराणै मुहल्लै में
 बठै देख्यो
 म्हारो छोटो-सो घर
 जिणरै किंवाड़ां लारै
 म्हें लुक जावती ही
 घणकरी बार

म्हें देखती रैयी
 घर नैं भौत देर ताईं

ओळ्यूं रै मिस
 के ठाह कियां आयग्या आंसू
 आंख्यां सूं बारै

सोचूं—

कदैई खरीद 'र
 सूप सूं बापूजी नैं
 इण घर री चाबी

बापूजी रो सुपनो हो
 औ घर
 जिको बेच दियो
 स्यात म्हारै सुपनां सारू ।

दो

घर छोड 'र
 चिड़कली चाल पड़ी
 आपरै नूवै घरबार
 उण आपरै जलम रो
 घर ई नैं छोड्यो
 मां-बापूजी
 बैन-भाई
 सखी-सहेल्यां
 अर आपरी
 सगळी यादां नैं समेट 'र
 चाल पड़ी
 बा अेक नूवै घर री
 काया में प्रवेस सारू ।

साच

जरूरी नैं
 कै जिको दीखै
 बो ईज हुवै साच
 जिको नैं दीखै
 बो भी हुय सकै साच
 पण कुण जाणणो चावै
 साच
 स्यात आजकालै
 साच नैं आंच ।

दुनिया

अेक

मिनख नैं
 सगळै जीवां में
 सिरैकार कुण कैयो
 म्हें तो नैं कैवूं
 प्रकृति सूं जुड़योड़ा
 सगळा जिनावर जाणै
 प्रेम री भासा
 पण मिनख
 क्यूं जीवै
 आपरी अलायदी दुनिया में ।

दो

टाबरां रा सगळा खेलकूद
 छोरियां रा नाच-गाणा
 बूढा-बडेरां री लांबी बातां
 गिटग्यो काच रो बक्सो
 अर रई-सई कसर
 पूरी कर दी मोबाईल
 अबै सगळा
 आपरी उधेड़ै अर आपरी सीवै
 आखो जग
 आप-आपरी दुनिया में जीवै ।

◆◆



कविता शर्मा

पणिहारी

रुणझुण, रुणझुण पायलड़ी
माथा पै चूनड़ी झीणी
नैण कटारी कामणगारी
मुळकै भीणी-भीणी

धोरां री धरती रै मांय
जठै बूंद-बूंद तिरसावै
माथै इंडी, इंडी पै गागर
भर-भर इमरत ल्यावै

टाबर टोळी भाबू भोळी
निरख-निरख हरखीजै
घणो तावडो पण भर्या परींडा
देखै चिड़कल्यां रीझै

आ पणिहारी गजबण भारी
नित कुवा सू पाणी खींचै
खेत, गुआड़ी, आड़ी-बाड़ी
घडुल्या भर-भर सींचै

जूंट जिनावर ढोर बटेऊ
सगळ्यां री तिरस बुझावै
पिणघट री ओळख पणिहारी
मुरधर री शान कहावै।

आंधी

झाख, झक्खड़ ओळा बिजळी
आंधी धूड़ धाणी
च्यारां कानी मचै बूरणो
हुवै महल झूपड़ी अर ढाणी

धडधडातो उठै भम्बूडो
करै शोकर सांय-सांय
ढोर-ढंगर, टीण अर टप्पर
सागै उडता जाय

आडी पडगी सगळी फसलां
बूर झड़कतो जावै
जद बौळा रोस दिखावै आंधी
निरा रूख उखाड्यां जावै

लारै-लारै इंदर बाबो
गरज गरज धमकावै
लपकै बिजळी, छूटै धूजणी
टाबर डरपै ओलो खावै

झाख झक्खड़ सगळा बूरै
पण आंधी करै तबाही
जद हुवै आभै धूड़मधाड़ी
थे घरां ही रहज्यो भाई।





डॉ. कृष्णा कुमारी

थे ई जाणो

कतनी सुखी छै
या छोटी-सी चिड़ी
जद भी मन में आवै ई कै
नाप्यावै छै धरती अर आकास नै फुर सूं
आ बैठै छै साता खाबा
कदी पेड़ पे
कदी घास में फुदक-फुदक कै
खेलबा लागज्या छै
अणजाण्यां चिड़ा-चिड़्यां लारै
कोई न्है पूछै ऊं सूं
कोई न बरजै ऊं नैं
अरी कै तू फिर री छी
कीं कै साथैसारो दिन
अर कस्यां रूख पे
काढी आखी रात थूं?

अर या गाई-माई
या भी तो मरजी की छै मालक
चरबा-फरबा चावै जटी चल दै छै
सो जावै छै
बीचां-बीच सड़क कै माथै
गाड्यां-घोड़ा / लोग-लुगायां / आगै-पाछै
सूं खड़ ज्या छै ई सूं बच कै
अर ई चींटी नैं भी देखो

अपणी धुन में / अठी-उठी
काई भी करती / फिरती रहवै
मिल जावै जद चावै जिसी दूजी चींटी तो
कानाफूसी करबा लागै
काई न काई दोनूं
कोई न्है कहवै ऊं सूं / कोई न बरजै ऊं नैं
अरी कै तू कीं कै गोडै इसक लड़ाबा गी छी ?
अर या गिलैरी / अर या ऊंदरी
यां की भी तो कतनी चैन की कटरी छै
न्है तो ब्यांव की चिंता
न्है ई सासरै आणो-जाणो
न्है ई घूंघटो पड़ै काढणो
न्है ई डाइजा का सोलां में
जीवतां ई बळबा को डर छै
कोई खसम यानै पावां की जूती कहै कै
ठोकरां सूं आडी न्है पाड़ै

पण या बापड़ी औरत ?
काई बताऊं! हाय विधाता!!
हाय री दुनियां! हाय री मरदां हाळी माया!!
म्हूं काई कहूं ?
म्हैं काई कहूं ? ?
थे ई सोचो! थे ई जाणो!!

◆◆

'चिर उत्सव', सी-368, तलवंडी, कोटा 324005 मो. 9166887276



कियां लिखूं कविता

थे चावो
कै म्हेँ मांडूं प्रेम कविता
कविता
जिकी मोह लेवै मन नैं
कविता
जिकी कर देवै नेह बीज रो थापन
अर प्रीत सू सराबोर कर देवै
इण अळझाट भस्चै जीवण नैं
पण कियां मांडूं म्हेँ
अैडी कविता
कियां उकेरूं
थारै मन री चावना रा
मोवणा चितराम
कियां मैसूस करूं
इण प्रीत झरणै रो
कळकळ नाद...
जद पसस्योड़ी है
अणथाग-अणमाप पीड़
म्हारै आखती-पाखती
जद बिलख रैया है
नैना टाबर भूख सू
मजूर मां-बाप रो
रुजगार बंद है
बीमारी सू आंती आय

सांस छूट रैयी है जद
घर रै अकेलै खैवणहार री
अरथ रै तोड़ै सू टूट रैया है
मन रा तार-तार
तद कियां मैसूस कर सकूं
प्रेम नैं ?
कियां लिख सकूं कविता
कियां उगेर सकूं
हेत-प्रीत री राग

थे अरथा दीजो

थे अरथा दीजो
म्हारै आडा-अंवळा सबदां नैं
काचा-पाका भावां नैं
थे उकेर दीजो कविता में
म्हारी पीड़
म्हारी प्रीत
म्हारा सपना
थे ई मांड दीजो कागद में
म्हेँ जाणूं कै थे समझो हो
म्हारै अंतस री कळझळ
अर मनगत री जूझ
अतरी सी म्हारी अरज
कै थे दीज्यो म्हेनै म्हारी पिछाण ।
◆◆



कमला मारवाड़ी (जैन)

मजलां चालणियो ई पासी

मजलां चालणियो ई पासी
सूत्या-सूत्या सुपनो देखै
बो सुपनो ई रह जासी
मजलां चालणियो ई पासी ।
चालणे रो मतलब जीणो,
थमणै रो मरणो है
सोच-समझ कर ले निरणो
उठकर पग आगै धरणो है
बैठ्या सूं मंजल सिर चढज्या,
चाल्यां बणै, चरणां री दासी
मजलां चालणियो ई पासी ।
चालूं कै नई चालूं ?
सोच-सोच कै टेम गमावै ।
आळस तज, डग धर्या लगोलग
अणचिंत्यो भी पा जावै
कामू रो रैवै हर खिण ताजो
निकम्मां रो बण जावै पासी
मजलां चालणियो ई पासी ।
जीवण अणमोल इणनै
आळस में मतना खोवो
मैणत रा हळ चलावो अर
हिम्मत रा अखूट बीज बोवो
'कमला' आगै पांव बधाया,
साथी सागै केई मिल जासी
मजलां चालणियो ई पासी ।



राजबिराज (नेपाल) मो. 9825733440



कामना राजावत

हथार्ई आळी चूंथरी

बा हथार्ई आळी चूंथरी कठै गई
जठै सिंझ्या पङ्ग्यां
कीं डोकरीयां भेळी होवती
करती ही मन री बातां
हंसी ठिठकळ्यां, कदैई करडी बातां
बांकी बातां में इतिहास हुवतो हो
तो कदैई खींच देंवती कींको भी भूगोल
बै कैवती—म्हें भागफाट्यां जाग्या करती
मण-मण पीस्या अर पोया करती
चाळीसां मण धान काढ्या करती
महीनो-महीनो नीपणो-चाकणो करती
दोपारियां गोटो किनारी लगाया करती

बै कैवती—म्हें अेक लोटा पाणी सूं न्हाती
चिमनी का चानणा मांय बिणाव करती
काजळियां लेंगा पे, पीळो ओढ'र
काजळ-टीकी, आटी-डोरी रो कर सिणगार
गणगौर पूजण जाया करती
ऊंट पे बैठ'र पीहर सासरै आया-जाया करती
बांके माथा पे पडी झुरियां माथै आयोडी हंसी
अर बीती बातां नैं याद कर
आयो मोद, कितो ओप्या करतो हो बां पर

बै कैवती—दिराणी-जिठाणियां मिल'र रैवती
बडेरं रो मान राख्या करती
आखै दिन सासू रै आगै भाज्या करती

कोई मोड़ा ताई बडेरियां रा पग दाब्या करती
कोई आधी रात रै पछै
पीव मिलण नै जाया करती

बै कैवती—म्हांका टाबर अचपळ कोनी हा
मोटो खुवाता, मोटो पैराता
पण घणा मूंडै कोनी लगाता
अेक काठा डूपटा में सियाळो काढता हा
धाणी भूंगड़ा उन्याळै में घणा भाता हा
चौमासा में रैवतो काकडी-मतीरां को कोड
काचरी-टींडसी रा फालरा सुखाता हा
घणा ई गाती ही गीत
करती ही घणा ई तमासा
जद जंवाई-भाई आवता हा

म्हें सुणती बांरी बातां
लागतो, अै कुणसा जुग री लुगायां है
अलग-सी
अब तो टेम बदळ्यो
अब कीं नैं औसाण है हथायां रो
सुख-दुख बांटण रो
सगळ भाज रैया है
अबै घरां रै साम्हीं
कोई हथार्ई आळी चूंथरी कोनी बणावै।

◆◆



डॉ. चेतना उपाध्याय

अंगरख्यो

हगळ्या मां सा नै बा सां नैं ढोक दूं
हगळ्या टाबरां नै म्हांकी जान लोग-लुगायां नैं राम-राम
थे म्हणैं ओरखो ? मूं अंगरख्यो
मोट्यारां का पैरबा नै आतो काम
ई टेम नै तो म्हारो पूरो ई कर दियो काम तमाम
लकझक सफेदी रो, काई ताप हुया करतो हो
त्योहारां पे धुलवा री मूं बाट देख्या करतो हो
पग्यां पगरखी धोती, गळै मां मिमणिया नै माथा पे साफो
म्हांकी शान मांय काई कसीदा काढ्या करता हा
मूं वांको मान बधावतो नै वे म्हारी हंभाळ राखता
अबै किंसो टेम आग्यो, नीं तो करै राम-राम
अर ढोक देवा रो तो अठै काई काम
हाय-हलो नै कर दियो, म्हांको पूरो काम तमाम
पैंट-शर्ट, अंगरख्यो-धोती नैं खाग्या
टाई बैल्ट, तिमणिया कमरखी खागी
म्हारी आन-बान-शान, साफो पड़ग्यो धूड़ा में
रोट्यां पोता चूल्हा पे, न फेर सैंकता अंगारा पे
मांटी म्हांकी मां रेती, न ऊपर आळो बाप समान
हवेर कलेवा नै फेर दोफैरी, सांझे ब्याळू नै राम-राम
आखो दंग खेत खलिहान कमर तोड़ता
सांझ पड़ै जद चौपाळां पे हगळ्या हमाज री साज सम्हाळ
औ ई अंगरख्यो धोती साफो वठै चलातो म्हांको काम
औ ई अंगरख्यो धोती साफो वठै चलातो म्हांको काम।

◆◆



ज्योत्स्ना राजपुरोहित


बा बतळासी बगत अर आभै नैं

बै सगळी लुगायां
हकदार है
दया अर सहानुभूति री
जिव्यां नैं बैम है
आपरी निरणै सगती पर
जिकी आखी उमर ढूढती रैवै
अेक मरद
जिको बाप-भाई कै
प्रेमी रै ओळ्ळवै
ले सकै
बांरी पांती रा फैसला
अर बारै काढ सकै बांनै
अधरझूल सूं।

कळपती रैवै जिकी सदीव
काळजै उठती
आजादी री चावना में
बळती रैवै बां लुगायां सूं
जिकी लेवै खुदोखुद फैसला
सई-गलत री
दोघड़चिंता सूं मुगत होय
जोखम लेवणो जाणै है जिकी !

भविस में कदैई
किणी दिन
पीठ फोर 'र
बैठ जासी अैं लुगायां
अर कर दैसी निजरांदीठ
इण जगत रा
सगळी रीत-रिवाज
उण दिन
जुगां सूं
मिनखां रै चौफेर भूंवती
बांरी परकम्मा अर ढूढ
हुय जासी पूरी
तद रैसी
फगत लुगाई
खुद रै पगां खड़ी
आतमसिद्धा
वीरबानी
जिकी बतळासी
बगत अर आभै नैं।

◆◆





ज्योति राजपुरोहित

मन

मन म्हणें कठपूतळी ज्युं
नचावै अर म्हें नाची जाऊं रे
मन रा हाथां बिकी-बिकी-सी
ठगी-सी रह जाऊं रे।

सात समंदर पार कराय दै
कदैई तो घर में बैठां-बैठां रे।

आंख्यां सावण-भादवो कराय दै
भींज-भींज जाऊं रे
मन म्हारो माळी ज्युं म्हें तो
दासी बण बैठी रे।

अैडो म्हारै पर जादू फेर्यो
सुध-बुध म्हारी बिसराई रे
खोळ किंवाड्यां मन री
बारै कीकर निकळ जाऊं रे

लोभ-मोह नें छोडनै
प्रभु चरणन में 'ज्योति' जाऊं रे
मन म्हणें कठपूतळी ज्युं
नचावै अर म्हें नाची जाऊं रे।

◆◆

देवो थे किणनैं दोस

बिना नाथ रा बळदिया,
भिडता भर-भर जोस।
बुढापै भूंडी हुई,
देवो थे किणनैं दोस।।
मदछकिया थे मानवी,
थे नीं राखता होस।
नस-नस इब ढीली पड़ी,
देवो थे किणनैं दोस।।

गाबड़ नीचै गेरली,
कर-कर मनडै रोस।
डाफाचूक हुया डोकरा,
देवो थे किणनैं दोस।।
थर-थर धूजै बूढिया,
औ देख आवतां पोष।
जम सियाळो आयग्यो,
देवो थे किणनैं दोस।।
दान-धरम कीन्हो नहीं,
भर भरी जवानी जोस।

पल्लै पुत्र पूंजी नहीं,
देवो थे किणनैं दोस।।
जम जबर जद आवसी,
पिराण ले जासी खोस।
पिछतावै में नाडु हिलै
देवो थे किणनैं दोस।।

◆◆



महेन्द्र-मूमल

जद-जतद पढूं
महेन्द्र-मूमल री कहाणी
हिवडै में हूक उठै
आंख्यां में आवै पाणी

बै किस्या मिनख हा
जो समझी भावना साची
आंख्यां ई आंख्यां सूं
प्रेम-पाती बांची

अब क्यूं रीत गयो
हिवडै रो भाव
क्यूं होयगयो मिनखां रो
तातो भाखर सो सुभाव

प्रेम पर भारी हो रैयो धन
प्रेम सूं रीत रैया मन

कोई करै भावना रो
तोल-मोल
कोई उडावै रिस्ता रो मखौल

डूंगर जिस्या
सख्त होयग्या
आजकाल रा मिनख
मिनखपणो बिसरा रै

बणग्या चील-कागला
कंगूरा झुकग्या सरम सूं
चीख रैया है छप्पर अर
डागळा
काई जाणै
और किस्या दिन आसी
साचा प्रेम री बातां तो
किताबां में ई रैय जासी ।

जीवण री बातां

आवो,
आज फेरूं बैठां
नीमडै री छियां मांय
घणा दिन बीतग्या
सुख-दुख री
बातां कर्यां ।

आवो,
आज खोलां
आपणै मन री गांठ्यां
सहैरां मांय
जाय बस्या जद सूं
भूलग्या आपणो
गांव अर गवाड़ी

भूलग्या चूल्हा री सिक्कोड़ी
बाजरै री रोटी रो सुआद
चीलवा रो खाटो
छाछ राबड़ीपीयां
जाणै जुग बीतगयो

आवो,
आज फेरूं परोसां
थाळ मांय
देसी जीमण
मायड भासा रो
रसपान करां
जडां ईज राखसी
मन रा रूंखड़ा
हर्या-भर्या

आवो,
भरल्यां
हिवडै में हेत रो उजास
फेरूं आ जासी
चानणी रातां
ल्यो आवो,
आज करां
जीवण री बातां ।

◆◆



तरनिजा मोहन राठौड़ 'तंवरानी'

गैली राधा

उण दिवसां री बात छै
मैं कंवळी कूपळ ज्यूं हुवती ही
कंचन काया आईनै मांय देख मुळकती ही
भंवरां री दीठ सूं इणनै बचाय राखती ही
जद सुणिया सबद थारै मन रा
हरख-हरख कर दरसन री चाव राखती
साम्हीं कदैई नीं पड़यो रे कान्हा !
पण हूं थनै ओळखती,
मीरां री प्रीत पर ना इतरा रे कान्हा,
उणरी प्रीत लौकिक रे कान्हा,
म्हारी प्रीत सूं मत जोड़ी,
आ तो अतंस में रम्योड़ी
अलौकिक रे कान्हा ।

कान्हा ! केई बरसां सूं थनै उडीकूं
भर नैणा रै पाण,
जद थूं मिल जावै अेक बार सुपनै में आय,
म्हारै धीरज रो छैह आ जासी
अणजाणै में म्हारै मूंडे सूं
फगत 'कान्ह-कान्ह' निकळसी
जद जग हंसैलो अर
म्हनै गैली राधा कैवसी
पण थूं चिंता ना करजै ।

कान्हा ! म्हारै हिवडै में थूं सदा इयां ई रैसी,
म्हारी सखियां कैवै,

रैळी-बावळी राधा थूं मन में मोद करै
नैणा में गुमेज भरै कै—
थूं कान्हा री अर कान्हो थारो
होस में आय जा
कान्हो थनै बिसरग्यो
छोड़ थारी अणगाती प्रेम री गळियां
किणी राणी रै मन बसग्यो
इसां सबदां रा बाण कान्हा म्हारै हियै नैं दाझै,
पण थारी म्हारी प्रीत नैं नाजोगा काई जाणै ?
कोसिस रा पग टूट जावै
जद थूं म्हनै याद करै
थारी अमर प्रेम री सौरम फूलां-फूलां में महकावै,
थारै नैणां रो नेह जणा-जणा में छळकै
पण नैह रो छैडो थासूं छूटै कोनी
थारी छिब हिवडै सूं जावै कोनी
नई कान्ह, नई !
थारो-म्हारो ब्यांव कोनी हो सकै,
आ बात म्हारै हिवडै में शूळ-सी चुभ जावै,
पण जद आंकूं थारी-म्हारी प्रीत नैं
निष्काम भावां सूं समरपित हो जाऊं,
नई कान्ह, नई !
थारो-म्हारो ब्यांव कोनी हो सकै
क्यूं कै अेक जीव रा
दो अलग-अलग सरीर हां आपां
थूं म्हारो कान्हो है अर म्हैं थारी गैली राधा ।

◆◆



दीपिका दीक्षित

सोना नो सूरज क्यारे उगेगा ?

कंय है के
सोना नो सूरज उंगी ग्यो है,
नै आना सूरज ना उजवारा मय
गरीबी, अशिक्षा अनै ऊंच-नीच
हंपाई रयं है ।
चारियें मेर
हेत नै हम्पनी हन्नाइये
वागवा लागी है
पण ज्यारे मुं कमली ने जोवूं
त मन मय विचार आवै
के आनै जिंदगी नो
सूरज क्यारे उगेगा ?
कारे मटेगा अनी जिंदगी नो परिताप ?
नै क्यारे थायगा
अनी जिंगी मय सुख, शांति नो वरसाद ?
मु जारे भी
कमली नै बारा मय विचार करूं
त मारी आंख ना सामहीं
अनी जिंदगी नो अेक वरसाद
सिनेमा नु वजु उतरी आवै ।
बापड़ी कमली !
वैगी उठी नै घट्टी दरे,
सपं-ढांढं नुं करै, रोटो करै नै
नानका नै दूद पिवाड़ी
नै छोरै नैं भणवा मैली,

न पांस कोस वेगरी स्रैर मय
मजूरी करवा जाए ।
आखो दाड़ो हाडतोड़ मजूरी करै
सांझ पड़ै घेर आवै
घेरै जापा मंय
छोरो रोते थकी मलैं ।
अैणनै बुस्कारती थकी
आंगणा मय आवै ।
आंगणै सोमो दारू मय डट थाई नै बैठो
नै कमली नै जोइ,
नै गाळी देतो थकी रोटलो मांगैं ।
कमली छोरा नैं नीचै मैली,
रोटी करबा बैठै ।
सोमो नै रोटो आली,
सोमो रोटो खातै-खातै
बबड़ातो-बबड़ातो
अेमज ढरि जाए
नै कमली अड़दू-पड़दू खाई
छोरं नै सुआड़ी नै पोतै हुई जाए
नै बीजै दाड़ै फेर काम माथै जाए ।
म्हनें रई-रई नै अेकस विचार आवै
कै कमली नीं जिंदगी मय
सोना नो सूरज क्यारे उगेगा ?
सोना नो सूरज क्यारे उगेगा ?

◆◆



डॉ. धनज्जया अमरावत

म्हारो बेरो

म्हारो बेरो
 हां औ बेरो, म्हनें चोखो लागै
 अठै बसी है,
 म्हारै बाळपणै री यादां
 जठै म्हें हेरती,
 चिड़कलियां रा आळा
 कबूड़ां रा माळा
 अर व्हरां नैना-नैना
 बिचियां रै हाथ लगाय
 लेंवती बो सुख
 जको आज
 नीं मिळै, हेरियोडो ई।
 हां, अठै ईज तो रैवता हा
 भंवर जी, मांगो,
 उणरी मां अर खेमौ
 कितरा लाड-लडावता हा बै
 नैना लीलू बाईसा नैं।
 कठै गया, बै हेजाळू लोग
 आज हेरूं तो ई
 नीं लाधे बो हेज।
 इणीज बैरा माथै
 हा कीं रूंखड़ा
 कीं बोरडियां रा
 कीं खेजडियां रा

तो कीं बांवलियां रा
 जका देंवता म्हनें
 बोरां, खोखां, गूंद अर
 पापडियां रो इधको सुवाद
 कठै गियो बो सुवाद
 अबै तो,
 बो सुवाद आवै ई कोनी।

म्हारै बाळपणै रा बेली
 धूड़ा में,
 ऊंडो रैवणियो हाथीडो
 बाड़ा में भरिया आईणा अर
 ठाणां बंधिया दूजोड़ा ध्राव।
 कठै गई बा सिंझ्या
 जद दुवारी करता सागडी
 म्हनें हेलौ मार बुलाता
 अर, दूध री धारां सूं
 भरीज जावतो
 म्हारो सगळो मूंडो
 बो झागां चढी,
 दूध री बाल्टी सूं
 आंगळी भरनै
 दूध रा झाग चाटणो
 आज ई म्हारै मूंडे
 मुळक लेय आवै

इणीज बेरा री
 माटी री सौरम
 इणरी साखां री महक
 नीप्योड़ा लाटां री गंध
 आज पण बसी है
 म्हारै अंतस में।
 हां, इणीज बेरा माथै
 म्हें फिरती
 म्हारा जीसा री
 आंगळी पकडियां
 उछळती-कूदती
 जद जीसा री याद आवती
 तो पूछती
 खेतां में चुगता सारड़ां नै
 जीसा रो पतो
 पण आज तो बै सारड़ा ई कोनी
 जिणसूं पूछूं म्हें
 म्हारै जीसा रो पतो
 पण म्हें जाणूं हूं कै
 इणीज बेरा री
 रज-रज में बसिया है
 म्हारा जीसा।
 हां, इणीज कारण
 म्हनें चोखो लागै औ बेरो।

◆◆

11, शक्ति-सदन, राम मोहल्ला, नागौरी गेट रै बारै, जोधपुर (राज.) मो. 8003700477



नलिनी पुरोहित

माधवी

किस्तर बोलैला माधवी
इण पुरुषप्रधान देस में
बोलणो तो काई
होठ भी नीं हिलाय सकै
माधवी गूंगी नीं है
उणनें अेक जबान
बख्सी है ईश्वर जी
पण छीन लीनी समाज
अर समाज में रैयनै
गूंगीजनै मून होयगी
बोलती किस्तर माधवी
दान में दियोड़ी
वस्तु ही माधवी
माधवी रा बापजी
प्रचलन चालू कर्यो हो
कन्यादान रो अर
जदी सूं चालर्यो है
प्रचलन गाय अर गौरी नैं
जटै हांकी जावै
बटै ई रहणो पटै
आपरी मरजी सूं बोलण रो तो
सवाल ई नीं उटै
महैं ई अेक सवाल करूं
भारत रा पिता सूं
भारत रा पिता ई

चलाई ही या प्रथा
यो रिवाज
क्यूं नीं अबै पुत्रदान व्है
कन्या रो ईज क्यूं
अगर यो व्है तो
आज धन्य हो जावै पिता

आज रो बाळक
काल रो नागरिक
कैवता ढबै नीं है
सगळ्ळा जन जागरूक
काई कर पावैला
आज रो अेकलव्य
डोनेशन रा जुग में
विपदा बडी है साम्ह्नीं
दक्षिणा नीं डोनेशन
मांगै है द्रोण
अेकलव्य कनै सूं
नीं वणी रा पिता सूं
अंगूठा री जगा
पचास हजार रो चेक
पछै अेकलव्य रो तीर
कुत्ता रा मूंडा पे लागै
या द्रोण रा माथा पे ।

◆◆





निर्मला राठौड़

मायड़ कैवै बेटी नैं

मायड़ कैवै बेटी नैं
मत आवजै लाडो थूं इण देस
चीड़ी कमेड़ी बणाय दीजै ईसर
मत बणाजै बेटी

घोर कळजुग आवियो इळा माथै राम
घर में ई नीं सुरक्षित बेटी आपणी आज
जद रक्षक ई भक्षक बण जावै तो
कठै अर किण सूं फरियाद करै बेटी

जलम देवाळ बाप ई भक लेवै तो
किण रो विस्वास करै बेटी
नारी जूण री जात्रां दोरी घणीज
कोय ना समझै आ बात

जलम लेवै जद घर में बेटी
मातम छावै अणमाप

सुत सुता में अंतर राखै घर पिरवार
नी मांगै कदैयी कीं मुख आपरौ खौल बेटी
जैडो मिल जावै उणनै स्वीकार करै बेटी

सगळा कैवै हांती री धणयाणी हुवै बेटी
नी हुवै पांती री हकदार बेटी
इण बात री गिणनै गांठ लगावै बेटी

हाथ सूं घर आळा जकौ दैवै
उण में ईज सबूरी कर लेवै बेटी
काम काज में मायड़ रो हाथ बटावै बेटी
तो ई दरद मिलै उणनै अणमाप

जद मोटी हुय जावै तो
खटकै घणी नैणा में सगळां रै बेटी
काळ चढनै रक्षक रै माथै
जद तांडव करै राकस
हवस रा लोभी भूखा भेड़िया री
बळि चढ जावै बेटी

क्यूं भक लैवै रक्षक ?
क्यूं लजावै कुळ नैं ?
छोटी-छोटी चिड़कलियां रो
बाळपणौ चिकदावै निरलज्ज

काई कसूर हुवै उणां रो ?
लाजां मरती किणी नैं नीं बताय सकै बेटी
रोज-रोज मरणां सूं बेहतर
आत्मघात कर जावै बेटी

जद रक्षक ई भक्षक बण जावै तौ
किण नै अर काई फरियाद करै बेटी ।



पदम निवास, पावटा बी रोड, जोधपुर (राज.) 342006 मो. 9660021521



नीलिमा राठौड़

कोविड पर आपबीती

अेक

कबूतर रो जोड़ो
निल लगातो जुगत
बालकनी में घोसलो बणाणै री
म्हें उडाती
तार पर बैठ्या देखता
मुंह उतास्यां
आज म्हें करूं जुगत बचणै रा
घर मांय बंद
बारै कबूतर उडै खुलै आभै में
म्हें देखूं बियां ई
जियां बै देखता हा मुंह उतास्यां।

दो

मिंदर री आरती
आनंद देवै मन नैं
मस्जिद री अजान
जगा देवै आतमा नैं
ओपरा मिनख री
नींद उचटगी
केस कस्या, फेर मुकदमो
अर फैसलो
बंद कर दियो सोरगुल
ईस्वर-अल्ला सोच्यो
नींद तो जोरकी

आपां ई लेवां झपकी
पारलोकी तो सोयग्यो
बंद कर आडा
मिनख धापग्या
अेकलपणै सूं काठा।

तीन

रात रै काळजै में
चांद री चांदणी ही
कीं गैरी, कीं माड़ी
रीत री रीत ही
कदै छोटे-कदै मोटा
टोटा रा टोटा हा
समय रो पहियो फिरियो
पहियै रो समय फंसगो
आज तो मिनख रै
सांसां रा ई सांसा हुयग्या
काई करी रे सांवरा!
आपसरी डोर ई तोड़ दी
जो करी भली करी
आस्था री गळी बंद मत करी
थारी करी, पर म्हें तो बस
दो-चार आपबीती करी।

◆◆



कुबदी कोरोनो

अबै तो बण्यो घर रुखाळो
बारै बैठ्यो कोरोना नाग काळो
फण पसारिया औ च्यारूंमेर
नीं छोड्या गांव-ढाणी स्हरै
अबखाई मांय पडी जिनगाणी
कुबदी कोरोनो जबर मांडी मनमानी
जीव-जीव रा पड़ग्या सांसा
नत निसरै औ बिछ रयी लासां
कर दीन्हा तैस-नैस केई घर-परिवार
कैड़ा दिन हा हंसता-मुळकताआवै बिचार
कोटियो सूत देंवतो दुमणो दुकानदार
देख्यो नीं इण जूण कदै अँडो हाहाकार
मंदी मांय मिनख सूं निसस्यो राम
बिसर मिनखपणो करै ऊंधा काम
लगावो थे मास्क राखजो दूरी
बचावो सै रो जीव औ हुयग्यो जरूरी
धरजो धीजो बधावो हिम्मत हूस
छटैला काळो बादळ कोरोना मनहूस
बावडैला हंसी-खुसी री बेळा
आस पांखड़ा मतना करजो भेळा
उकेरांला फेर सूं नूवा मीठा गीत
मिल-जुल 'र करांला सैयोग, हुवैला जीत ।

◆◆




अबखाई अर औसर

खेल मंड्यो जबरो चौसर
अबखाई मांय आछो औसर
मिनख-मानखो घटकग्यो
मूळ मारग भटकग्यो
जीव मर रिया तड़प-तड़प
करै रुपियां खातर झौड़-झड़प

मरी आत्मा घट्यो ईमान
कोरोना काळ बण्यो बेईमान
लूट जमाखोरी नै काळाबाजारी
अँ मिनख मार मोटा बौपारी
लाज करो थे बणो ना नुगरा
है पतियारो थे लोक कळजुग रा
दिया दान दातारी रो दागीणो पैरो
हुवैला चांदणो रंग आवैलो गैरो ।

◆◆



प्रमिला चारण

आंगण अब जोवैला बाट

रमिया सरवरियै री पाळ
बाबोसा रै द्वार
डागळियां री मेड
आमलियां रै बाग
सहेल्यां रो साथ
आंगण अब जोवैला बाट
चौवटो सूनो पड्यो.... !

धीवडियां दोरी हुयी
दूजै घर जावती....
डूंगर-भाखर भेळा हुया
अब करैला मन री बात
चिडकलियां दोरी हुयी
दूजै घर जावती....
नाळा-नाडिया ओढैला
दिखणी रो चीर
नैणां ढळकावैला नीर....

चिडकलियां दोरी हुयी
दूजै घर जावती....
बतळावैला बाखळ-बार
सूनापण नै धार
चिडकलियां दोरी हुयी
दूजै घर जावती

तारां छाई झिलमिल रात
दिनां रै बाथां घात
रोवैला आधी रात
पूछैला आ बात
बणाई कुण आ रीतडली ?
ऊंडोडै काळजै रा उछास
उणरो जावै सत्यानास !
बणाई कुण आ रीतडली ?

जलमी बाबोसा री पोळ
लाडेसर इण आंगण री छांव
औ ई ओरण, औ ई गांव
सिधाई
दूजी ठौड
हियै हूक लियां अणपार !

आभै रो रोयो जीव
धरा रो धूज्यो काळजो....
धरा ओढ लुआं रो
बळतो पोमचो
आंधी री पकडी आंगळी
जूना धाबळ रो धरियो भेख

आसीसां दीनी मोकळी
वैला सात जलम थारो सीर
पराई क्यूं व्है लाडली ?
नेवर बांधो बाईसा बाजणा
झांझर री दो झणकार
सिणगारो कसूमल भेस
चुडलो मजीठी चीरवां
सिधावो पिव रै देस
बधाओ बेल वंस री रात
धीवडियां रो अमर सुहाग
हमेसा रहसी राज....
आसीसां फळसी राज री ।





डॉ. प्रियंका भट्ट

अनुभवां री लाठी

या अनुभवां री वा लाठी है
सगळ्यां रै काम री साथी है

गेला मांय बै कतरा कांटा
हर बगत या म्हानै बचावै है
सिखलावै है, बतळावै है
और टेम-टेम समझावै है।

पर मिनख अस्या पत्थर जिस्या
जे चतुर कागला बै मन रा।
अणी रा अनुभवां नै व्यर्थ बतावै
रोज ठोकरां खावै है
पछै पाछेड़ सूं पछतावै है
आंख्यां खुलवा पे आवै है
तो ई ये वटवृक्ष रै जस्या-तस्या
सब दुख अपमान औ रंज भूल
गेला बतळाता जावै है
अर प्रेम लुटाता जावै है।

उठाय़ा दोनूं हाथ

बै ऊपर उठाय़ा दोनूं हाथ
जीवण रा समंदर में
डूबती थकी जिजीविषा
ऊपर-नीचै आता-जाता
हालातां सूं गोता लगाता
फेर भी
मन मांय धार्यां
नूंवी आसा अर विश्वास
भलाई
व्है घणी ऊंडी-ऊंडी गैराई
पार करांगा
सब मुश्किल
पावांगा मंजिल
है यो
पूरो पाको
दृढ निश्चय, विश्वास
बै ऊपर उठाय़ा दोनूं हाथ।

◆◆



डी-7, हिरणमगरी, सेक्टर-5, उदयपुर (राज.) मो. 9468967674




प्रियंका भारद्वाज

मुळक

आमण-दूमणी लुगाई री
मुळक
भोळावण में लाग्योडी
छैणी है
पत्थर माथै
जिकी देवै बैम
मूरत होवण रो ।

मजूर

ई भोम माथै
कर राख्यो है कब्जो
अर आभै रो भी
करै धणियाप
बण 'र देवदूत
इक्का-दुक्का लोग
दूजै कानी
हाथां में हळ, कस्सी
अर माथै री पीड़ री पांड ऊंचायां
मजूर फिरै
भोम दूढतो
पण बीं खातर
नीं आभै में जग्यां है
ना भोम माथै ।



सरणार्थी केंप

सरणार्थी केंप में बैठ्या लोग
कुंआरी मां री बा औलाद है
जिननैं भगवान
इण आस मांय गूथै
कै कदैई तो बणसी
कोई ईसा मसीहो
जीको बांटसी धरती
सगळां में बराबर-बराबर

किसान अर मजूर

दिल्ली रै फुटपाथ माथै
बैठ्यो मजूर जद सुणी कै
किसान आवै धरणो देवण
उभाणां पगां भाज्यो
धरणै री जग्यां
पण चाणचके ई काळजै मांय
मच्यो घमसाण कै
बांनै मोड़ आऊं पाछा
ईं सूं पैलां कै
बांनै हांक देवै हाकम रा डंडा
बकरी-भेड़ ज्यूं, क्यूंके
फुटपाथ माथै अब
जग्यां खाली कोनी ।



वीपीओ-मुंडा, जिला-हनुमानगढ़ (राज.) 335526 मो. 7357474289



प्रीत रै आंगणै

आ थोड़ी बैठ बावळी !
घड़ी स्यात गुरबत करां
इण जूण री
अबखायां रै जाळां मांय
लारै छूटग्यो हेत
बीं रो हिसाब करां ।

पराई निंदा री बातां
बाखळ सूं बारै करां
मिनखां रै हिचै मांय
प्रीत-रीत रा अलेखूं रंग भरां

आ बैठ कन्नै
सांसा ज्यूं अकमेक होय 'र
जठै है अंधारो
बठै सबड़क च्यानणो करां

आपां दोन्यूं—
जवानी री थळी लांघ 'र
बुढापै री
चौक माथै आय बैठग्या,
थूं चरावती रैयी
ढोर-डांगर
अर पाळती रैयी
टाबर-टींगर

अर म्हें
आखी जूण रैयो परदेसां

म्हें कदैई नीं देख्यो
थारो आरसी दाईं
पळपळाट करतो जवानी रो
मूंडो
अर नैणां मांय काजळ कै
सुरमो,
कदैई नीं सुणी
थारी पाजेब री
मीठी-मीठी छण...छण...
चूड्यां री खण...खण...


आ थोड़ी कन्नै सरक बावळी
बुढापै नें देख-देख 'र
नैणां सूं नैणां मिला 'र
हाथ सूं हाथ थाम 'र
होळै-होळै प्रीत रै आंगणै
उतरां ।

दोजक

म्हें दादी नें कैयो—
'दादी !
थे दस-बारै उपराथळी

टाबर जामण
हाळो देख्यो
घणो दोजक ।'

दादी बोली—
'बेटा,
उपराथळी
पडता काळ
कदैई छपनियो काळ
कदैई अठावनियो
घणो देख्यो लुखासणो
जांटी रा छोडा ई
धान मांय
पीस-पीस खाया
कठै हा घी-दूध
डांगर तो भूखा मरता मरग्या
जापै रै भानै सूं
थोडो आछो खाणनै मिलतो
औ
दोजक ।





भावना शर्मा

पूत भलाई लख कमाया होसी

मुळक ना सकै मानखो
जलम री गत बणाया होसी
मां-बाप री आसीस बिना
पूत भलाई लख कमाया होसी

चांद सरीखी चांदणी
सीतळ नेह उजास
चरण कमल रा दायरा
तूं मत भूलै करतार
इण रूंखां री छियां बिना
कीं बच्यो जिको तूं खोसी
मां-बाप री आसीस बिना
पूत भलाई लख कमाया होसी

जीवण री उजियाळी है
मां-बाप री हाजरी
नर-नाहर सम गरज उठै
सर पर छतर भारी
इण काजळ री कोर नैं छूतां
जम भी डरता होसी
मां-बाप री आसीस बिना
पूत भलाई लख कमाया होसी ।

◆◆





मधु वैष्णव 'मान्या'


छाला

पगां रा छाला
आपाणै सागै चालैला
तूं मन रो नेह....
गैर जरूरी मत कर।

मधु.... तिरस प्रेम री
राखां जद... गांठ हिवडै
ज्हेरीली मत कर।
भावां रा रंग हजार
तूं बातां इंदरधनुषी मत कर...।

चिड़कली सांसां री
उड जावैला अेक दिन
तूं बातां...
ड्योढी पर मत कर।

◆◆



हरियल पान

मन हिंडोळ्य में
रमता रैवै
प्रीत री बूदां रा
चाव हजार....।

काढण सूं निकळै कोनी
मधु
आंख्यां में जळ
प्रेम रा दीप हजार....।

धीरज री पाळ माथै
साजन, म्हारा जीव रा
पक रैया हरियल पान हजार।

◆◆



मधुर परिहार

आंगणियै री चिड़कलियां

आंगणियै री चिड़कलियां
अबै नीं दीठै कोस पचास
बाटां जोय-जोय थाकगी
म्हारी बुझगी अब तो आस

सूरज सागै चक-चक करती
गोधुळी ताई आंगणै फिरती
डाळ-डाळ बा इयां फुदकती
जियां घर री होवै खास
पण आंगणियै री चिड़कलियां
अबै नीं दीठै कोस पचास


चीं-चीं चक-चक करती
बुणती सुपन हजार
स्यात पंख आयां पछै
बीं नैं आयो सघन विचार
आभा कानी जोवती
बीं नैं दीठ्यो घणो उजास
पण आंगणियै री चिड़कलियां
अबै नीं दीठै कोस पचास

खुद रो आभो सोधण खातर
इण आंगणियै नैं छोडगी

निंबड़ली, खेजड़ली अर
थळगट सूं नातो तोड़गी
गमती, घटती इणरी जात नैं
कोई बिचाळै स्यात
पण आंगणियै री चिड़कलियां
अबै नीं दीठै कोस पचास

फुदक-फुदक नैं मांड पगलिया
सुभ करती संसार
झूठ, लोभ अर खोट बाँरै
नीं हो औ व्यापार
मिनखां री मक्कारी बाँरै
गळै री बणगी फांस
अबै आंगणियै री चिड़कलियां
नीं दीठै कोस पचास।

◆◆



7, पंचवटी कॉलोनी, रातानाडा, जोधपुर 342001 मो. 9610678147



मयूरा मेहता

वीरां रो वीर

वीरां रो वीर महाराणा,
वीरां रो वीर महाराणा
हळदीघाटी रो वीर, महाराणा वीर।

नाम रहैगो अमर प्रताप थारो जर्मीं पर
वीरां रो वीर महाराणा,
हळदीघाटी रो वीर, महाराणा

आपणी नगरी रै खातिर,
सारो राजपाट ई त्याग्यो
घास री रोटी खाई,
पर मन में मोह न ज्याग्यो
वीरां रो वीर महाराणा,
हळदीघाटी रो वीर महाराणा

प्रेम हो अतरो मन में कै
जोड़्या हा बंधण केई सारा
चेतक री वफादारी सुणनै,
व्हैग्या अचरज ही सारा
वीरां रो वीर महाराणा,
हळदीघाटी रो वीर महाराणा

◆◆



मानसी शर्मा

सोच

अेक

आ जरूरी तो कोनी
कै जिको
थारै साथै रैवै
बो थारै बाबत
चोखो सोच राखै ।

दो

महैं सोचूं
कै बारै जाय 'र पढ़ूं
कीं बणूं
अर आपरै
मन री करूं

पण

पछै सिमट जाऊं
खुद रै भीतर
काछबै दाईं ।

तीन

महैं सोचूं कै उड जाऊं
किन्रै दाईं आभै में
पण सोचूं

कै डोर सूं

अळगो हुवतां ई
के ठाह कटै जाय 'र पढ़ूं

लूटण आळा भौत है
अटै
पग-पग माथै ।

चार

महैं सोचूं
कै घर सूं भौत ई दूर
जाय 'र
पढ़ूं अर घूमूं

पछै

सेलफ्यां लेय 'र
लगाऊं इंस्टाग्राम माथै

चिंतावां सूं कोसां दूर हुय जाऊं

अर

चलावती रैवूं
देर ताईं
आपरो मोबाईल ।

पांच

महैं सोचूं कै
पढाई रै साथै-साथै
करूं कोई काम
कमाऊं घणा सारा रुपिया
अर खरीदूं
भौत सारा
भांत-भांत रा गाभा

पछै

पैर 'र इतराऊं
दरपण रै साम्हिं
अर बणाऊं
आपरी मनमरजी री
वीडियो क्लिपां
घणी सारी ।

◆◆





मीनाक्षी आहुजा

महामारी रै दौर मांय

मिनख व्हैग्यो
साव नागो
आपदा नैं ई अवसर जाण
धावड़िया बण लूटै
दूजै मिनख नैं
कोई नकेल घालै इणरै
अर अेक
तळिया रगड़तो
निठल्लो बैठ्यो
बोट जोवै
ठालो बैठ 'र
आस लेय 'र
कै आवैली
ऊजळी परभात
पण खुद नैं नीं करै
कोई जुगत
मिनख नैं बचावण री
बस घुचरियो बण भूसै
गुंभारियै मांय लुक्योड़ो
सूरज नैं माथो टेकणो चावै
पतरो बांचतो
सुभघड़ी नैं उडीकै
बूझै सगळ्यां नैं
कद आवैला सतजुग रा राम
कद मिटसी औ कोहराम ?

तीसरो मिनख
करै करमां री जुगत
अर लडै अेकलो ईज
कुण जाणै
चानण रो कतरो
ऊगतो दीसै
उणरै माथै।

अब थे ईज

भींत रै उण पार
बा भींत
जिकी खड़ी कीनी ही थे
म्हारै मन रै दुआर
म्हें कदैई थानै ओळमो
दियो ई कोनी
थे ईज लगाया म्हारै माथै
इल्जाम हजार
इण पगां मांय
आज भी पैरूं हूं
थारै नांव रा बिछिया
कंड्यां देवूं बिसार
म्हें ईज गाया गीत
म्हें ईज करी प्रीत
म्हें राख्यो दिवलो
थे तो दिया बिसार।
◆◆

सी-10, पार्क रै कनै, मॉडल टाउन द्वितीय, सरकारी अस्पताळ रै लारै, श्रीगंगानगर (राज.) 335001
मो. 9413372488



मीनाक्षी पारीक

बस! इत्तो ई चावै नारी

जद भी बारी आवै
प्रेम अर अपणायत री
तो चाणचकां ई
उज्जळ्या हो
आ जावै चित्त में
चितराम
राधा-कृष्ण री
सुंदर-सी जोड़ी रा।
जां पर नीं जाणै
कत्ता ही गीत
कथा-कहाण्यां
अर दूहा
लिख्या गया है आज तांई
पण जद बात आवै है
ईं सूं आगै बध'र
प्रेम रा बंधण में
बंधबा की, तो
हर लड़की चावै है
श्रीराम सो पति
जाकां हिरदै में
अेक ई नार
माता सीता ई रही
कन्नै या आंतैरै
सदा वांका मन रा
खूणा-खूणा में

सीताजी रो ई वास रैवतो
पीछै चाहै
अश्वमेध जिग्य री बात हुवै
या आपरै म्हैल री।
अश्वमेध जिग्य हुयो
जद भी सोना री
सीता माता घड़ाई
अर आपरै कनै बैठायी।
हर लुगाई नैं चाह हुवै
पति श्रीराम सो
जिणरा हिरदा में
फगत अर फगत
आपरी लुगाई रो ठायो हुवै।
ज्यूं कै
पत्नी आपरा मन-मिंदर में
खुद रै भरतार री छवि
सजायां राखै
बस इत्तो ई चावै
अेक भारतीय नारी।
अर इण अेक सुपना रै
अेक इच्छा रै बदळै में
निछावर कर देवै
आपरो पूरो जीवण
आपरा भाव अर अस्तित्व।
◆◆



डॉ. मीनाक्षी बोरणा

आथण

फेरूं बा ई आथण
ढळगी चौगान
नैणां भरगयो नीर
मनडै भरगया भाव
बा जिंदगाणी
बो ई कळकळो
छेहलो भरम
होमीज्योड़ा सुपना
पींजर तन
झींझोड़ जाग्यो
पण
भंवारा फंस्योड़ो
तांतो नीं टूट्यो।

बंधण

मारग रो छेहलो पड़ाव
डगर अबूझ
पण आस नीं छोडी
आभै रै आंगणियै रा
मुगत पांखी हां
रूढियां रै बंधणां
नीं बंधां

कुरीतियां आगळ
नीं झुकां
परछाई है साथण
अेकला ई
बधता चालां।

मानवी

रात रो बगत
सून्याड़ चौराहो
उण ठौड़ ऊभो
अेक मानवी
हाको कर 'र
कैवै—
'म्हनेँ मत मारो
म्हारो मरणो
थांरी जेबां नीं भरै
म्है फगत
करमठोक
गरीब-गुरबो
बगत री मार सूं अधमरुचो
अर
लोकतंतर रो रुखाळो
इण देस रो
अेक मानवी हूं।

◆◆



मोनिका राज 'गोपा'

मरुनार

बा खेजड़ली रै रूख-सी
आपरी जड़ां सीचण सारू
तिड़की, तिरसी मरुधरा री
कूख सू खोज लावै
बूदां जीवण री ।

वा है सैनाणी आक-सी
बार-बार शीश
बाढीजण रै बाद भी
हेत-हेज अर सनेव रै बिना
देवै जलम हरप्रिय नैं
कै बिरख भी बण जावै इमरत ।

बा घूट-घूट पी लेवै
तपतो बायरियो
जुगां-जुगां री अमिट तिरसी
खिलावै दाइती मरुभोम में
रोहिड़ै री राती आभा ।

बो तो है—
रळियावणो रूप थार रौ
भुरटां रो शूळ है,
गोद है धोरां री ।
सूखी पड़योड़ी हथाळियां री

रेख में जम चुकी
राख सूं मांज्या करै बा पीड़ नैं
बळती लूआं री बांध डोरियां
हाथां रै पालणै में
झुलावै जीवण नैं ।

बा आंख्यां रै पाणी सूं
भर देवै तिरसी धरती री
तपती गोद
औ पाळ दे-दे रोके
खेतां में आस रो पाणी ।

विस्वास रो मोड़ बंधाय
गांव बधावणो
बादळ बींद रो
आ तो है धोरां री धणियाणी
झणकती झांझर रा नेवर
है देह दाइतै कैरां री आब
तपती लूआं री ठाडी रात ज्यूं
पूनम रै चांद-सी
आ 'मरुनार' है...
बरसतै मरुथळ में मुळकती
सिंधू री बयार है ।

◆◆

सिटी पुलिस चौकी रै कनै, गोपा चौक, जैसलमेर (राज.) 345001 मो. 8078695982



राजोल राजपुरोहित 'मुक्ता'

लापसी

चार पहियां रो म्हैं मालिक, रुतबां सूं बणाऊं लापसी
ठाठ-बाट री ओळखाण करातो, सारो गांव जीमाद्यूं लापसी....
मौसा बोलणियां नैं आज बता द्यूं, कंदोई झट बणादै लापसी
काळी मूंछ्यां रै दे ताव, सगळो नगर जीमा द्यूं लापसी...
इतरो हाको तो सूत्योड़ा शेर जगा देवै,
तीस मारखां चोर नैछो कियां राखसी...
घर में डाकू मंगळ गाया, बो बारै गावतो लापसी....
टक्कां रो सूपंडो साफ होयगयो, बचगी कोरी लापसी....

भतूळियो अर मिनख

भतूळिया तूं चोखो
दीठै जैड़ो काम करै....
मिनख भतूळिया सूं भूंडो
मिनखपणो सरमसार करै....
मूंडै पर तो रस घोळै,
लारै कटारी घोंप दौडै
भतूळियां तूं चोखो
दीठै जैड़ा काम करै...
◆◆





डॉ. लीला दीवान

मैं पाणी में ऊभी

औ हाको आयो—
गांव में पाणी आयो
मैं सुपना सू जागी
आधी सूती, आधी जागी
मैं उण दिसा में भागी
जटासूं हाको आयो
औ काई !
काल जठै धोरा ई धोरा हा
आज पाणी ई पाणी है
मैं पाछी भागी
जाणै सुपना सू जागी
घर में घणो तो कदै हो कोनी
थोड़ा नैं समेटवा लागी
गांठड़ी मोटी घणी
छोटी करवा लागी
छोरा नैं काख में लियो
मैं चालवा लागी
औ काई !
पाणी तो घरां ताई आयग्यो
धीरै-धीरै पाणी बधवा लाग्यो
पाणी घोड़ा ताई आयग्यो
मैं पाणी में ऊभी

छोरो काख में धूजै
अंधारो होवा लाग्यो ।
चिमनी करूं कियां ?
दीयापेटी भीजी
अंधारो और बधवा लाग्या
नानियो जोर सू रोवा लागो
रोतां-रोतां जीभ
ताळवा रैं चिपगी
कैवै तो कीं कोनी
नानिया रैं आंख में आंसू कोनी
जीवण री जोत देखी है ।
नानियो म्हेनैं चूथवा लाग्यो
बारै काळियो भोंकवा लाग्यो
मैं जाणूं हूं
दोन्यां नैं भूख लागी है
पण मैं काई करूं
मैं पाणी में ऊभी
पण मैं काई करूं
मैं पाणी में ऊभी
◆◆



विमला महारिया 'मौज'

ठाडी चिंत्या

लठ गड़ागड़ धूम धड़ाधड़
भाठा भिड़ाई सिर फुड़ाई
चुगली चाळा गाळम गाळ्यां
वाह रे माणस भली कमाई !
अपणा पराया भेद अजाण्या
स्याणप करतां खोट घड़ाई
बीच-बिचौला कुण बणै जद
ठाला बैठ्या करै लड़ाई !
बूढ-बडेरा हुया बापड़ा
कुण सुणै बै साची गाई
भलै-बुरै रो सपमपाटो
जूनी बातां लगै बुराई !
लोग-लुगाई दोन्यूं खोटा
सरम लाज नैं परै बगाई
पकडै गळा उठावै सोटा
टाबरियां री स्यामत आई !
हुयो जमारो रळमपळम अब
मिनखाचारो साख गमाई
धरम समूळो धूजण लाग्यो
सगळो ज्ञान अधर में भाई !
आप मरूधै औंछा भागैं
पडै पल्लै न अेक भलाई
रामधणी कै लाको लागै
'मौज बाई' नैं चिंत्या खाई



नैणां

दुळक-दुळक मनडै री पीड़ा
छळक-छळक छळक्या नैणां
अणबोल्या अणदीख्या बैणां
ऊंडो भेद उंडळक्या नैणां !
राता-राता घुळ रतनारा
कळप-कळप कर फूल्या नैणां
पीड़ पांवणी च्यार दिनां री
सुध जीवण री भूल्या नैणां !
कोरा-कोरा होग्या चिरमी
जाण जगत सूं रूठ्या नैणां
जड़ लीन्या कपाट निरखणां
निरख-निरख बिस टूठ्या नैणां !
मतलब रै भायां रा हेता
हाटां तुलता देख्या नैणां
कुण अपणां अठै कूण पराया
भरम भायला देख्या नैणां
मायड़ री काळजिया कोरां
देखी बळती भोळा नैणां
कूख कबर ज्यूं ऊंडी देखी
जामण हत्यारण देखी नैणां
मन री पीड़ दुळकती जावै
घणा मिजाजी किळवळ नैणां
कीच पड्यौ पाप्यां रै हिरदै
'मौज बाई' रा निरमळ नैणां



'श्याम कृपा' / 62, वार्ड नं. 5, शिव कॉलोनी, मोदी लिंक रोड, लक्ष्मणगढ़ (सीकर) 332311 मो. 9461541031



श्यामा शर्मा

हर आवै छै

थुआर अर रकाण सूं
जाणी जावै छी रुत
सियाठै
काती को न्हाबो
ऊंदहाठै
आखातीज को मेळो
सावणी तीज
डूंगर में जाबो
बरखा को मौज लेबो
लुगायां जाणै अब
रुत काई होवै छै
थुआर अर रकाण
संदै भूलगी
गळ्गी संदी रितुआं
बार थुआर
वांकी रकाण
लुगायां अब न्हं जाणै

◆◆



भरम

भरम रै छै चांद को
आग को, रेत को
छोरां को, अबखायां को
लोगां को, लुगायां को
कठी कुणकी, कठी कुणकी
सरम छै
आखी जिंदगाणी
भरम छै, भरम छै।

जिंदगाणी

जिंदगाणी में
कतना ही उतार-चढाव
आवै छै
कोस-कोस का भाटा
अर लोक-लोक का बरताव
आदमी खुद सूं
कदी जिंदगाणी सूं
लडुबो ई करै छै
अस्यां ई मनख की
जिंदगाणी कटै छै।

◆◆



डॉ. संजू श्रीमाली

पिछाण-अेक

अेक नान्हो हो अंकुर
जीवण री आस मांय
आपरी इकलंगी
नान्हो-सी डाळ पर
अेक-दो कूपळां सागै
बतावै
आपरै जीवत रैवण रो
वजूद
गिगनार नापण री खिमता
माटी मांय हरी आपरी
जड़ सूं राखतो उम्मीद
बतावै
मानखै नैं बात
पिछाण जड़ां री ताण
हरमेस ऊपर बधण री ताकत

पिछाण-दो

जाणूं हूं
जितरा टाबर
उतरा हुवै घर
पण
कदैई औं नीं भूलणो कै
पिछाण तो बडेर ई हुवै

करतूत

म्हैं जाणूं हूं
थूं
सोध रैयो है
थारै टाबरपणै रै बेली नैं
पण
इब बो नीं रैयो
इण घर रै आंगण मांय
स्यात
थूं नीं भूल्यो
उण बेली रै हाथां मांय
हींडा बांध'र
हींडणो
या
बीं री ठंडी छियां मांय
जी भर'र
सूवणो
आज रा टाबर
कठै याद राखै
पुराणी यादां
थारै बेली नैं कटाय'र
बणाय लिया
नूंवै घर या
बांडा अर बारियां ।

◆◆



सपना वर्मा

खसेरणी

लकड़ी रै भारियै-सी लुगायां
बळणो आपरी किस्मत मानै
चूल्है में डाई अर राख होई
आ ईज बात पिछाणै
पण होवै कई मजबूत
डंडकोरियो-सी
बानै—
सागो देख नहीं बळणो आवै
आग देख नीं मरणो आवै
बै ईज लुगायां बणै खसेरणी
जिंदादिली रो करज चुकावै
आग सूं माटी
कदै आग सूं पाणी
कोयलो-कोयलो कटती जावै
किस्तां-किस्तां बळती जावै ।

त्यौंहारी अर भीख

त्यौंहारी रो मतलब भीख नीं
दुआ होवै
सारां सूं मोटी बात कै
अेक आस होवै
जकी काम रै साथै
जुड़योड़ी होवै

लुहारणी काकी आवै जद
त्यौंहारी लेण सूं पैलां
खुरचणो, कुड़छो, चींपियो
बठळ मूं काढ रै
साम्हीं धर देवै
अर बीं रै बदळै
त्यौंहारी ले जावै
कुंभारां रा घर सूं आवै तो
निआयी सूं पका रै
दीया, ढकणियां, गुल्लक
पगधोणियां सागै लावै
मेहतर दादो आता जद
कीं ल्यांवता तो कोनी
पण बै भी जिम्मेदारी निभावै
बीं सारू ई आवता
गांव में मरुयोड़ा
कुतिया-मिन्नियां
ढोर-डांगरां नैं घाल रै
हाडारोड़ी में बै ई न्हाखै
चाहै खळ्ळा काढ्या हो
या फेर तीज त्यौंहार
अेक उडीक रैवै
त्युंहारी रै बहानै
सगळ्ळा जुड़योड़ा रैवै ।

◆◆

कविता



सरोज देवल बीठू

मां

बळता खीरां ज्यूं
जद ई तपै माथो
याद आवै म्हनै
उलटी हथाळी
माप लेवणो
पूरी पीड सीधां ई
ताव, तावड़ा ज्यूं
मतैई
जद ढळ जावतो हो मां !

अै औखद
नीं मिलिया करै
बैदां री पोथ्यां मांय मां !

मन-मेदनी मांय
कितरा रतन, मां !
हियै मांय अटक्या
कितरा मून, मां !

इण जीवण जूण री
अंतिम सांस री बगत
सगळा संसार रो
निरवाळो आणंद-समंद

निरांत सूं भेळो व्हे जावै
आंख्यां री कोर माथै
अटक्योडी
आंसूडां री अेक बूंदइली मांय
अर ढुळक जावै
बा मोती झालर,
पीड अर मोह सूं नीं
करुणा रा अलख रूप ज्यूं

जीवण अर म्रित्यु रै बिचली
कांकड़
जमपाश नीं
बिना फांस अर कसक रा
मीठा पाणी ताई ले जाय

कोई अेक कोटर
कुटी, पंचवटी सूं
अलकनंदा रा
कल्याणी छंदां ताई, मां !

कथावां

कथावां
साची प्रीत री
उणरी रीत री

मेह में नाचता
बै मगन मोर है
मनमोवणा
चितचोर है

जिणरी पंखड़ी
देह त्याग्यां पछै ई
भळावण देय
आगली पीढी नै
पूगती करीजै

जुगांजुग
संभाळ राखीजै
पोथी, पूजा अर
चंवर रै मिस... !



एस-5, 'फतह हिल्स', सिरै मिंदर रोड, जालोर (राज.) मो. 7665377999



सुंदर पारख

पीड़

पीड़ री
रोवण री आदत मिटगी
अमूजो लियां
आंख्यां री कोरां पर
सूख जावै...
पीड़
अंतस में रळगी

सूखती जड़ां

सूखती जड़ां
कांई काम री
जड़—
ऊगती पौध जलमावै
दरखत हुवै
डाळां-पानां
फळ-फूल छावै
बा ईज हरी जड़ काम री।
सूखती जड़ां
मत हुईज्यो
पनपता रहीज्यो
जन-मन रा हुकर
फळता रहणो ही
जीवण रो सार है।

राजस्थान रो धीणो

थाळां बैठ जीमणो—
रंज्यो-मंज्यो पुरसणो
अर मनवारां सूं धपाणो
कुण करै ?
टेबलां मेलीजै
टोपिया अर बरतन
पलेटां-चम्मच-कांटा
रसोई नीं बणाई हुवै
अैसान करियो है—
कांटा चुभै
चम्मच मारै
अर गासिया ?
अटकै—जद मन भटकै
टिब्बां-दर-टिब्बां
अे मावड़ी
जमारो क्यूं बदळ न्हाख्यो ?
हियो बावै बाको।

◆◆





सुमन पड़िहार

रिवाज री बुगची

अेक रिवाज री
बुगची होवती

मिनखां रै आंखियां मांय
पाणी होवतो

जाणता हा सगळा
मोटै-छोटै रो कायदो
नीं कदैई रीसाणो होवतो
नीं करड़ा बोल होवता
जे होवता तो
मिनख पेट मोटो राखता

हेत अणमाप होवतो
भाई-भाई रो गांव
सगळो सगो होवतो

अबै बै बातां नीं रैयी
मिनख धुक-धुक नै
हेत-प्रेम मिटाय दियो
बोलो-बालो खुद में ईज
मिनख रमग्यो

बाड़-किंवाड़ ई पूछै
अबै कै कठै गया बै
पैलड़ा मिनख
जका जीवण नैं
जीवण बणाय राख्यो हो

कठै गया बै मायत
जका अकाळा सूं
जूझता थकां
हिम्मत नीं हारी
जीवण नैं पाछो पनपायो

कठै गई बा
रिवाज री बुगची!





डॉ. सुषमा सिंघवी

सवां बीच राजी हूं मैं

‘ॐ नमः सिवाय’
सिव री माळा फेरूं हूं पण
सवोपासिका बणगी म्हें,
सवां बीच राजी हूं म्हें ।
चेतन-रुखाळी नीं की पण
जड में ही भरमीजी म्हें ।

‘प्राण देय भी धरती मां री,
धण-सुरक्षा’ नैं भूली म्हें
स्वारथ सूं खोदी अतरी कै,
खानां खाली कर दीनी म्हें ।
सत्त्व-भूत पृथ्वी मरगी बण,
मृत-भाटा रा भवन रहूं म्हें ।
सोना-रूपा-मृत-धातु पण,
सिणगारूं सररीर इतरूं म्हें ।
चेतन सूं तो लाड नहीं पण,
जड-मृत वैभव बीच जीऊं म्हें ?


कारखाना रा कैमिकल सूं
अणगिण वाहण रा धुआं सूं
हवा जीवती में ज्हेर घोळ अर
अे.सी. हीटर सूं कतल करूं म्हें ।

सिव रो नांव जपूं पण,
सिव सररीर नैं मारूं म्हें ।

पाणी भी तो सिव-मूरत पण,
कचरो, लासां नाख बिगाडूं म्हें ।
आग-सूरज-चांद नीं छोड्या,
सगळां रो सरूप निचोडूं म्हें ।
भूख-तिर-रोग अभाव में जीवै,
सिव-मूरत होतृ-जीव नीं पूजूं म्हें ।

पृथ्वी-जळ-तेज-वायु-गगन,
सूरज-चांद-हवण-कर्ता-प्राणी ।
सिव री अैं आटूं मूरत चेतन,
इणां री रुखाळ सूं ई जान बचाऊं म्हें ।

◆◆



‘जैन कुंज’, फ्लैट नं. 2 डी, 1-गोपाल बाड़ी, जयपुर 302001 मो. 9414071430



अवन्तिका तूनवाल

औ जीवण जीणो पड़सी

जुग-जुग करणा पड़्या काज अर जुग-जुग ही करणा पड़सी
भाग साथ नीं देवै तो भी औ जीवण जीणो पड़सी

साच धरम री खातर मिनख,
सगळो जीवण जीवै दुख भोग
इणरो जो नीं करै सम्मान,
उणरै धोक लगावै लोग
दिवलो जोयो साच-धरम रो, उणरो साथ निभाणो पड़सी
भाग साथ नीं देवै तो भी औ जीवण जीणो पड़सी

पांच पूत अर किसन भतीजो,
कुंती पग-पग दुख झेल्या
भरी सभा मांय लुटी द्रौपदी,
भीष्म, विदुर धृतराष्ट्र छतां
होणी नैं कुण टाळ सक्यो, होणी तो होयां सरसी
भाग साथ नीं देवै तो भी औ जीवण जीणो पड़सी

अेक करै कर-कर मरजावै,
दूजो बिन मेहनत पा जावै
भाग भरोसै बैठ्यां कीकर,
जतन जीवण रा कर पावै
बिन मांग्या मोती मिल जावै, मांग्यां मान गमाणो पड़सी
भाग साथ नीं देवै तो भी औ जीवण जीणो पड़सी





आशा रानी जैन 'आशु'

सीख रो गीत

ताती-ताती मत खा रे मूंडो बळ जावगो
ठंडी करके खा जीवण साता में जावगो

बना बिचार्यां काई न करणो, कैग्या छै बूढार
पाछै कदम मेलणो पैली मन में करो बिचार
सोच-समझ अर जो चालै मंजित नूंवी पावैगो
ताती-ताती मत खा रे....

ई धरती पर तूं जद आयो तूं छो खाली हाथ
मालिक भर दी झोळी मांही घणी-घणी सौगात
औरां को जद भलो करैगो, तूं सुख पावैगो
ताती-ताती मत खा रे....

मन में धीरज राख बावळ, और कर्यां जा मैनत
भासा सूं हीरो हो ज्यागी, कोई दिनां या किस्मत
मैनत करबा वाळो जग में नाम कमावैगो
ताती-ताती मत खा रे....

कपट ईसका छळ नहीं करणा, मीठो राख ब्यौहार
मन सूं भाव दया का राखो, सब धरमां को सार
जश्या करम करैगो वश्या तूं फळ पावैगो
ताती-ताती मत खा रे....





क्यूं गुणगुणायो रे भंवरा

मंझ रात क्यूं गुणगुणायो रे भंवरा
मचळै है म्हारा अरमान कोरा कोरा
मंझ रात....

नींदां में हाल म्हूं तो सोई छी गहरी
तूं लांघ आयो रे आशा की देहरी
छम-छम सी पायल पाड़ोसण की बोलै
चंचळ हिरणिया सा मन मेरा डोलै
हालै रे देख नैणां रा कटोरा म्हारा
मंझ रात....

सूनी-सी रातां में उठगी रै झटकै
बिखर्या-सा केश म्हारा कांधा में लटकै
बेरी या बेर जब बागां में फूलै
खिलती लता जब बागां में झूलै
हाल बेबसी रो मत डालै रै डेरा
मंझ रात....

चंचळ-सी रात बडी नटखट जवानी
झिलमिल उडै रे म्हारी चुनरिया धानी
प्यासा-सा होठ म्हारा होग्या गुलाबी
प्याला का प्याला भरी नैणां शराबी
रोळी-सा होग्या रे गाल गोरा-गोरा
मंझ रात....

पाणी में चांद दिखावै

यो कुण छै री म्हानै पाणी में चांद दिखावै
दो पल म्हारै पास आवै री दो पल दूरो जावै

यो कुण छै री डूब-डूबकर उभरै है हिरदा में
परछाई के जइयां रह-हर गुजरै है हिरदा में
काजळ सूं बातां करग्यो री आंख्यां धनक रचावै
यो कुण छै री म्हानै पाणी में चांद दिखावै
दो पल म्हारै पास आवै री दो पल दूरो जावै

आंख मदभरी होठ रसीला, जीवन में रस भरग्यो
म्हारा खंडित ताजमहल नै, यो कुण पूरो करग्यो
काजळ सूं बातां करग्यो, मनडै नै हरसावै
यो कुण छै री म्हानै पाणी में चांद दिखावै
दो पल म्हारै पास आवै री दो पल दूरो जावै

नम री पलक्यां सूं आंसूड़ा, टप-टप करता बरसै
तब जाकर म्हारा हिरदा में, गीत रागिनी हरसै
प्रणय प्रीत री बातां करग्यो, मनड नै हरसावे
यो कुण छै री म्हानै पाणी में चांद दिखावै
दो पल म्हारै पास आवै री दो पल दूरो जावै





नगेंद्र बाला बारेट

मन में ले लूं सार

देख समय रा भाव नैं मन में ले तूं सार
जे कोई कहवै तो मानले की खेतां बोवै है कचनार
गर कोई कैवै कै आज छात पर बोल्यो हाथी आर
तो इण बात नैं मान जा अर कहदै कै हाथी हो कबूतर लार

भखभूरिया सा पांख है अर बीं पे सूंड लांबो
छीतरिया-सा कान है अर घण मोटो है मूंडो
बगत-बगत रो फेर है, और है कळजुगी बात
हाथी कबूतर अेक रूप में दीसै, आ बात है साच

बिरछां रो प्रेम

बिन बोल्यां ई औ बिरछ म्हानै प्रेम की बात सिखावै है
रे मूरख तूं सपना में खोवै, ओ सोनलियो जलम गमावै है
इक-दूजा रै गळै लाग रैया, तो बण्या इक-दूजा रो सारो है
रे मन तूं काई गुमान में जीवै, आ काया तो नश्वर है
तूं भी थारा कुटुंब सूं मेळ राखलै, आपस में भेळापो कर
नीं जाणै कद ई जाणो पड़जा, फेर कठै अै बातां है
है तो ओ बिरछ, पण संदेस प्रेम रो देवै है
सदा मानवता री छांव राखो, औ ई पाठ पढावै है।



कृष्णा कॉलोनी, राजकीय विद्यालय रै कनै, सुशीलपुरा, अजमेर रोड, सोडाला (जयपुर) 302006
मो. 7838550985



प्रमिला शर्मा सनाढ्य

ओळ्यूं

पिया हो म्हानें ओळ्यूं घणी आवै हो
परदेसी प्रीतम बेगा आवो म्हारोडै देस
सखियां म्हारी मोसा बोल बोलै हो
सुणो-सुणो पिया बेगा आवो म्हारोडै देस

सावण सुदी तीज बालम, सूनी-सूनी बीती हो
चौथ र चंदा नैं भी म्हें फीको-फीको देख्यो हो
रस भर्या झूला संग मन म्हारो डोलै हो
झूलै रा हर झोटा साजन पिया-पिया बोलै हो
आंगणियै री फुलवाडी फाग मचावै हो
परदेसी प्रीतम बेगा आवो म्हारोडै देस

सुपनै में सासूजी री बेल बधाऊं हो
अपणै सांवरियै रा पगल्या दबाऊं हो
हिवडै रा जिवड़ा मिल मोद मनावां हो
दूधांधोई रातडली में रळ-मिल जावां हो
नणदल म्हारी भावज हेलो पाडै हो
सुणो-सुणो साजन कीकर बोलूं मनडै री बात।

काजळ टीकी मांग मैदी गजरा सजाया हो
हिवडै में सतरंगी सुपना सजाया हो
हथेळ्यां री मैदी बीच थांकी मूरत मांडी हो
चौबारै में छम-छम करती पायलडी झणकारुं हो
नैणां रा झरोखा साजन अंसुवन सूं धोवूं हो
सुणो-सुणो पिया बेगा आवो म्हारोडै देस।





प्रीतिमा 'पुलक'

अखबारां में

मनखपणां पे कालिख फरगी, मान डूबगयो गारां में
कसी-कसी बातां मंडज्या छै, पढ देखो अखबारां में
तड़के-तड़के जाग जो होवै, नाम प्रभु का बोलां छां
राम-राम दुनियां सूं करता, अखबारां नैं खोलां छां
घणी तरक्की मलक में होरी, असी खबर भी आवै छै
नुई योजना कतनी चाली, सारी बात बतावै छै
कतणी मटगी कतणी बटगी, घूस का बाजारां में....

जो बेट्यां नैं नाम कमायो, वांको ऊंचो नाम मंडै
नान्ही बायां का रगतां सूं, फेर भी यो अखबार भंडै
दंड देबा हाळा अब तो, अपराध्यां नैं पाळै छै
तिजोर्यां की कूंच्यां इब तो, चोरां कै हवालै छै
खटकै छै वू नंगोपण, जे दीखै इशितहारां में....

नीति अर नियम सब टूट्या, मरयादा भी टूटी छै
कलयुग का बेटा न लाजां, अपणी मां की लूटी छै
रुपिया-पीसा का फेरां में, जान घणी ही सस्ती छै
च्यारूंमेर लगै छै जाणै, गिद्धां की ही बस्ती छै
मनख्यां में उ करंट फैलगयो, ज्यू बिजळी का तारां में....

रूप धरै साधू-संतां को, घणा लुटेरा घूमै जी
म्हां कैवां जाणै नायक वै, नशा में संदा झूमै जी
संस्कारां की राह भूलग्या, लोग मति का मास्या छै
करमां का फैर छै देखो, कीटाणु सूं हार्या छै
कोरोना उत्पात मचा र्यो, मान का जग सारां में...



'अध्यात्म', सी-1, कपिलवस्तु कॉलोनी, पाटन रोड, झालावाड़ (राज.) मो. 9928216828



पुष्पा शर्मा

भ्रूणहत्या

माई म्हैं तो अजन्मी हूं लाडली
म्हारो क्यूं घोटै तूं दम
क्यूं घोटै तूं दम माई म्हारी क्यूं घोटै तूं दम
माई म्हैं तो अजन्मी हूं लाडली
म्हारो क्यूं घोटै तूं दम

मत दीजै म्हनें दत्त दायजो
मत खरचै तूं धन
पढ-लिख'र थारो बणूं सहारो
थोड़ो दैऽ दैऽऽ मन
माई म्हैं तो....

नारी जग में जन्मदायिनी
फिर क्यूं मिल रैयो दंड
म्हारै मरणै सूं हो जासी
दुनिया ही बदरंग
माई म्हैं तो...

मायड़ तूं तो भई रे बावळी
म्हैं तो थारो दरपण
दरपण थारो टूट गयो जद
भूल जासी प्रतिबिम्ब
माई म्हैं तो....

◆◆



मंजु महिमा

घणो निराळो राजस्थान

अेक आडी है मीठा पाणी री झीलां,
अेक आडी है मोटो रेगिस्तान
घणो निराळो म्हारो राजस्थान

धरती रै धोरां चालै है, ऊंटां रा काफला
अरावळी री पहाडियां छाई आधा राजस्थान
घणो निराळो म्हारो राजस्थान

वीरां रो इतिहास अणी रो, विकास रो है वरतमान
दुनिया भर में पैठ है इणरी, अजब है इणरी शान
घणो निराळो म्हारो राजस्थान

सुनहरी धरती रो लहंगो इणरो, चूनड़ ओढी धाणी
झूम-झूम के नाचै सगळा, मीठी इणरी वाणी

बीकानेर है बोरलो इणरो, जयपुर-जोधपुर झुमका
कंठला में जड़ियो अजमेर, कोटा-उदयपुर चुड़ला
आखा देस में अद्भुत है इणरी स्यान
घणो निराळो म्हारो राजस्थान

‘पाणी’ को मोल यो जाणै, माथै गागर लेय रै भागै
कदी काळ, कदी खुसहाल, पाणी रै खातर हुयो कुरबान
अजब-गजब है इणरी स्यान
घणो निराळो म्हारो राजस्थान





डॉ. रानी तंवर

चिड़कली उडबो चावै

लाडो पढबा नै मां सात समंदर पार जावैली
थारी कूख नैं उजाळ, जग में नाम पावैली
अेकली कदै न भेजूं लाडो, म्हारी बात मानैली
अेकली कदै न भेजूं लाडो....

थारी चिड़कली उडबो चावै, आकासां नैं छूबो चावै
पगल्यां री जंजीरां पग नै काट खावैली
लाडो पढबा नै मां....

नखरा नाज्यां बेटी पाळी, मूं जाणूं छै भोळी भाळी
कपटी छळी घणो संसार कोनी पार पावैली
लाडो पढबा नै मां....

सब समझै या पढी-लिखी छै, थारा बेटां सूं कद कम छै
बैरी निजस्थां नैं तो चीर फोड़ डालैली
लाडो पढबा नै मां....

लाडो सुपणा सब तूं पूरा कर लै, पण म्हारा भी मन की सुण लै
मां भी छोड सब रुजगार थारै लार चालैली
लाडो पढबा नै मां....

लाडो मानै कोनी सात समंदर पार जावैली
न भेजूं अेकली, लाडो म्हारी बात मानैली

◆◆



रानी सोनी 'परी'

मारवाड़ी ओळमो

मांडो झोळी मावडली, मैं लेय ओळमो आई हूं
म्हनें तूं कसूर बता दै, किसबिध हुई पराई हूं
अेक कूख ही अेकसो जापो, दरद अेकसो झेल्यो
म्हें रमती क्यूं आंगणियै में, बीरो गोदयां खेल्यो
दुभांत या कयांकी राखी, के मां में परजाई हूं
म्हनें तूं कसूर बता दै, किसबिध हुई पराई हूं
बाबलियो तो लाड लडायो, बीरो क्यूं घुरकायो
काची-सी उमरडी में, सगळो काम सिखायो
चूल्हो-चोको राखूंड में, सगळ पहर बिताई हूं
म्हनें तूं कसूर बता दै, किसबिध हुई पराई हूं
सासू-सुसरा, जेठ-जिठाणी, सै कीं बातां मानी
छोटी नणद देवरियै के, कदै देखी कोनी कानी
के के बात बताऊं मायड, के के दर्द छुपाई हूं
म्हनें तूं कसूर बता दै, किसबिध हुई पराई हूं
जी की तो जेवडी कर दी, कर्चो काळजो भाटो
जो मिल्यो राजी हो खायो, के मीठो के खाटो
पीवरियै का गेला भूली, सासरियो अपणाई हूं
म्हनें तूं कसूर बता दै, किसबिध हुई पराई हूं
डोली आई अरथी जासी, या ही सीख सिखाई तूं
मूंडै पर तो ताळो राखी, सारा फरज निभाई तूं
तेरी सारी बातां मानी, अब मान मान मुरझाई हूं
म्हनें तूं कसूर बता दै, किसबिध हुई पराई हूं





डॉ. रेनू सिरैया 'कुमुदिनी'

आयो बुढापे

आयो बैरी बुढापे यो दिन-रात सतावै है
हुयो हाड पिंजरा सो नहीं साथ निभावै है

आंख्यां ये करै झिलमिल हाथां में जोर नहीं
अबै चाल हुई लड़खड़ यादां कमजोर घणी
कानां सूं भी अब तो घणो ऊंचो सुणावै है

भण लिखनै छोरा भी अबै बाबू ये बणग्या
कोनी टेम मिलवा नैं जद सूं बै पनपग्या
घणा रोग पड़्या पाछै, जीणो नीं सुहावै है

है साथै सगळा ई पण फेरूं ई अकेला हां
छोरा-छोरी पोता सब नाता स्वारथ रा
हिवड़ै री कोण सुणै, आंख्यां ई भर आवै है

क्यूं भूल्या सगळा ही अेक दिन यो आवैला
जो कर्यो कुमुदिनी थे उणरो फळ पावैला
जद छळै आपणा ही वृद्धाश्रम खुल जावै है

आयो बैरी बुढापे यो दिन-रात सतावै है
हुयो हाड पिंजरा सो नहीं साथ निभावै है





लता पुरोहित

परिवार नियोजन

अे भायां म्हारा सुणजो थानै, बात कहूं म्हैं साची
म्हैं भी इणनै अेक दाण ही, किताबां में बांची
यो मिनख जमारो खोटो, इणमें जनता सब है नाची
हरिया-भरिया दीखता खेतां में, घणा धान रा टोटा है
तो पण आपणा इणी देस में, घणा व्है रैया मोटा है
आपां मिल सब बात करांगा, ये कदी नीं व्हैगा काची
घर में थे जे चार जणा व्हो, तो रोटी खावो ताजा
थोड़ा में थे घणो समावो, सब रैवोला थे साजा
दो टाबर नैं जलम देयनै, रैइजो थे सब राजी
परिवार नियोजन में भाग ल्यो, सरकार री सुणजो बातां
'हम दो हमारे दो' सब कैईनै जाता
इण नियमां रा पाळण करां, कदी नीं रैवां संतापी।

बचपन री यादां

याद घणो बचपन आवै, कीं करनै पाछो लाऊं
वणी वगत री फिकर ई कोनी, किसतर हूं समझाऊं
घेरदार फ्रॉक पैरनै, फूंदी जोर सूं असी फराय
शाला में मस्ती करता, दो चोटियां तो ऊंची कराय
छुट्टी आधी में घरै जो आता, मन व्है तो पाछी जाऊं
मेळा देखण सौक घणो है, खेलकण्या वठै सूं लावां
शाला में सिनेमा रो दिन व्है, पैलां नांव वठै लिखावां
पिकनिक रो तो आणंद घणो थो, अंताक्षरी भी म्हैं खेलाऊं
भादो में संध्या मांडा मा, गोबर सोधनै सब लावां
तरै-तरै फूल लाइनै, कागडो ऊपर पूरी सजावां।





विजयलक्ष्मी देथा

गीत कस्यां गाऊंला

गीत कस्यां गाऊंला रे, गीत कस्यां गाऊंला
मारकाट आज मची, धरती है रगत रची
हरियाळी कठै बची, गीत कस्यां गाऊंला

ज्ञान रो उजियार कठै रे, घोर अंधियार अठै
भ्रूणहत्या बलात्कार जठै, गीत कस्यां गाऊंला

बालकां पे जोर-जबरी रे, जीवण री गाडी थमरी
रोवै-बिलखै टाप-टापरी, गीत कस्यां गाऊंला

झुंपड्यां में नित रोदण, महलां में मत्रै मोदण
यां खायां री क्यूं खोदण, गीत कस्यां गाऊंला

कांटा को ढेर बध्यो, सांसां में ज्हेर बध्यो
भायां बीचै बैर बध्यो, गीत कस्यां गाऊंला

रागां रो अंत हुयो, संत मन कुसंत हुयो
यो कुणसो पंथ हुयो, गीत कस्यां गाऊंला

पसरग्या कोरोना रा पांव, सिसक रह्या स्हैर-गांव
दुष्ट डाकी खेलै दांव, गीत कस्यां गाऊंला

ऊगतो क्यूं आंथ रह्यो, दुख यो किण भांत रह्यो
घर-घर घिर घात रह्यो, गीत कस्यां गाऊंला





डॉ. विजयलक्ष्मी शर्मा

तूं क्यांनै तरसावै रे!

अँडो कोई दिन आवै, कानूडो मिलण नै आवै
सागै आवै स्यामा प्यारी, भाग नैं सराहूं रे!
जुगल मूरत प्यारी, स्याम छिब मतवाळी
देख्या ही लुभाऊं हूं तो, गुरु गुण गाऊं रे!
आरतो उतार लेवूं, मनडो ही वार देवूं
चरणां लिपट कर, हरख मनाऊं रे!
अँडी कोई घड़ी आवै, अँडो कोई पल आवै
जोऊं बैठी बाट हूं तो, कागला उडाऊं रे!

थांरी तो सूरत पर, अटक्यो है मन म्हारो
सुध ले ल्यो दासी री थे, किसन मुरारी रे!
जुगल छबि री सोभा, किण भांत कैऊं कान्हा
राधा राणी रूप पर, जाऊं बलिहारी रे!
फूटरो सरूप थांरो, आंख्या मोटी कजरारी
हाथां में मुरलिया, मुगट मोर धारी रे!
पीतांबर पैर लियो, गळ मोतियां री माळा
टीको तो लिलाड पर, सोवै गिरधारी रे!

प्यारा कान्हा तूं तो म्हारो माय-बाप
भाईबंध विद्या धन, बुध और सखा म्हारो रे!
तूं ही म्हारो साची प्रेमी, इण आखै जग मांही
थारै सूं संबंध नातो, नेह रिस्तो सारो रे!

थारै सागै जोड़्यो हेत, रीत प्रीत जाणूं नाही
थूं तो इण जगत री, रीत सूं ही न्यारो रे!
भगत बच्छल प्रभु! करुणा रा धाम हो थे
त्रिलोकी रो नाथ म्हानै, लागै घणो प्यारो रे!

हिवडै में आस लागी, कानूडै सूं मिलण री
भूखी तीसी बाट जोऊं, कद कान्हो आवै रे!
मुरली री अणहद, कानां कद पडै म्हारै
कद म्हारो लाडेसर, बंसरी सुणावै रे!
गायां रो गुवाळ नंद लाल गिरधारी कान्ह
उण बिन म्हानै कोई और ना सुहावै रे!
आज्या भगतां रा बेली, लाडला माखणचोर
काळजै री कोर अब, देर क्यूं लगावै रे?

थारै दरसण सारू, तरस रह्यो है जीव
आज्या म्हारा हेताळु, तूं क्यांनै तरसावै रे!
जमना किनारै कान्हा, कदंब री छियां हेठै
बंसरी री तान म्हानै क्यूं ना सुणावै रे!
मनडै रो मोर कान्हा, तन्नै ही पुकारै नित
मदन मोहन कद दरस दिखावै रे!
चटपटी लाग रही, काळजै रै मांही कान्हा
कद म्हारो लाडेसर, हिवडै लगावै रे!



राणी बाजार, बंगाली मिंदर रै कनै, बीकानेर (राजस्थान) 334001 मो. 8824016859



डॉ. विद्या रजनीकांत पालीवाल

मायड़ री पाती

(परदेस में परिणीता बेटी नैं सदेस)

मायड़ देय सदेसड़ा, ले बायरिया री ओट
कहिजो म्हारी धीय नैं, सुरति करै हिया में चोट

सुण पंछी पीड़ा माय री, कहिजै धीय नैं जाय
राम-लखण सा वीर थारा, कई पण पीव न खाय

सूना ये बाई घर-आंगणा, थां बिन रह्यो न जाय
पंख वाळा बडभागी पंछी, म्हैं किणबिध मिलूं आय

बिणती ओ सूरजदेव सूं, करज्यो पूरण प्रकास
कहिजो म्हारी धीय नैं, मायड़ मिलवा री आस

कुण सुणै किणनैं कैवां, हाल लिख्या नीं जाय
ऊग्या सूरज सांमै ऊभी, आंख्यां झर-झर जाय

सासू ये बाई थारी सोवणी, ससुर देव अवतार
नणदल मीठी बोलणी, बाई! नेह भर्या भरतार

मन री पीड़ यो जग नीं जाणै, मायड़ आखिर है मां
भावां रो संसार हिया में, होठां मुळकै है मां



22, ब्रज विहार, धायबाई जी री बाड़ी, पुला (उदयपुर) राज. 313001 मो. 6378289196



शकुंतला शर्मा

पीड़ अेक विरहण री

सावणियै री बरसै बदरिया, रिमझिम-रिमझिम
ठंडी पून चालरी मधरी, सतरंगी म्हारी उडी चुनरिया

थारै बिना औ क्यांको सावण, फीका सगळा तीज-तिंवार
आज हिंडोळो सूनो साव, बेरंगा म्हारा सगळा सिणगार

आज धारली मूरत आंख्यां में, म्हें पूछूं थे क्यूं नीं आया
म्हनें बतावो के काम अटकग्यो, पोळ्यां खाली-खाली आज

देखो लोर सावणियै रा, घणो सांतरो मौसम है
इण रुत में थे कठै बस्या हो, दाळ-चूरमा घणा अडीकै

रात बैरण लांबी होयगी, दिन में मनड़ो भटकै है
झिरमिर-झिरमिर बारै बरसै, टप टप टप टप आंसू बरसै

सुणल्यो जी साथीड़ा म्हारा, लारली बातां भूल ज्यावो थे
अे बदळी तूं जाकर कह दे, आ जोगण आंख्यां नीं झपकै

कठै गयो म्हारै हिवडै रो हार, कठै गयो म्हारो नौसर हार
कठै म्हारै चुड़लै रो सिणगार, कठै म्हारै चूनड़ रो भरतार

अब तो आ ज्याओ जी भरतार, अब आ ज्याओ जी भरतार
सावण की रुत है रंग-रंगीली, हिल-मिल रैवां जी भरतार





शोभा चंदर

क्यूं भेजी परदेस

क्यूं भेजी परदेस मावड़ी
म्हानै क्यूं भेजी परदेस

खेल-खिलौणा, साथ सहेल्यां
ज्यां संग चार दिन भी न खेल्या
के छूट गयो अे म्हारो देस
मावड़ी म्हानै क्यूं भेजी परदेस

कुण थपक्यां दे गोद सुआसी
कुण कांधा ले मेळो घुमासी
कुण सुळझासी म्हारा केश
मावड़ी म्हानै क्यूं भेजी परदेस

म्हैं भी ही थारा पेट की जाई
क्यूं म्हानै तूं जाणी पराई
मनड़ा पे लागी म्हारै ठेस
मावड़ी म्हानै क्यूं भेजी परदेस

भूल गई कोयलड़ी गाणो
भूल गई चिड़ी चुगबो दाणो
आंसुड़ां री पाती रो संदेस
मावड़ी म्हानै क्यूं भेजी परदेस

सुणल्यो म्हारी बात

म्हारा सायब जी, सुणल्यो थे म्हारी बात
सुणल्यो थे म्हारी बात
कद आओला थे, लिखदयो म्हनै
म्हारा सायब जी, सुणल्यो थे म्हारी बात
जद सूं थे परदेस पधार्या
सगळा सुख भी संग ही सिधार्या
म्हारा नैणां करै, राल्यूं बरसात
थे सुणल्यो म्हारी बात...

जद सावणियो म्हासूं लडै छै
बस थे जाणो गाज पडै छै
हिवडो पावै नहीं, चैन घड़ी स्यात
थे सुणल्यो म्हारी बात...

बासंती रुत जद मुस्कावै
मनड़ा मांय आस जगावै
पिवजी ल्यावैला, फूलां री सौगात
थे सुणल्यो म्हारी बात...

प्रीत को औ रंग छै मतवाळो
दिन-दिन गैरो होबा आळो
मन रा बागां का अे, हरखै पात-पात
थे सुणल्यो म्हारी बात...

◆◆



स्नेहलता कचोरिया

अलबेलो मेवाड़

अलबेलो मेवाड़ देश म्हारो, प्यारो राजस्थान है
इण धरती नैं नमण करूं, यो वीरां रो जन्म स्थान है

राणी पद्मणी रतनसिंह, महलां री सोभा न्यारी ही
सुंदरता बैरण हो गई, आयो आंख्यां में पाणी है
कामलोलुप खिलजी देखो, जबर राणी रो रूप है
सुध-बुध सारी भाल गयो, बैरी बण आयो क्रूर है
अलबेलो मेवाड़...

इणी रूप रै कारण बो, छळ-बळ सारा काम लिया
राणी मनडै में घबराई, गोरा बादळ नैं याद किया
देख्यो जद सत जावण में है, राणी साचो प्रण कीन्हो
कूद गई जळती ज्वाला में, कर नाम अमर इतिहास में
अलबेलो मेवाड़...

सलूंबर री हाड़ा राणी, सारो जग पहचाणी है
शीश काटनै हाथ धर दियो, वीरांगणा अग्राणी है
चूड़ा सारा मोह छोडनै, रण दीन्ही टंकार है
जुध जीतनै आया, पण राणी री अमर सैनाणी है
अलबेलो मेवाड़...

पन्ना जैड़ी धाय मां अटै, अपणा लाल गंवाया है
राजवंश रै खातर जिण, आंसू आंख सुखाया है

बनवीर रै हाथ नों लागी, उदय सिंह री पाती है
इण जननी रो जस गातां, आ जीभ म्हारी थाकी है
अलबेलो मेवाड़...

भामाशाह स्वामी भक्त नैं, कोई भूल न पावैगा
विपत्ति में जो साथ निभावै, साचो भक्त कहावैगा
संपत्ति सारी अर्पण कर दी, देश सेवा हित उपकारी
धन्य धन्य बीं जननी नैं, जो इसा देशभक्त जाया है
अलबेलो मेवाड़...

आन-बान हित राणा प्रताप, घोर जंगळा में भटक्या
राजमहल रा भोग छोडनै, घास री रोटी खाई ही
अकबर रै तो हाथ नों आया, लोह चणा चबवाया है
मुगल वंश मन में पछतावै, धन्य या धरा महान है
अलबेलो मेवाड़...

चेतन तो घोड़े हो, पण स्वामीभक्त महान हो
घायल पर घायल होयो, राख्यो स्वामी रो मान हो
शक्तिसिंह पछतावै हो, धिक्कार मनै मां जाया नैं
चरण पडूं इण चेतकरै, स्वामी री लाज बचाई है
अलबेलो मेवाड़...

अलबेलो मेवाड़ देश म्हारो, प्यारो राजस्थान है
इण धरती नैं नमण करूं, यो वीरां रो जन्म स्थान है



वृन्दावन विहार कॉलोनी, बाईपास रोड, सलुम्बर (राज.) मो. 8890687837



सपना यशोवर्धन व्यास

म्हारो जैसाणो

ओ म्हारै जैसाणै स्रैर री बात निराळी
म्हारै जैसाणै री बोली तो शहद री प्याली
होड करै है हेम सूं वीं रा भाटा अर चट्टाण
किळकै कारीगरी कलमां सूं, मुळकै है पाषाण
नोमुज धोरांळी धरती री गाथावां पुराणी
अपणायत शीश देवै रैकारै में गाळी

चालै मारग झीणोडै, आ धणियाप न धारै है
भुजबळ माथै रखै भरोसो, अरि शीश उछाळै है
धरती अभिमानी आंटीली, लहू मांग सजावै है
जीवण जूझण में जाणै है, जौहर में न्हावै है
चामुंडा रूद्रोणी बीसहथी चितराळी
ओ म्हारी जैसाणै स्रैर री बात निराळी

पाणी काढै पाताळ फोड, धोरां में उगावै धान
फळियां काचरियां उपजावै, खीज सोगरो शान
गगनां गूंजावै माडराग, राइको रणमल लोकगीत
झिझळियो, लाखो अर पणिहारी री अमर प्रीत
रंगां-चंगां, मरदंग मैफिलां घूमर गैहरां वाळी
ओ म्हारै जैसाणै स्रैर री बात निराळी

धरती जैसाण री दीवानी, आजादी री प्यारी
देखण आवै है दुनिया, जग में जाणी-पिछाणी

आंक्या नाम इतिहासां में, तलवारां रो पाणी
पग-पग माथै पाणीपत, चप्पे-चप्पे झांसी राणी
हळदीघाटी गळी-गळी रग-रग में रजवाणी
हर नर जायोडो लियानार्ड, थळियां थर्मोपाली
ओ म्हारै जैसाणी स्रैर री बात निराळी

दांतां आंगळी दिरावै, नक्काशी हस्तशिल्प कला
गिगनारां गळबाथां भैर कंचन वर्णा कोट किला
मुळकावै मूरत्यां मिंदर में, हद म्हैल मंडाण
कळियां चिटकी चट्टाणां में, पाषाणां में प्राण
बुरजां बंगलां गोखां झरोखां झूलणा जाळी
ओ म्हारै जैसाणी स्रैर री बात निराळी

पळ-पळ पळकै हैं कंचन ज्यूं जैसाणै रो पाषाण
रळ-रळ रळकै है रूपो जद छावै चांदणी रात
मरु री रजकण में हरखै हीरा कोहिनूर बरसात
मिनखां री मूंछां में मुळकै मरदाई रा क्रिपाण
किळ-किळ किळकै है कारीगरी रचै रागण्यां रास
महिमा मरुधर री गावण अग गंधर्व सुरग में खास
आ तो धरती है बुर्ज ननानू मेघाडंबर वाळी
म्हारै जैसाणै री बोली तो शहद री प्याली
ओ म्हारै जैसाणै स्रैर री बात निराळी
म्हारै जैसाण री शान बान तो जग जोवण वाळी ।



सर पदमपत सिंधानिया यूनिवर्सिटी, नेशनल हाई-वे 76, एफ.आर. 1/6, भटेवर, उदयपुर (राज.) 313601
मो. 9414269257



सरोज कंवर

मारवाड़ री मीठी बोली

मारवाड़ री मीठी बोली, ज्यूं मिसरी संग घोळी सा
ऊंचा-ऊंचा महल-माळिया, खेलै आंख-मिचौळी सा

रूप निराळो इण धरती रो
नेह बताऊं इण धरती रो
घूँघट में निजरां है तिरछी, देखै सूरत भोळी सा

केसरिया जद बानो पहरै
दुस्मण नैं शमशीरां घेरै
शीश निसाणी दै क्षत्राणी, तिलक लगावै रोळी सा

खेजड़ली री छायां नीचै
देख गढां नैं आंख्यां मीचै
रंग-रंगीलो राजपुताणो, छवि साफ अर धोळी सा

अलगोजां खेतां में बाजै
रणभेरी रण मांही साजै
रंगमंच पर रण दिखलावै, अँड़ा है हमझोळी सा।

◆◆



अनार्यभट्ट



डॉ. सुमन बिस्सा

राग बसंती

सावण में मेघ मल्हार चलै, काती में 'दीपक राग' सजै
फागण में राग बसंत जमै, मौसम खुद झूम-झूम गावै ।
है नहीं धूजणी री धुक-धुक, डांफर रो कोप हुयो ढीलो
लदग्या अबै दिन सियाळै रा, मन महा मोद सूं भर छावै ।
अणगिणत पुसब अर रंगां री छटा नैं जद तितल्यां निरखै
तो खुद रै पंखां रीझ्योड़ी, सगळी लजखाणी पड़ जावै ।
रातीवासो ले पेड़ां में, दिन ऊगै जद चै 'चाट करै
समवेत सुरां में यूं लागै, बगिया चिड़ियाघर बण छावै ।
जागा पलटणिया धोरा तो, खुद में ही बड़ा घुमक्कड़ है
सैलाणी करुजां सूं मरू रा, सैलाणी धोरा बतियावै ।
बायरियो परभाती गावै, आ धरा रास में रंग जावै
आभो बण जावै छैल, उमगतो मौसम जद बसंत आवै ।
चंपा, गुलाब, चमेली सब, फुटरापणै में होड करै
क्यूं चूकै फिर केतकी, पलास, बै भी प्रतियोगी बण जावै ।
नव कूंपळ री अगवाणी में, पेड़ां रा पीळा पात झरै
इण महा त्याग री गाथा रै, कीरत नैं खुद कुदरत गावै ।
फूलां री सरगम बीच, बिखर जावै मौसम री मधुरी लय
तो धड़कन सूं स्पंदन तक, संगीत लहरियां भर जावै ।
लहरां रै संग किरणां नाचै, तो मन भी कथक निरत करै
लय, ताल, सुरां री तिरवेणी, गळहार लियां आगै आवै ।





सुमन राठौड़ झाझड़

रंगीलो राजस्थान


अठै कण-कण गरबीलो, काई करूं बखाण
रंग-रंगीलो म्हारो प्यारो राजस्थान
अठै मायड़ कोख सूं वीर सपूत निपजै
माटी रक्षार्थ शीश चढावण मिनख खपजै

अठै वीरांगना पन्ना स्वामीभक्त हुई
काळजै री कोर रो त्याग कर अमर हुई
मर्दानी हाडी शीश काट थाळ सजा दी
कर्तव्य निभावण अमिट निसाणी भेज दी

अठै पद्मण जौहर इतिहासां अमर हुयो
धरम अर शील बचावण जौहर जलम हुयो
अठै मीरां कृष्ण भक्ति अभिमान बण्यो
गोरा बादळ रक्त माटी परिधान बण्यो

अठै आन-बान-शान राजपूताना री
बैरी थर्याया है माटी बलिदानां री
अठै जोधाणो-बीकाणो घणो सुहाणो
धोरां री धरती जैसाण गजब ठिकाणो

अठै मिलाप अर अपणायत रो भाव मिलै
मान-सम्मान प्रेम भाव देख हिबड़ो खिलै
अठै धरती रै कण-कण में सोनो उपजै
मोठ बाजरी अर ग्वार धोरा में निपजै



ग्राम पोस्ट- झाझड़ (झुंझुनूँ) राजस्थान



आशा पांडेय ओझा

अेक

दो

घोर अंधारो च्यारां कानी
अजब निजारो च्यारां कानी

नैणां रा अै घाट भंवर जी
जोवै थारी बाट भंवर जी

पसर गयो रे बैर भरुंट्यो
थारो-म्हारो च्यारां कानी

कूं-कूं केसर आळी थाळी
चंदन आळ्य पाट भंवर जी

मीठी फसलां बीती बातां
पाणी खारो च्यारां कानी

क्यारां पैरण क्यारां ओढण
थां बिन कैड़ा टाट भंवर जी

जूणां काटै लोग-लुगाई
सांसां भारी च्यारां कानी

रेशम लागै लट्टा जैड़ो
मखमल लागै टाट भंवर जी

छायां वाळ्य रूख कट्या सब
चाल्यो आरो च्यारां कानी

कांकड़ जैड़ी सेजां लागै
थोर सरीखी खाट भंवर जी

ठीमर ठावा लोग कठै अब
अकलां गारो च्यारां कानी

भूल्या किसबिध म्हानै कैवो
बणग्या काई लाट भंवर जी

निजरां लागी किणरी 'आशा'
जोय! उतारो च्यारां कानी

खूट रही रे सांस री सीसी
आओ अब भन्नाट भंवर जी



ए-603, सिल्वर स्कवायर अपार्टमेंट, न्यू विद्यानगर, बी.एस.एन.एल. ऑफिस रोड, हिरण मगरी
सेक्टर-3, उदयपुर (राज.) 313002
मो. 8955697416



उर्मिला देवी 'उर्मि'

हर घड़ी हतास क्यों

झूठा सरोकार व्हैग्या, रिश्ता तार-तार व्हैग्या
संवेदन सूं खाली आज, मिनख दीखै है क्यूं ?

कोरी चमक-दमक में ही मानै है बडापणो
दूजां री परवा आज, कम ही दीखै है क्यूं ?


बारे दीखै ताम-झाम, मन में है मैलड़ भरचो
जका लागै घणा नैड़ा, बै ई घणा ठगै है क्यूं ?

पूछै कुण दुखी जीवां नैं, आंसू ढळकाता नैणां नैं
ढोंग अर छळावा ई, च्यारूं कानी बधै है क्यूं ?

खेतां में जका काम करै, धान रा भंडार भरै
बै ही अन्नदाता दीखै, हर घड़ी हतास क्यूं ?

बेट्यां री लाज जटै लूटीजती दीखै बठै
बेट्यां नैं पढाबा सारू, नारा लागै है क्यूं ?

देस रा नेतावां नैं जिम्मेवारी लागै जे मुस्कल
फेर बै सत्ता रो लोभ, जल्दी-सी छोडै नीं क्यूं ?



पुस्तकालय

अनुग्रह, तरुण उद्यान रै कनै, गोळ चौक, रोहिणीपुरम्, रायपुर (छत्तीसगढ़) 492010 मो. 9424212670



डॉ. तारा दीक्षित

व्है मन घणो उचाट

आवै भी नीं है आऊं, संपावा रो कायदो
व्है मन घणो ऊचाट, तो हूनर सूं रोवीजै

आंख्यां री आ जुबान होवै है किण खातर
व्है अरै-मैरै पैरां तो, निजरां सूं बोलीजै

आंख्यां रो है गुनो, यो काई दोष हेत रो
हिया रो हेत, हेत सूं हिया में राखीजै

घर में घुसनै रैवा रो बणयो है कायदो
मन व्है बातचीत रो, मोबाइल सूं करीजै

कियां सेवै मिनख, काल बायरो वसै
महँ शरण हूं करतार, बेड़ो पार करीजै

है कण-कण में वास थारो, आ साची बात छै
बिलखता रा भेळु, थां बिन कुण वावीजै

आवै भी नीं है आऊं, संपावा रो कायदो
व्है मन घणो ऊचाट, तो हूनर सूं रोवीजै





दीपा परिहार 'दीप्ति'

अेक

दो

च्यारूं कानी अँडो खाको व्हे जावैला
परंपरा फाटोडो वागो व्हे जावैला

किस्मत थारी चोखी लिख्योडी व्हेला तो
राजाजी रै गढ रो पागो व्हे जावैला

मर जावैला जिण दिन हिंवडै रो हेत जटै
उणरो जीवन टूटो धागो व्हे जावैला

जोडण-तोडण रो जतन करै जीवां जितरै
मरियां पाछै तोडण तागो व्हे जावैला

विपदा पडियां ई आदम तो परखीजैला
भाई सूं भाई भी आगो व्हे जावैला

झूठी रीतां सूं चालणियां नै देखां जद
सीधो चालण वाळो बांको व्हे जावैला

नाजोगी करतूतां वाळा चोखा कींकर
साची साम्हीं दीपा नागो व्हे जावैला

भूख सूं यूं लोग सगळा मर जावै
रुपिया जद सब उणां रा हर जावै

आज विपदा देख चारूं कानी री
लोग कोरोना हुवै तो डर जावै

योजना सरकार री आवै तद ही
भ्रष्टाचारी उणां नै चर जावै

जद ठिकाणो छूट जावै स्हैरां सूं
आपरै ही गांव रैवण घर जावै

आज बीमारी दिखै सगळा देसां
कुण बचावै मौत मूंडे नर जावै

स्हैर अब खाली हुया कोरोना सूं
वै कमावण नै किसां रै दर जावै

साच रो खाली घडो पडियो देखो
ठाम दीपा झूठ सूं ही भर जावै





डॉ. उषाकिरण सोनी

निज रा करम सुधार

करमां सारू मिनख नैं, मिली जूण घरबार ।
करम मिलासी राम सूं, निज रा करम सुधार ॥
कासी-मथुरा सब कर्चा, हुयो न मांय उजास ।
राग बात नैं प्रेम तेल में, भिजो र दिवलो चास ॥
मैं-मैं करतो फिर रह्यो, बो न मिलावै हाथ ।
जद तूं मैं नैं छोडसी, मिल जासी साख्यात ॥
क्यूं तूं पायो जलम है अर क्यूं मिल्यो संसार ।
जे तूं कारण खोज लै, तो होसी बेड़ो पार ॥
मिली मिनख री जूण है, तो मिनखाचारो राख ।
सगळ्ळां सागै भाईचारो ई, भरसी तेरी साख ॥
आयो कोरोना काळ बण, लियां हाथ जमफांस ।
जात-धरम पूछ्या बिना, काठी करै उसांस ॥
रंग-रूप, धन-ज्ञान रा, बो नहीं राखै ध्यान ।
कोरोना री निजर में, सगळा हुया समान ॥
दादोजी कहता हा सदा, अतिथि हुवै भगवान ।
ई कोरोना रै काळ में, है दुस्मण सो मेहमान ॥
कामकाज सब ठप हुया, बंद है हाट-बाजार ।
पांख-पंखेरू मून सब, रोवै मिनख-संसार ॥
संक्रामक रोग तिसणा सूं, हु र्यो ग्रसित संसार ।
रामनाम री ओषधी लै, ओ रोग जायगो हार ॥





छैल कंवर चारण 'हरिप्रिया'

कळप

कर-कर मन में मोद नैं, गाढो कर-कर गाढ ।
पाळ पोष मोटा किया, जद तक छैली दाढ ॥

जिण दिन आई मूँछ नैं, दाढी वाळा बाल ।
पूठ पिछाडै निरखता, पूत तमीणी चाल ॥

देख सवायो आप सूं, दूणी छाती कीन्ह ।
काज सुधारण कारणै, झूट गवाही दीन्ह ॥

आस-पास हठ आपरी, रख दी सब हेठीह ।
तन मन धन वारत हुआ, खुद सुख सूं छेटीह ॥

सूरज सोहन ऊगसी, घर आसी विरदाळ ।
छम-डम झांझर बाजसी, खूब बजास्यूं थाळ ॥

होई कमर जद दोवड़ी, निजरां निठगी मीट ।
माणस हुयगयो दूमणो, ओछी पड़गी तीट ॥

जद सूं मांचो ढाळियो, ड्योढी वाळी साळ ।
तरस गयो हुंकार नैं, मिनखां पड़गयो काळ ॥

पूत गयो परदेस में, धीवड़ गी सुसराल ।
मुसकल दोन्यूं टेम री, कीकर आवै थाळ ॥

लूखी-सूखी जीम द्यूं, काया नैं भाड़ोह ।
सीरा-लपसी जीमस्यूं, मन लेवै आड़ोह ॥

चूल्हो कुण सिळगावसी, कर ठीकर आछाह ।
वापरगो सो जीम ल्यो, काचाह नैं पाकाह ॥

जद घर आयो डीकरो, तद ही घर में राड़ ।
दोस देय अळगो हुवो, लै खरचां री आड़ ॥

नीव लगी महलां उठी, झूपी अठी हमेस ।
उठीज रेशम घासिया, उठीज फाटा खेस ॥

ना तीरथ ना धाम च्यार, ना घूम्या परदेस ।
आया ज्यूं ही होयग्या, जा अमरापुर पेस ॥

अब लग घर री बात ही, अब पूगी बारैह ।
मिनखां मोटो बाजणो, क्यूं रैवां लारैह ॥

इखबारां में सोक रा, संदेसा छपवाय ।
सीरा लपसी गांव रा, गिंडकड़ा तक खाय ॥

मोल मोलावै मोकळा, देवै धरमादेह ।
काग जीमावै कूकता, कूड़ा ही डाडैह ॥





तारा प्रजापत 'प्रीत'

करलां मन री बात

आओ कदै सांझ ढळै, तारां छाई रात ।
हाथ आपरै हाथ में, करलां मन री बात ।।
बरस बिता'र आई है, सातू वाळी तीज ।
साजन घर थे आवजो, चांद दिखायै दीज ।।
नैणां री पिव जोत थे, काळजियै री कोर ।
बाटा थारी जोवती, हिवडै नाचै मोर ।।
माथै ऊपर गागरी, पाणी भरवा जाय ।
निरखत छटा सुहावणी, मनडै हरखित थाय ।।
बाट पिव री जोवती, मनडै हुवै अधीर ।
सावण बरसत बादळी, आंख्यां बरसै नीर ।।
ओळ्यूं आवै सायबा, मनडो रैवै उदास ।
आंगळ्यां पे दिन गिणुं, पिया मिलण री आस ।।
राधा रै हिवडै बसै, कानूडै री प्रीत ।
कान्ह बजावै बांसुरी, सखियां गावै गीत ।।
काणो घूँघट काढनै, देख रही हर ठांव ।
ताळ-तळैया बावड़ी, म्हारो प्यारो गांव ।।
निरखण लागी काच में, गोरी निज सिणगार ।
झुमकी पैरी काम में, गळै नवलखो हार ।।
तलवारां री धार है, थारा नैण कटार ।
हिवडै नैं घायल करै, जद-जद करता वार ।।
सदा आज में जीवणो, नाम काल रो काळ ।
जाणो पड़सी छोडनै, प्रीत न हिवडै पाळ ।।



प्लॉट नं. 1, गायत्री विहार, खादी भंडार रै लारै, भास्कर सर्किल, रातानाडा, जोधपुर (राज.) 342001
मो. 9413111462



मान कंवर 'मैना'

श्रृंगार रस रा दूहा

चंदा सरीखो मुखड़ो, पुहप कियो सिणगार।
बाटां जोऊं बालमा, पंथ रैयी बुहार।।

पिव परदेसां बस गया, सखी! लिखो संदेस।
कद आवोला सायबा, प्यारी धण रै देस।।

पिव परणावो भेजियो, बांचूं बारम्बार।
कद आवैला सायबा, लिख्यो नहीं इक बार।।

सेजां बैठी गोरड़ी, दिवलो लियो जुपाय।
आओ म्हारा सायबा, हिवड़ो ल्यो न लगाय।।

सिर पर चूदड़ सोवणी, रखड़ी साजै जोर।
हाथां चुड़लो गोखरू, पैर र बैठी गौर।।

मनड़ै सूं मनड़ो मिलै, बंधै प्रीत री डोर।
जीवण पूरो बदळ दै, चुटकी भर सिंदूर।।

आंख्यां जाणै मद भरी, हिरणी जैड़ी चाल।
रूप सायधण निरखतां, सायब हुया निहाल।।

गोखै ऊभी गोरजा, पिव री जोवै बाट
आवै म्हारा सायबा, ढाळूं हिंगळू खाट।।

बैठी गोरी अणमणी, यूं उदासी अपार।
कद आवोला सायबा, थाकी पंथ निहार।।

पीळो ओढ्यो प्रेम सूं, कर सोळ्ळा सिणगार।
बेगा आवो सायबा, भव-भव रा भरतार।।

माथै साफो सोवणो, सिरपेच जोरदार।
लागै सायब फूटरा, मूंछ्या रोबदार।।





डॉ. सुशीला शील

श्रृंगार रा दूहा

धक-धक करतो काळजो, धक रिह्यो दिन-रात ।
टप-टप टपकै नैण सै, बोलै सगळी बात ॥

फडकै बायीं आंखड़ी, छाजै बोल्या काग ।
पिवजी आया आंगणै, आज हुई धिन्नभाग ॥

कड़-कड़ कड़कै बीजळी, झर-झर बरसै मेह ।
थर-थर कांपूं अकली, प्रीत आवो गेह ॥

में गुणवंती सांवळी, अळगा रै भरतार ।
मन री बात न बूझता, अँडा निपट गंवार ॥

बेगा-बेगा काम कर, मिलण पिया सूं आज ।
सास-नणद रोक्यां खड़ी, कुण जावै किण काज ॥

प्रीतम की बातां लगै, ज्यूं लाडू री कोर ।
कण-कण पागी प्रेम सूं, हिवड़ो हुयो विभोर ॥

चुड़लो बिंदी चूनरी, नैणां सुरमो सार ।
पिया मिलण नै मैं चली, सज सोळा सिणगार ॥



कहावतां रा दूहा

गुणी ओगुणी लोग री, दसा आप दरसाय ।
आम लुळै नीचो झुकै, अरंड अकासां जाय ॥

थे महलां, म्हां झूपड़ी, राजनीति री खोट ।
ठावां-ठावां टोपला, बाकी नैं लंगोट ॥

कोर कळेजां जाणियो, आंख्यां कस्या न दूर ।
सासू थारी लाडली, म्हारै घरां रो नूर ॥

कळजुग री औलाद अे, है अतरी हुसियार ।
दो रोटी ना जीवतां, मस्यां पछै ज्यूंणार ॥

जद जाऊं घर-ब्हारनै, हियो धरावै धीर ।
मां थारा आशीष ज्यूं, कामधेनु रो छीर ॥

मंजिल को बेरो नहीं, थक्या-थक्सा सा पांव ।
घणो सतावै तावड़ा, मां तूं बड़ की छांव ॥

प्रीतम दोरी ही निभै, थारी म्हारी प्रीत ।
हूं दीवाळी गाऊं जद, थां होळी रा गीत ॥





डॉ. साधना जोशी 'प्रधान'

चरुंठिया

अेक

नाच्या चढकर टूंकळी, पत्तो मद में चूर।
आयो उडतो बायरो, लेग्यो कोसां दूर।
लेग्यो कोसां दूर, धूळ में रळ कुरळायो।
छेकड़ पड़्यो उजाड़, याद निज बिरवो आयो।
कहत 'साधना' साच, भाग नीं कोई बांच्यो।
छिन में पलटी खाय, अणूतो क्यूं थूं नाच्यो॥

दो

निंदा में रस मोकळो, चुगली इमरत पान
परनिंदा रस पीवतां, होवै राजी झ्यांन।
होवै राजी झ्यांन, करै नित थूक बिलोई।
झूठी लोदर घाल, बैठज्या छोड रसोई।
कहत 'साधना' साच, हथाई राखै जिंदा।
सै स्यूं सोरो काम, डावडी करणो निंदा॥

तीन

घर पड़्यो है सांकड़ो, अठै कठै इब ठौड़।
आयो बेटो बाप नै, बिरद आसरम छोड़।
बिरद आसरम छोड, नर्चीतो होग्यो भायो।
पण भूल्यो आ बात, बगत थारो भी आयो।
कहत 'साधना' साच, निकळ्यो पूत कुपातर।
इण सूं चोखो बांझ, जणीता होवै बे-घर॥

चार

चौबारो घर आंगणो, उजड़्या हरियल खेत।
छोड गया निज गांव नै, स्रैरां सूं कर हेत।
स्रैरां सूं कर हेत, भूलग्या रीत पुराणी।
खोई कुल-पैचाण, बदळ्यो खाणो-पाणी।
कहत 'साधना' साच, कठै है भाईचारो।
जात-न्यात तो दूर, उडीकै घर चौबारो॥


पांच

काया ढळती छांव है, सुणलै आतम टेर।
मूंडो निरखै बावळी, मन री काळख हेर।
मन काळख हेर, मांज मैलो मन-दरपण।
दोस हियै रा सैंग, राम नै कर दै अरपण।
कहत 'साधना' साच, रूप औ थोथी माया।
दो दिन जोबन-धूप, छांव है ढळती काया॥

छह

पीस्सो, रुतबो डांग लै, बणजा खुद सरदार।
निरबळ रो सोसण करै, तागत है बदकार॥
तागत है बदकार, मिनख नै भूत बणा दै।
मिनखपणो जा भूल, पाप रै गेल लगा दै।
कहत 'साधना' साच, जबर सोसण रो किस्सो।
अनाचार रो मूळ, जगद में होवै पीस्सो॥

वंदे मातरम् अपार्टमेंट, कोठारी रोड, सुजानगढ़ (चूरू) राज. 331507 मो. 9413076275



डॉ. अनिता जैन 'विपुला'

अेक

देखूं मन सूं
परखूं हिवडै सूं
जीवूं आत्मा सूं

छह

कैवै हां मौन
सबद सूं तीखो यो
कचोटै मन

इग्यारा

आंख्यां देख
मन ई पिछाणै
ईस जाणै

दो

प्रेम निराळो
लागै सब फूठरो
हियै उजाळो

सात

तड़प हरो
आकंठ प्रीत करो
सून्य नैं भरो

बारह

पिया री याद
बांसुरी बेसरी क्यूं
गळो रुंधगयो

तीन

प्रेम सौरम
ज्यूं भीनी कस्तूरी
पावै स्व डूबै

आठ

मिलणो चावै
कियां देखै आतम
हटै तो तम

तेरह

भाग हूं थारो
करम लारै चालूं
सपना पाळूं

चार

प्रेम भळक
अंतस रो उजाळो
रोक्यां नीं रुकै

नौ

काल न मुड़यो
काल रा मोहताज
तो जियो आज

चवदैं

जीवन जियो
विष-अमृत पियो
अर्पण करो




पांच

मौन निगळ
करोध आग उगळ
अब पिछाण

दस

गुरु निखारै
कोयला हीरो बणै
कोई नीं जाणै





चित्रा शर्मा 'काप्रेनी'

अेक

चोखा काम को
चोखो नतीजो आवै
या साची खुशी

दो

मनख्यां में मेळ
अेक डोर सूं गूंथ्या
कुटम खुश

तीन

हर्या नोटां में
गाडी घोड़ो बंगलो
नक्कटी खुश्यां

चार

मन को खेत
मन ई करै खेती
हासल खुशी

पांच

लक्ता गहणां
डीलड़ा की शोभा छै
खुशी कोई ना

छह

हार बा पैली
दगदगो मन को
हरा ई दे छै

सात

रास नै सांप
काळज्यो मान ले छै
दगदगा में

आठ

आछो मनख
दगदगा की मास्या
नकाम को छै

नौ

मन की बातां
ठम जावै ज्यां की ज्यां
दगदगा सूं

दस

आंख्यां फाटी
रूंम-रूंम कांपग्यो
यो दगदगो





डॉ. जेबा रशीद

राजस्थानी री सांवठी छियां में पढूं म्हारै जीवण-पोथी रा पाना

म्हें सोच्यो, मोटी बैन ममतामयी आनंद कौर व्यास जी सूं बंतळ कर 'र ग्यान रा मोतियां सूं धोबो भरलूं। आपरो महिला लेखन में चावो-ठावो अर अंजसजोग नांव है। बीकानेर स्टैर रा आनंद कौर व्यास आपरी कलम री निकेवळी कोरणी सूं साहित्य जगत में ठावी ठौड़ थरपाई। अके छोटी-सी भेंट कर आपां बतियावां... उणां सूं। आम्हीं-साम्हीं बैठ्या तो सवालां रो सिलसिलो चाल पड़्यो—

* आपरी साहित्यिक जात्रा कद अर कियां सरू हुयो ? लेखन री प्रेरणा कठै सूं मिली ?

—जे बालपणै मांय आछे, ओपतो अर असरदार वातावरण मिलै तो बालक री जिग्यासा तिरपत होय सकै। अबोध बालपणै री काची माटी माथै जिका मंडाण मंड जावै, बै जीवण भर साथ निभावै। साहित्यिक जात्रा सूं पेलानां जीवण री सरूआती जात्रा रो विवरण देवणो जरूरी है, जिकै सूं ठाह लागै कै जीवण रै पड़ावां नैं पार करतां-करतां साहित्यिक रुझाण कियां बण्यो। पैलो चरण नानीजी सूं सुण्योड़ी कहाणियां रो है। म्हनै इसी कहाणियां सुणणै री घणी इच्छा रैवती, जिकी में उण बगत रै जीवतै-जागतै चरितरां री बात हुवै। म्हारो सवालिया बालमन जाणणै सारू बेचैन होय जावतो कै यू क्यूं होयो ? म्हें सवाल खोद-खोद 'र पूछती रैवती। अणजाणै में ई साहित्यिक झुकाव होय रैयो हो।

म्हारै पिताजी री बदळी मेड़ता सिटी हुयो। म्हें मौको मिलतां ई मिंदर में जावती। मिंदर में मीरां रै जीवण माथै भासण हुया करता हा। म्हारो सवालियो मन पूछतो—मीरां इतरी अबखायां रै बावजूद आगै कियां बधी! अबखायां भचीड़ा खांवतै काई कोई मिनख आगै बध सकै ? अणजाणै में साहित्य रा संस्कार पड़ रैया हा। पैलां मेड़ता में अर पछै नावां री मिडिल स्कूल रै पुस्तकालयां में जित्ती पुस्तकां ही उणां मांय सूं म्हें सगळी टाळवीं पुस्तकां पढली, जियां प्रेमचंद री लगैटगै सगळी कहाणियां अर उपन्यास, नाती लेखकां री कहाणियां, पत्रिकावां आद पढता। चतुरसेन शास्त्री, गुरुदत्त, रवीन्द्रनाथ टैगोर री काबुलीवाला कहाणी, पंचतंत्र री कहाणियां, बाल साहित्य री पत्रिकावां—चंदा मामा, सारिका, जातक-कथावां, बाल रामायण, बाल महाभारत, चित्रकथावां आद। इण बिचाळै म्हें म्हारी छोटी-छोटी कहाणियां लिख 'र म्हारै छोटै भाई अर सहेलियां नैं सुणावण लागगी। साहित्य रा सरूआती सांतरा संस्कार पड़ रैया हा।

जेबा रशीद : 151, चौपासनी चुंगी चौकी रै लारै, जोधपुर (राज.) 342008 मो. 9829332268
आनंद कौर व्यास : एस-43, आशियाना, अमरबाग, कृष्णा कुंज, कुडी हॉस्पिटल रै साम्हीं, जोधपुर मो. 8875637761

आगलो पड़ाव ब्यांव रै बाद रो हो। म्हारा पति राजस्थान रा नामी कवि गिणीजता। उण बगत बीकानेर में खूब कवि-सम्मेलन हुया करता। घर में दोनां रै बीच साहित्य रो वातावरण हो जिणरो असर भी पड़णो जरूरी हो। बाद में तो घणाई दूजा प्रभाव पड़्या। बै आपरै आगै रा सवालां रै जबाब में बताऊंली।

* आप आपरै लेखन रै आगै कुणसी अबखायां सूं रूबरू हुया, जिणां रो सामनो करतां-करतां फैसलो लियो अर सिरै लेखिका बण सक्या।

—अबखायां कोई अेक-दो हुवै तो गिणाऊं। केई अबखायां तो लेखन रै सीगै में आमतौर सूं महिलावां झेलती ई रैयी है। म्हनै भी इणां सूं बाथेड़ा करणा पड़्या। 1955 में ब्यांव रै पछै जद अगलै साल सासरै में पग मेल्या तो यूं लाग्यो, जाणै माइकै रा दिनां सूं साव अलायदो वातावरण हो। छोटी अवस्था में गिरस्थी रो भार पड़ग्यो। छोटी-सी तणखा में गुजारो करणो, पांच जणा री जिम्मेदारी निभाणी, घर में कोई उछाव बधावणियो नीं, किणी तरै सूं गीर गट्टा सूं गिरस्थी धरम निभायो। लेखन री हूस मगसी पड़ण लागी। फेरूं जल्दी-जल्दी टाबर हुवण सूं (1958 सूं 1963 ताई चार टाबर) इसो लखावण लागग्यो, जाणै अबै लेखन रो धरम कोनी निभ सकै। लिख भी लूं तो दिखाऊं किणनै, छपाऊं कियां? दूर-दूर ताई कोई सायरो नीं हो। घर में तानाकसी भी चालू रैवती। पण खैर, जीवण गाडी तो आगै गुडकावणी ईज ही। 1959 में म्हारै पति री बदळी पैलां बिचून, फेर सोजत रोड होयगी। इण सारू फेरूं 1966-67 ताई लेखन रो काम ठप्प सो ई रैयो। इण बिचाळै म्हें 1968 सूं लेय 'र 1974 ताई दसवीं सूं अेम.अे. ताई री परीक्षावां प्राइवेट विद्यार्थी रै रूप में पास करी। अबखायां रै बिचाळै म्हें हिम्मत कोनी हारी। म्हारै जीवण में जिका बेला बीतिया हा, उण घरबीती अर कीं लोगां रै दुख-दरद री परबीती नैं दरसावण वाळा दो उपन्यास हिंदी में लिख्या। काळा बादळां में बीजळी रा पळका पड़ै जियां म्हारो हौसलो बधावण रो पेलो काम तो म्हारा पति श्री भवानीशंकर व्यास 'विनोद' ई कर्यो। पण भागजोग सूं म्हनै तीन जगां रो इसो सायरो मिल्यो कै म्हें सगळी बाधावां नैं पार कर 'र म्हारै लेखन नैं परवान चढावण लागगी। म्हारै उपन्यास नैं पूरी तरियां पढ 'र चावा-ठावा साहित्यकार नन्दकिशोर आचार्य अर गौरीशंकर 'अरुण' कैयो कै औ उपन्यास घणो सांतरो है, इणनै छपावणो ई चाईजै। नन्दकिशोर आचार्य म्हारै पैलै उपन्यास रो नांव राख्यो—'कटते कगार' अर दूसरे रो नांव 'कल का कुहरा'। अबै समस्या छपावण री ही। भाग रा धक्का तो घणाई खाया। पण भाग बेच्योड़ो थोड़ै ई हो। बीकानेर रा प्रकाशक श्री कृष्ण जनसेवी उपन्यासां री पांडुलिपियां पढ 'र इत्ता खुश हुया कै बिना कीं लियां-दियां म्हारै दोनूं उपन्यासां नैं छपाया, दस दूजी पोथ्यां (सगळी हिंदी में) छपाई, मानदेय भी दियो। सगळी जग्यां पैलो उपन्यास तो छपतां ई इतो चावो हुयग्यो कै च्यारूंमेर उणरी बडाई होयगी। बसंती पंत आपरो लघु शोध प्रबंध लिख्यो। नांव हो—'हिंदी उपन्यास, रचना विधान और शिल्प'। पोथी में दस उपन्यासकारां रा उपन्यासां रै सागै म्हारो चर्चित उपन्यास भी भेळो हो। म्हारै उपन्यास री धपटवीं चरचा हुयी। दोनूं उपन्यास 'कल का कुहरा' अर 'कटते कगार' नैं डॉ. सुमन बिस्सा आपरै शोध प्रबंध 'हिंदी लेखिकाओं के उपन्यासों में नारी-चित्रण' में सामल कर्या, जिणमें देश भर री 70 चर्चित महिला उपन्यासकार सामल ही। जाहिर है उण शोध-प्रबंध री खासा चरचा हुयी।

* आपरी लेखनी मतलब रचनावां रो खास विसय यानी केंद्रीय बोध काई रैवै ? आपरी पोथ्यां किण विधावां में छपी अर कुणसी विधावां आपनै पसंद है ?

—इण सवाल रो थोड़ो ब्हौत उत्तर तो पैलां आय चुक्यो है, पण जटै ताई पसंद वाळी विधावां रो सवाल है वै है कहाणियां अर उपन्यास। इण रा खास कारण है : कहाणियां सारू म्हारो कैवणो है—जीवण बणतै-बिगड़तै सुपनां रो मायाजाळ है। म्है अलेखूं काचा झाग अर कुंवारा सुपना नैं जीवण री करड़ी चट्टाण माथै टूटतां देख्या है। म्हारै साम्हिं मुरझाया सुपनां रा जाणै कित्ता दरसाव आया, इणरो कोई ठाह-ठिकाणो कोनी। बस, अै दरसाव ई म्हनै कहाणियां लिखणै रो हौसलो दियो। कहाणियां रो कच्चो माल तो च्यारूंमेर बिखर्योड़ो ईज है। आज रो परिवेस, मिनख री मांदी मानसिकता माथै लगोलग हुवणिया अन्याय अर अत्याचार म्हारा कथानक बण्या। उपन्यास में म्हारी चेष्टा रैवै कै उणमें घटनाक्रम जीवण रै ओळै-दोळै घूमै। अनुभवां री गैराई सूं सिरजै, परिवेस रै जथारथ सूं आंख सूं आंख मिलाय र बंतळ करै, पसर्योड़ै सरणाटै नैं भांग र मिनख री मांयली ताकत नैं वाणी देवै। सबदां रा चितराम तो महताऊ है ई, पण मून रा चितराम तो उणां सूं ई बेसी वाचाल हुया करै। मून रै महालोक री जातरा म्हारै इण उपन्यास में है। म्हारी राजस्थानी रचनावां ई दो विधावां में ई छपी है, जियां दो कहाणी संग्रै 'वै सुपना अै चितराम' अर 'मोल मिनखाचारै रो' अर अेक उपन्यास 'मून रा चितराम'।

* राजस्थानी लेखन सूं झुकाव रा खास कारण ?

—पैलो कारण तो औ है कै राजस्थानी आपणी मातभासा है। महाराष्ट्र, पंजाब, बंगाल, तमिलनाडु, आंध्रप्रदेश, कर्नाटक अर उड़ीसा आद में बडा-बडा लेखक गीरबै रै सागै आप-आपरी मातभासा में लिखै, नाम कमावै, पुरस्कार मिलै तो फेरूं आपां लारै क्यूं रैवां! 1973 ताई तो म्हारी घणकरी रचनावां हिंदी में ही, पण 1973 में अेक निश्चित पड़ाव साम्हिं आयो। म्हारी कहाणियां रो प्रसारण आकाशवाणी केंद्र सूं होवण लाग्यो। म्हारी कहाणियां री भासा री मरोड़-मटोट, मिजाज अर मिठास देख र आकाशवाणी रा उद्घोषक यशपालसिंह राठौड़ अर गुलाब कौर कैयो, “आनंद कौर जी, आप इत्ती फूटरी कहाणियां लिख रैया हो। भासा में जोधपुर री बोली रो मिठास है तो आप राजस्थानी में क्यूं नीं लिखो? अरे, हिंदी में तो मोकळी लेखिकावां है, पण राजस्थानी में ब्हौत कम आगै आय रेयी है। 1973 री इण घटना रै बाद आज ताई यानी 48 बरस सूं ऊपर म्है राजस्थानी में रचनावां लिखी। राजस्थानी पत्रिकावां में छपी। राजस्थान अर राजस्थान रै बारे री कोई राजस्थानी पत्रिका इसी नीं है जिकी में म्हारी कहाणी नीं छपी हुवै। आकाशवाणी वाळ म्हनै बीकानेर रै बडा-बडा लेखकां रै सागै जोड़ता रैया, जिणमें अन्नाराम सुदामा, मालीराम शर्मा, चंद्रदान चारण सरीखा लेखक हा। म्हारी किताबां छपी अर पुरस्कारां री झड़ी लागगी। राजस्थानी में म्हनै अै पांच पुरस्कार मिल्या—1. सांवर दइया पैली पोथी पुरस्कार, 2. गोदावरी देवी सरावगी पुरस्कार, 3. टैस्सीओरी पुरस्कार, 4. करणी माता पुरस्कार, 5. भीलवाड़ा री राष्ट्रीय साहित्यिक संस्था सूं साहित्यांचल पुरस्कार। म्हारी कहाणियां सांतरी अर सांवठी ही। म्हारो नांव बडी-बडी लेखिकावां रै बिचाळै आवण लाग्यो जियां लक्ष्मीकुमारी चूंडावत, सुखदा कच्छवाहा, पुष्पलता कश्यप, चांदकौर जोशी, जेबा रशीद, बसंती पंवार, माधुरी मधु, कुसुम मेघवाळ, कृष्णा भटनागर आद। म्हारा कथानक साव नूवा हा। पुराणा बोदा कथानकां रो कोई दोहराव कोनी हो। म्है नूवा

विसय, नूवो मुहावरो अपणायो। भासा, कथ्य अर शिल्प री तासीर बदळी अर नारी मनोविग्यान रा अछूता विसयां माथै कलम चलाई। जियां नारी जीवन री अबखायी, उपभोक्तावाद, बाजारवाद, भौतिकता रा भंवरजाळ, समाज में व्याप्त भिस्टवाडो, काळो धन अर राजनीतिक विसंगतियां आद। उपन्यास : लारला सौ बरसां में जठै पुरुष लेखकां रा डेढ सौ सू ई बत्ता उपन्यास छप्या बटै महिलावां रा मुस्कल सू दस-बारह उपन्यास ई साम्हीं आया। लेखिकावां बै ईज ही जिकी कहाणियां में पैलां ई नांव उजागर कर चुकी ही, जियां बसंती पंवार (सौगंध), सुखदा कच्छावा (मिट्टू), कमला कमलेश (राधा), जेबा रशीद (नेह रो नातो), मनीषा आर्य सोनी (आठवीं कुण), रितु प्रिया रा खुद दो उपन्यास, संतोष चौधरी (रात पछै परभात) अर रेणुका व्यास 'नीलम' (धिंगाणै धणियाप) आद। इणसूं म्हारै मन में आयो कै म्हंनै कोई राजस्थानी में टणको उपन्यास लिखणो चाईजै अर बो उपन्यास है—'मून रा चितराम'।

*** राजस्थानी लेखन में लेखिकावां रो काई दखल मानो ?**

—आज री राजस्थानी लेखिकावां सगळी रचनात्मक विधावां में कलम चलाय रैयी है, जियां कविता, कहाणी, लघुकथा, उपन्यास, व्यंग्य, सबद चितराम, संस्मरण, डायरी, निबंध, समीक्षा अर जात्रा वृत्तांत आद। राष्ट्रभाषा हिंदी प्रचार समिति श्रीदूंगरगढ महिला लेखिकावां माथै जिको विशेषांक निकाळ रैयी है उणमें 100 सू बेसी लेखिकावां है—कारण प्रकाशन री पैलां सू ज्यादा सुविधावां, दूसरी अकादमियां अर दूजी संस्थावां कानी सू पोथ्यां रो प्रकाशन, प्रोत्साहन, पुरस्कार, सोशल मीडिया में देशभर में प्रचार री सुविधावां आद।

*** आमतौर पर औ ओळमो दियो जावै कै घणकरी महिला लेखन पर भासा, शिल्प, विसै रै स्तर माथै लेखिकावां ट्रीटमेंट में नवाचार में चुनौती सू बचै। इण प्रसंग में आप खुद रै लेखन नै कियां देखो ?**

—आपरौ औ कैवणो सही है कै घणकरी लेखिकावां भासा, कथ्य, शिल्प, नवाचार री चुनौतियां सू बचती रैयी है, कारण बांरो रचना संसार अभिधा रो है, विवरण देवण रो है, जियां-तियां पुराणै ढंगढाळै री पोथ्यां निकाळण रो है। इसी लेखिकावां भीड़ तो बधाय सकै, पण गुणात्मकता रै स्तर माथै ओछी पड़ जावै। बै दूजी भासावां रै साहित्य नै नीं तो पढै अर नीं उणां री विशेषतावां सू रूबरू हुवै। इसी लेखिकावां लेखन नै कोरो कामचलाऊ धंधो मानै। लेखिकावां नै खुद रै लेखन माथै नूवै सिरै सू सोचणो पडैला। नूवी चुनौतियां सारू कथ्य रो सांतरो चयन, इचरज करणै सारू विसय सामग्री रो निरवाह, नूवी शैलियां, प्रतीकां, बिंबां रो प्रयोग, आपरै लेखन री झीणी पड़ताळ, उपमावां री निरवाळी छटा, जुगबोध सू जुड़योड़ी व्यंजनावां, लोकजीवन रा दरसाव, ओपती रंजक भासा, कसावट, व्यंजना माथै जोर आद। जठै ताई म्हारै लेखन रो सवाल है, म्हें आं सगळी बातां माथै पूरो ध्यान दियो है। म्हारी रचनावां विचार-प्रधान है। म्हें लिखण री भूख रै चालतै कोनी लिखूं। आज रै जुगबोध री सच्चाई नै बखाणूं, दूजी भासावां रै साहित्य नै पढण री चेस्टा राखूं। बांरी तुलना में म्हारै लेखन री तपास राखूं अर आज रै समय रा सवालां सू भचभेड़ा करूं, बदळाव नै अंगेजूं। म्हारी रचनावां नै देख-पढ र आप खुद निरणै कर सको कै म्हारो औ कथन कित्ती हद ताई सही है।

* 21वीं सदी में राजस्थानी साहित्य की लेखिकावां की गिणत बधी है। खासकर कहाणी अर उपन्यास रै पेटै। आप इण विसय में कांई सोचो ?

—इण सवाल रौ उथळो पैलड़ा सवालानां मांय आय चुक्यो है। गिणत बधण रा कारण भी उण उत्तर है। हां, म्हारी सोच है कै कोरी भीड़ बधावण सू आज रै जुग री चुनौतियां रो सामनो नीं करयो जाय सकै, गुणात्मकता जरूरी है।

* आज राजस्थानी में महिला लेखन की कांई स्थिति है, इणरी चुनौतियां कांई ?

—राजस्थानी में संख्यात्मक रूप सू घणकरो काम हुयो है पण गुणात्मकता री ओजू दरकार है। इण सारू खेचळ करणी पडैला। कविता, कहाणियां आद तो घणी ई लिखीजी है, उपन्यास साव कमती लिखीज्या है। जिण विधावां माथै घणकरो जोर दियो जावणो चाईजै, बै है—डायरी विधा, साक्षात्कार, संवाद, आलोचना, रिपोर्टाज, अनुवाद, आछा आधुनिक नाटक, शोध अर आंकलन अर अैड़ा ईज कीं दूजा विसय। औ चुनौतीपरक काम है। घर-गिरस्थी रा जंजाळ, पग-पग माथै रुकावटां, आर्थिक रूप सू दूजां माथै निरभरता, खुद रै बूतै प्रकाशन करण री असमरथता, साहित्य में फैल्योडै छळ-कपट, महिलावां नैं आगै बधण सू रोकै। सागै ई उणां में वैग्यानिक सोच रो अभाव है, खुली बात नैं कैवण री झिझक है अर देस भर रै आछै साहित्य नैं पढण रो अभाव है।

* महिला लेखन माथै पत्र-पत्रिकावां, न्यारा अंक, विसेसांक केंद्रित करती आयी है। इण तरै रा प्रयासां री जरूरत क्यूं पडै? अर इणरो कोई लाभी भी हुवै कै नीं ?

—पत्र-पत्रिकावां रा सामान्य अंकां में महिला लेखन नैं कम ठौड़ मिलै। ज्यादातर ठौड़ पुरुष लेखकां रै सीगै में ई जाया करै। महिलावां नैं ज्यादातर भागीदारी मिलै, इण सारू पत्रिकावां विसेसांक निकाळै। औ स्वागत करणै लायक काम है। पण इणमें भी सावधानी जरूरी है। विसेसांक जे सामान्य रूप सू महिलावां माथै केंद्रित हुवै यानी उणमें सब तरै री रचनावां छपै तो ज्यादातर कविता, कहाणी अर लघुकथावां आद ई छाय जावेला, जरूरत उपेक्षित विधावां नैं ठौड़ देवण री है।

* भासा, शिल्प, बिंब रै स्तर माथै राजस्थानी लेखिकावां सारू कोई खास संदेस ?

—संदेस देवण री मसीहाई मुद्रा म्हारै कनै कोनी। लगोलग पचास बरसां सू बेसी सिरजणा करणै रै बावजूद म्हनैं लखावै कै म्हारै मांय अजै अधूरोपण है, हर हमेस पूरणता री तलास करूं। इण सारू युवा लेखिकावां नैं सलाह है कै बै आपरै खुद रै लेखन सू आतममुगध नीं हुवै। हरेक क्षेत्र में नवाचार करै यानी भासा रो नूवो रचाव, ताजा उपमावां, तुलनावां अर मौलिक कल्पनावां माथै जोर देवै। नूवै सू नूवा बिंब अर प्रतीक रचै अर रूडी कल्पना रै सागै मौलिक सिरजण करै। खुद नैं जल्दी संतुष्ट मान 'र सिरजण री साख नैं नई बिगाडै। इण हिंदी कहावत नैं पढ 'र सीख लेवण री चेस्टा करणी चाईजै—रात के राही थक मत जाना, सुबह की मंजिल दूर नहीं है। राजस्थान रा आछा लेखकां-लेखिकावां रै साहित्य रै सागै देस भर री दूजी भासावां रा ताजा-तरीन साहित्य नैं पढै, नूवा कथानक अर चुनौतीपूर्ण घटनावां चुणै, पाठकां माथै पूरो पतियारो राखै अर सवाल उठावण री खिमता राखै। नूवै सिरजण नैं अपणावै अर अभिधा री जग्यां व्यंजना माथै जोर देवै। सगळी उदीयमान अर ऊरमावान लेखिकावां नैं सुभकामनावां।



राजस्थली रै 45 बरस री अणथक यात्रा रै मौकै
महिला लेखन अंक सारु हियैतणी बधाई



अमलगामाट्रेड कॉरपोरेशन

30/31, कलाकार स्ट्रीट, कोलकता - 7

Branch

महावीर स्थान, सिलीगुड़ी, दार्जीलिंग
(पश्चिम बंगाल)

सिद्धार्थ प्लाजा

(पारख कटला), श्रीडूंगरगढ़ (राजस्थान)

रेखा सर्विस सेन्टर

(के.एस.के.)

कालू रोड, गुसाईंसर बड़ा, तहसील- श्रीडूंगरगढ़ (राजस्थान)



शुभेच्छु

विजय सिंह पारख

मो. : 9413074666

माँ थारी छीया घणी ही, ना चाईजै आकास
थारी छिब रै साम्ही मगसो, सूरज रो आभास ।



जन्म :
12.12.1938



निर्वाण :
3.2.2021

श्रीमती कलावती आर्य

एम. ए. हिंदी, बी. एड.

(सेवानिवृत्त उप जिला शिक्षा अधिकारी)
धर्मपत्नी स्व. श्री मनोहर लाल आर्य

भूतपूर्व गाईड कैप्टन, समाज री पैली शिक्षा अधिकारी अर अखिल भारतीय श्री ब्राह्मण स्वर्णकार महासभा रै महिला प्रकोष्ठ री पैलड़ी अध्यक्ष। सामाजिक सरोकारां मे योगदान। चावा वक्ता। लोक संस्कृति अर लोकगीतों री लुंठी साधिका।

माँ रै भणन री हटौटी वाने लूगाई जूण सूं अलायदी एक व्यक्तित्व रै रूप मांय समाज में थरपायो। जद घर-द्वार सूं बारै रो संसार एक भोळी-ढाळी लुगाई खातर एक इचरज हूवतो हो, उण बगत समाज रै सागी काण कायदै सागै आपरो शिक्षा रै वास्तै घर सूं व्हीर हूवणो आज री पीढी रो मारग सौरो करण री पैलड़ी खेचळ गिणी जा सकै। जिती तरै री अबखायां पढी-सुणी-समझी, वां सगळी बातां नै घूँघट री ओट सूं कड्खै मेलती आपरी शिक्षा-यात्रा लगोलग आगीनै बधती रैयी अर समाज री बावनी सोच रा भोथरा भाटा रेत मांय रळता रैया।

घूँघट नै परचम बणावण री कैबत नै आप सांगोपांग जूण मांय उतारता रैया अर एक पूरै-सूरै पढ्यै-लिख्यै कड्खै री धगियाणी बण'र जगत सूं व्हीर हुया। आपरी लगन अर निष्काम हूस नै लखदाद अर हीयै सूं सिलाम।

संस्कारां री अंवेर

पुत्री-दामाद : मनीषा आर्य सोनी-मधुसूदन सोनी (अधिकारी SBI)
मनस्विनी, मानस दोहिती-दोहिता अर सगळो आर्य परिवार।

महावीर माली, राष्ट्रभाषा हिन्दी प्रचार समिति, श्रीङ्गरगढ़ (राज.)

खातर महर्षि प्रिण्टर्स, श्रीङ्गरगढ़ में छपी

राजस्थली लेन-देन सारु:

खाता नांव : RAJASTHALI
बैंक : बैंक ऑफ इंडिया, श्रीङ्गरगढ़
खाता सं. : 746210110001995
IFSC : BKID 0007462

Website : <http://rbhpsdungargarh.com>